

Bien. B. IX. 14

Ex Bibliotheca

Ord. Eremitar. Samabulensium.

Insule Regalis Vigrensis.



*[Faint, illegible handwritten text, possibly bleed-through from the reverse side of the page.]*



THE  
Faint handwritten text, possibly a title or header, including the word "THE" in large letters.

Faint handwritten text, possibly a signature or name.

Faint handwritten text, possibly a date or a short paragraph.





THEOLOGIA  
UNIVERSA  
Speculativa, Moralis,  
Polemica.

SPECULATIVA  
De Deo, Angelis, Incarnatione, &c.  
MORALIS

Cum Corollariis Casuum Conscien-  
tiæ, & Directorio Confessarii;

POLEMICA  
Exhibens Doctrinam Acatholicam,  
Doctrinam Catholicam, Objectiones  
Acatholicas.

*Que Quarta Editione auctior,*  
Auctore

R. P. ANGELINO BRINCKMANN,  
Ord. S. Francisci FF. Minor. Lectore Jubilato,  
Provinciæ Thuringiæ S. Elisabethæ Ministro  
Provinciali.

*Accessit MONITORIUM ad Sacerdotem  
Sacris fungentem Ministeriis.*

---

WETZLARIE,  
Typis NICOLAI LUDOVICI WINCKLERI.  
Anno MDCCCL.



DD. Eremitar. Camatoulensium  
Insule Regalis Vigrensis.

Bien. B. ix. 14

REVERENDISSIMO  
ET CELSISSIMO

PRINCIPI  
AC DOMINO,  
DOMINO

ADOLPHO,


INCLYTÆ ET IMMEDIATÆ  
ECCLESIAE FULDENSIS

ABBATI,  
SACRI ROM. IMPERII  
PRINCIPI,

DIVÆ AUGUSTÆ  
ARCHI-CANCELLARIO,  
PER GERMANIAM ET  
GALLIAM

PRIMATI,  
PRINCIPI AC DOMINO,  
DOMINO NOSTRO CLEMENTISSIMO.

*Dicata, Consecrata.*



*Reverendissime & Celsissime*  
**S. R. I. PRINCEPS,**  
*ac Domine, Domine Clemen-*  
*tissime, &c. &c.*



Rovincia nostra Thurin-  
giæ S. Elisabethæ Ordini  
S. Francisci quantum  
Inclytæ debeat Dicecesi  
Fuldensi, quantum glor.  
mem. Antecessoribus S. R. I. Princi-  
pibus, Imperialis, atque immediatæ  
Ecclesiæ Fuldensis Abbatibus, eloqui  
debent, nec satis possunt quatuor in  
hac Dicecesi Ordinis Seraphici Con-  
ventus: Fuldæ in Monte ad B. V. Dei-  
param, Hammelburgi in Monte Pa-  
lao-



## D E D I C A T I O.

laeopolitano ad Ss. 14. Auxiliares, Brückenavii in Monte Sinai ad S. Crucem, Salismonasterii ad S. Bonifacium; optima Provinciæ nostræ portio, & maximâ, quâ ipsius, etsi ad tres sese extendat Archi-Diœceses, & ad quinque Diœceses, in nulla major. quantum eadem Provincia, *Reverendissime Princeps, Tuæ* debeat *Celsitudini*, nec non *Reverendissimo*, atque *Perillustri Ecclesiæ Fuldensis Capitulo*, eloqui debet, & in feros, quibus steterit, loquetur annus Conventus noster Dermbaci in hac ipsa Diœcesi quintus, indêque quinque Christi vulneribus facer, adhuc in cunis Benjamin, *Reverendissimam Celsitudinem Tuam* cum *Perillustri Capitulo Patrem*, qui fundator audit, agnoscens, venerânsque.

Tanto, *Reverendissime & Celsissime Princeps*, existente Provinciæ

## DEDICATIO.

nostræ debito, quonam illud exsolvet? non auro & argento, quod Franciscanis non est; Sed functionibus spiritualibus, quæ auro gemmisque præstant. Proinde non nostra, nihil habentes, sed nosmetipsos, nihil meliùs possidentes, *Reverendissimæ Celsitudini Tuæ*, Patriæque, qui in Patria Patriæ servituri, in Ara ad orandum, in Choro ad psallendum, in Confessionali ad absolvendum, in Cathedra ad prædicandum, apud infirmos ad assistendum offerimus, dicamus, consecramus.

Ut verò hujus obligationis nostræ habeatur monumentum, & internæ affectionis specimen externum; *Universa hæc Theologia* in Monte Mariano, qui Benedictinus sub Inclytæ Dicecesis Dominio existens à Sæculo septimo, nata, adeoque Domino fundi debita properat  
ad

## DEDICATIO.

---

ad Aulam Fuldensem. *Speculativa*  
de Deo, Angelis & Incarnatione;  
*Moralis* de Moribus, *Polemica* de  
Fide. Hæc Fidem docet, quam Apo-  
stoli prædicaverunt; Martyres san-  
guine suo decoraverunt; Doctores  
Ecclesiæ verbo, & calamo propug-  
naverunt. Fidem docet, cujus si  
spectemus antiquitatem; post Apo-  
stolos non scit initium: si utilita-  
tem; est sperandarum substantia re-  
rum: si necessitatem; qui non cre-  
diderit, condemnabitur. *Marci 16.*  
Fidem illam antiquam, adeo utilem,  
& planè necessariam Buchonia, In-  
clyta nempe Dicecesis Tua, sine vio-  
latione tenuit à tempore, quo post  
S. Bonifacium est Benedictina, indé-  
que benedicta. Tenuit eam, & te-  
net *Perillustreis Familia Tua*, Fide  
Christiana non junior. Tenes eam,  
*Reverendissime & Celsissime Princeps,*  
) ( 4 sed



## DEDICATIO.

sed qualiter? Theologiam dedico Polemicam, simul & Moralem, in signum, fidei jungenda esse opera, operibus fidem. Fides sine operibus, opera sine fide sunt mortua. Fides, necesse est, sit fortis, sit viva, sit charitate formata. Fidem vivam, fidem nempe & opera semper tenuit *Perillustris Familia de DALBERG*: Insignia ejus intuens, *Lilia* video, & *Crucem*; Sed quid liliis cum cruce, cruci cum liliis? crucem scimus symbolum esse fidei, lilia castitatis; apertius loquor: *Crux* denotat fidem, *Lilia* castitatem, & in castitate alia opera bona. Dum igitur *Reverendissime & Celsissime Princeps*, *Crux* & *Lilia* figurant fidem, & opera, asserere audeo: sicut *Crux* & *Lilia Perillustri Familiae Tuae* sunt Insignia propria, atque nativa, sic eidem propria, atque nativa sunt fides ac opera.

## DEDICATIO.

opera. Unde nullus *de DALBERG*, qui fide sit famosus, operibus infamis; multi verò, quos crux & lilia, fides nempe & opera mundo fecerê celebres, cœlo gloriosos.

Taceo S. R. I. Archi - Cancellarios, Camerae Imperialis Præsides, Principum Cancellarios, Præsidentes, Vice - Dominos; &c. omitto Cathedralium Præpositos, Decanos, & universim quotquot sive in choro, sive in foro, mundo sunt, & fuerê spectabiles. *Crux & Lilia*, fides & opera ex *Celeberrima Familia de DALBERG* non paucos promoverunt ad Insulam, Pedum, & Pallium; ad Archi - Episcopatus, & Principatus: *JOANNEM* Ecclesiae Wormatiensi dederunt Episcopum, *WOLFFGANGUM* Sanctae Sedi Moguntinae Archi - Episcopum, *HERIBERTUM* Ecclesiae Coloniensi

## DEDICATIO.

pariter Archi-Episcopum, nec non utrique Ecclesiæ & Triumphanti, & militanti sanctum. Te verò *ADOLPHE*, *Cruce* & *Lilia*, fides & opera Inclytæ Ecclesiæ Fuldenfi die 8. Aprilis 1726. dederunt *Abbatem*, *S. R. I. Principem*. Fidem tuam, & opera, postquam Princeps, testantur Ecclesiæ, quas nullo non die frequentas; loquuntur Altaria, quibus crebro affis; magnificant Cathedræ, è quibus indispensabiliter audis verbum Dei.

Sunt in Te fides & opera, & quidem, ut Principem decet, exemplariter; Sunt in Te Tuo docente Symbolo, *Candore*, & *Amore*, nimirum fides, *Candore*, opera *Amore*. Benè, optimè: fides sine candore fallax, sine amore informis; opera sine candore fucata, sine amore ingrata; candore verò & amore probantur. Fides & opera in Te, *ADOLPHE*, sunt

*Can-*



## DEDICATIO.

*Candore & Amore*: candorem exprimunt *Lilia*, *Cruce* amorem; *Liliis* & *cruce*, candore & amore, fides Tua & opera subditis sunt ad exemplum, Tibi in terra ad meritum, in cœlo ad præmium. Fides & opera in Te, *Reverendissime & Celsissime Princeps*, sunt candore & amore. Quo candore? quem sonat echo: ore, re; quo amore: quem sonat vocabulum Amore: demptâ semper literâ: more, ore, re. Sic vive diu, diu fides & opera sint Tibi *candore*, *amore*; diu prosperè procede, & regna *candore*, *ore, re*; *amore*, *more, ore, re*. Nos verò servi Tui sumus fideles, & devoti: fideles *candore*, qui probatur *ore, re*; devoti *amore*, qui noscitur *more, ore, re*, hoc est corde, verbo, opere. A servo devoto & fidelis, *Reverendissime & Celsissime Princeps*, venit *Theologia hæc universa*:  
venit

## DEDICATIO.

venit *Speculativa* ad Antistitem nostrum, acceptura approbationem; venit *Moralis* ad Inclytæ Ecclesiæ Fuldenfis Abbatem, sub pedo, & mitra ovibus Christi dispendenda, ut vitam habeant, & abundantius habeant; venit *Polemica* ad S. R. I. Principem, tolerante Imperio fidei impugnatores, habitura propugnatorem, prævalitura etiam contra portas inferi; venit doctrina fidei & morum ad *Crucem*, & *Lilia DALBERGICA*, in liliis candorem, quo tenenda fides, in cruce amorem, quo facienda opera, figuratura Orthodoxis. Venit Theologia universa ad Dominum nostrum Clementissimum: ut sit in gratitudinis argumentum, atque Montis Mariani pensivunculam. Sic venientem, *Reverendissime & Celsissime Princeps*, *Candore & Amore* admittere digneris; admif-

## DEDICATIO.

admissa serviet Deo, Tibi & Patriæ;  
etenim quidquid participat Divinitatis,  
ad Dei gloriam; quidquid æstimationis,  
ad magnam *Celsitudinis* *Tuæ* æstimationem;  
quidquid doctrinæ Catholicæ,  
ad animarum in hac Dicecesi instructionem  
cedere, sicut nobis est propositi,  
ita & curæ erit; atque ita post  
Theologiam abstractivam, quæ  
Viatorum in terra, sequetur  
intuitiva, quæ comprehensorum  
in cælo.

*Ita optant, & orant*

*Reverendissimæ & Clementissimæ*  
**CELSITUDINIS VESTRÆ**

*Humillimi, & devotissimi Servi*

F. Angelinus Brinckmann,  
Provincialis,

Et Provincia Thuringiæ S. Elisabethæ  
Ordinis S. Francisci Fratrum Minorum  
Recollector.

CEN.



# CENSURA ORDINARI I.

**C**Um *Theologia universa* à R. P. Angelino Brinckmann, Ordinis S. Francisci Lectore Jubilato, ac Provinciæ Thuringiæ S. Elisabethæ Ministro Provinciali composita, atque à Theologis ejusdem Ordinis revisa, eorum judicio nihil contra fidem, aut bonos mores contineat, apposita habens Corollaria Casuum Conscientiæ; hinc eam Confessariis utilem, & typis dignam censeo. Fuldæ die 15. Januarii Anno 1732.

*Adalbertus L. B. à Walderdorff,*  
Imperialis & Immediatæ Ecclesiæ Fuldensis Capitularis, Reverendissimi ac Celsissimi Principis Consiliarius Intimus, in Spiritu-  
libus Vicarius Generalis, & Per-  
illustris Conventus ad S. Salva-  
torem Superior. Mppriâ.

FACUL-



# FACULTAS ORDINIS.


**F**acultatem facimus Admodum Reverendo in Christo Patri P. F. Angelino Brinckmann, Ordinis Fratrum Minorum Recollectorum Ss. Theologiae Lectori Jubilato, ac Provinciae nostrae Thuringiae S. Elisabethae Ministro Provinciali. librum à se compositum, cujus titulus est: *Theologia universalis &c.* à RR. Patribus Theologiae Lectoribus ad id specialiter deputatis examinatum & approbatum, publicis typis committendi, servatis aliàs de jure servandis. Datum in Conventu nostro ad Ss. Apostolos Petrum & Paulum intra Civitatem Namurcensem die 8. Septembris Anno 1731.

*F. Godefridus Stürze, totius  
Ordinis Seraphici Definitor,  
ac Nationis Germano - Belgicae  
Commissarius Generalis.  
Mppria.*

):(:(: GEN.

## CENSURA THEOLOGORUM.


**T***heologiam universam, Speculativam nimirum, Moralem & Polemicam, ab*  
Admodum Reverendo Patre Angelino Brückmann, Ss. Theologiæ Lectore Jubilato, ac Provinciæ nostræ Thuringiæ S. Elisabethæ Ordinis S. Francisci Fratrum Minorum Recollectorum Ministro Provinciali, succinctâ, clarâ & gratâ methodo concinnatam, quondam ab eo, quatenus speculativa est & moralis, publicis Disputationibus, Theologorum censuris, & prelo datam, nunc verò pluribus additionibus auctam, ac tertio edendam, unâ cum Directorio Confessarii, & Monitorio ad sacerdotem sacris fungentem Ministeriis, attentè à nobis subsignatis perlectam, Orthodoxæ fidei veritati, bonorumque morum integritati consonam, animarum Pastoribus, Confessariis, Sacerdotibus, ac Theologiæ Candidatis omnibus non mediocriter utilem reperimus, ideoque ut denuò ad plurimum utilitatem, in lucem  
pro-



prodeat, novo prelo dignissimam censemus.  
Datum Limburgi in Conventu nostro Sancti  
Sebastiani ad Lahnam die 16. Octobris An-  
no 1731.

*F. Ludovicus Eisenbach, Ss. Theo-  
logiæ Lector Emeritus, præfatæ  
Provinciæ Ex-Provincialis, &  
Custos actualis.*

*F. Reinhardus Rohner, Ss. Theo-  
logiæ Lector Emeritus, præfatæ  
Provinciæ Definitor actualis.*



## FACULTAS PRIVILEGII CÆSAREI.


**C**UM Privilegio Cæsareæ Majestatis cau-  
tum sit, ne quis per universum Impe-  
rium Libros à Patribus Ordinis S. Fran-  
cisci Seraphici editos aut edendos imprimat,  
aut alibi impressos intra Sacri Imperii fines  
adducat & distrahat, absque consensu & fa-  
cultate eorundem Patrum sub pœna Confis-  
cationis Librorum, & multâ Viginti Mar-  
carum Auri puri; hinc plenum illius Privi-  
legii Cæsarei usum concedo Domino Nicolao  
Ludo-





Ludovico Winckler, ut librum à me compositum, cui titulus: *Theologia universa, Speculativa, Moralis, Polemica, &c.* suis sumptibus imprimere, suisque emolumentis vendere & distrahere possit ac valeat. Dabam Fuldae in Conventu Montis Mariani die 15. Februarii 1733.

*F. Angelinus Brinckmann,  
Provincialis. Mppria.*



## LECTORI THEOLOGO.

**L** Egenda tibi sistitur *Theologia universa*, ut legas benè: Nota, Lit. P. significare peccatum, M. mortale, V. veniale. Quaestionibus & Corollaris apposita est vel authoritas, vel ratio, si non, facillè patebit recogitanti; legens eam recogita, sic Theologia haec erit specierum & resuscitativa, & conservativa, donec accidente lumine gloriae, videas facie ad faciem Eum, qui est Theologiae nostrae objectum, principium & finis.

TRA-



# TRACTATUS I.

## De Deo Uno & Trino.

### CAPUT PROOEMIALE.

De natura Theologiæ, principiis & objecto.

*Quid sit Theologia & quotuplex?*



THEOLOGIA, juxta Etymologiam nominis, est sermo de Deo; &, sermonem de Deo instructum sunt Theologi; quoad rem est rerum divinarum ex revelatis Sacra Doctrina. S.

Augustin. 14. Trin. c. 1. Discurret enim de Deo, rebusque divinis ex principiis supernaturalibus, scilicet Fidei. Theologia dividitur (1.) ratione methodi in Positivam & Scholasticam; hæc syllogisticè procedit, secus ista. (2.) Ratione subjecti in Theologiam Dei, Beatorum & Viatorum: Prima est comprehensiva, quâ Deus Se & omnia comprehendit; Secunda intuitiva, quâ Beati Deum vident facie ad faciem; Tertia abstractiva, quâ Viatores cognoscunt res divinas tantum ex re-

..A

vela-

velaris. (3.) Ratione materiæ in *Speculativam*, quæ de speculabilibus; in *Moralem*, quæ de practicis; & in *Polemicam*, quæ de articulis fidei controversis.

### *An sit Scientia & qualis?*

*Theologia non est scientia in rigore philosophico; quia Conclusiones ejus non sunt evitentes, utpote illata saltem ex una propositione revelata & eatenus obscura: Est tamen scientia in latiore acceptione, quatenus cognitio certa & infallibilis; imò scientiis naturalibus est certior; quia certius habet motivum assentiendi, idque Revelatio Dei. Est Ecclesiæ necessaria: quia instruit in fide & moribus. Est simpliciter practica; quia provocat ad Deum vel amandum vel colendum &c.*

### *Principia Theologiæ.*

Principia scientiæ sunt illa, ex quibus suas infert conclusiones. Theologiæ principia sunt veritates divinitus revelatæ, aut saltem una præmissa revelata sive mediatè sive immediatè, & altera naturaliter evidens; quia Conclusio ex illis deducta est Theologica. Hæc reduplicativè sumpta nec supernaturalis est (uti & habitus ejus) nec de fide Divina; quia intellectus non assentitur illi immediatè propter revelationem, sed propter connexionem ejus cum præmissis.

### *Objectum Theologiæ.*

*Materiale sunt res omnes mediatè & virtualiter revelatæ; quia sunt subjectum conclusionis Theologiæ.*

*Forma-*

Forma  
ration  
adeo  
toris  
que  
restan  
conn  
diatè  
citas

D  
ei con  
nos  
quia  
sunt.

omni  
& d  
& in  
num  
Ego  
Deo



Formale quod seu terminativum est Deus sub omni ratione, sub qua à Theologia consideratur, adeoque sub ratione *Deitatis*, *Trinitatis*, *Iustificatoris* &c. ut patet. Formale quo seu motivum, idque remotum est Deus sub ratione *prima veritatis* in *restando*; proximum sunt principia Theologica, ut connexa cum conclusione; nam hæc immediate movent ad assensum conclusionis, veracitas Dei ad assensum præmissarum.

## CAPUT I.

### De Existentia Dei, Essentia & Attributis.

#### *An sit Deus?*

**D**Eum esse, est per se notum quoad se; quia *existentia est de essentia Deitatis*; adeoque de se ei convenit absque medio & ratione à priori. Quoad nos notum est per fidem & demonstrationem; quia *existentia Dei est revelata*, & ex his, quæ facta sunt, intellecta conspicitur.

#### *Quid sit Deus?*

Deus est *Ens à se*; à quo, per quem & in quo sunt omnia; unde prima ratio *Deitatis* constitutiva & distinctiva est *Aseitas*; quia hæc seu esse absolutum & independens est radix omnium divinarum perfectionum; & Moysi quærenti nomen Dei respondit: *Ego sum qui sum*. Unde S. Bern. *Nihil competentius Deo, quam hoc nomen: qui est.*

*Attributa Dei*

Sunt perfectiones, quæ non sunt de primo conceptu Dei, ab essentia instar proprietatum polulantes. Alia sunt *negativa*, ut infinitas, immutabilitas, immensitas &c. Alia sunt *affirmativa*, ut omnipotentia, sapientia, iustitia, &c. Hæc formaliter sumpta sunt in Deo; quia perfectiones; priora solum fundamentaliter: quia sunt *negationes*. Attributa positiva cum essentia & personalitatibus realiter (ut fides docet) identificantur, formaliter ex natura rei ab eis & inter se distinguuntur. Scotus 1. d. 2. *quest.* 7. quia contradictoriè convenit his ante intellectum, quod non convenit illis, & in conceptibus suis adæquatis sese non involvunt.

## CAPUT II.

## De Attributis in particulari.

**A**tributa Dei, quorum ratio nullatenus competit creaturis, sunt *infinitas, simplicitas, immutabilitas, ineffabilitas, invisibilitas, æternitas, immensitas, ubiquitas*. Unde Deus est infinitus, simplex, immutabilis, ineffabilis, invisibilis, æternus, immensus, ubique. Infinitus est; quia *magnitudinis ejus non est finis*. *Psal.* 144. Est ens omnino simplex absque compositione & componibilitate; quia *actus purus*. Est immutabilis; nam ipse ait *Malach.* 3. *Ego sum Deus & non mutor*. Est ineffabilis & incomprehensibilis; quia *infinitus*. Est invisibilis; quia *lucem inhabitat inaccessibilem*.

bilem. Est æternus; quia existit independenter ab alio sine principio & fine. Est immensus; quia nulla potest circumscribi termino. Est ubique per præsentiam, omnia cognoscenda; per potentiam, omnia operando; per essentiam, cœlum & terram implendo.

## CAPUT III.

## De Visione Dei.

*Quomodo Deus sit visibilis?*

**V**isibilis est non oculo corporeo; quia Spiritus: nec ab intellectu naturaliter; quia speculum voluntarium: sed ab eo per lumen gloriæ elevato sive in via, sive in patria; quia merces Sanctorum.

*Principia Visionis*

Sunt Deus, lumen gloriæ & intellectus; inde visio est beatifica, supernaturalis & vitalis. Species impressa Dei (quæ est qualitas virtualiter Deum representans, & concurrens ad visionem cum intellectu, quem determinat) est possibilis; quia nulla ipsius repugnantia: at superfluit; quia ad visionem immediate concurrat, ut objectum mori-  
vum, ipsa essentia.

*Objectum Visionis*

Præteritum est Deus, sicut est. 1. Joan. 3. Secundarium sunt creaturæ; Nam Beatus videt Verbum, & in Verbo facta per Verbum, inquit S. Bern. 5. de Conside-



*ratione c. 1.* De potentia absoluta videri potest essentia sine Personis, & una Persona sine altera; Filius sine Patre terminat unionem hypostaticam, cur non posset visionem? Inæqualitas visionum physicè est ab inæqualitate intellectuum; Ubi enim perfectior causa, perfectior est effectus: moraliter est ex inæqualitate meritorum; quia Deus reddet unicuique secundum opera ejus. Rom. 2.

## CAPUT IV.

### De Scientia Dei.

#### *Objectum intellectus divini*

**T**erminativum est omne intelligibile; non enim est ulla creatura invisibilis in conspectu Ejus. Hebr. 4. Motivum est essentia divina movens ad sui & aliorum cognitionem; quia infinitam habet vim representandi quidlibet, prout representabile; idque representans ut factibile, habet rationem ideæ. Creaturæ sunt objectum merè terminativum, etiam secundum esse proprium, quatenus in Deo representatum; quia, si essent motivum, ab eis dependeret divina scientia.

#### *Scientia Dei*

Est cognitio comprehensiva sui ad intra & extra; de objecto necessario est necessaria, de libero libera, operabilem est Practica, Scibilem Speculativa; libera terminativè potuit non esse in Deo. Quælibet scientia Dei vel est simplicis intelligentiæ vel visionis: Prima est merè possibilem, Secunda pro  
aliqua

aliqua temporis differentia existentium; & quidem possibilia cognoscit Deus in essentia sua, ut in medio prius cognitò; nam se ipsam noscens Divina Sapiencia, novit omnia, inquit D. Dion. de div. nom. c. 7. Futura contingentia, sive absolute sive conditionate, videt in decreto concomitante; quia sine Decreto non sunt futura, adeoque non cognoscibilia: & sicut concursus Dei in tempore est simultaneus, ita decretum ab æterno est concomitans, quatenus Deus creaturæ volens libertatem, coincidit in determinationem ab ea in tempore ponendam.

## CAPUT V.

## De Voluntate Dei.

*Objectum voluntatis divinæ.*

**D**atur in Deo voluntas. De Fide. Objectum ejus motivum est increata Dei bonitas; nam Proverb. 26. Omnia propter semetipsum operatus est Dominus. Terminativum sunt etiam creaturæ; quas si non vellet, Creator non esset. Peccatum nihil est, ait S. Augustin. idque factum sine ipso, puta, Deo. Deus amat se necessariò, tum quoad speciem, quatenus non potest se odisse; tum quoad exercitium, quatenus non potest se non amare; liberè tamen libertate essentiali, quatenus voluntariè sine coactione; quia bonus, nequit se odisse, neque non amare, quia immutabilis. Creaturas actuales amat amore benevolentia & liberè; quia benevolè & libere producit: possi-

biles amore simplicis complacentiæ & necessariò; quia possibiles, non potest velle non possibiles.

### *Libertas Dei.*

Est in Deo libertas: Omnia quacunque voluit, fecit. *Psal. 113.* Volitio Dei libera, sive sit contrarietatis, sive contradictionis, est unus simplicissimus actus divinæ voluntatis, isque necessarius in essendo, & liber solum in terminando; quia volitio est libera, si possit abesse ab objecto, seu terminari vel non terminari ad objectum, quamvis nequeat abesse à subiecto.

### *Prædestinatio.*

Deus omnibus providet creaturis. *Sap. 6.* Vult omnes homines salvos fieri. *1. Tim. 2.* Prædestinatio complete sumpta est volitio gratiæ ac gloriæ quibusdam conferendæ; incomplete sumpta est volitio vel solius gratiæ, vel solius gloriæ: Prior facta est sine meritis; nam si gratia, jam non ex operibus. *Rom. 11.* Posterior facta est post prævisa absolute merita; Deus vult omnes salvos fieri. *1. Tim. 2.* At cur non omnes salvantur? Quia non vult efficaciter. Cur non efficaciter? Quia non providit merita, sine quibus neminem salvat. Unde Ambros. inquit lib. 5. de Fide c. 3. Quorum merita præscivit, eorum præmia prædestinavit. Reprobatio, quæ est rejectio à gloria, facta est post prævisa absolute demerita; quia Justitia vindicativa supponit culpam absolute existentem.

## CAPUT VI.

## De Existentia &amp; Essentia Trinitatis.

*An plures Personæ Divinæ ?*

**T**rininitatem Personarum, & Naturæ Unitatem in Deo fides docet, ratio non convincit. In Deo quatuor sunt Relationes reales, scilicet Paternitas, Filiatio, Spiratio activa & Spiratio passiva: quia reale est earum fundamentum nempe Generatio & Processio. Per has Relationes constituuntur tres Personæ: Pater, Filius, & Spiritus Sanctus; Pater in esse personali per Paternitatem, Filius per Filiationem, Spiritus Sanctus per Spirationem passivam: quia (ut dixit Joannes Theol. in Concil. Florent. Sess. 18.) sola Relatio multiplicat Personas. Spiratio activa à Paternitate & Filiatione est realiter indistincta: quia iis non opponitur relative. Personæ inter se distinguuntur realiter: quia Pater generat Filium, non Se Ipsum, Spiritus Sanctus ex Patre Filioque procedit, non ex Se Ipso.

*Tres Personæ sunt Unus Deus.*

Ita habetur 1. Joan. 5. Hi tres unum sunt, nimirum quælibet trium Personarum est Deus, & tres sunt Unus Deus. De fide ex Deut. 6. Audi Israël, Deus, Deus noster, Deus tuus Unus est. Ratio est; quia unam habent naturam, sique non distinguuntur se totum.

A 5

Perso-



*Personalitates & Subsistentiæ.*

Personalitates sunt tres scil. *Paternitas, Filiatio, Spiratio passiva*; Formaliter sumptæ nec perfectæ sunt, nec imperfectæ: quis dicat imperfectas? si quis autem dicat perfectas, dicit unam Personam non habere perfectionem, quam habet altera. Tres sunt Subsistentiæ relativæ & una absoluta: per relativas nempe Personalitates Natura Divina existit incommunicabiliter alteri supposito; per absolutam eadem Natura præintellecta Personalitati existit per se & independentem ab omni alio, sed communicabiliter.

## CAPUT VII.

## De Divinis Processionibus.

*An in Deo Processiones?*

**P**rocessio in Divinis est Origo, quâ una Persona procedit ab altera. Duæ sunt in Deo Processiones ad intra, una Filii à Patre per intellectum, altera Spiritûs Sancti à Patre Filioque per voluntatem. *De Fide.* Ratio: quia duæ sunt in Deo potentia, *Intellectus & Voluntas*; & duæ Personæ scil. *Secunda & Tertia* productæ, primâ emanante à Natura. Intellectus in Patre est productivus notitiæ genitæ, hæc cum sit in Deo, est infinita & consubstantialis Genitori, ideoque subsistit per se & est Persona; similiter voluntas in Patre & Filio producit amorem, qui est Spiritus Sanctus, per se subsistens, & Persona.

*In quo consistat Processio ?*

Processio Filii consistit in dictione, non intellectione; Processio Spiritûs Sancti in spiratione, non volitione: quia intellectus producit in solo Patre, voluntas in Patre & Filio; ideoque hac Spiracione, quæ propria est Patri & Filio; iste dictione, quæ propria est soli Patri; intellectio & volitio respiciunt objectum cognitum & volitum, dictio & spiratio terminum productum. Processio Verbi est naturalis & propriè generatio: quia Filius procedit per intellectum Patris secundum, vivens à vivente in identitatem Naturæ. Processio Spiritûs Sancti non est generatio: quia fit per voluntatem, adeoque voluntaria est & libera libertate essentiali; est simul necessaria: quia non potest non esse. Spiritus Sanctus non est Filius, inquit Aug. l. 15. de Trinit. c. 14. quia exiit à Patre, non quomodo natus, sed quomodo datus.

*Principium Processionum.*

Principium quod Divinarum Processionum sunt Personæ producentes. De Fide. Ratio: quia principium realiter distinguitur à termino producto; hoc autem potest solū convenire personis. Principium quo remotum est Essentia Divina, proximum intellectus & voluntas: quia Verbum, quod est Filius, habet immediatè procedere ab intellectu; Amor, qui est Spiritus Sanctus, à voluntate, non à natura; ab hac tamen Filius & Spiritus Sanctus procedunt mediâtè: quia Filius est ex substantia Patris, & Spiritus Sanctus ex substantia Patris Filiique. Florent. Sess. 19.

Quam-

Quamvis intellectus Patris ante generationem cognoscat omnia, quæ sunt Patris, formaliter tamen fecundatur cognitione solius Essentiæ Divinæ, antequam generet Filium; Patris & Filii voluntas fecundatur amore ejusdem Essentiæ, antequam spiret Spiritum Sanctum.  
*Bovin: quia sola Essentia Divina est objectum motivum Divini intellectus & voluntatis.*

### *Terminus Processionum.*

Terminus totalis Divinarum Processionum est Persona producta. Ambros. de Divin. c. 7. *Formalis productus est Personalitas; formalis communicatus Essentia: quia Essentia communicatur, Personalitas producitur, & utraque complet Personam.*

## CAPUT VIII.

### De Divinis Personis in particulari.

*An & quot Notiones in Deo?*

**N**Otio est ratio Personam notificans & distinguens. Sunt quinque scil. Innaoscibilitas, Paternitas, Filiatio, Spiratio activa, & Spiratio passiva: quia per has cognoscimus unam Personam distinguere ab alia. Unde

Prima Persona vocatur 1. Pater respectu Filii: quia genuit ipsum de substantia sua. 2. Principium respectu Spiritus Sancti: quia hic procedit ab ipso tanquam principio, non ut causâ. 3. Innaoscibilis: quia est principium sine prin-

principio, & fons totius Divinitatis; ut dicit Aug. 4. de Trinit. c. 2.

Secunda Persona vocatur 1. *Filius* respectu Patris: quia procedit naturaliter in similitudinem naturæ intellectualis. 2. *Verbum*: quia est terminus productus locutione. 3. *Imago Patris*: quia ejus est similitudo vi suæ processionalis.

Tertia Persona vocatur 1. *Spiritus Sanctus*: quia procedit per voluntatem amore Essentiæ Divinæ fecundatam, quod est spirari. 2. *Amor*: quia est terminus productus dilectione. 3. *Donum*: quia procedit liberè, quomodo datus. Spiritus Sanctus ex Patre Filioque procedit ut uno principio: quia unam habent virtutem spirativam. Si tamen per impossibile procederet à solo Patre, esset idem Spiritus: quia terminus esset ejusdem virtutis spirativa; distinguereturque realiter à Filio: quia existeret procedendo, Filius nascendo, quod ad diversitatem sufficit, ut habet S. Ansel. in Epist. contra Gracos c. 4.

### Quid Circuminfessio?

Circuminfessio est mutua Personarum in se invicem inexistencia, fundata in identitate Naturæ, juxta illud Joan. 14. Ego in Patre & Pater in me est.

### Quid Missio?

Missio in Divinis est processio originalis Personæ Divinæ à Persona mittente ad creaturam, in qua incipit esse novo modo per effectum visibilem, vel invisibilem. Ex communi.

Missio



Missio alia est *activa*, alia *passiva*: *activa* convenit Personis producentibus, *passiva* productis. Missio præter processionem à mittente dicit effectum aliquem temporalem Personæ missæ specialiter convenientem: Sic Filius missus est à Patre in mundum; quia à Patre procedit, & illi convenit opus redemptionis humanae.



## TRACTATUS II.

### De Angelis.

#### CAPUT I.

#### De Natura Angelorum.

*An dentur Angeli, quid sint?*

**A**ngelus est substantia spiritualis, completa & finita. *Ex communi.* Angeli existunt. *De fide.* Sunt incorporei & incorruptibiles: quia *Spiritus*, ad *Heb. 1.* Sunt tamen annihilabiles: quia *Creatura*.

#### *Angelorum Hierarchia & Chori.*

Tres sunt juxta D. Dionys. Angelorum Hierarchiæ, & in qualibet tres Ordines seu Chori, adeoque universim novem. Est autem Hierarchia Angelica Coetus variorum Angelorum, qui potestate & functione cum quadam subordinatione præditi inter se unum corpus efficiunt.

Cho-

Chorus verò seu Ordo est Coetus Angelorum alicujus Hierarchiæ, in eadem speciale munus habentium. *Ex communi.* In suprema Hierarchia sunt Seraphini, Cherubini & Throni; in media Dominationes, Virtutes & Potestates; in infima Principatus, Archangeli & Angeli.

*Angelorum distinctio & creatio.*

Omnes Angeli solo differunt numero, sicut homines: quia juxta Aug. l. 3. de liber. arbit. c. 11. officio sunt impares, naturâ pares. Sex diebus fecit Deus cœlum & terram, & omnia, quæ in eis sunt. *Exod. 20.* adeoque & Angelos, non in cœlo empyreo, quia *Lucifer in hoc voluit condescendere, Isa. 14.* Sed in sidereo, quia de cœlo cecidit in fulgur. *Luc. 10.*

*CAPUT II.*

*De Angelorum intellectu & voluntate.*

*Quomodo cognoscant Angeli?*

**I**ntellectus Angelicus de se est indifferens ad cognitionem abstractivam & intuitivam. Abstractiva est cognitio rerum absentium, intuitiva presentium: ad hanc determinatur per objectum, ad illam per objecti species.

*Unde sint Species Angelicæ?*

Aliquæ rerum species fuerunt Angelis in principio creationis à Deo infusæ: ut docet Aug.

Aug. l. 4. de Gen. c. 22. Creaturæ prius sunt factæ in mentibus Angelicis, quam in se ipsis. At quomodo? per species; ut statim cognoscerent Creaturas & Creatorem. Aliæ species ab ipsis Angelis successivè sunt acquisitæ: quia postea res plures cognoverunt, cognoscendo species acquisiverunt.

### *Quid cognoscant Angeli?*

Angeli per se cognoscere possunt quæcunque entia supernaturalia creata, item secreta cordium: ista enim proportionem habent naturalem inesse cognoscibilis cum intellectu naturaliter operante. De facto tamen ea non cognoscunt: quia solus Deus novit cor filiorum hominum. 3. Reg. 8. neque certò cognoscunt futura contingentia à libero arbitrio dependentia: quia nullum datur ad ea cognoscenda determinativum.

### *Quomodo loquantur & illuminent?*

Angeli loquuntur producendo in intellectu audientis cognitionem de objecto habitam, aut ejusdem imprimendo speciem, D. Bonav. Becan. Superiores illuminant inferiores, veritates sibi specialiter revelatas manifestando. S. Dionys. de Celest. Hier. c. 7.

### *Quomodo velint?*

Voluntas Angelica naturâ suâ est mutabilis: quia libera; unde dicit S. Damascen. l. 2. c. 3. Quod Angeli ad malum inflecti nequeant, non ipsorum naturæ est, sed Dei gratiæ.

CA.

## CAPUT III.

## De Angelorum loco, motu &amp; operatione.

*Quomodo Angeli sint in loco?*

**A**ngelus est in loco definitivè, scil. totus in toto & totus in qualibet parte, quemadmodum anima rationalis in corpore. Formaliter est in loco per ubi modale; quod indivisibile est ex parte subiecti scil. Angeli, divisibile ex parte spatii, cuius singulis partibus totam substantiam Angeli intimè sistit, ut unio animæ corpori. Naturaliter non possunt esse extra locum suum adæquatum, nec in pluribus inadæquatis discontinuis: aliàs velut à se dividerentur. Possunt tamen esse in loco minimo: quia sunt indivisibiles; & plures simul in eodem: quia carent quantitate.

*Quomodo se moveant?*

Angeli habent facultatem motricem, quâ & se & res creatas movere possunt: *Angelus enim Domini descendit de caelo & revolvit lapidem. Matth. 28.* Motus eorum esse potest um continuus movendo se ad locum successivè; tum instantaneus, movendo se ad locum contiguum in instanti; non tamen se movere possunt in locum distantem sinè transitu per medium, aliàs naturaliter in momento possent de caelo transire ad terram.

B

Ad



*Ad quid mittantur ?*

Angeli mittuntur ad ministeria hominum, quandoque visibiliter in corporibus assumptis, sic missus fuit Angelus Raphaël. *Tob. 5.* Plerumque invisibiliter, sic mittuntur ad custodiam hominum. *De Fide.* Et singuli ad custodiam singulorum. *De mente P. P.*

*Quomodo assumant corpora ?*

Angeli quandoque assumunt corpora, ut patet supra de Archangelo Raphaële. Ad corporis assumptionem requiritur, ut Angelus existat in corpore (sive verum sit, sive ex aëre & vaporibus efformatum) sicut motor in mobili, eoque utatur ad sui representationem. Becanus. In corporibus assumptis possunt ambulare, comedere, loqui, non verò exercere operationes intrinsecè vitales, hæ enim petunt procedere à principio vitæ intrinseco.

## CAPUT IV.

De Gratia, Gloria, & pœna Angelorum.

*Unde Angelorum gratia ?*

**O**Mnes Angeli sunt creati in gratia sanctificante, eâ enim indigebant ad meritorie operandum, gratiam istam acceperunt ex meritis Christi prævis, & quidem inæqualem secundum inæqualitatem perfectionis naturalis. *D. Thom. artic. 6.* Quia Christus est caput hominum & Angelorum.

*Pecca-*

*Peccatum Luciferi.*

Durante Angelorum viâ aliqui eliquerunt actus meritorios, alii demeritorios, primus peccator fuit Lucifer, ut colligitur ex *Apoc. 12.* Et primum ejus peccatum formaliter fuit Philautia, seu inordinatus amor erga se ipsum, ut colligitur ex S. Augustin. 14. de civit. cap. ult. dicente: *Duo amores fecerunt duas civitates, unam Dei, alteram Diaboli; civitatem Dei amor Dei, civitatem Diaboli amor sui usque ad contemptum Dei.* Inde orta est formalis superbia, & appetentia saltem inefficax æqualitatis cum Deo, u. dixerit *Isa. 14. Similis ero Altissimo.*

*Angelorum gloria & poena.*

Ante lapsum Adæ Angeli boni acceperunt gloriam, mali poenam: poena est tum damni, quatenus privati sunt visione Dei; tum ignis, quatenus huic perpetuò sunt alligati. D. Thom. Scot. & utriusque Schola &c.

*Dæmonum obstinatio.*

Dæmones sunt obstinati ex inflexibilitate arbitrii tantum morali, non physicâ; unde dicit Damascen. l. 3. *Sicut nec sunt, nec erunt susceptibiles penitentia, ita nec venia.* Dominus tamen implebit ruinas Angelorum per homines, & quidem sedem superbi Luciferi per humilem Franciscum Seraphicum; ita S. Bonav. c. 6. & 7. *vita S. Francisci.*

## TRACTATUS III.

De Creatione Rerum visibili-  
lium, earumque fine.

## CAPUT I.

De Operibus sex dierum.

**Q**ui vivit in æternum, creavit omnia simul. *Eccles. 18.* puta simultate rerum, non temporis: quia sex diebus fecit Dominus cælum & terram, & mare & omnia, quæ in eis sunt. *Exod. 20.*

Primâ die, quæ probabiliter fuit Dominica, creavit cœlos, & in siderco Angelos; terram & super eam aquas & denique lucem. Lux illa non fuit lux solis, sed juxta S. Bonav. alia, quæ in nube tenui tanquam subiecto movebatur de Hemisphærio in Hemisphærium, factumque est vespere, intellige tempus noctis, & manè, intellige diem artificialem ab ortu lucis usque ad occasum, dies unus, nempe naturalis 24. horarum. Dies iste exordium habuit à nocte, luce factâ post 12. horas à creatione mundi: Moyses enim *Genes. 1.* dies creationis enumerat incipiendo à vespere, unde Hebræi dies supputabant ab occasu solis.

Secundâ die factum est Firmamentum, dividens aquas ab aquis, idque est cœlum æreum: hoc enim dividit aquas, continens supra se aquas

aquas nubium, infra se aquas terræ; & aër vocatur coelum, *Psal. 8. volucres cæli.*

Tertiâ die congregatæ sunt aquæ, quæ appellata maria; & producta vegetabilia seu plantæ:

Quartâ die facta sunt astra seu stellæ: Primò, ut luceant super terram. Secundò, ut sint in signa tum auræ, tum temporum.

Quintâ die producta sunt animalia aquatilia & volatilia.

Sextâ die producta sunt animalia terrestria, & ultimò homo, cujus pedibus subjecit Deus omnia sublunaria. *Psal. 8.*

Septimâ die quievit Deus ab omni opere suo, puta, in specie, non in individuo, ut exponit S. Augustin. *l. 4. de Gen. ad lit.*

## *CAPUT II.*

### *De primo homine.*

**P**rimus homo, qui fuit Adam, formatus est à Deo secundum corpus (anima enim quælibet creatur ex nihilo) de limo terræ. Eva, quæ mater viventium, de costa Adæ dormientis. *Genes. 2.* Iste extra, hæc in Paradiso; uterque sextâ die Creationis. D. Ambros. *de Paradiso c. 4.*

### *Scientia Adami.*

Adamo data est à Deo scientia rerum naturalium; item per revelationem cognitio supernaturalium, etiam Incarnationis, & Ss. Trinitatis: quia in naturalibus erat perfectus, & ad finem supernaturalem creatus.



*Status Innocentiæ.*

Adamus in Statu Innocentiæ pro se & suis posteris habuit gratiam sanctificantem & Justitiam originalem: colligitur ex illo ad *Ephes. 4. Induite novum hominem, qui secundum Deum creatus est in iustitia & sanctitate.* Hoc statu perseverante Adam & posterius habuissent immortalitatem: quia per peccatum mors. *Rom. 5.* Et quidem tum per extrinsecam custodiam à Deo, tum per fructum de ligno vitæ, de quo *Genes. 3.* Potuisset tamen creari in puris naturalibus: quia non est, unde implicet status pura natura.

*Lapsus Adami.*

Adam primus parens peccavit 1. Inordinatè amando uxorem, nolens eam offendere præbentem fructum vetitum. 2. Contra obedientiam, comedendo de ligno vetito scientiæ boni & mali. 3. Contra charitatem, in genus humanum tanquam caput ejus originando peccatum & pœnam. Peccatum Adæ secuta est pœna scilicet privatio gratiæ sanctificantis, subtractio Justitiæ originalis irrecoverabilis, debitum mortis corporalis, ejectio de Paradiso, damnatio æterna seclusâ pœnitentiâ, variæ pœnalitates, peccatum originale in posteris cum effectibus præfatis. Ita communis ex Script. & P. P.

## CAPUT III.

De ultimo fine hominis.

*Quis rerum omnium finis?*

**R**erum omnium creaturarum finis ultimus est

est Deus ipse, nam universa propter semesipsum operatus est Dominus. Proverb. 16.

*Quis sit finis hominum?*

Finis hominis est Deus, ut possidendus visione & fruitione. Ita enim perfecte satiat animam, & anima quiescit; Unde Beatitudo formalis consistit in clara Dei visione, ejusque fruitione; principaliter tamen in fruitione: quia hac visione perfectior.

*Quomodo Beati impeccabiles & securi?*

Beatitudo annexam habet impeccabilitatem proximam & in sensu composito, non remotam & in sensu diviso: quia prescindendo à beatitudine Beati sunt in - & extrinsece liberi. Insuper habet annexam perpetuitatem & securitatem: nam Matth. 25. Ibunt Iusti in vitam æternam; neutra tamen est illi essentialis: quia nulli creature essentialis est perpetuitas.

*Dotes Beatorum.*

Sunt dona supernaturalia, quibus Beati ab æterno sponso Deo ornantur in Patria. Dotes aliæ sunt animæ, aliæ corporis; Dotes animæ sunt tres: visio, quæ respondet fidei; comprehensio, quæ succedit spei; fructio, quæ respondet charitati in via. Dotes corporis gloriosi sunt quatuor: impassibilitas, claritas, agilitas & subtilitas. Ita communis ex 1. Corinth. 15. Per impassibilitatem corpora gloriosa habent esse immunia, Deo ea conservante, ab omni

passione corruptiva & afflictiva; per claritatem, esse venustissima, & in se lucidissima; per agilitatem, posse sese movere instar sagittæ etiam sine motu progressivo; per subtilitatem, posse pervadere & intimè penetrare obvia corpora. *Comm. T. T.*

*Quid Aureola & quotuplex?*

Aureola est præmium aliquod speciale excellenti victoriæ, sive de carne, sive de mundo, sive de diabolo, respondens; unde sunt tres scil. Virginitatis, Martyrii & Doctoratûs. *Ex*

*ESTIM.*

*CAPUT IV.*

De quatuor hominum novissimis.

**H**ominum novissima sunt: Mors, Judicium, Infernus, cœlestis Gloria.

*Mors.*

Statutum est omnibus hominibus semel mori. *Quis est homo, qui vivet & non videbit mortem? Psal. 88.* Mortui resurgent ad vitam. *De Fide ex Symbolo Apost.* Causa efficiens resurrectionis, quia supernaturalis, est ipse Deus; materialis sunt ipsa corpora resuscitanda; formalis sunt animæ istis reuniendæ: quia ex his & illis resurgunt homines. Causa moralis & meritoria est Christus: patet ex illo *1. Corinth. 15.* Sicut in Adam omnes moriuntur, ita & in Christo omnes vivificabuntur. Exemplaris quoad electos est Resurrectio Chri-

Christi: quia, cum differentia tamen sexuum, resurgunt Beati in mensuram ætatis plenitudinis Christi.

*Judicium.*

Post mortem hominis sequitur Judicium particulare, post resurrectionem universale; utrumque peragitur à Christo homine, sed subauctoritative: Joan. 5. Pater omne Judicium dedit Filio. Primum fit in ipso loco mortis, secundum in valle Josaphat: Coen ex Joëlu 3. v. 2.

*Pœna & Gloria.*

Post Judicium tum particulare, tum universale peccatoribus datur pœna, justis gloria: pœna, quæ partim est damni, partim sensûs, vel temporalis est, vel æterna; prima infligitur justis in purgatorio, secunda damnatis in inferno: pœna solius damni est pro decedentibus cum solo originali, eaque in limbo puerorum, Gloria est æterna, eaque in cælo. Rom. 2. Deus reddet unicuique secundum opera ejus scil. justis & peccatoribus; ibunt hi in supplicium æternum, justis autem in vitam æternam. Matth. 25.





# TRACTATUS IV.

## De Virtutibus Cardinalibus

praesertim

### De Jure & Justitia.

#### CAPUT I.

### De Prudentia, Temperantia, & Fortitudine.

*Quae & quot Virtutes Cardinales?*

**V**irtutes Cardinales dicuntur illae, in quibus omnis morum honestas, quasi in cardine versatur. Sunt quatuor: Prudentia, Justitia, Temperantia & Fortitudo.

Prudentia est rerum appetendarum & vitandarum scientia. Ita Aug. l. 1. de lib. arbitr. c. 13.

Temperantia est virtus, quae moderatur voluptates gustus & tactus. Species ejus sunt abstinentia, sobrietas, castitas.

Fortitudo est virtus, quae moderatur motus animi in rebus arduis ad agendum. Excellentissimus ejus actus est martirium, quod est tolerantia voluntaria mortis ex odio verae fidei, aut alterius virtutis Christianae inflictae. Resistens vel & alii.

#### COROLLARIA CASUUM.

*Coroll. 1.* Prudentiae opponitur per defectum praecipitatio, inconsideratio, inconstantia & negligentia.

gligentia; per excessum opponitur prudentia carnis, astutia, dolus & fraus. Sunt peccata gravia vel levia secundum gravitatem vel levitatem materiæ.

*Coroll. 2.* Temperantiæ per defectum opponitur stupor, per excessum gula, ebrietas & luxuria; sunt peccata ex genere suo mortalia.

*Coroll. 3.* Fortitudini opponitur per defectum timiditas & ignavia; per excessum temeritas. Sunt peccata plerumque levia.

*Coroll. 4.* Adultus non est verè martyr 1. Qui martyr est solo desiderio, vel non subit saltem cruciatum lethalem. 2. Qui pugnat pro fide, juxta illud: *Martyr non pugnat.* 3. Qui dormiens occiditur in odium fidei nullâ præhabitâ cognitione de morte inferenda. *Less. cap. 1. num. 34.* Quia mortem pro fide non suscepit. 4. Qui non habet veram fidem. 5. Ad effectum Martyrii in peccatore requiritur saltem attritio, tanquam dispositio. *Scot. 4. d. 14. q. 1.* Quia Martyrium à P. P. æquiparatur Baptismo.

## CAPUT II.

### De Jejunio Ecclesiastico.

#### *Quid Jejunium Ecclesiasticum?*

**E**st abstinencia à carnibus & appertinentibus cum unica in die refectione circa aut post meridiem sumendâ. *Ex comm.*

*Quid*

*Quid requiratur ad Jejunium?*

Ad Jejunium Ecclesiasticum tria requiruntur  
1. Delectus ciborum. 2. Unica refectio. 3. De-  
terminatum refectiois tempus.

*Quomodo & quos obliget?*

Obligat per se graviter statuto tempore, &  
quidem omnes Christianos, quibus ætas com-  
petens. *Ex jure Eccles.*

*Cause excusantes.*

A. Jejunio sunt impotentia, labor & pietas:  
excusant per rationabilem Epikeiam & beni-  
gnam interpretationem mentis S. Ecclesiæ.

*Dispensatio in Lege Jejunii.*

Dispensare potest Papa pro tota Ecclesia, Epis-  
copus pro suis Dioecesanis, Parochus pro Paro-  
chianis saltem ubi non est Episcopus. Item dis-  
pensare possunt cum suis Prælati Regulares,  
etiam locales. Ratio: quia *jus aut consuetudo &*  
*necessitas permittit.* Papa si velit tanquam Legis-  
lator Jejunii, dispensare potest validè etiam sinè  
causa, non item alii. Medici, Confessarii, Theo-  
logi declarare solum possunt, jejunium hìc &  
nunc non obligare: quia *ut tales nullam habent*  
*Jurisdictionem.*

**COROLLARIA CASUUM.**

*Coroll. 1.* Ex parte cibi violat jejunium & pec-  
cat mortaliter 1. Comedens carnes; & qui-  
dem toties, quoties. Navarr. cum comm. Excusat  
à mor-

à mortali parvitas materiæ nim. Semuncia juxta Pasqualign. Media avicula juxta Sporer. 2. Velcens etiam in Germania, ubi permittuntur ova & lacticia, cibis conditis Sagimine & lardo, ut communis habet sensus cum Laymann contra Dianam & nonnullos alios; quorum sententia de mente Sporer Confessarii servire potest ad permittendum pauperibus & aliquantulum divitibus, ut sagimine coquant; famulis & ancillis, ut taliter cocta comedant. 3 Sumens jusculum carniū.

*Coroll. 2.* Ex parte refectionis violat jejunium & peccat mortaliter 1. Sumens plures refectiones; tamen, ut habet probabilior contra Sogar, dispensatus sit ad carnes; inque non tantum peccat secundâ refectione, sed & singulis sequentibus, ut sentit Henno cum Medina contra Laymann & plures: Quia præceptum jejunii est negativum prohibens omnes refectiones exceptâ unâ. 2. Per modicas comestiones extra refectionem perveniens ad quantitatem notabilem; paret ex proposito. 29. damnatâ sub Alexandro VII. Excipe, nisi aliquid sumatur per modum medicinæ, vel parum, ne noceat potus, aut aliâ de causâ, ut ovum seu offula à Professore, Concionatore, Musico. *comm. DD. apud Laymann.* 3. Sumens immodicè lac, jusculum carniū, chocolatum & alia, quæ per se ordinantur ad nutrimentum; secus est de potu usuali, ut vino & cerevisia. *comm. cum S. Thoma.*

*Coroll. 3.*



*Coroll. 3.* Peccat, qui refectiōem anticipat; & quidem anticipans unâ horâ ante consuētā, quæ jam undecima, peccat juxta Less. Laym. & comm. solū venialiter; juxta Navarr. Marchant. & alios mortaliter: nisi fiat propter iter, concionem, catechēsim aliūdvē negotium; quo interveniente, refectio licitè etiam interrumpitur. 2. Peccant refectiōem protrahentes ad multas horas, ut virtualiter sit duplex; duas horas pro refectiōe, mediam pro collatione concedit Henno *Tractat. de Peccat. d. 4. q. 5.*

*Coroll. 4.* Secluso voto & regulâ, ut est nostra Fratrum Minorum, ad jejunium non obligantur, qui infra 21. annum; quamvis post ulum rationis obligentur ad illud inadæquatè sumptum pro sola abstinentia à carnibus. Sexagenarii, si robusti sint, non est, unde eximantur; eximebat eos vivæ vocis oraculum Pii V. teste Lamas, at ejusmodi oracula sunt revocata per Urbanum VIII. favet tamen ipsis, si senectus morbus, sententia plurimorum DD. quam Marchant, approbante Sporer, sed improbante Kerchoven, extendit ad sexagenarios Ordinis Minorum quoad jejunium regulare. Ratio, quia jejunia regularia non sunt vota, sed præcisè præcepta Regulæ obligantia ad modum præceptorum Ecclesiæ: hæc autem ob communem naturæ deficientiam non obligant sexagenarios in sæculo, ergo nec ista sexagenarios in Religione. *Opinio probabilis*, non tamen ita consulenda senibus satis valentibus, inquit Sporer *Tract. 3. de jejunio sect. 4. n. 51.*

*Coroll. 5.*

*Coroll. 5.* A jejunio quoad unam refectio-  
nem Impotentia excusat 1. Infirmos & conva-  
lescentes. 2. Prægnantes & lactantes. 3. Pau-  
peres non habentes, quo semel satis reficiantur.  
4. Itinerantes sive pedibus, sive equo, sive cur-  
ru, modò notabiliter sint defatigati. Labor  
excusat Agricolas, fabros lignarios & ferra-  
rios, pistores, sutores, textores, vertentes pre-  
lum typographicum, & similes, quorum labor  
cum jejunio incompatibilis; non verò excusat  
pictores, sartores, &c. quorum opera sunt quie-  
ta. *Quid si labor sit illicitus v. g. in Festo, aut in frau-  
dem jejunii?* Ordinariè non excusat: quia Eccle-  
sia non favet peccatoribus, fraus verò & dolus  
nemini patrocinantur. Unde ex labore illicito  
vel in fraudem jejunii moraliter impotens ad  
jejunium non tenetur quidem jejunale, Ecclesiâ  
eum in tali statu non obligante, peccavit tamen  
ponendo causam. Pietas seu opera pietatis ex-  
citant Confessarios per potiore diei partem  
sedentes, Professores, Concionatores, attentâ  
eorum complexione & laborum gravitate. *Quid  
si causa dubia?* Recurrendum est ad Prælatum  
pro dispensatione, de quâ suprâ.

*Coroll. 6.* A jejunio quoad carnes excusat  
1. Gravis infirmitas. 2. Paupertas illos, qui  
aliud non habent ad sedandam famem. 3. Peri-  
culum prolis prægnantes, quibus vehemens car-  
nis appetitus. 4. Necessitas laborantes & fa-  
mulantes in oppidis hæreticorum, si non den-  
tur alii cibi, nec laboritium sinè damno possint  
desce-

deterere; cum his teste Laymann *cap. 3.* Societas à Summo Pontifice accepit privilegium quoad hoc dispensandi, in quo communicant alii Religiosi mendicantes. *Sporer num. 56.*

*Coroll. 7.* Qui in die jejunii non jejunavit, siue culpabiliter, siue inculpabiliter, non tenetur jejunare alio die: quia obligatio jejunii est affixa diei à mediâ nocte ad median noctem. Unde non satisfacit, jejunium privatâ authoritate de uno die transferens ad alterum.

*Coroll. 8.* Licita est ex consuetudine collatiuncula, siue vespere sumatur, siue ex crâ manè: in eâ attendenda est non ciborum esurialium qualitas, sed quantitas, nimirum modica, quæ quarta pars coenæ ordinariæ, ut censet Reginaldus *l. 4. n. 185.* & alii comm. Quia etiam in auditione missæ & aliis præceptis quarta pars censetur modica, nisi totum sit valde magnum.

### CAPUT III.

#### De Jure & Justitiâ in communi.

*Quid Jus & quotuplex?*

**J**US, cujus violatio est injuria, est potestas legitima ad aliquid; eaque est vel activa ad aliquid exequendum, vel passiva ad recipiendum, vel restituta ad avertendum nocumentum. Dividitur in Jus ad rem & in Jus in re. Jus ad rem acquiritur contrahenti ante rei traditionem,  
Jus

Jus in re post traditionem; illud parit actionem personalem, hoc realem, utrumque est fundamentum Justitiæ.

### *Quid Justitia & quotuplex?*

Justitia est constans & perpetua voluntas, Jus suum cuique tribuendi. *l. just. ff. de Justit. & Jure.* Dividitur in commutativam, distributivam & legalem. Commutativa respicit aequalitatem rei ad rem seu dati & accepti, ut nimirum, quantum acceptum est, tantum detur; & sic dicitur respicere proportionem arithmetica. Distributiva respicit onera & bona communia inter partes commun-tatis distribuenda juxta personarum qualitates & merita; & sic dicitur respicere proportionem geometricam. Legalis membra Reipublicæ inclinatur ad curandum bonum totius.

### *Subjctum Justitiæ.*

Justitia strictè talis esse nequit in Deo respectu creature: quia in Deo non est perfectum debitum solvendi; nec inter Patrem & Filium, uxorem & maritum quoad regimen domesticum, dominum & servum quâ tales: quia inter illos sic sumptos non est perfecta altereitas.

### *Objctum Justitiæ*

*Materialè* sunt res, quæ commutantur, distribuuntur &c. *Formale* quod sunt res ut justæ seu debitæ alteri; *Formale quo* est honestas in illis reddendis.

C

COROL.



## COROLLARIA CASUUM.

*Coroll. 1.* Si quis rem, quam emisti, vendat alteri, actionem tantum habes in venditorem; Si verò tradita tibi auferatur, actionem non tantum habes in furem, sed & ad ipsam rem ad quascunque personas pervenerit.

*Coroll. 2.* Peccant contra Justitiam Filius occidens Patrem, servus dominum & vice versâ. 2. Pater auferens bona filii, eidem propria; dominus non solvens mancipio, quod promissit. Ratio: quia non peccant præcisè ut tales, etiam peccaturi, si tales non essent.

## CAPUT IV.

## De Speciebus Juris.

*Quæ sint Species Juris?*

**S**unt Dominium, Ususfructus, Usus, Habitatio, Possessio, Servitus, Pignus & Hypotheca: Dominium aliud est Jurisdictionis, quod est potestas gubernandi subditos; aliud *Proprietatis*, quod vel *perfectum*: & est jus in re ad omnem ejus usum, nisi lege prohibeatur; vel *imperfectum*, quod continet vel proprietatem rei sine emolumentis, & dicitur *directum*; vel emolumenta sine proprietate & dicitur *Utile*. *Ususfructus* est Jus utendi & fruendi, *Usus* verò utendi tantum re aliquâ, salvâ rei substantiâ. *Habitatio* est Jus per se vel alium inhabitandi ædes alienas. *Possessio* est, quâ rei non prohibita possideri instituitur; si instituitur suæ & animo solo, est *Possessio Juris*

*Juris tantum*; si non suæ, animo tamen & corpore est *Possessio facti tantum*; si suæ & animo atque corpore, est *Possessio Juris & facti simul*. *Servitus* activè est Jus in re aliena aut persona, ut tibi tuisve serviat. *Pignus & Hypotheca* est Jus detinendi rem alienam in securitatem debiti inde, si aliàs non, solvendi.

*Quomodo acquirantur & amittantur?*

Dominium ordinariè acquiritur titulo & traditione, Ususfructus, Usus, Habitatio, Servitus lege & conventionem; Possessio lege & apprehensione aut verâ aut fictâ. Amittuntur Ususfructus, Usus, Habitatio, Servitus 1. Rei destructione. 2. Si sint ad tempus, eo expirante. 3. Morte Ususfructuarii &c. Possessio amittitur 1. Voluntate nolentis possidere, nisi sit pupillus. 2. Oblivione, quod res sit sua. 3. Rei ablatione. 4. Amissione. 5. Fugâ animalis, si non habeat consuetudinem redeundi.

**COROLLARIA CASUUM.**

*Coroll. 1.* Acceptans à pupilio dante sua bona sinè consensu Tutoris, ea non facit sua; quia *Lex obstat*.

*Coroll. 2.* Jus Domini proprietarii violat 1. Ususfructuarius destruens aut alienans rem sui Ususfructus. 2. Usarius arrogans sibi fructus ab usu distinctos.

*Coroll. 3.* Domini duo in solidum implicant: quilibet enim de re perfectè disponderet, quia

C 2

Domi-

*Dominus*; non perfectè disponderet, quia alius *Dominus*. Non implicant duo possessores: rem ablatam possidet & *Dominus* & fur; hic possessione facti, iste *Juris*.

## CAPUT V.

### De Subjecto Domini.

#### *Dominium Uxoris.*

**O**Mnis homo est capax domini. Uxor habet plenum dominium bonorum paraphernalium: nam *paraphernalia* sunt bona, quæ uxor habet pro se ultra dotem marito allatam; dotalium verò & medietatis communium dominium habet, non administrationem. *Dotalia* sunt, quæ uxor adfert marito ad sublevanda matrimonii onera; *Communia*, quæ conjuges sibi acquirunt.

#### *Dominium Filiifamilias.*

Filiusfamilias plenum habet dominium castrense & quasi castrense, adventitiorum verò dominium, non administrationem, profectitiorum nec dominium nec administrationem. *Bona Castrensia* sunt, quæ acquiruntur in militia profana; *Quasi Castrensia*, quæ in sacra ex munere clericali vel officio non mechanico v. gr. Professoris, Judicis, Advocati &c. *Adventitia* sunt, quæ filio obveniunt nec à patre, nec intuitu patris v. gr. per hæreditatem maternam, inventionem, donationem &c. si secus, sunt *profectitia*.

*Domini-*

*Dominium Religiosorum.*

Religiosi post vota solemnia sunt domini in temporalia incapaces in particulari. *Trid. Sess. 25. de Regular. cap. 2.* Professi regulam S. Francisc. etiam in communi *cap. 6. Reg. Franc.*

*Dominium Clericorum.*

Clerici dominium habent bonorum propriè patrimonialium & quali; item reddituum beneficiorum, quâ parte ad honestam sustentationem sunt necessarij. *Patrimonialia* sunt, quæ clerici habent independentè à Ministerio & Beneficio Ecclesiastico; *quasi patrimonialia*, quæ acquiruntur ministerio clericali v. gr. celebrando, concionando &c. *Ecclesiastica*, quæ proveniunt ex Beneficio Ecclesiastico v. gr. Canonicatu, Decanatu &c.

**COROLLARIA CASUUM.**

*Coroll. 1.* Parvuli & amantes sunt capaces domini; ab illis auferens facit injuriam, & ablatum non est suum.

*Coroll. 2.* Peccant in re gravi M. & ad restitutionem tenentur 1. Uxor auferens de bonis dotibus & communibus, marito rationabiliter invito, & hic auferens de paraphernalibus uxoris, vel castrensibus aut quasi castrensibus filij ultra alimenta filio necessaria. 2. Filius auferens de bonis paternis; quod si his nomine suo negotietur, lucrum erit suum; tenebitur tamen patri pro interesse. *Sporer num. 53.* Item si filius



extraordinariè & supra debitum patri labore, pro excessu laboris à patre vel cohæredibus potest, factâ protestatione de non laborando gratis, exigere stipendium; at pater detrahere potest expensas in filio alendo factas. Lugo num. 43.

*Coroll. 3.* Religiosus peccat contra votum paupertatis 1. Utens rebus tanquam suis. Advertant ante professionem pecuniam, census & similia reservantes, iis postea usuri suo arbitrio, sinè dependentia & licentia. 2. Quamcunque rem temporalem sinè superioris licentia vel expressa vel tacita, vel rationabiliter præsumpta accipiens, occultans, permutans, donans &c. Sanch. lib. 7. *Moral. cap. 19.* Isti sunt proprietarii, quorum poena est privatio vocis activæ & passivæ per triennium, *Trid. citat.* & privatio sepulture Ecclesiasticæ. *cap. Cum ad monast. de Statu Monach.* 3. Habentes & permittentes rerum superfluitatem, pretiositatem, curiositatem: quia non stant cum paupertate. *Marchant. T. 1. quest. 4.* Et quis non? Cogitent illud 1. *Timoth. 6.* Habentes alimenta, & quibus tegamur, his contenti simus.

*Coroll. 4.* Religiosus potest habere peculium (nisi Regula veret) quoad usum congruum dependentem à voluntate Prælati, qui semel concessum possit revocare pro arbitrio suo. DD.

*CONTINUUM.*

*Coroll. 5.* Religiosus habens Beneficium extra monasterium fructus acquirit monasterio, si huic incorporatum sit Beneficium, si non incorporatum: acquirit ad pios usus, sicut alii Bene-

Beneficiarii, Jura tamen stolæ pro sacris, nuptiis, sepulturis &c. semper acquirit monasterio juxta Regulam cap. Cum ad monast. de Statu Monach. quidquid Monachus acquirit, Monasterio acquirit.

Coroll. 6. Donatio à Religioso facta nomine proprio est invalida, & donatarius monasterio tenetur ad restitutionem.

Coroll. 7. Beneficiarius licitè suos dicit con- sanguineos 1. Ex suis patrimonialibus. 2. Ex quasi patrimonialibus, seu acceptis pro sacris, concionibus &c. 3. Ex parsimonialibus, quæ subtrahit genio suo. 4. Ex redditibus necessariis ad sustentationem, hanc habens aliunde. Ratio: quia illorum omnium est Dominus.

Coroll. 8. Beneficiarius redditus honestæ sustentationi superfluos expendens ad usus profanos gravissimè peccat. Ita omnes, & constat ex Trid. Sess. 15. de reform. cap. 1. Imo restitutioni obnoxius est & ipse & recipiens. Ita contra multos Navarr. de Redit. quest. 2. Layman Tractat. 2. cap. 3. aliq, apud illos plurimi. Quia illorum non acquirit dominium: unde illud? Non à fundatoribus: aliàs clerici habuissent ante bonorum divisionem. An ab Ecclesia? Hæc in Trid. citat. præcipit illos expendi in usus pios, ad quid dedisset dominium? Prohibet de illis testari. cap. Ad hac. de Test. juxta Trid. supra: sunt bona Dei. Unde D. Bern. Epist. 2. ad Canonicum Lugdunensem: quidquid præter necessarium victum & vestitum de Altari retines, tuum non est, rapina est, sacrilegium est.

## CAPUT VI.

## De objecto Domini.

*Quarum rerum dominium competat homini?*

**S**UB Dominium hominis cadunt 1. Actus sui liberè eliciti vel imperati. 2. Alius homo, sed tantum quoad opera. 3. Bona gratiæ & dona supernaturalia. 4. Bona famæ & honoris. 5. Bona fortuna & res omnes sublunares. Ratio: quia de omnibus illis tanquam suis potest disponere.

## COROLLARIA CASUUM.

*Coroll. 1.* Homo non est Dominus vitæ suæ & membrorum, peccat mortaliter 1. Occidens se ipsum, nisi executor sit justæ sententiæ. 2. Occidens alium volentem. 3. Mutilans se vel alium, nisi ob conservationem vitæ. 4. Vitam temerè exponens morti.

*Coroll. 2.* Non peccat se occidens indirectè ex justa causâ, nimirum 1. Permittens se occidi à latrone, quem posset occidere. 2. In naufragio cedens alteri tabulam, vel in incendio præcipitans se per fenestram, modò sit spes evadendi. 3. Damnatus ad mortem non refugiens, cum possit. 4. Assistens pestiferis. 5. Non permittens mutilationem vitæ conservandæ necessariam, ubi dolores nimis essent magni. 6. Religiosus accelerans mortem per mortificationes. Communis. Ratio: quia omnes illi mortem non intendunt, solum permittentes ex justa causâ, qui stante impedire non tenentur.

## CAPUT VII.

## CAPUT VII.

## De modo acquirendi Dominium.

*Quot modis acquiratur Dominium?*

**D**ominium acquiritur tribus modis: Jure naturali, Jure civili, & Jure contractûs; etenim res sunt vel nullius, utpote vocantes, derelictæ aut pro derelictis habitæ; & Jure naturali sunt primò occupantis; vel sunt possidentis præsumptivè: & Jure civili sunt legitimè præscribentis, etiam in foro conscientiæ; vel sunt possidentis verè: & Jure contractûs sunt eementis, donatarii, legatarii &c. Sporer n. 130.

## COROLLARIA CASUUM.

*Coroll. 1.* Thesaurus Jure naturæ quidem est inventoris; at de Jure civili 1. Licite inventus in proprio fundo totus est inventoris, in alieno tantum ex dimidio, alterâ parte pertinente ad dominum fundi. §. *Thesauros. instit. l. 2. de rerum division.* Princeps tamen statuere potest, ut thesaurus ubicunque repertus sibi totus, exceptâ aliquâ parte, tradatur ad ferenda Reipubl. onera. Henno. d. 4. q. 52. Thesaurus ex industria quælitus in fundo alieno, incio aut invito fundi domino, totus adjudicatur domino. *L. unica. de Thesaur.* Inventus arte magicâ in fundo proprio totus cedit Fisco; inventus in alieno cedit Fisco ex media parte, ex altera domino fundi. Leges tamen istæ, quia poenales & ferendæ sententiæ, teste Lessio, non obligant ante Judicis sententiam.



*Coroll. 2.* Animalia sylvestria fiunt capientis  
 1. Si nondum ab alio sint capta. 2. Si capta in  
 libertatem naturalem se receperint v. gr. examen  
 apum ex alveario, cervus ex vivario. 3. Si cap-  
 tio eorum ex justa causa sit prohibita; capiens  
 tamen tenetur latâ sententia poenam luere, dam-  
 numque notabile refarcire. *Less. lib. 2. cap. 5.*

*Coroll. 3.* Non acquirit dominium, conse-  
 quenter tenetur ad restitutionem 1. Capiens  
 feras in vivariis, pisces in piscinis. 2. Capiens  
 feram ab alio insequente lethaliter vulneratam,  
 pisces reti alieno implexos. 3. Capiens anima-  
 lia naturâ mansueta, etiamsi longè aberraverint;  
 vel mansuefacta, quamdiu consuetudinem ha-  
 bent redeundi. 4. Ovem laniatam eripiens è  
 faucibus lupi. 5. Alterius columbas inescando  
 alliciens ad suum columbarium: secus est, si  
 absque fraude ad illud convolent. *Lugo d. 6.*  
*num. 46.* Ratio: quia capiunt, quod jam captum est,  
 vel sub alterius existit dominio.

*Coroll. 4.* Pauperes ad usum quotidianum in  
 sylvis lignantes, sinè damno notabili, ordinariè  
 non peccant mortaliter; attendere tamen oportet,  
 an prohibentes obligare velint tantùm ad  
 poenam, an etiam ad culpam? An ad gravem  
 vel levem? *Layman lib. 3. cap. 5.*

*Coroll. 5.* Res incertæ, domino earum post  
 diligentem inquisitionem non comparente, non  
 sunt inventoris, quidquid velint Haunold. So-  
 tus, aliique; sed domino suo sunt reddendæ  
 modo, quo possunt, meliori, nimirum piè ex-  
 pen-

pendendo. D. Thom. 2. 2. q. 66. Scotus d. 15. q. 2. Unde Aug. L. 50. Homil. 9. Si quid invenisti, & non reddidisti, rapuisti.

Coroll. 6. Præscriptio est acquisitio domini per civilem rei possessionem, tempore legitimo continuatam. Eâ finitâ deprehendens rem fuisse alienam, non tenetur ad restitutionem priori Domino; nisi hic gaudeat beneficio restitutionis in integrum, quod conceditur piis locis, minoribus, & quandoque majoribus. Less. lib. 2. cap. 6.

Coroll. 7. Ad præscriptionem requiritur 1. Res apta præscribi, & est illa, quæ apta possideri. 2. Possessio rei tanquam suæ, & possessionis continuatio per tempus lege definitum. Ad præscriptionem mobilium v. gr. pecuniæ, animalium, supellestilis &c. requiruntur tres anni inter præsentés, quatuor inter absentes; ad præscribenda verò immobilia v. gr. prædia, domum, hortum &c. Sufficiunt 10. anni inter præsentés, & 20. inter absentes. Excipiuntur pupilli, contra quos nunquam præscribitur; item Monasteria, Hospitalia & alia loca pia, contra quæ non præscribitur ante 40. annos. 3. Bona fides, ut rem possidens prudenter iudicet esse suam; aut saltem nesciat esse alienam. Dubium superveniens bonæ fidei non interrum- pit præscriptionem, modò dubitans diligenter inquirat, an res sit sua; & manens dubius resolvat, rei retentionem sibi esse licitam ob titulum possessionis. 4. Titulus possessionis præsumptus, seu iustus in æstimatione v. gr. Emptio, Donatio &c.

tio &c. hujus tamen probatio non requiritur ad præscriptionem à tempore longiori. *Omnes.*

*Coroll. 8.* Non præscribit 1. Laicus loca sacra, bona Clericorum & Jura spiritualia, v. gr. Jus decimandi, conterendi beneficia Ecclesiastica &c. *quia nequit illa possidere.* 2. Religiosus sibi bona temporalia, tutor sibi bona pupilli; hic tamen pupillo, iste monasterio: *quia non possident nomine suo, sed alterius.* 3. Commodatarius commodatum, Depositarius depositum: *quia non possident tanquam suum.* 4. Laborans ignorantia Juris; secus si facti: nam ut habet *Reg. Jur. in 6to.* Ignorantia facti, non Juris excusat. 5. Dubius prædicè, an res sua. 6. Hæres immediatus rem malâ fide à testatore possessam; *quia hic cum defuncto scitione Juris censetur una persona.* Layman *lib. 3. cap. 8.*

## CAPUT VIII.

### De Injuria in bonis naturæ.

*Quid injuria & quotuplex?*

**I**njuria est violatio Juris alieni: committitur Injustâ rei alienæ acceptione, & iniquâ detectione. Si quis sciens, volens Jus alterius violat, est injuria formalis; si inculpabiliter ignorans, est materialis.

*A quibus committatur in Bonis naturæ?*

Bona naturæ sunt bona animi & corporis, in his committitur injuria 1. Ab eo, qui vi & mi-  
nis

nis vel fraude retrahit a virtutibus v. gr. ab ingressu Religionis vel professione, aut inducit ad peccatum v. gr. apostasiam, hæresim &c. 2. Ad eo, qui se ipsum occidit, vel alium innocentem. 3. A Magistratu, qui occidit malefactores extra casus à Deo concessos vel ex. vel implicite.

## COROLLARIA CASUUM.

*Coroll. 1.* Vi vel fraude inducens puellam ad fornicationem peccat non solum contra castitatem, sed etiam contra Justitiam. Dominus servum taliter inducens ad occidendum peccat contra Justitiam dupliciter: *quia inductio illa injuriosa est & occidenti & occiso.*

*Coroll. 2.* Injuriam infert 1. Adulter marito, quamvis in adulterium consentiat; *quia fuit ejus immobile.* Platel. 2. Clericum à Beneficio sperato impediens per vim vel fraudem. 3. Usurarius danti usuram ex necessitate. 4. Acceprans nummum aureum, quem dans putat esse cupreum: *quia hic errat in substantia, adeoque non consentit.*

*Coroll. 3.* Peccant mortaliter se vel alios castrantes ob carnistentationes vincendas. *Can. 22. Apost.* Aut vocis suavitatem acquirendam. *Herinx num. 16.*

*Coroll. 4.* Reus est suicidii 1. Se gladio transfodiens, ne ignominiosè suspendatur. 2. Paulatim se vino adusto interimens, aut crapulâ, qui ex numero eorum, de quibus *Eccles. 37.* Propter crapulam multi obiérunt. 3. Metu torturæ sibi falsò



falso imponens crimen ; propter quod erit morte puniendus. Herinx num. 38. Lugo & alii contra Lessi. Maist. &c. Quia se occidit directè : nam alteri imponens crimen falsum , propter quod est occidendus, illum occidit directè ; ergo & sibi imponens.

Coroll. 5. Reus est homicidii 1. Magistratus innocentem tradens tyranno occidendum, tamerti ad avertendum Reipubl. damnum : quia directà innocentis occisio est intrinsecè mala non minùs ac fornicatio. 2. Judex ad mortem condemnans accusatum , quem certò scit innocentem , at secundùm allegata & probata est nocens. Lyranus in cap. 23. Exodi, explicans illud : *Innocentem & Justum non occides*. Et sequuntur multi contra multos. Ratio est Lex divina : *Innocentem non occides*. Ergo non valet lex humana : *Innocentem, qui probatur nocens, occides*. Conf. Non enim occiditur aliquis, quia probatur nocens, sed quia est ; probari nocentem, non est malum, sed esse. 3. Judex jubens occidi illum, quem privatâ scientiâ novit reum, at talis non probatur. Lessi. cap. 29. num. 94. 4. Occidens Principem tyrannum, seu tyrannicè populum regentem. Concil. Constantiens. Sess. 15. 5. Paterfamilias, cujus servus aut animal, interveniente suâ culpâ latâ, fecit homicidium. Lessi. 6. Maritus occidens uxorem in adulterio deprehensam. 7. Procurans abortum foetûs animati. *Quid si non animatus?* Licere procurare, ne puella occidatur, aut infametur, damnavit Innocent. XI. 8. Occi-

dens

dens Invasorem bonorum fortunæ, pudicitæ, vel honoris, quæ aliter non possunt servari. Colligitur ex propositionibus 30. 31. 32. damnatis ab Innocent. XI. exculatur, si bona sint notabilia, & ad sustentationem valde necessaria; aut si mulier opprimenda prævideat consensum & ruinam spirituales. Ratio: *quia tunc in primo casu est invasor vite corporalis, in secundo spiritualis.* 9. Medici, Chyrurgi, Pharmacopolæ, Infirmarii, qui ex ignorantia, negligentia, avaritia &c. sunt in causa, cur moriatur infirmus.

*Coroll. 6.* Licet directè occidere 1. Magistratui homicidas, maleficos, incendiarios, fures, falsarios &c. *Comm.* Non furem ob furtum simplex, quod committitur à fure, quia diurnus est, vel fugit, non inferente periculum vitæ, nec gravia communitati damna, cum Scoto Alensis, Sotus &c. 2. Unicuique bannitum.

*Coroll. 7.* Foemina gravida, si ad mortem damnata, periculosè ægotans autoritate publicâ secari potest in supplicium, ut proles baptizetur, aliàs sinè baptismo moritura. Layman.

*Coroll. 8.* Mater infirma licitè sumit medicinam directè curativam, licet per accidens sequatur abortus, modò proles non sit animata; Si animata, & matre à medicina abstinente servari possit ad baptismum, alioquin sinè eo moritura, mater tenetur abstinere: *quia salus æterna prolis est præferenda vite corporali matris.* Si non adhibito remedio mater judicetur cum prole moritura, adhi-

adhiberi potest medicina, directè tendens in curationem matris. Less. lib. 2. cap. 9. num. 62.

*Coroll. 9.* Servato moderamine inculpatæ tutelæ, unicuique licet occidere iniustum invasorem vitæ, etiam alienæ. *Omnes cum D. Thoma:* quia vim vi repellere licet, non plus tamen faciundo, quam necessitas postulet. Quid si invasor sit Episcopus, Pater vel Superior? Quid si amens vel ebrius? Quid si invasus dederit causam calumniando, irritando &c. Adhuc licet: quia *ius retinet naturale defensionis.*

### CAPUT IX.

De Injuria in bonis famæ.

*Quid bona Fama & Honor?*

**B**ona fama est existimatio multorum de excellentia alicujus. Honor verò est alterius excellentiæ apertum testimonium, sive ab uno procedat, sive à pluribus.

*Quomodo lædantur?*

Læduntur & committitur injuria 1. Actû interno per dubitationem, suspensionem, opinionem & Judicium temerarium. 2. Actû externo per diffamationem injustè læditur fama sive propria sive aliena; per detractionem tantùm aliena & occultè; per contumeliam læditur honor & apertè. Dubitatio temeraria, suspicio & levis opinio regulariter sunt peccata venialia; ast judicium temerarium, diffamatio, detractio, & con-

& contumelia sunt ex genere suo peccata Mort,  
commun. DD.

### COROLLARIA CASUUM.

*Coroll. 1.* Suspicio temeraria per accidens fit  
Mort. 1. Si sit de personâ eccellente & in re gra-  
vissima. 2. Si ex ea negetur votum, sequatur  
odium, detractio &c. Sufficit tamen confiteri  
odium, detractioem &c. omisâ suspitione;  
*quia non est hæc mortaliter mala in se, sed in effectu.*

*Coroll. 2.* Judicium temerarium (quod est  
firmus de alterius crimine assensus absque fun-  
damento) est veniale in materia levi, vel sine  
plena advertentia. *Her. d. 7. num. 5.*

*Coroll. 3.* Detractio fit voce, facto & scripto.  
1. Voce detrahit: imponens crimen falsum,  
exaggerans verum, manifestans occultum, sini-  
stre interpretans factum. Item laudans frigide,  
rectè facta negans, parvi faciens, reticens; ubi  
centetur vituperium. 2. Facto detrahit: alte-  
rius janua ad detrahendum appingens cornua  
aut furcam. 3. Scripto: componens libellum  
famosum.

*Coroll. 4.* Non est peccatum detractionis 1. Cri-  
men proximi narrare viro prudenti causâ con-  
sili, auxilii vel solatii. 2. Narrare crimen non  
nominatâ personâ, vel si incognita sit & nun-  
quam cognoscenda; cavendum tamen præjudi-  
cium communitatis v. gr. monasterii, ut non  
nominetur. 3. Crimen narrare, ubi jam est,  
vel proximè fiet notorium. 4. Crimen noto-  
rium



rium Jure evulgare alibi, est tamen contra charitatem, si fiat cum damno infamati. 5. Delicta aperire superiori, servato ordine correctionis fraternæ. Herinx *d. 7. q. 2. & comm.*

*Coroll. 5.* Est peccatum mortale 1. Notabiliter detrahere defuncto. Layman *Tractat. 3. c. 3.* 2. Crimen revelare in confuso, dicendo v. gr. se scire aliquid grave de tali. 3. Crimina audita recensere ut audita, si fiat taliter, ut audientes credant; secus, si non credituri Sotus *l. 4. q. 6.* 4. Sinè justa causâ crimen proximi narrare viro uni prudenti. Layman *citat. contra Navarr. Reginald.* 5. Alium inducere ad detrahendum, quod & scandalum. 6. Delictum à Prælato punitum divulgare extra monasterium. 7. Crimen notorium factò vel famâ publicare alibi: qui enim per injuriam amisit famam in uno loco, non amisit Jus ad famam in alio. Platel. *contra Less.* 8. Crimen oblitteratum resuscitare: quia nova est detractio. 9. Revelare crimen ad suum lucrum: quia non oportet ditescere cum alterius injuria. 10. Patefacere crimen, cui Jure annexa est infamia, quamdiu occultum. Less. *num. 67.*

*Coroll. 6.* Est peccatum plerumque veniale, quandoque nullum 1. Narrare defectus proximi leves. 2. Revelare defectus naturales v. gr. quod aliquis sit parvi ingenii, spurius &c. Navarr. Cave, ne cui dicas in faciem convitiandi causâ. 3. Dicere aliquem esse iracundum, avarum, superbum &c. quibus significatur non tam actus, quàm inclinatio. 4. Infamatum de



vel aliud grave malum sequeretur. 5. Minuens famam alterius, manifestando verum crimen, ubi & quando necesse est ad servandam propriam. Sporer *fest.* 3.

*Coroll. 10.* Qui sui Juris est, se ipsum infamans ordinariè peccat venialiter. Metzger *d.* 39. Per accidens mortaliter 1. Si de crimine commissio se jactet. 2. Si grave præbeat Scandalum. 3. Si Religiosus sit vel Paterfamilias, quibus se infamantibus, damnum redundat in communitaltem vel familiam.

*Coroll. 11.* Contumelia committitur verbo: & est convitium, improprium vel maledictum; aut Scripto: & est libellus famosus; aut facto: & est irrisio, illusio, vel subfannatio. Per accidens est peccatum veniale vel ex parvitate materiæ, vel ex imperfectione actûs, vel quia à Parentibus in filios, à Superiore in subditos &c. causâ justæ correctionis.

## CAPUT X.

De injuria in bonis fortunæ.

*Quid furtum & rapina?*

**B**ona fortunæ sunt pecunia, prædia & alia, tum mobilia, tum immobilia; quæ fortunâ acquiri solent. In his committitur injuria furto & rapinâ: Furtum est occulta rei alienæ acceptio, invito rationabiliter Domino; rapina verò est rei alienæ violenta acceptio, Domino sciente & contranitente. Differunt specie, & sunt ex genere suo peccata mortalia. CO-

## COROLLARIA CASUUM.

Coroll. 1. Furtum committunt 1. Subducens rem suam alteri datam in pignus: quia injuste auferre eam quàm pignus, & eatenus non suam. 2. Auferrens à Commodatario commodatum, à Depositario depositum, à Fratribus Minoribus libros. 3. Auferrens cum voluntate ablatum restituendi; Si credatur Dominus rationabiliter invitus. 4. Rem alienam detinens; esto acceperit bonâ fide. 5. Domum iacendens, fenestras infringens &c. est enim injusta damnificatio, quæ furtum improprie. Lessi. num. 56. 6. Accipiens rem alienam in gravi necessitate, ex proposito. 36. damnata ab Innocent. XI. 7. Uxor auferrens marito, filii parentibus, amicus amico, Religiosus de rebus monasterii; & hic quidem non tantum committit peccatum furti contra Justitiam, sed & proprietatis contra professionem. 8. Sartores, textores & similes operarii retinentes fragmenta alicujus momenti. 9. Falsâ monerâ decipiens alium, quamvis & ipse eâdem deceptus fuerit; imputer sibi vel decipienti deceptionem, non alteri innocenti; hic retinet Jus, ut non decipiatur. 10. Proximum decipiens vendendo, emendo, aut aliter contrahendo: quia injuste damnificat. Sporer ex comm.

Coroll. 2. Furtum faciunt M. 1. Auferrens quantitatem notabilem. Sed quæ illa? Placet sententia Sbogar. num. 84. quantitatem esse notabilem, quæ sufficeret ei, cui auferretur, pro sustentatione unius diei, & sunt duo vel tres du-



cati respectu cujuscunque, florenus respectu mediocriter divitum, medius florenus respectu mechanicorum, aliquot grossi respectu pauperis: quia censetur injuria gravis, aliquem privare victu diurno, adeoque etiam eo, quod sufficit ad victum istum. 2. Auferens sartori acum, unde grave patitur damnum. 3. Qui furatur modica ex animo furandi multa, ubi furtum externum est veniale, internum mortale. 4. Furto minuto advertenter complens quantitatem notabilem, quamvis eam modica furando non intenderit, ubi furtum ultimum in se est veniale, sed detentio rei alienæ in notabili quantitate, quæ tunc inchoatur, est peccatum mortale. *Less. num. 42.* 5. Quilibet communi consensu ex pluribus per furta minuta inferentibus grave damnum: nam quilibet moraliter influit in singula furta & totum damnum. *Herinx d. 8. num. 18.*

*Coroll. 3.* Major requiritur quantitas ad furtum mortale 1. In furtis minutis à diversis. 2. In furtis diutius interpolatis. 3. In furtis domesticorum & amicorum. *Herinx citat. num. 15.* Quia in his non fit tanta injuria.

*Coroll. 4.* Non faciunt furtum, vel non mortale 1. Uxor de bonis communibus, convertens in suas, liberorum & familiæ necessitates; item pecunias occultans, ne maritus prodigus in ludos & compotationes profundat. *Less. d. 14.* 2. Famuli & ancillæ auferentes esculenta communia; maximè si ipsimet absument. 3. Qui bonâ

bonâ fide credit Dominum consensurum, si ad-  
esset. 4. Sartores retinentes fragmenta; si ju-  
stam mercedem non accipiant à Dominis, qui-  
bus tamen ob sartorum copiam, si se, suosque  
alere velint, laborare debent. Sanch. apud Spor.  
num. 68. Quia retinent in compensationem  
mercedis. 5. Accipiens alienum in extrema ne-  
cessitate: quia in hac omnia sunt communia; excipe,  
nisi dominus sit in eadem, tunc melior est con-  
ditio possidentis. 6. Utens compensatione oc-  
cultâ, servatis conditionibus servandis; præci-  
pue sunt: ut debitum sit certum & jam solven-  
dum, nec aliter solutio obtineri possit; Deinde  
ut vitetur iterata solutio, ita peccatum debitoris  
& damnum tertii; ne debitor putet se adhuc  
obligatum, nec alteri imputetur furtum cum  
gravissimo documento. Less. c. 12. n. 57. Quia  
licet unicuique ex Jure naturali se conservare in-  
dennem sinè alterius injuria.



TRACTATUS V.

## De Restitutione.

## CAPUT I:

## De Restitutione in communi.

*Quid sit Restitutio?*

**R**estitutio est actus iustitiæ commutativæ, quo vel suum domino redditur, vel damnum illatum ad æqualitatem reparatur.

*Unde Obligatio Restitutionis ?*

Obligatio restitutionis oritur ex re accepta & injusta acceptione : ratione rei acceptæ tenetur restituere , qui habet rem alienam , etiam sine culpa ; ratione injustæ acceptionis tenetur , qui proximum injustè damnificavit.

*Quando sit restituendum ex damnificatione ?*

Ut damnificatio sit formaliter injusta , pariaturque obligationem restitutionis sub mortali & in foro conscientiæ , requiritur in damnificante culpa , eaque Theologica gravis sive peccatum mortale. Lugo ex comm. TT. Ratio : Quia damnificans sine culpa solum per naturalem inadvertentiam vel oblivionem nullam formaliter committit injustitiam.

## COROLLARIA CASUUM.

*Coroll. 1.* Non tenetur ad restitutionem , qui non impedit homicidium , furtum , vel aliud proximi damnum , quando debuit ex charitate : quia restitutio est actus Justitiæ , adeoque supponit Justitiam violatam. 2. Qui læsit Justitiam distributivam. Herinx d. 7. num. 29. Quia competentes ad beneficia , officia &c. non habent strictum Jus , unde extra concursum conferens beneficium vel officium indigno , ad nihil tenetur digno præterito ; Ecclesiæ tamen & Reipublicæ tenetur ad damna , si quæ patiantur , reparanda.

*Coroll. 2.* Ad restitutionem tenetur 1. Qui habet rem alienam , à fure bonâ fide emptam , etsi non

non recipiat pretium : quia res furtiva clamat Dominum suum, isque non tenetur dare pretium. 2. Qui rem furto ablatam perdidit aut consumpsit, tenetur enim ratione injustæ acceptionis. 3. Qui domum incendit, ovem occidit &c. nisi fuerit amens vel aliunde sine culpa. 4. Advocatus, qui ex malitia aut negligentia culpabili perdit litem iustam. 5. Confessarius, qui injungit restitutionem faciendam, cum esset omittenda, aut omittendam, cum esset facienda. Excusatur, si respondeat juxta sententiam probabilem, vel dicat ira sibi videri, & non urgeat. Henn. d. 1. quæst. 5. ex comm.

Coroll. 3. In foro conscientiae non tenetur ad restitutionem sub mortali 1. Commodatarius, apud quem res aliena perit absque sua culpa v. gr. incendio, furto improviso &c. nisi pactum iniêrit assurationis. 2. Qui somno obrutus non extinguit candelam, unde oritur incendium. 3. Advocatus cadens causâ, si fecerit, quod solent docti & diligentes. 4. Qui grave damnum intulit actione tantum venialiter malâ: quia ubi injustitia formaliter levis, ibi levis obligatio. 5. Cujus animal intulit damnum, si ille non fuit in culpa; tenetur tamen in foro externo vel damnum compensare, vel animal dare. L. 1. ff. si quadrupedem.



## CAPUT II.

## De Restitutione ex impeditiōe boni.

*Ad quid teneatur impediens à bono ?*

**A**D restitutionem tenetur, quanti spes iniuste crepta altimatur: 1. Impediens à consecutione boni impedito ex Justitia debiti, sive vi vel fraude impediat, sive precibus vel consilio: *quia ledit Jus ad rem, quod habet impeditus.* 2. Impediens à consecutione boni, non quidem ex Justitia impedito debiti, justè tamen sperati, si impediat per vim, fraudem, aliūve modum injuriosum. *comm. DD.* Quia impeditus etsi non habeat Jus ad rem, Jus tamen habet, ut non impediatur modo injurioso, idque læditur.

## COROLLARIA CASUUM.

*Coroll. 1.* Ad restitutionem tenetur 1. Qui destruendo alterius sata, impedit messem. 2. Qui impedit, etiamsi sinè vi vel fraude, hæredem ab hereditate, legatarium à legato, emptorem à possessione rei emptæ &c. Qui dignum impedit vi vel fraude, ne consequatur Beneficium, ne fiat ei donatio, legatum &c. *And. à M. D.*

*Coroll. 2.* Impediens vi vel fraude à Beneficio, non tenetur impedito ad restitutionem. 1. Si dicta sua revocer, quando res adhuc integra. 2. Si petens planè est indignus. 3. Si dignus, ad nullam habet spem. 4. Si dignus est, & spem habet, at impeditur, ut conferatur digniori. *Less. num. 125.*

*Coroll. 3.*



*Coroll. 3.* Qui solis precibus Beneficium procuravit indigno, ad nihil tenetur competitoribus pignus, nisi officia conferantur per concursum; tenetur tamen Ecclesiæ vel Reipublicæ ad damna ex administratione indigni evenientia. Herinx d. 7. num. 29.

### CAPUT III.

#### De Restitutione ex injuria in bonis spiritualibus.

*Ad quid teneatur seducens?*

**Q**ui vi aut fraude aliquem induxit ad malum, vel retraxit à bono, tenetur ex Justitia procurare seducti emendationem, damni-que subsecuti reparationem. Scotus 4. d. 15. *quest. 3.* Quia injustè damnificavit.

*An sit restituendum acceptum ob turpem causam?*

Seductus acceptum ob turpem causam, opere impleto, non tenetur restituere, attento Jure naturæ. D. Thom. *quest. 62.* apud Less. Quia seducens sub conditione operis dedit, ergo seductus opere impleto datum fecit suum, ergo de Jure naturæ non tenetur restituere.

#### COROLLARIA CASUUM.

*Coroll. 1.* Falsam doctrinam retractare tenentur, quicunque dederunt.

*Coroll. 2.*

*Coroll. 2.* Qui alium sollicitat ad peccatum consilio tantum vel precibus, sollicitato ad nihil tenetur, quia peccat solum contra charitatem. Excipe, nisi Pater sollicitet filium, Dominus servum, Prælatus subditum. Metzger. Quia ex officio tenentur à malo reducere, magis non inducere.

*Coroll. 3.* Dans consilium Judici ad ferendam contra Cajum sententiam injuriam, non obligatur ex Justitia Judici: quia contra hunc non committitur injusitiam, relinquens eum in sua libertate. Obligatur tamen Cajo in solidum, scilicet in defectu Judicis: quia Cajo injuste nocuit.

*Coroll. 4.* Vi aut fraude Novitium retrahens à professione, Professum à Religione, tenetur ex Justitia reparare damnum tum Religioni, tum extracto. Lugo d. 9.

*Coroll. 5.* Consilio tantum vel precibus Novitium extrahens à Religione, nec huic tenetur, quia libere exit; nec illi: quia non habet Jus in bona Novitii, nisi in libera ejus voluntate. Extrahens Professum ad nihil tenetur professo; Lugo citat. Monasterio tamen ad indemnitatem. Communior contra Less. & Sanch. Quia tamen si professus utpote consentiens nullam patiatur injuriam, patitur tamen Religio, habens Jus, ne damnificetur.

*Coroll. 6.* Qui promisit etiam cum Juramento opus peccaminosum, implere non potest: quia Juramentum nequit esse vinculum iniquitatis; pretiumque tenetur restituere: quia non datur, nisi sub conditione operis.

*Coroll. 7.*

*Coroll. 7.* Meretrix acceptum pro meretricio (nisi acceperit à Religioso, milite, vel pupillo) potest retinere. *L. Affectionis. ff. de Donat.*

*Coroll. 8.* Quæ accepta sunt à testibus ad dandum falsum testimonium, a Judicibus ad ferendam injustam sententiam &c. Oportet impleri esse de Jure positivo restituenda (juxta aliquos danti, juxta alios pauperibus) affirmat Navarrus, negat And. à M.D. volens, leges oppositas non obligare ante Judicis sententiam.

*Coroll. 9.* Restituere tenentur, quod acceperunt: Judex pro ferenda sententia justa, vel in favorem unius, quando causa utriusque æquæ probabilis; inventor pro reddendo invento; qui novit alterius delictum, ut non revelet &c. Ratio: quia contra Justitiam exigitur pro eo, quod jam debitum est ex Justitia. *Lessi. cap. 14. num. 63.*

## CAPUT IV.

### De Restitutione ex injuria in bonis naturæ.

*Ad quid teneatur occisor?*

**I**njustus occisor aut mutilator per se tenetur  
 1. Ad compensandum damnum personale in usu vitæ aut membri. *Aliqui* 2. Ad compensanda damna realia in bonis fortunæ. *Omnes.* Ratio: quia injustè damnificans, quantum & in quibus damnificavit, tenetur damnum reparare saltem æquivalenter, & quantum potest.

COROL.

## COROLLARIA CASUUM.

*Coroll. 1.* Restituere tenentur 1. Mutilator expensas curationis, non verò hæredibus, si vulneratus moriatur, expensas funeris: *quia tamen aliquando fuissent faciendæ; nec totum lucrum cessans: quia detrahenda, quæ superites consump- sisset.* Less. cap. 9. 2. Deturpans puellam, si damnum patiatur in contrahendo matrimonio. 3. Hæredes occisoris ex ejus bonis, etiam si hic subeat pœnam talionis seu mortis; nisi huic pœnæ, ut solent, acquiescant hæredes occisi. *Navarr. ex comm.* Ratio: *quia debita realia afficiunt & comitantur bona debitoris.*

*Coroll. 2.* Occisor restituere tenetur 1. Occisi parentibus, uxori & prolibus; quantum eis debebat occisus & damnificavit occisor. *Omnes.* 2. In defectu præfatorum hæredum aliis hæredibus, sint qualescunque, saltem si eorum damnum adverterit. *Her. num. 73.* 3. Creditoribus occisi, qui habent actionem immediatè in hæredes occisi, & his deficientibus, in occisorem, ut satisfaciunt, quantum satisfecisset occisus laborando &c. *Layman cap. 6. contra Less.* 4. Pauperibus: quos alebat occisus. *Mastrius contra Lugo.* Ratio: *quia omnibus istis occisor intulit injuriam in bonis fortuna.*

*Coroll. 3.* Occisor non tenetur ad restitutionem 1. Quando ab occiso fuit provocatus: *quia non occidit injustè, utens jure naturali defensionis.* 2. Quando occisus occisori omnia condonavit & potuit. 3. Quando occisus equidem morte natu-

naturali vel aliâ iustâ mox fuit è medio tollendus. Herinx num. 78. Tunc occisor peccavit occidendo : quia injustè abstulit vitam ; non verò damificavit : quia aliunde mox è medio tollendus sine iniustitia , non amplius fuit damificatus ad emolumentum. Aliud est , si quis alium sciat ab alio iniuste interficiendum , is præveniens interficiendo , in se præoccupat obligationem restituendi.

## CAPUT V.

## De Restitutione ex stupro &amp; adulterio.

*Quibus & quantum restituere debeant stuprator & adulter ?*

**R**estituere debent illis & tantum , quos & quantum damificaverunt.

## COROLLARIA CASUUM.

*Coroll. 1.* Corruptor Virginis ad nihil tenetur , si nullum secutum sit damnum , vel si virgo spontè consenserit , vel si blanditiis & muneribus fuerit seducta. Sanch. Quia nulla ei facta injuria.

*Coroll. 2.* Qui virginem defloravit vi vel fraude absque promissione matrimonii , tenetur eam servare indemnem , vel ducendo uxorem , si ipsa velit , vel augendo dotem , ut possit æquè honestè nubere. Navarr. cap. 16. Ipsa tamen non tenetur stupratori volenti nubere : quia non  
*stupra-*



*stuprator, qui injuriam intulit, sed stuprata, quæ injuriam passa, habet optionem satisfactionis.*

*Coroll. 3. Qui virginem defloravit, verè vel fictè promittendo matrimonium, tenetur eam ducere; si verè promiserit: tenetur ratione promissionis; si fictè: tenetur ratione injulte deceptionis. Quid si deflorator sit disparis conditionis? Per se adhuc tenetur; si verè promiserit, vel si fictè & virgo istam disparitatem ignoraverit. Quid si deflorator ante deflorationem voverit castitatem aut Religionem? Iterum tenetur ad matrimonium: si puella voti fuerit ignara, & damnum huic illatum non sit aliter reparabile; quia votum non obligat cum notabili damno proximi in materia Justitiæ strictius obligantis, idque stante matrimonio (pro quo contrahendo consultant, etsi non necessarium, petere dispensationem) est sopitum, obligans tamen defloratorem in quantum comparabile cum debito matrimonii. Si verò defloratio sit occulta, & deflorata æquè honesto statu potiri queat, vel indebitè publicata per ipsam puellam, observandum erit votum & defloratæ constituenda dos. Her. d. 6. num. 88. Lessi & alii plerique DD. Excipe defloratorem non teneri ad matrimonium 1. Si fictio potuerit facilè adverti: quia decepta decipi voluit. 2. Si puella se finxerit virginem, vel postea prostituerit; quia in tali casu etiam sponsalia non obligant. 3. Si sequantur scandala vel alia gravia mala. 4. Si puella nolit, & tunc stuprator non tenetur ad aliud; quia aliud non promisit; nisi se finxerit divitem,*

tem, ut puellam deciperet; tunc enim ratione deceptionis tenetur ei satisfacere. Less. c. 10. d. 34.

Coroll. 4. Adulter & adultera, prole certò securâ, tenentur & quidem quisque pro rata, imò deficiente uno, quilibet in solidum ad reparanda damna marito & legitimis in alimentis & hæreditate ex suppositione spurii obvenientia. *Quid si adulter suppositionem dissuasit?* Diana eum exonerat, verius adhuc tenetur, si mulier aliter non potuerit: quia in necessitatem istam ab adultero consecta. *Quid in dubio, an proles sit ex adulterio?* Juxta Less. num. 39. tenentur ad nihil: juxta Layman cap. 14. & verius tenentur pro ratione dubii, quia constat de delicto; ergo non magis favendum est adulteris reis, quam marito innocenti.

Coroll. 5. Adultera plerumque non tenetur manifestare delictum spurio, minus aliis. Scot. d. 15. q. 2. Quia sibi obest, nec aliis prodest. Tenetur tamen quovis modo curare, ne hæredes legitimi ex suppositione illegitimi damnificentur; quod si impedire omnino non valet, sufficit poenitentia & prompta voluntas.

Coroll. 6. Qui proles exponunt, quamvis licet, tenentur refundere expensas, nisi factæ ab Orphanotrophio ad hujusmodi proles nutriendas fundato. Laym. cit.



## CAPUT VI.

## De Restitutione ex læsione famæ.

*Quis teneatur famam restituere?*

**O**mnis & solus ille tenetur ex iustitia famam restituere, qui illam per injuriam abstulit physicè aut moraliter. Ratio: *Quia læsio famæ est injuria personalis, ergo à persona injuriante, non ab heredibus reparanda. Quid si famam læserit quis merè materialiter, putans delictum esse publicum? Non peccavit lædendo, peccat non reparando: qui bonâ fide accepit alienum, cessante bonâ fide tenetur restituere; Sic & in præsentia.*

*Cui Fama restituenda?*

Fama restitui debet proximo, cui injustè ablata, etiam defuncto. Ratio: *Quia defunctus retinet jus ad famam, in fama superstes.*

*Quomodo Fama restituenda?*

Qui propalavit crimen verum, non potest dicere: *fui mentitus, quia mentiretur, sed dicat: male fui locutus: injustè infamavi: nolo dixisse quæ dixi &c.* qui verò imposuit crimen falsum, tenetur dicere: *se fuisse mentitum, errasse, rem non ita esse &c.* quia famam abstulit mentiendo; ergo reddere debet fatendo, *se mentitum &c.*

## COROLLARIA CASUUM.

Coroll. 1. Ad restitutionem famæ tenentur  
 1. Qui imposuit crimen falsum. 2. Qui injustè revelavit verum, sciens esse occultum. 3. Qui reve-

revelavit verum, putans esse publicum; at non tenetur ad restitutionem damnorum, si quæ secuta ante errorem cognitum, hæc enim non fuerunt volita. 4. Qui scripsit libellum famosum. 5. Auditores infamatoris, infamantes ulterius: quia & ipsi committunt injusitiam. Navarr. apud Less. 6. Superior audiens & non impediens subditum detrahentem. Ratio: Quia superior ex officio subditorum suorum detractionem & passivam & activam impedire tenetur; si non impediat, ipsemet subdito non restituente restituet. Si verò in absentia superioris subditus detrahat, superiori nequit imputari; neque hic obligatur restituere in solidum.

Coroll. 2. Ad restitutionem damnorum ex infamatione secutorum tenetur infamator, & post mortem ejus tenentur hæredes: quia obligatio est realis, afficiens infamatoris bona, adeoque eum, ad quem transeunt. Less. c. 11. d. 21.

Coroll. 3. A restitutione famæ excusat 1. Fius impossibilitas. 2. Iusta condonatio. 3. Infamationis oblivio. 4. Famæ recuperatio. 5. Mutua compensatio: equidem infamantem infamare per se non licet, si tamen infamaveris eum, qui te prius infamavit, tu licet non restituas illi, donec ille restituat tibi. 6. Crimen occultum, quod aliquibus dixisti: aliâ ratione evadens publicum. Her. num. 77.

## CAPUT VII.

## De Restitutione in bonis fortunæ.

*Quis restituere debeat bona fortunæ**& quæ ?*

**R**estituere debet, qui alienum aut detinet, aut injustè accepit, sive per se sive per alium. Res aliena restitui debet in se, si possit, aliàs in æquivalenti. Damnum compensari debet ad æqualitatem. *Omnes.* Quia aliàs non tollitur injustitia.

## COROLLARIA CASUUM.

*Coroll. 1.* Ad restitutionem in bonis fortunæ obligantur 1. Possessor bonæ fidei. 2. Possessor malæ fidei. 3. Damnificans & ad damnum cooperantes.

*Coroll. 2.* Non satisfacit, qui rem alienam, sciens dominum, dat pauperibus; vel sibi retinens orat pro domino: *quia hic præsumitur invitus.*

*Coroll. 3.* Per se loquendo res aliena adhuc existens eadem numero restituenda est; ad hanc enim Jus habet dominus ejus. Si non possit, dandum est æquivalens sive ejusdem sive diversi generis, v. gr. in rebus functionem suscipientibus, pecunia, frumento, vino &c. unum pro alio &c. non tamen aliquid inferioris ordinis v. gr. pecunia pro fama, hæc enim non est compensabilis illâ.



## CAPUT VIII.

De Restitutione à Possessore  
bonæ fidei.*Quis Possessor bonæ fidei ?*

**P**ossessor est vel bonæ vel malæ vel dubiæ fidei. Primus est, qui rem, quam possidet, inculpabiliter iudicat esse suam; Secundus, qui scit vel culpabiliter ignorat esse alienam; Tertius, qui dubitat, an sua sit, nec ne.

*Ad quid obligetur ?*

Possessor bonæ fidei, cognoscens rem esse alienam, tenetur eam gratis domino suo restituere, quantum extat vel in se vel in æquivalenti. *Communis T. T. Ratio:* Quia cessat bona fides, adeoque res statim restituenda est domino suo, cum verò Possessor bonæ fidei teneatur restituere solum ratione rei alienæ acceptæ, non tenetur ad plus, quam de re in se vel fructu suo extet.

## COROLLARIA CASUUM.

*Coroll. 1.* Possessor bonæ fidei tenetur restituere 1. Rem alienam. 2. Fructus ejus naturales: *quia res fructificat domino suo.* 3. Mixtos, deductis expensis, & æstimatione laboris. *Less. 4. 2.*

*Coroll. 2.* Qui vestem à fure donatam bonæ fidei attrivit, domino comparenti tenetur restituere vestem & pretium usûs, quantum factus ditior, parcendo propriæ; si vestem à fure emerit, nihil præter ipsam restituet, amittens pretium datum.

*Coroll. 3.* Qui bonâ fide rem emit furtivam, reddere potest eam furi, ut recipiat pretium, si aliàs non recepturus. Ita multi DD. apud Sporer p. 4. c. 2. contra multos alios. Ratio: Quia ad vitandum damnum proprium rem licitè reponit ac relinquit in statu, in quo ante erat. *Quid si malâ fide emerit sciens vel dubitans rem esse alienam?* Idem indulgent multi cum Sporer cit. negat Less. cum comm.

*Coroll. 4.* Possessor bonæ fidei non tenetur ad restitutionem 1. Factâ præscriptione: quia rem facit suam. 2. Si res perierit sive fortuito sive culpâ, aut sit consumpta, nec factus inde ditior: ubi enim nihil rei bonâ fide acceptæ restat, nihil est restituendum. 3. Si rem furtivam iusto preno empram, durante bonâ fide, iterum vendiderit eodem vel minori pretio; Si majori: tenetur restituere auctuarium, nisi fructus sit industrialis. 4. Si postea fiat dubiæ fidei, & factâ inquisitione remaneat dubium. Sbogar. Quia melior conditio possidentis.

## CAPUT IX.

### De Restitutione à Possessore malæ & dubiæ fidei.

*Ad quid obligetur Possessor malæ fidei?*

**P**ossessor malæ fidei tenetur restituere rem ipsam, si extet, aliàs æquivalens & omne interesse. Laym. ex commun. Quia violavit Iustitiam commutativam, rem alienam injustè accipien-

cipiendo vel detinendo; ergo non tantum rem ipsam vel eam non extante æquivalens restituere, sed & dominum indemnem servare tenetur.

*Ad quid Possessor dubiæ fidei?*

Accipiens rem dubiam animo, si non sua, reddendi domino, non peccat, & domino post debitam inquisitionem non comparente licite eam retinet & consumit; quod si postea dominus compareat, solvitur tenetur restituere, quantum factus est didior. Accipiens verò rem dubiam animo sibi retinendi, peccat contra Justitiam, teneturque premisso examine ad restitutionem totius, si inveniat, rem esse alienam; Si maneat dubium, tenetur ad restitutionem partis dubio proportionatæ, dividendo illis, qui in dubium veniunt, uni vel alteri plus vel minus pro qualitate dubii. *Ratio:* quia talis dubitans non potest retinere totum, cum injustè acceperit, nec tenetur restituere totum, cum remaneat illi sicut aliis Jus dubium. Sanch. Less. Laym. apud Sporer *Tract.* 4. c. 2.

**COROLLARIA CASUUM.**

*Coroll. 1.* Possessor malæ fidei debet restituere

1. Rem ipsam, quam subripuit ex incendio. *Sbog. n. 76.* vel æquivalens, si pereat apud ipsum quomodocunque, dum est in mora culpabili restitutionis.
2. Rei æstimationem, quam aufert injustè & consumit, non obtante, quòd periisset apud dominum aut ablata fuisset.
3. Rei

meliorationem, si exier, tum intrinsecam v. gr. bovem apud se impinguatum; tum extrinsecam, v. gr. modius frumenti valet 6. floren. tempore ablationis, & 9. tempore consumptionis, debet solvere 9. floren. si verò valuerit 9. & iterum 6. tempore consumptionis, ad 6. obligatur, nisi dominus ante vendidisset novem. Navarr. c. 17. 4. Rei deteriorationem, ut si bos pinguis factus sit macilentus. 5. Omnes fructus, quâ parte sunt naturales, etiam non exstantes, etiam quos non percepit, percepisset autem dominus rei, item quos percepit, & dominus non percepisset. Less. d. 17. Quia possessor malæ fidei tantum debet restituere, ut dominus rei ablatae vel damnificatae nullum patiatur damnum, nullumve amittat interesse.

*Coroll. 2.* Possessor malæ fidei non tenetur restituere 1. Si res aliena apud se pereat casu v. gr. domus incendio; equus morte naturali, quâ eadem certò apud dominum fuisset moriturus. 2. Si macet ovem jam morituram. Hen. n. 25. Quia in tali casu domino nullius est valoris.

*Coroll. 3.* Insuper peccat mortaliter Possessor dubiæ fidei, qui accepit rem animo retinendi, dubitans, an sit vendentis, donantis &c. resciscens esse furtivam tenetur ad restitutionem, tamen si pretium non sit recuperaturus. Spor. n. 134. Advertant, qui à quibuslibet personis præsertim filiis familias quælibet emunt suppellectilia.

*Coroll. 4.*

Coroll. 4. Quando constat, unum ex pluribus actione suâ intulisse damnum dubitatur autem, quis intulerit, tenentur singuli restituere pro ratione dubii: quia *Possessio stat pro delicto*, ergo prout singuli sunt gravati, debent concurrere ad restitutionem. Imò si damnum sit illatum ex mutuo consensu, tenetur quilibet in solidum, deficientibus aliis.

## CAPUT X.

### De Restitutione & cooperantibus ad damnum.

*Qui sint cooperantes ad damnum?*

**C**ooperantes ad damnum sunt, qui præter physicum damnificatorem concurrunt ad damnum. Alii sunt cooperantes positivè, ponendo actionem; alii negativè, non impediendo. Cooperantes positivè sunt *mandans, consulens, consentiens, palpo, recursum præbens, participans*. Negativè cooperantes sunt *mutus, non obstant, non manifestans*; cooperantur efficaciter, si ex cooperatione sequatur effectus.

*Ad quid obligentur Cooperantes positivè?*

Cooperantes positivè & efficaciter ad damnum, etsi seclusâ cooperatione inferendum, tenentur ad restitutionem, & quidem singuli in solidum, id est ad restitutionem totius, aliis, qui complices sunt, non restituentibus, si ex conspiratione in totum influxerunt damnum.



Ratio: quia omnis damnificans tenetur indemnizare, quantum damnificavit.

*Ad quid Cooperantes negativè ?*

Cooperantes negativè tenentur ad restitutionem, si damnum impedire debuerint ex Iustitia officii vel contractus; secus est, si tantum ex charitate. *Com. ex D. Thom. q. 62.*

### COROLLARIA CASUUM.

*Coroll. 1.* Cooperantes positivè & restitutioni obnoxii sunt 1. *Mandans* sive explicitè mandet sive implicitè, cum vel sine potestate; etiamsi erret mandatarius, occidens alium, quàm voluerit mandans: quia occisionis causa est mandatum; unde volenti auferre 50. suadens auferre 100. obligatur ad 50. 2. *Consentiens*: Unde suffragantes sententiæ iniquæ, electioni personæ indignæ &c. tenentur ad omnia damna inde sequentia; nec excusat ultimò suffragantem, quòd alii suffragia seu jam dederint, esto excusent Caj. Less. & nonnulli. Ratio: quia ad sententiam & electionem concurrit tam votum ultimum, quàm priora. 3. *Palpo*: qui adulando, laudando &c. efficaciter movet ad damnum. 4. *Recursum præbens*: qui rem ablatam injustè abscondit, & malefactorem ut talem recipit in malo confortaturus. 5. *Participans*: qui particeps est vel prædæ, partem recipiendo; vel iniquæ operationis, claves adulterinas efficiendo, excubias agendo, prædas deportando &c. *Hen. d. 4.*

*Coroll. 2.*

*Coroll. 2.* Restitutioni non sunt obnoxii 1. Mandans: si mandatum revocet, idque mandatario ante executionem innotescat. 2. Consulens: si consilium sit inefficax; vel si furi parato auferre à Petro 100. consulat, ut tantum auferat 50. secus est, si consulat, ut non à Petro 100. sed à Paulo auferat 50. 3. Recursum præbens: si malefactorem recipiat ut aliam personam timulo amicitiae, aut ex compassione. 4. Ratum duntaxat habens damnum, nomine suo factum. Herinx *d. 8. q. 3.* Ratio: quia damnificatio nequit illis adscribi.

*Coroll. 3.* Cooperantes negativè & restitutioni obnoxii sunt 1. Principes, Magistratus, Bellidux, ex culpa gravi non impediens furta, homicidia, spolia &c. 2. Consiliarius, Canoniceus, non impediens iniquam constitutionem, electionem &c. quando & quantum possunt. 3. Tutor non impediens damna pupillorum. 4. Pastores, famuli, custodes agrorum, sylvarum, piscinarum, gabellarum, & similes, qui non impediunt damna, quæ possunt & debent, aut fures vel defraudatores non manifestant: quia tenentur ex officio impedire damnum. *At quid de mulctâ, si poena sit statuta in venantes, lignantes, & custodes non accusent? eos teneri mulctam compensare, quidam affirmant ex Soto; negant Less Sy'v. &c.* Ratio: quia non habent in commissis dominum vel fiscum mulctâ dirare, sed solum sylvam custodire & damna avertere, quodsi habeant aliam commissionem ipsi attendant. *Quid*  
*si Pe-*

*si Petrus à fure ascipiat pecuniam, ut non clames? Si ad clamandum non fuerit obligatus, nec obligatur ad furtum compensandum. Herinx cit. num. 64.*

*Coroll. 4. Si plures furentur ex eodem ærario, piscina, sylva &c. Sed absque conspiratione, quilibet solum restituere debet id, quod abstulit.*

*Coroll. 5. In damnificatione lucrativâ, ut est furtum, 1. Debet restituere, apud quem res illa existit, vel malâ fide est consumpta. In non lucrativa, ut est incendium, si plures ad eam æqualiter concurrerint, æqualiter debent restituere, quilibet suam partem, & in defectu aliorum, totum; Si inæqualiter: obligatur 1. Mandans cum potestate. 2. Executor. 3. His deficientibus, cooperantes positivè, & post hos cooperantes negativè scil. mutus, non obstitans, non manifestans; damnum reparaturi, proportionaliter inter se dividendo. Sbogar cit. c. 8.*

*Coroll. 6. Restituente principaliter obligato, aut restitutione ei condonatâ, reliqui sunt liberi, non e contra: quia solum in principaliter obligato obligantur alii, & hu in defectu principalis satisfaciuntibus, tenetur iste restituere. Restitutione plenè condonatâ uni æqualiter damnificantium, hic ad nihil tenetur; condonatâ solum suâ parte, obligatur in solidum ad partes sociorum. Less.*

*c. 13. d. 8.*



## CAPUT XI.

## De Circumstantiis Restitutionis.

*Quis debeat restituere?*

**R**estituere debet, qui realiter læsit jus alterius sive physicè, sive moraliter injustè accinendo aut detinendo. Lædens solum intentionaliter, peccat quidem, non tamen est, quod restituat.

*Quid restituendum?*

Cuique suum ad æqualitatem.

*Cui restituendum?*

Debita simpliciter incerta ex delicto v. gr. furto restituenda sunt in pauperes vel pios usus, idemque probabilis est de incertis ex contractu vel re accepta tantum. 2. Debita certa domino suo, si mortuus, hæredibus. Res commodata, deposita, oppignorata &c. non domino, sed commodatario, depositario, hypothecario, his enim debetur respectivè, quæ talis. 4. Creditori suo, non creditoris creditori; valet tamen in foro conscientie & quandoque licet. *Sbogar tr. 141.*

*Quo ordine restituendum?*

Præferenda sunt 1. Debita realia personalibus in totum; sunt autem debita realia, in quæ immediatè tanquam sua creditor habet actionem; personalia sunt, quæ creditori parant actionem in personam, ut solvat. Adeoque  
res

res aliena in individuo v. gr. ex deposito extans, prius est restituenda domino suo; vel si huic non possit, pauperibus. Item res inventa, bonâ fide accepta, acquisita per furtum vel aliter injustè, est integra restituenda domino suo, priusquam debitis personalibus latis fiat: *quia dominium rerum ejusmodi mansit apud creditorem seu dominum, ergo illi soli debentur.* Item probabilius res empta reddenda est venditori, si nondum solutum sit pretium, etsi transierit in dominium emptoris. 2. Inter debita personalia præferenda sunt privilegiata v. gr. expensæ funeris, pharmacorum pretia, operariorum merces. 3. Hypothecata præferenda chirographiis, & hæc nudis. Inter plura autem hypothecata, priora tempore præferenda sunt posterioribus. 4. Inter nuda, præferenda sunt onerosa gratuitis, puta, debita ex contractu oneroso debitis ex gratuito v. gr. donatione, legato &c. maturata nondum immaturatis. Hæc omnia in totum, reliqua indifferenter pro rata parte debiti, servatâ proportionem Geometricâ. *Sporer c. 4. n. 23.*

#### *Ubi restituendum?*

Restituendum est in loco congruo, ut possessor bonæ fidei & dominus rei, restituente Possessore malæ fidei, maneant indemnes.

#### *Quibus auxiliis restituendum?*

Restituendum est expensis propriis, si restitutio debita sit ex injusta acceptione, expensis domini seu creditoris, si restitutio sit debita ex re accep-



accepta tantum; si verò debita ex contractu, tunc expensis illius, in cujus utilitatem factus est contractus. *Communis.*

### *Cur restituendum?*

Restituendum est ob honestatem Justitiæ; accedere potest motivum alterius virtutis. Si quis coactus nolens volens restituat, satisfacit quidem obligationi restituendi, peccat tamen ob pravam voluntatem non restituendi.

### *Quomodo restituendum?*

Restituere tenetur debitor periculo quandoque suo, quandoque creditoris: periculo suo restituit debitor, sibi que res perit in via 1. Si culpa sua gravi pereat. 2. Si remittat rem injustè ablatam & pereat, etiamsi non sit in causa. Ratio: Quia debitori ex delicto imputatur causa damni. Si enim rem non abstulisset, & injustè detinuisset, domino taliter non periisset. Rem debitam in individuo perire domino suo, verum est, quando perit sinè culpa debitoris; hic autem intervenit culpa: *quia injusta ablatio fuit causa & occasio interitus.* Periculo creditoris restituit debitor, eique res perit 1. Si nuncius ab ipso met creditore vel cum ejus consensu à debitore electus. 2. Si fideliter remittat rem, quam habuit sinè culpa. *Quid si res transferenda sit debita ex contractu?* Transferetur cum periculo creditoris, si remittatur eadem numero, quæ fuit accepta, ut fit in commodato, deposito &c. At cum periculo debitoris, si reddatur eadem

tantum in genere aut specie, ut sit in mutuo, emptione &c. Hinc si debitor remittat librum commodatum, & simul pecuniam ex mutuo vel emptione debitam, aufugiente nuncio aliàs fidei, tenetur ad restitutionem pecuniæ, non libri: *quia ista fuit sua, non liber; & res quæque perit domino suo.* Her. q. 6. ex comm.

### *Quando restituendum?*

Debita extra contractum restitui debent in affectu statim: nolens enim restituere, peccat; in re, quamprimum moraliter possunt; aliàs non restituens tenetur damnis ex injustè dilata restitutione secutis. Debita ex contractu restituenda, prout contrahentes convenerunt. Her. citat.

## CAPUT XII.

### *De Causis excusantibus à Restitutione.*

**C**ausæ excusantes, ut restituito licitè differri possit, sunt ignorantia, impotentia, damnum proprium, damnum alienum.

I. Ignorantia excusat, quando est inculpabilis aut facti aut Juris, ut si quis ignoret, quod res sit aliena, aut quod restituenda.

II. Impotentia excusat, quando debitor omnino non habet, unde solvat.

III. Damnum proprium excusat, quando debitor restituere nequit, nisi cum jactura animæ, corporis, famæ, aut bonorum temporalium; obligatur tamen 1. Si possit per tertium v. gr. per confessarium. 2. Si creditor indigeat, aliàs æquale

æquale aut maius damnum passurus: quia in pari causa prior est conditio possidentis.

IV. Damnum alienum excusat, si ex restitutione aut ipsi creditori, aut alicui tertio, aut communitati sit proventurum. His causis durantibus obligatio restituendi quasi dormit; ipsis verò cessantibus, denuo evigilat & reviviscit.

*Causæ excusantes, ut restitutio omnino omitti possit, sunt interitus rei, remissio creatoris, compensatio, autoritas legitima.*

I. Interitus rei in individuo debitæ excusat, si pereat sine omni culpa debitoris, isque sit bonæ fidei. Unde & qui rem alienam in extrema necessitate accepit & consumpsit, postea ad nihil tenetur; si verò ante eam acceperit iniuste, tenetur ad æquivalens. Her. q. 7.

II. Remissio creditoris excusat, si fiat 1. A potente remittere. 2. Liberè sine vi vel fraude; unde obligatus manet, qui remissionem iniuste extorquet, dicendo: non tibi solvam, nisi remittas dimidium &c. Sporer num. 84.

III. Compensatio excusat facta vel ipsi debitori: ut si creditor vicissim ei debeat; vel creditoris creditori: ut si debitor restituat creditoris sui creditori; vel creditori ipsi: ut si debitor creditori tantum donet, beneficium exhibeat &c. ex intentione ita satisfaciendi.

IV. Autoritas legitima excusat v. gr. per legem præscriptionis, & per justam Judicis sententiam. Huc refertur *cessio bonorum*, quando debi-

tor creditoribus omnia sua bona cedit, inter ipsos dividenda; cedens tamen in foro conscientiae reservare potest necessaria ad sustentationem, ad hanc enim quilibet ius habet, redeunte autem meliori fortunâ reliquum solvere obligatus manet: quia cessio bonorum excusat ob solvendi impotentiam; hac igitur cessante, cessat excusatio.

2. Ingressus Religionis, factâ cessione bonorum: nam monasterium non tenetur solvere ex bonis suis, & quidquid Religiosus acquirit, monasterio acquirit. Tambur. num. 12. Quod si tamen superior debitis gravatum & cum injuria creditorum profitentem scienter admiserit, tenetur dare licentiam, ut per opera statui suo proportionata satisfaciatur. Ratio: quia restitutioni obnoxium ponens in statu, in quo non est solvendo, solutionis curam gerere tenetur. Layman. Henn. Unde Novitius illicite ingreditur Religionem, si speret, quod uno vel altero anno manendo in sæculo possit debita solvere; secus, si deberet ad longum tempus expectare. Less. l. 2. c. 16. Alii aliter sentiunt apud Sporer c. 4. n. 100.

\*\*\*\*\*

## TRACTATUS VI.

De Contractibus in genere & in specie.

### CAPUT I.

De Natura Contractûs.

Quid Contractus & quotuplex?

**C**ontractus est duorum vel plurium in idem consensus, in uno saltem obligationem pariens.

riens. Dividitur 1. In gratuitum & onerosum. Gratuitus est, in quo pro accepto nihil rependitur, ut in donatione, testamento &c. Onerosus est, in quo aliquid datur & accipitur. Primus in uno contrahente parit obligationem, secundus in utroque. 2. In nudum & vestitum, de quibus infra. 3. In absolutum & conditionatum. Primus fit independenter, secundus dependenter à conditione, quâ non eveniente nec valet, nec obligat. 4. In explicitum, qui fit expresse, & implicitum, qui fit tacite v. gr. suscipiens officium Tutoris, Judicis &c. censetur titulo Justitiæ se obligare ad munia annexa.

*Qualis debeat esse consensus, ut valeat*

*Contractus.*

Debet esse 1. Promissorius verus. 2. Voluntarius & liber. 3. Sensibiliter expressus: quia homines solis sensibilibus inter se communicant. 4. Reciprocus, id est ex parte utriusque contrahentis; unde donatio, promissio ante acceptationem donatarii, promissarii, non sunt contractus. 5. Factus à persona habente rerum suarum administrationem. 6. Lege non prohibitus. 7. Circa materiam possibilem, & honestam: quia ad impossibile & inhonestum nulla obligatio. *Comm. DD.*

**COROLLARIA CASUUM.**

*Coroll. 1.* Invalidè contrahunt 1. Qui sistè.  
2. Qui errat vel decipitur circa substantiam rei, aut qualitates per se intentas & sub conditione



positas à se contrahente : quia deest consensus.

3. Qui ob turpem causam vel de re iniqua.

4. Religiosus sine consensu Prælati : quia non est sui Juris. 5. Pupilli & Minores de bonis im-

mobilibus vel mobilibus, *que servando servari possunt* ; etsi contrahant cum consensu Tutoris aut Curatoris, nisi etiam fiat interventu Judicis.

*L. 22. Cod. de administr. Tutor.* 6. Amentes & Ebrii:

*quia consensus non est voluntarius & liber.*

*Coroll. 2.* Valide contrahunt 1. Qui errat circa meras qualitates impulsivas, etsi error sit antecedens, dans causam contractui, vel proveniat ab altera parte contrahente, aut aliquo tertio : quia taliter contrahens absolute consentit in substantiam rei ; non consensisset quidem, si non errasset, de facto tamen consentit.

2. Qui ex metu gravi, etsi sit ab extrinseco injuste incussus : quia metus non tollit simpliciter voluntarium ; excipe sponsalia, matrimonium, professionem Religiosam ; non valent de Jure positivo, si fiant ex metu gravi ab extrinseco.

3. Filiusfamilias de bonis castrensibus & quasi castrensibus. Item pupillus & minorennis, si puberes aut pubertati proximi. Est autem pubes masculus annorum 14. Fœmella 12. Iste pubertati proximus ab anno 10. hæc à nono cum dimidio. *Her. d. 5. q. 3.*

*Coroll. 3.* Filiusfamilias impubes ex nullo contractu de bonis suis, etiam cum consensu patris, obligatur civiliter ; Pubes verò ex omni contractu, Patri etiam invito non præjudicante, obli-

ligatur & naturaliter & civiliter. Pupillus pubertati proximus, vel pubes & Minorennis seu minor annis 25. cum autoritate Tutoris contrahens, obligatur & naturaliter & civiliter; contrahens sine ista autoritate, non obligatur civiliter, quamvis alterum contrahentem obliget sibi in suum commodum; probabilius tamen obligatur naturaliter seu in foro conscientiae, quousque se beneficio restitutionis in integrum defendat. Sporer ex LL. variis. Ubi nota, aliud esse obligari *naturaliter*, aliud *civiliter*: primum est, obligari de Jure naturae & in foro interno; secundum, obligari de Jure positivo & in foro externo, ita ut in foro civili detur actio.

Coroll. 4. Contractus naturâ suâ solubilis rescindi potest 1. A decepto, deceptione proveniente ab altero contrahente. 2. Ab eo, qui contraxit ex metu gravi injustè incusso. Less. d. 6. Imò qui metum incussit, tenetur ante Judicis sententiam restituere id, quod ex contractu accepit, & omnia damna resarcire: quia *injustè vexans, injuriam intulit.*

Coroll. 5. Contractus invalidus non confirmatur Juramento: nequit enim firmari, quod non subsistit; Juramentum tamen est validum, nisi de re sit iniqua vel prohibita, debetque servari. Contractus Juramento confirmatus vel traditione, scripturâ, instrumento publico &c. dicitur *vestitus*, & parit obligationem civilem, nempe in foro civili dat actionem; quod non facit contractus nudus. Sbogar 17. 42. num. 12.

## CAPUT II.

## De Promissione &amp; Donatione.

*Quid Promissio & Donatio ?*

**P**romissio est gratuita fidei obligatio de re facienda in futurum. Donatio est liberalis rei collatio. *Communis.*

*Qualiter obliget Promissio ?*

Obligat de se ex fidelitate sub V. de voluntate promittentis etiam ex Justitia, si nimirum promittens ita voluerit sese obligare; & tunc de genere suo sub M. *Ex communi.* Quia stat penes promittentem ex Justitia se obligare, vel non; graviter, aut leviter.

## COROLLARIA CASUUM.

*Coroll. 1.* Promissio ex Justitia obligans in re gravi (qualis est juxta Navarrum, si sufficiat ad furtum mortale, at nimis rigide; juxta Stephan. à S. P. si duplo major) obligat sub M. Excipe nisi promittens voluerit obligari sub V.

*Coroll. 2.* Promissio non obligat 1. Si merè interna, facta homini, utpote non acceptabilis; secus si Deo, qui intuetur cor, statimque acceptat. 2. Si merè externa absque animo se obligandi. 3. Si non acceptata, eaque revocabilis est ad beneplacitum promittentis, & moriente promissario jus acceptandi, utpote personale, non transit ad illius hæredes. Si verò ante acceptationem moriatur promittens, & ante mortem ejus promissarius acceptare non potue-

potuerit, poterit post eam: quia gratia non extinguitur morte gratificantis, & heredes obligantur defuncti promissionem implere. 4. Si res promissa fiat illicita, vel promissario inutilis. 5. Superveniente notabili mutatione, qua stante promittens censetur, noluisse se obligare. 6. Si res in individuo promissa pereat; secus, si ex multis ovibus indeterminatè promissa sit una, & aliquæ pereant. *Sporer n. 72.* 7. Ob ingratitude, scilicet positivam, promissarii. 8. Ob non subsistentiam causæ principalis; sic cessat promissio ob paupertatem, si promissarius comperiatur revera non pauper.

*Coroll. 3.* Donatio est invalida 1. Facta à non habentibus dominium rei vel administrationem. 2. Quæ est bonorum omnium inter vivos, nisi ad pias causas; secus, si fiat causâ mortis. 3. Quantum excedit 500. solidos scil. aureos, qui faciunt 1000. Imperiales. *L. penult. C. de Donat.* Valer tamen, etiam quantum ad excessum, si insinuetur Judici, vel fiat ad pias causas, aut ædium reparationem, vel à Principe, aut Principi à privato, vel militibus à Belli Ducibus. *L. Sancimus. 34. Cod. de Donat.*

*Coroll. 4.* Donatio inter vivos est revocabilis 1. Quando est inofficiosa, nimirum si adimat liberis legitimam jure naturæ à parentibus debitam, aut parentibus media ad sustentationem à liberis subministranda. 2. Propter susceptionem prolis. 3. Ob enormem Donatarii ingratitudinem. Donatio causâ mortis revocatur

1. Quando transit mortis periculum. 2. Per mortem Donatarii. 3. Per solam Donatoris voluntatem, quæ sicut & testatoris juxta Juristas est ambulatoria usque ad vitæ supremum exitum. Her. q. 3.

### CAPUT III.

#### De Commodato & Deposito.

##### *Quid Commodatum & Depositum?*

**C**ommodatum est contractus gratuitus, quo res conceditur ad solum usum pro determinato tempore; si pro indeterminato tempore, donec revocetur, est precarium. Depositum est contractus, quo res alteri custodienda traditur, ut eadem gratis reddatur. Huc pertinet sequestrum, quo res aliqua, de qua lis est, eâ pendente deponitur apud tertiam personam, quæ vocatur sequester, postea tradenda victori. *Commun. DD.*

#### COROLLARIA CASUUM.

*Coroll. 1.* Obligationes Commodatarii sunt 1. Restituere rem numero & qualitate eandem. *Quid si perierit?* Suppositâ culpâ restituet in æquivalenti. 2. Præstare expensas ordinarias v. gr. pabulum æquo. 3. Re non uti, nisi ad usum concessum. *Sporer c. 8.*

*Coroll. 2.* Obligationes Depositarii sunt 1. Re depositâ non uti, licet tamen de præsumpto Domini consensu, si res non consumatur usu,

aut



aut saltem in eadem bonitate certò possit reddi, quandoque Dominus voluerit. 2. Eandem numero restituere, & quidem in loco, ubi accepta. *Sbogar iv. 58.* Quia dominium depositi manet apud deponentem, & huic restitui debet absque gravamine Depositarii.

## CAPUT IV.

### De ultima Voluntate.

*Quid ultima Voluntas, quæ species ejus?*

**U**ltima voluntas est dispositio de eo, quod quis fieri vult post mortem suam. Species ejus sunt: Testamentum, Codicillas, Legatum, Fidei-commissum, Donatio causâ mortis.

*Quid Testamentum, Codicillus &c.?*

*Testamentum* est ultima voluntatis dispositio solemniter facta cum hæredis institutione. Aliud est *scriptum seu clausum*, ad quod requiruntur septem testes legitimi, rogati, subscribentes & subsignantes. Aliud est *nuncupativum*, quando testator coram totidem testibus exprimit nomen hæredis, & quæ vult; solet tamen plerumque à Notario Publico redigi in scripturam seu Instrumentum publicum. *Codicillus* est certa dispositio, quâ sine hæredis institutione aut revocatione quædam in testamento mutantur, addendo, vel minuendo. *Legatum* est quædam testatoris donatio, ab hærede præstanda. *Fidei-commissum* est, quando testator fidei hæredis sui ali-

E 5

quid

quid committit tradendum alteri, idque vel statim vel post mortem fidei-commissarii.

*Qualiter obliget Testamentum ?*

Testamentum, non privilegiatum, sine solemnitatibus juris non obligat in foro externo, & factum ad causas profanas probabilius nec in foro conscientiae : quia *L. Si quaramus. 4. ff. de test. dicitur infectum, nullum &c.* In hoc tamen obligat factum ad causas pias, modò adsint illa, quæ jus naturæ exigit ; nimirum ut certò constet de voluntate defuncti. Ratio : quia potestas civilis nequit impedire ea, quæ spectant ad salutem animarum & obveniunt Ecclesiis, locisque piis. Herinx d. 2. q. 4.

COROLLARIA CASUUM.

*Coroll. 1.* Legatum est nullum : 1. Si Legatarius putetur vivus & sit mortuus, vel moriatur ante Testatorem. 2. Cessante fine principali-ter intento : quia hæc censetur mens Testatoris. 3. Si hæres nolit acceptare hæreditatem. *L. Si nemo. ff. de test. tutela.* Nam ruente principali, ruit accessorium. Excipe legata ad pias causas, his præjudicare nequit hæres. 4. Conditionatum, non impletâ conditione ; nisi impossibilis sit aut turpis, quæ habentur pro non apposis. Hen. q. 7.

*Coroll. 2.* Testari non possunt 1. Impuberes, etiam ad pias causas, amentes & ebrii. 2. Filius familias pubes ; nisi de castrensibus & quasi castrensibus. Item de adventitiis, sed solum ad pias causas. 3. Clerici quoad partem fructuum sustentata-

stentationi superfluam: quia non est ipsorum; Item Jus prohibet. cap. ad hac de testam. 4. Religiosi professi, etiam Priores & Abbates, utpote non habentes Dominium; habent hoc Novitii, ideoque testandi sunt capaces. 5. Usurarii publici, Hæretici, damnati ad mortem, etiam civilem, id est exilium, triremes vel perpetuos carceres. Less. d. 4.

Coroll. 3. Hæredes institui non possunt 1. Fratres Minores de Observ. & Capucini. Clement. exivi. de verbor. significat. Possunt tamen bona immobilia relinqui alicui tertio cum onere vendendi, & in Fratrum necessitates expendendi loco eleemosynæ. S. Congreg. 1590. 2. Qui non possunt testari ob delictum, ut supra. 3. Filius spurius à Patre, & probabilius nec à Matre. Filius naturalis institui potest hæres ex assê à Patre & Matre, si desint hæredes necessarii; ubi verò sinè testamento moritur Pater & Mater, succedit ab intestato Matri in omnibus, Patri in sexta parte bonorum. Her. ex variis LL. ubi

Nota 1. Quadruplicis generis esse filios nempe legitimos, legitimatos, naturales & spurios: Legitimi sunt, qui nati ex matrimonio vero vel saltem bonâ fide contracto Legitimati, qui per matrimonium subsequens habentur tanquam legitimi. Naturales dicuntur inter quorum parentes tempore conceptionis & natiuitatis nullum erat impedimentum dirimens matrimonii; Spurii verò, quando tale impedimentum intercessit.

Nota 2.

*Nota 2.* Hæredes esse triplicis generis nempe ab intestato, necessarios & extraneos. Hæredes *ab intestato* dicuntur, qui succedunt, nullo existente testamento vel invalido. *Necessarii* dicuntur, qui non nisi ex causis legitimis possunt exhæreditari; debentur autem ipsis de Jure non omnia bona defuncti, sed pars legitima, eaque quoad descendentes est tertia pars bonorum, vel si plures sint, quàm quatuor, dimidia, ex æquo inter illos dividenda. *Novell. 18. c. 1.* Sed qui sunt hæredes necessarii? Respectu Parentum sunt descendentes, nimirum filii, his deficientibus, Nepotes, deinde Pronepotes &c. Respectu filiorum in defectu descendantium sunt ascendentes, nimirum Pater & Mater, deinde Avus &c. Unde ab intestato 1. Succedunt descendentes legitimi, ut supra. Ubi tamen Nepotes repræsentant personam Patris sui defuncti, succedunt avo cum patruis, non tamen per capita sicut patruj, sed sic, ut omnes filii unius patris constituent unum caput. 2. In defectu descendantium succedunt ascendentes, & in defectu horum collaterales usque ad decimum gradum. Denique *hæredes extranei* sunt, qui non de familia & liberè à testatore instituuntur.

*Coroll. 4.* Testamentum potest revocari, quamdiu vivit testator; nisi sit Religiosus professus, is enim abdicavit dominium. *Quid si juraverit se non revocaturum?* Adhuc revocat validè, non licitè. *Sbogar tr. 155.* Is enim non agit contra Justitiam, utpote factò Juramento retinens rei testa-

testatæ dominium, sed solum contra Religionem. 2. Si testamentum impleri nequeat secundum mentem testatoris defuncti, mutari potest ab Episcopo, si sit ad causas pias; à Magistratu, si sit ad profanas.

## CAPUT V.

### De Emptione & Venditione.

#### *Quid Emptio & Venditio?*

**E**mptio est pactio pretii pro merce, Venditio autem pactio mercis pro pretio.

#### *Quid requiratur ad validè emendum vel vendendum?*

Ad validè emendum & vendendum requiruntur 1. Merces seu res, quæ sint vendentis. 2. Pretium, quod ementis. 3. Pactio, quæ legitima.

#### *Quid ad licitè?*

Ad licitè emendum & vendendum requiruntur res sinè vitio occultato, pretium justum & pactio sinè fraude. *Omnes.*

### COROLLARIA CASUUM.

*Coroll. 1.* Emptio est illicita 1. Sinè manifestatione pretii simplici venditori incogniti. 2. Sinè solutione intrà laritudinem pretii iusti. 3. Si minoris ematur, præcisè ob solutionem anticipatam. *Commun.* Quia non servatur æqualitas, quæ servanda, inter rem & pretium. Est autem duplex



duplex pretium: unum *legitimum*, quod à lege vel superiore taxatum; ultra hoc non potest res iustè vendi, infra tamen emi. Aliud est *naturale* seu *vulgare*, quod ex communi hominum ætimatione constitutum est; à quo patitur latitudinem pretii infimi, medii, & summi. *Infimum* est, infra quod non potest res iustè emi. *Summum* est, supra quod non potest res iustè vendi. *Medium*, supra quod iustè potest res vendi usque ad summum, & infra emi usque ad infimum.

*Coroll. 2.* Venditio est illicita 1. Sine mentione de vitio occulto, & occultans tenetur ad omne interesse, si emptor damnificetur, v. gr. Si ex ove morbida inficiantur alæ. Si verò vitium sit patens, & res non plus vendatur, quàm valet, nulla sit injuria. 2. Si res plus vendatur, quàm in se valeat; excipe, nisi merces sint subhastatæ, & publicè vendantur plus offerenti; vel certæ accedant circumstantiæ. 3. Si plus vendatur præciè ob dilatam solutionem, vel supra pretium legitimum seu taxatum. 4. Si pharmacopola vendat *quid pro quo*, nisi certus sit de æquivalentia. 5. Si mercator vendat pretio infimo, sed minorem tradat mensuram; aut fraude inducat ad emendum pretio summo. 6. Si res uni vendita vendatur alteri. Tradenda tunc est priori emptori; si tradita sit posteriori, prior habet Jus ad rem & actionem in venditorem. *Less d. 4. & seq.*

*Coroll. 3.* Venditio rescindi potest 1. Mutuo consensu. 2. Propter læsionem ultra dimidium,  
etiam

etiam in foro externo. 3. Per restitutionem in integrum, quæ est reductio in pristinum statum, & competit minoribus 25. annis, Ecclesiis &c. ex contractu latis, estque intra quadriennium à tempore lationis petenda. 4. Per retractum gentilitium, qui est jus proximioris consanguinei ad rescindendam venditionem rei immobilis oblato pretio, quo ab extraneo vel remotiore consanguineo res fuit emptæ; fieri debet intra annum & diem. 5. Per evictionem, quæ est rei suæ ab altero possessæ recuperatio; differt à vindicatione: quod hæc sit actio personalis, ista realis. *Plat. c. 4. §. 6.*

*Coroll. 4.* Famulus non potest sibi retinere, quod ultra pretium præscriptum accipit, rem Domini pluris vendendo; aut retinet, minoris emendo. *Sporer n. 36.* Idem est de quovis alio, nomine alterius emente aut vendente. *Sporer in l. c. 5 n. 36.* Ratio: quia totum pretium datur pro re, ergo Domino rei, & tota res, quantum iuste valet, valet Domino suo. Item qui suscipit nomine alterius emere aut vendere, tacite promittit per moralem diligentiam utiliter rem alterius gerere, emendo aut vendendo; ergo tunc nihil sibi acquirit. Excipe, nisi emens aut vendens extraordinarium adhibeat laborem & industriam, cui respondeat illud plus in venditione acquisitum, & minus in emptione datum. *Quid si habens rem nomine alterius vendendam pretio taxato, eo emat sibi? Emit licite, si adhibita diligentia non potuerit habere, nisi pretium à Domi-*

Domino taxatum; & postea vendens pluris, illud plus facit suum, imò totum pretium: *quia accepit pro re jam sua, quàm verè priùs emit & solvit autolvere intendit. Sporer citat.*

*Coroll. 5.* Licet emunt & vendunt pretio currente, emptor sciens pretium mox augendum, & venditor sciens minuendum. Item emptioni vel venditioni licet apponunt pactum redimendi vel retrovendendi; modò augeatur vel minuat pretium juxta oneris gravitatem, & absit contractus Moharra; ille enim, quo volenti mutuum merx aliqua venditur pretio summo, & statim paratâ pecuniâ redimitur infimo, pallium est usuræ.

*Coroll. 6.* Res absolute & in individuo vendita, etsi necdum tradita, nec soluta, emptori perit, eique fructificat; Si verò sit indeterminata in individuo, vel determinata solum in toto, cujus est pars, v. gr. tres oves ex grege, perit venditori. *L. quod sape. 35. ff. de contrahenda emptione.*

## CAPUT VI.

### De Negotiatione & Monopoliis.

*Quid Negotiatio? An licita?*

**N**egotiatio est, dum quis emit rem eo animo, ut rursus vendendo lucretur. Est per se licita, prohibita tamen Clericis & Religiosis. *Cod. secundum. 6. ne Clerici vel Monachi.*

*Quid*

*Quid Monopolium? An licitum?*

Monopolium est, dum unus vel plures faciunt, ut soli aliquid vel certo pretio vendant. Licitum est auctoritate Principis. Layman n. 42.

**COROLLARIA CASUUM.**

*Coroll. 1.* Non est illicitum Clericis & Monachis 1. Habere agros proprios & fructus vendere. 2. Fabricare auctoritate v. gr. horologia, cruces, picturas & alia hujusmodi postea vendenda, modo non publice & aperta officina. 3. Animalia in suis prædiis facere & facere nata vendere, greges nutrire, & ex lacte, lana &c. lucrum reportare. Ratio: quia non intervenit negotiatio proprie dicta.

*Coroll. 2.* Monopolium est illicitum, saltem contra charitatem 1. Dum aliqui conveniunt de non emendis aut vendendis mercibus nisi tali pretio. 2. Dum unus vel pauci coemunt merces vel frumenta, postea vendituri maiori pretio, quam venderentur cessante monopolio. 3. Dum aliqui impediunt merces introduci in urbem, ut suas distrahant carius. Less. d. 21.

**CAPUT VII.**

**De Mutuo & Usura.**

*Quid Mutuum?*

**M**utuum (quasi ex meo tuum) interdum significat rem, quæ mutuò traditur, interdum contractum: Mutuum ut contractus, est ille,

ille, quo rei alicujus numero, pondere vel mensura constantis dominium transfertur in alium cum obligatione restituendi similem in specie & qualitate. Hinc mutuo tradi possunt pecunia, butyrum, frumentum, oleum, & aliæ res fungibiles, quarum una reddi potest & solet pro alia v. gr. pecunia pro pecunia, frumentum pro frumento.

### *Quid Usura?*

Usura sumitur quandoque pro lucro immediate proveniente ex mutuo; quandoque pro contractu, & est ille, quo aliquid pretio æstimabile exigitur ultra sortem præcisè vi mutui.

### *Quotuplex Usura?*

Alia est formalis & aperta, alia virtualis & palliata: prima provenit ex mutuo formali & explicito, v. gr. mutuo 100. ut reddas 100. & 6. Secunda ex mutuo virtuali & implicito, nimirum in aliis contractibus imbibito v. gr. depono apud te 100. datâ facultate eis utendi, ut post annum reddas 100. & 5. ubi usura contegitur pallio *depositi vel quasi*.

### *Usura an & quale peccatum?*

Usura tum aperta, tum palliata est ex genere suo peccatum M. quia prohibita omni jure. Less. c. 20.

### *Usurarii Obligatio & Pæna.*

Usurarius, sive acquirat dominium usuræ, sive non, tenetur ad restitutionem; notorius est infamis, non debet absolvi, nec admitti ad com-



munitionem, nec sepeliri in loco sacro, nisi restituerit. *Ex variis Can. apud Layman c. 16.*

### COROLLARIA CASUUM.

*Coroll. 1.* Mutuator tenetur 1. Tradere rem absque vitio occulto. 2. Non repetere ante tempus præfixum, & sinè usura.

*Coroll. 2.* Mutuatarius tenetur 1. Non repetere mutuum ab usurario, nisi urgente necessitate; aliàs cooperatur peccato. 2. Reddere tempore præfixo; nisi sit filiusfamilias sub patria potestate: qui mutuum sinè consensu Patris accipiens pecuniam non tenetur, nec Parentes ejus, restituere, probabiliùs etiam in foro conscientiæ. *L. 7. & 9. ff. de Scto. Macedon.* Excipe: nisi filius bona habeat castrensia, vel publicè putabatur sui Juris, vel pecunia sit versa in utilitatem Patris, vel hic debuisset eam suppeditare. *Leff. d. 2.* Item pupillus factus major non tenetur solvere mutuum à tutore acceptum, nisi creditor probet in ejus utilitatem esse conversum. *Comm. ex l. 3. Cod. quando ex facto tutoris.* 3. De omni casu fortuito, si quo mutuum pereat: quia illius Dominus est. 4. Rem restituere absque mutuantis damno.

*Coroll. 3.* Mutuator licitè aliquid, non plus æquo, accipit ultra sortem titulo lucri, aliàs cessantis, vel damni emergentis, & ob periculum fundatum sortis amittendæ. *Herinx q. 2.*

*Coroll. 4.* Mutuatario licitè imponitur poena conventionalis, si tempore statuto non reddi-

derit mutuum; solvenda est interveniente culpa, aliàs non.

*Coroll. 5.* Usura est 1. Exigere aliquid supra sortem tanquam debitum ex gratitudine. 2. Exigere aliquid propter laborem in numeranda pecunia; vel quia te obligas non repetere sortem ad certum tempus, aut prorogas tempus restitutionis faciendæ. 3. Mutuare, ut mutuarius tuas emat merces, tuos colat agros, et si pro pretio: quia imponitur onus. 4. Mutuare pecuniam, ut tempore messis solvatur in frumento; quia fit contra rationem mutui. Tambur. aliq. apud Sporer. Montes pietatis (qui sunt cumulus pecuniarum ad subveniendum indigentibus mediante mutuo, dato modico pretio pro ministrorum sustentatione) vacant usurâ, approbati à variis Pontificibus.

## CAPUT VIII.

### De Censu, Cambio, & Contractu

#### Societatis.

#### Quid Censu?

**C**ENSUS est Jus percipiendi certis temporibus pensionem aliquam ex re aut persona alterius fructiferâ. Sumitur etiam quandoque pro contractu, quo Jus percipiendi pensionem emittitur & venditur; quandoque pro pensione ipsâ.

#### Quotuplex Censu?

Unus est *reservativus*: quando quis alteri gratiis vel modico pretio tradit rei suæ v. gr. agri domi-

mi-

minium utile & directum, reservato sibi Jure certam pensionem ex ea quot annis percipiendi. Alius est *consignativus*: quando quis, retento rei suæ usu & dominio, consignat alteri pensionem solvendam, vel in fructibus, & dicitur *Census fructuarius*; vel in pecunia; & dicitur *pecuniarius*. Si census fundetur super re v. gr. domo vel agro &c. est *realis*; Si super persona, habente tamen redditus, vel lucrante, est *personalis*; Si duret semper, dicitur *perpetuus*; Si possit redimi, vel ex parte venditoris, restituendo pretium, vel ex parte emptoris, pretium repetendo, vel ex parte utriusque, ut liceat Censuistæ pretium reperere, & censuario reddere, dicitur *redimibilis*; Si secus, *irredimibilis*, qui tutissimus. Accipiens censum vocatur *censuista*; dans, *censuarius*.

*An Census sit licitus?*

Licitus est census *realis*. *Comm. TT. & Canon.* Ratio: quia Jus percipiendi fructus v. gr. ex prædio, vel eorum loco annuam pensionem, justo pretio emitur, vel aliter constituitur; ergo fructus vel annua pensio licite recipitur. Licitus etiam probabilissimè est census *personalis* super personæ industria collocatus. Ratio apud Less. est: Quia sicut Jus percipiendi aliquos fructus ex alterius prædio est pretio æstimabile, ita etiam Jus percipiendi aliquid de lucro personæ lucrantis industria; & sicut Dominus prædii potest vendere Jus percipiendi aliquos fructus ex suo prædio, ita homo industrius potest vendere Jus percipiendi aliqua lucra ex sua industria. Unde

G 3

pro-

probabiliter licitus est census germanicus accipiendi. §. Pro 100. census, inquam, personalis utrinque redimibilis cum assecuratione capitalis & lucri: modò fundetur super personæ industria & lucro, ut census seu pensio accipiat non ratione pecuniæ datæ in se, sed ratione juris percipiendi §. ex personæ lucro, ratione juris istâ pecuniâ nimirum 100. florenis empti; quod Jus eâdem pecuniâ, si reddatur & recipiatur, redimi & retrovendi potest, sicut in aliis emptionibus. *At multi non sciunt hunc modum?* R. Sciunt implicite & in consilio, volentes contrahere juxta praxin licitam. Sporer Tr. 6. n. 26.

*Quid Cambium? An licitum?*

Cambium est contractus, quo pecunia permutatur pro pecunia, cum lucro campforis. Ex Cambio reali (exclue fictum) tum minuto seu manuali, tum locali seu per literas licitum est lucrum: quia datur pro labore & expensis Campforis, seu ratione moneta commodioris, vel magis currentis &c.

*Quid Contractus Societatis?*

Est conventio plurium partem suam, nimirum pecuniam, rem, vel industriam conferentium ad negotiationem in commune lucrum; est de se licitus. Layman. cap. 18. 19.

## COROLLARIA CASUUM.

Coroll. 1. Ad centum requiritur 1. Res censui subjecta ex se fructifera: quia in emptione census, pecunia

*cunia datur pro parte fructuum, vel lucri persona lucrans.* 2. *Emptio & venditio: aliàs esset mutuum, & pensio esset usura.*

*Coroll. 2.* Censui realis perit pereunte re, super qua est fundatus; transeunte illà ad alium, transit cum illa.

*Coroll. 3.* Ad Contractum Societatis requiritur 1. Ut fiat in negotiatione honesta. 2. Ut singuli Socii conferant vel rem vel industriam. 3. Ut quilibet Socius regulariter sit expositus periculo perdendi; communiter tamen contrarios apud Less d 3. admittitur contractus triplex cum eadem persona, nempe contractus societatis, & assicurationis sortis & venditionis lucri certi pro incerto; requiritur autem omnino, ut pecunia verè detur ad negotiationem, nimirum verè negotiaturis; deinde ut dominium ejus maneat apud dantem, ne sit mutuum; denique ut lucrum certum peritum sit proportionaliter minus, & lucrum sociorum incertum speratum majus, ad compensandum periculum sortis in se susceptum & labores. 4. Ut in partitione lucri & sortis serveretur æqualitas Geometrica; quatenus quilibet socius tantum accipiat, quantum proportionaliter contribuit. Lugo & alii.





## CAPUT IX.

## De Locatione &amp; Conductione, Emphyteusi &amp; Feudo.

*Quia Locatio & Conductio?*

**L**ocatio est contractus, quo ad certum tempus infra decennium conceditur usus vel fructus rei aut personæ pro pretio. Dicitur: *Usus vel fructus rei aut personæ*; quia locantur res tum mobiles, tum immobiles ratione usus vel fructus, v. gr. domus, ager &c. Item personæ rari ne opificii vel servitii. Conductio est contractus, quo usus ille vel fructus accipitur.

*Quia Emphyteusis & Feudum?*

Emphyteusis est contractus, quo in perpetuum vel saltem ad decennium concedatur rei immobilis dominium utile sub onere pensionis realis. Feudum vero est contractus, quo conceditur res immobilis quoad dominium utile sub onere obsequii personalis. Sporer c. 7. n. 17. Feudarius seu Vassallus non præstans homagium perdit feudum; Emphyteuta pensionem non solvens per biennium, si Emphyteusis sit Ecclesiastica, vel per triennium, si sit secularis, perdit rem Emphyteuticam cum omnibus meliorationibus.

## COROLLARIA CASUUM.

*Coroll. 1.* Obligatio locatoris est 1. Aperire vitium rei locatæ. 2. Solvere expensas ad rei loca-

locatæ conservationem necessarias; nisi conductor in se assumpserit onus expensarum ob minus pretium. 3. Conductorem non expellere ante elapsum locationis tempus, nisi in casibus à Jure exceptis, qui sunt 1. Si biennio integro non solvat pensionem. 2. Si ob casum improvisum domus v. gr. locata, utibus Domini sit necessaria, aut reparanda. 3. Si conductor in re locata malè versetur. Layman. *cap. 22.*

*Coroll. 2.* Obligatio conductoris est 1. Re locatâ non uti, nisi ad usum concessum. 2. Eam non deferere ante elapsum locationis tempus. 3. Eam locatori servare integram. 4. Solvere pensionem. Si verò uti frui non poterit absque sua culpa, liberatur; Si magna incidat sterilitas, minuendum est de pensione pro rata sterilitatis. *cap. propter sterilitatem. de locata.*

## CAPUT X.

### De Ludo & Sponsione.

*Quid Ludus? An licitus?*

**L**udus est contractus, quo ludentes inter se conveniunt de pretio victori solvendo. Per se est licitus. *Ex communi.* Sponsio est contractus, quo duo de veritate, aut rei alicujus eventu certantes aliquid exponunt, obtinendam ab eo, qui veritatem fuerit assecutus. Est licita; modo absit fraus, fiatque super re dubia & honesta. *Communi.*

## COROLLARIA CASUUM.

*Coroll. 1.* Ludus est illicitus 1. Si sit prohibitus; est autem prohibitus tam Laicis, quàm Clericis ludus, qui alearum nomine venit, utpote ludus tesseraarum, taxillorum, & chartarum. Quantum ad Laicos prohibitio non est in vigore; quantum ad Clericos est innovata in *Trid. Sess. 22. c. 1. de Reformat.* Excipiuntur colludentes recreationis causâ, modeste, privatim, pretio modico. 2. Si ludens exponatur perjuriis, rixis &c. 3. Si pecunia ad familiæ sustentationem sit necessaria. 4. Si committantur fraudes.

*Coroll. 2.* Ludens lucrum non facit suum 1. Si lucretur à Religioso vel filiofamilias, non potente alienare; vel ab injustè ad lutum coacto; vel utatur fraudibus insolitis. 2. Si apponat moneram malam, vel de qua non potest disponere. 3. Si ladar creditò, habens animum non solvendi. Ratio: quia debet esse aequalis colludentium conditio; qui non potest perdere, non potest lucrari, & vice versâ.

*Coroll. 3.* Nulla est Sponsio 1. Si quis spondeat, se victurum bibendo; quia est de excessu illicito. 2. Si unus spondens sit certus de re: quia debet esse aequalitas inter spondentes, ut quilibet possit perdere. Si tamen incertus, non obstante alterius certitudine, spondere velit, nulla sit ei injuria.

CAPUT XI.

De reliquis Contractibus.

*Quid Assesuratio & Fidejussio?*

**A**ssesuratio est contractus, quo aliquis rei alienæ periculum in se suscipit, obligando se ad eam compensandam, si perierit. *Fidejussio* autem, quo suscipit obligationem alterius debiti solvendi, si debitor ipse non solverit. *Ex communi.*

*Quid Pignus & Hypotheca?*

*Pignus* est, quando debitor tradit creditori rem aliquam in securitatem debiti. *Hypotheca* verò, quando creditori pro debito obligat rem suam immobilem, sed non tradit. *Ex communi.*

COROLLARIA CASUUM.

*Coroll. 1.* Assesurans, qui scit rem esse in tuto, inique petit pretium, idque non facit suum.

*Coroll. 2.* Fidejussor accipere potest pretium pro fidejussione juxta periculum, quod subit. Debitore non solvente, obligatur debitum solvere, probabilius etiam ante Judicis sententiam. Si plures sunt fidejussores, omnes tenentur in solidam, & debitor tenetur singulis pro damno. *Sporer cap. 7. sect. 4.*

*Coroll. 3.* Obligatio debitoris est 1. Rem hypothecatam uni, non obligare alteri; nisi ex ea satisfieri possit utrique. 2. Non surripere pignus. 3. Redimere pignus. 4. Solvere debitum pereunte pigore absque culpa creditoris.

*Coroll. 4.*

*Cor. II. 4.* Obligatio creditoris 1. Pignore non uti contra voluntatem Domini; oppignorare tamen potest alteri, imò vendere, si non redimatur elapso tempore in pactum deducto, at sibi appropriare non potest tanquam poenam legis committioriae: quia ultra solutionem debiti acciperet pignus, quod est injustum. 2. Fructus pignoris, si quos percipiat, computare in sortem sive solutionem: Usurarius enim regulariter est contractus Antichristeüs, pignore utendi & fruendi, donec debitum ex integro sit solutum. Pignus datur ad securitatem debiti, non ad usum-fructum; vel certe creditor fructus computare debet in solutionem debiti. Layman cap. 30.

## CAPUT XII.

### De Justitia distributiva.

#### *Quid Justitia distributiva?*

**E**st illa: quæ officia, præmia & alia communitatis bona distribuit secundum cujusque merita, tributa verò & alia communitatis onera imponit secundum cujusque facultates.

#### *Quomodo lædatur?*

Læditur acceptione personarum (quæ ex genere suo mortalis) Officia, Beneficia, bona communia & onera injustè distribuendo illis, quibus non debent, vel in toto, vel in tanto. *Comm.*

#### *Ad quid teneatur lædens?*

Ecclesiæ vel Reipublicæ, si hæc vel illa per electionem aut promotionem indigni sit damnific-



nificata, tenetur ad indemnizationem, digno præterito ad nihil: quia hic non habet Jus strictè dictum, habet illa: & Justitia distributiva est & obligat primario in bonum communitatis, non partium.

### COROLLARIA CASUUM.

*Coroll. 1.* Est contra Justitiam distributivam P. M. 1. Ad officia sæcularia assumere indignum, imò omnibus paribus minus dignum relictò digniore. Less. c. 32. d. 3. Licet tamen officia sæcularia v. gr. officium Prætoris, Judicis, Consilarii &c. vendere, modò vendantur dignioribus aut saltem dignis pretio modèrato, atque ob necessitatem vel utilitatem Reipublicæ. D. Thom. *Opusc. 21. ad Ducissam Brabantia.* 2. Beneficia Ecclesiastica (quæ sunt Jus perpetuum percipiendi fructus ex bonis Ecclesiasticis ob aliquod officium spirituale, autoritate Ecclesiæ constitutum) conferre indignis, aut in concussu dignorum & digniorum dignis, per hunc dignioribus acquisito jure. *Trid. Sess. 24. c. 1. de Reformat.* Conferri possunt digno præ dignioribus in quibusdam casibus, nimirum quando habens Jus Patronatûs præsentat personam dignam, vel quando Beneficium est limitatum ad certam familiam, vel quando dignior non est de gremio Ecclesiæ, aut reservatur ad melius Beneficium. Herinx *dis. 7.* Item quando Beneficium, quod confertur est simplex non habens annexam curam animarum vel Jurisdictionem. *Marchant. Tractat. 10. tit. 4.* Nisi passim fiat, ut limi-

limitat Less. c. 34. n. 66. Beneficium resignare in dignum prætermisso digniore, esse peccatum mortale, volunt Navarr. Sanchez, negant Sannig, Reginaldus & communior cum Praxi.

Coroll. 2. Justa tributa & vectigalia (etiam in dubio, an justa sint, ut teste Henric probabilius censent Suarez, Vasq.) solvenda sunt in conscientia. Comm. ex Rom. 13. Reddite omnibus debitum, cui tributum, tributum, cui vectigal, vectigal. Nihilominus defraudantes vectigalia à restitutione excusant Reginaldus, Storz, Marchant, alique. non solventes, si non petantur, excusat Sotus, consuetudinem verò, quæ optima legum & voluntatis Principis interpret, esse servandam monet Lessius.

### CAPUT XIII.

#### De Justitia vindicativa.

*Quid Justitia vindicativa?*

**E**st illa, quæ reo debitam & condignam infert poenam. Quatenus servat æqualitatem inter poenam & delictum, pertinet ad Justitiam commutativam; quatenus pro delictis distribuit poenam, ad distributivam.

*Quæ Personæ concurrant ad Judicium?*

Tres principales 1. Judex, qui est vel ordinarius, vel delegatus, vel arbitrarius. 2. Actor, qui in causis civilibus jus suum prosequitur, in criminalibus defert crimen, & dicitur accusator, si suscipiat onus probandi, secus, denunciator.

3. Reus.

3. Reus, qui convenitur vel in civilibus, vel in criminalibus. Personæ accessorizæ sunt: Testes, qui junguntur actori, Advocatus, qui reo, Assessor, qui Judici.

### COROLLARIA CASUUM.

*Coroll. 1.* Obligationes Judicis sunt 1. Accelerare Justitiam. 2. Non acceptare munera (quia utroque jure prohibita) nisi post latam sententiam, vel sint victualia modica. 3. Non suadere compositionem in re pro una parte moraliter certa; huic enim faceret injuriam. 4. Decidere pro parte probabiliore, oppositum proposit. 2. damnavit Innocent. XI. 5. Compensare damna ex sententiâ formaliter injustâ.

*Coroll. 2.* Obligationes accusatoris sunt 1. Non accusare de crimine occulto, aliter corrigibili: faceret enim contra charitatem. Obligatio accusandi tantum est, quando crimen vergit in damnum Reipublicæ, vel ex eo pendente grave damnum imminet tertio, accusatori nulum. 2. Probare delictum, aliàs incurrit poenam talionis. Marchant. tractat. 5. tit. 3.

*Coroll. 3.* Obligationes testis sunt 1. Sub M. fateri veritatem, nisi noverit vel ex confessione sacramentali, vel sub secreto naturali, vel à reo extorserit per injuriam, vel grave sibi, suisve metuat malum. Si nolit testari, non tenetur ad compensationem damni secuti: *quis non testari non est contra Justitiam.* 2. Facto Juramento, revelare omnia, quæ potest absque pecca-

peccato ; nisi juramentum restrinxerit mente : *quatenus jure teneor.* 3. Compensare damna ex testimonio falso : *quia hoc est contra Justitiam.* Si facto Juramento de dicenda veritate dicat falsum, committit perjurium contra Religionem, mendacium contra veritatem, & injustitiam contra reum. Testes efficiunt duo : qui testes in facto & circumstantiis omnino conformes, jurati, petente reo, de viâ & omni exceptione majores. Less. cap. 30.

Coroll. 4. Obligationes Advocati sunt 1. Non suscipere causam, nisi saltem probabiliter sit justa, idque significare debet clienti, aliâs causa est damnorum. 2. Non exigere stipendium ultra justum. 3. Compensare damna tum clienti, tum parti ; Si scieas patrocinetur causæ injustæ, aut fuerit negligens & infidelis. Herinx diâ. 6.

Coroll. 5. Obligationes rei sunt 1. Fateri veritatem in causâ capitali, si interrogetur juridicè. D. Thom. *quæst.* 69. apud Less. Dissentit Lugo & quidam alii, non tamen licet uti restrictione purè mentali, quæ nimirum ex circumstantiis nequit cognosci, & damnata est ab Innocent. XI. 2. Non excipere contra testem objectione falsorum criminum, potest verorum, modò profit. 3. Non inferre vim justitiæ ministris, nisi sententia sit ad mortem & certò iniqua : *quia licet vim vi repellere.* Fugere licet semper, & carcerem infringere, ob jus naturale vitæ conservandæ, possuntque ad hoc præbere instru-

instrumenta, qui non sunt ministri Justitiæ.  
Mertzer d. 47.

\*\*\*\*\*

## *TRACTATUS VII.*

### *De Religione.*

#### *CAPUT I.*

##### *De ejus Quidditate.*

**R**eligio est virtus moralis, inclinans ad debitum Deo exhibendum cultum. Actus ejus numerantur à D. Thoma: Devotio, oratio, adoratio, sacrificium, oblatio, primitiæ, decimæ, votum, juramentum, adjuratio & laus Dei.

*Quid oratio, quomodo necessaria, quis orandus?*

Oratio est decenium à Deo postulatio; eaque mentalis vel vocalis, publica vel privata. Viatori adulto ad salutem est necessaria juxta Aug. de bono persever. necessitate medi. Absolutè & terminativè orandus est solus Deus, Sancti transitivè tanquam intercessores nostri.

*Quid Adoratio & quoduplex?*

Adoratio est actus submissionis erga alterum ob ejus excellentiam, exhibitus Deo tanquam supremo Domino ob ejus excellentiam infinitam, dicitur Latria, seu adoratio suprema, exhibi-



hibitus Christo homini ob unionem hypostaticam & Deiparæ ob maternitatem tanquam excellentias supernaturales extraordinarias, dicitur Hyperdulia, exhibitus Sanctis ob excellentiam supernaturalem gratiæ & gloriæ, dicitur Dulia, Sanctis ipsis convenit absoluta, imaginibus respectiva.

### COROLLARIA CASUUM.

*Coroll. 1.* Bona spiritualia sunt petenda absolute, temporalia conditionate, mala nullatenus. Peccat M. contra Religionem, petens à Deo rem moraliter malam v. gr. occasionem furandi, fornicandi &c. 2. Proximo petens morbum, mortem &c. nisi ad finem bonum.

*Coroll. 2.* Sancti coli non possunt cultu publico, nisi saltem sint beatificati; privato coli possunt, quicunque mortui cum fama sanctitatis.

## CAPUT II.

### De Horis Canonicis.

*Quid sint?*

**H**oræ Canonicæ sunt preces vocales, quæ ex præscripto Canonum quotidie certis horis à quibusdam personis sunt persolvendæ.

*Omnes.*

### COROLLARIA CASUUM.

*Coroll. 1.* Non satisfacit 1. Horas recitans mentaliter: quia sunt preces vocales. 2. In notabili quantitate percurrens officium syncopando, mutilando, absorbendo syllabas, verba &c.

*quia*

quia omittit partem notabilem. 3. Vesperas differens post duodecimam noctis: quia officium est annexum Diei a 12. noctu ad 12. Satisfacit tamen ob privilegium, qui matutinum cum laudibus recitat pridie. *Quid si nulla sit necessitas?* Adhuc recitat licite. *Quid si non possit die sequenti?* Non tenetur recitare pridie: quia privilegium non tenetur uti.

*Coroll. 2.* Est peccatum M. Horas in choro non recitare tempore statuto. Neuss. num. 10. Excusant exequiæ, proelio &c. Extra chorum sine causa rationabili matutinum aut Horas minores recitare post meridiem, Vesperas ante meridiem, non est nisi P. V. Communis D.D. Si vero ex contemptu suisque deque pro libitu quis mutet tempora Horarum est M.

*Coroll. 3.* Est peccatum M. 1. Omittere integram Horam aut Nocturnum. Commun. contra paucos. Excipiunt Vesperas Sabbathi Sancti Gob. num. 609. Sporer num. 29. Omittens tamen omnes septem Horas unâ mortali et omiſſione, non septem, ut volunt Less. Caiet. Neuss, sed unum committit peccatum, quod est gravius, ut docent Gob. Sporer &c. quia septem Hæc unum integrant officium, & sic sub unum cadunt præceptum. 2. Omittere officium defunctorum in die animarum; Litanias majores in diebus Rogationum & Festo S. Marci, si in tali loco servetur processio. Neuss num. 81. & alii. 3. Non recitare privatim ea, quæ organo pullantur. Commun. contra Sanchez.

*Coroll. 4.* Qui in choro ponit liberos, inquit antiphonas, pullat campanas, trahit folies organi, vel aliter inservit choro, non tenetur repetere ea, quæ ipso non audiente cantantur: quia chorus supplet, cum quo unum facit officium. Idem affirmat Sanchez de tussiente, excreante, aut aliquid necessarium alteri dicente.

*Coroll. 5.* Constitutus in ordinibus majoribus omittens Horas peccat contra Religionem, Beneficiatus probabiliter etiam contra Iustitiam, etsi intendat non percipere fructus: quia accepto Beneficio absolute obligatur ad officium, & non est penes ipsum vel orare, vel non recipere fructus. Hen. quest. 3. Recipiens autem fructus & omittens Horas tenetur post primum semestre accepti Beneficii ad restitutionem fructuum ex Constitutione 135. Pii V. sic, ut omittens totum officium unius diei perdat omnes fructus illi diei correspondentes, omittens matutinum, vel reliquas Horas, dimidiam partem, omittens Octavam minorem, sextam partem. Quid si Parochus omittat Breviarium? Ad nihil tenetur, si fructus recipiat pro functionibus parochialibus, vel hæc illis solum æquivalent, si excedant, restituet, quantum correspondet Horis omis-  
sis.

#### *Obligatio ad Horas.*

Hæc oritur ex triplici titulo, nempe ex titulo Sacrorum Ordinum, ex titulo Beneficii, & ex titulo Professionis ad chorum. Primus tenet ex 6. Dolentes. Secundus ex Concil. Lateran.

*sess. 9.*

sess. 9. Tertius ex consuetudine, habente vim legis.

### COROLLARIA CASUUM.

Coroll. 1. Obligantur ad Horas Presbyteri, Diaconi & Subdiaconi, etiam excommunicati, suspensi, interdicti; imò juxta Tamburinum degradati, juxta Layman damnati ad triremes, item, qui dispensati junguntur matrimonio juxta Neus ex commun. contra Sporer.

Coroll. 2. Obligantur ad Horas Beneficarii, saltem si percipiant fructus; item, si non percipiant ex culpa sua, unde non obligantur: 1. Beneficium obtinens invalidè v. gr. per Simoniam, aut validè, sed nimis tenue, non præbens juxta Neus saltem tertiam, juxta Sporer saltem quartam partem honestæ sustentationis. 2. Litigans pro Beneficio, si non possideat. 3. Qui nihil accipit 1. vel 2. anno. Hurt. Neus contra varios. 4. Beneficio privatus injustè. 5. Habens plura Beneficia, non tenetur pluries ad Horas: quia plures obligationes cadunt super idem, ut patet de auditione missæ in festo incidente in Dominicam.

Coroll. 3. Obligantur ad Horas saltem privatim recitandas Religiosi ad chorum professi (idem est de Monialibus) etiam apostataz, incarcerati &c. Si extet in earum Religione aliqua Lex vel consuetudo, graviter obligans. Gob. March. & commun. unde non obligantur 1. Novitii. 2. Transcuntes de Clericatu ad statum conversorum. 3. Dispensatus ad matrimonium.

4. Religiosi Societat. Jesu. 5. Privilegiati, ut sunt Clerici Ordinis S. Bened. ex Privilegio Eugenii IV. apud Sporer.

Dixi : *saltem privatim* : Quia obligatio chori ex Clement. 1. De celebrat. Miss. afficit totam communitatem, presentibus saltem quatuor, curâ incumbente primariò Superiori, secundariò subditis; ita ut hi peccent graviter, si ipsi scientibus omitatur chorus. Excusatur tamen communitas à choro, si presentes sint tantum 3. vel 6. Religiosi, qui prædicationibus & confessionibus occupati.

#### *Forma Horarum Canonicarum.*

Horæ sunt dicendæ juxta Breviarium Romanum ex Bulla S. Pii V. excipiente Ecclesias, quæ à ducentis annis ante Bullam usæ sunt alio, datâ eis facultate Romanum assumendi.

#### COROLLARIA CASUUM.

Coroll. 1. Non satisfacit, si obligatus ad Romanum Breviarium recitet vel semel ex alio, secus, si Religiosus vel Clericus relicto Breviario sui Ordinis vel Ecclesiæ privatim recitet ex Romano. San. h. Sporer, Dianâ.

Coroll. 2. Obligatus ad Breviarium Romanum (nisi sit Religiosus, habens obligationem personalem) uti potest alio, si existat alibi, aut habeat Beneficium, ubi est usus alterius; quia peregrini se conformare possunt loco, & Beneficiarius suæ Ecclesiæ. Idem possunt FF. Minores existentes in itinere ex privilegio Innocent. IV. *Quid si obligatus*



gatus ad Breviarium Romanum careat illo? Debere uti alio, affirmat Pellizar. Sed negat Gob. quia Pius V. citat. dicit: neminem ex iis, quibus hoc dicendi, psallendique onus impositum est, nisi hanc solum formam posse satisfacere.

### Qualitas Officii.

Recitandum est officium Canonicum cuique juxta directorium suæ Ecclesiæ vel Ordinis S. Rit. Congregatio.

Coroll. Non satisfacit 1. Autoritate propria recitans de Sancto, etsi Canonizato, de quo ab Ecclesia nullum fit officium. De festis Dioecesanis licet recitare Regularibus, & de Patrono debent. Neus dia. 6. Peccat Religiosus celebrans de Beatificato sui Ordinis in aliena Ecclesia, si solum concessum sit in Ecclesia sui Ordinis. 2. Recitans officia certo Ordini propria, officia nostra recitare possunt nostri Tertiarii, Moniales, Syndici, Confratres Chordæ. Neus citat.

### Ordo Horarum

Servandus est in Choro sub P. M. teste Marchant. extra chorum sub V. secluso contemptu, secundum commun. DD.

Coroll. Culpâ vacat inversio Ordinis ex causa: Si nondum dicto matutino vadas ad primam; Si sero veniens pergas cum choro, postea partem omissam repetiturus; Si non habens lectiones, eas omittas, lecturus postea; Si ob commoditatem recitandi cum socio, recites Horas minores ante matutinum, imò matuti-

num sequentis diei non recitatis vesp̄is. *Sporer num. 134.* Si celebres missam ante recitatum matutinum. *Neufs num. 13.*

### *Interruptio Horarum*

Facta absque causa & notabilis per se est V. Decet tamen incipere de novo. *Commun.*

*Coroll.* Non est peccatum, matutinum separare à laudibus, additâ in fine collectâ, imò nocturnum à nocturno.

### *Mutatio Officii.*

Unum officium mutare in aliud, est per se illicitum, & prohibitum in Bulla S. Pii V.

## COROLLARIA CASUUM.

*Coroll. 1.* Est peccatum M. officium mutare in aliud, etsi æquale, passim pro libitu. *Commun.* Secus, si fiat rarissime & non in notabiliter brevius. *Sporer. loco citato.*

*Coroll. 2.* Est peccatum M. loco officii Dominicæ recitare de feria 3. vel de communi Martyrum. Suarez & alii: quia nimis notabili parte officium detraudatur.

*Coroll. 3.* Non est peccatum mutare officium, si subsit causa v. gr. impotentia, notabilis difficultas, conformitas, societas. Unde licitè officium mutant in aliud. 1. Qui non habet officium talis diei; & que dicat de communi, vel si non quadret, aliud. 2. Qui ob debilitatem viûs, vel ob difficultatem psalmos feriales legendi ad lucernam vel ob necessarium iter, aut  
repen-

repentinis urgentes occupationes concionandi, confessiones audiendi, studendi &c. nequit orare de Dominica aut Feria. *Ex commun. DD.* 3. Qui existit in loco, ubi celebratur speciale festum v. gr. Patrocinii vel Dedicationis. Layman. 4. Qui recitare debet cum Persona gravi v. gr. Superiore vel cum infirmo aut cæco. Sanchez, Gobat &c.

*Coroll. 4.* Qui erravit recitando matutinum, quod non erat recitandum, non tenetur repetere, Horas tamen reliquas recitabit de festo occurrente sub V. Lugo, Gobat, Pellizarius: quia error non est continuandus, & officium occurrens est in possessione.

### *Recitatio cum Socio*

Est valida & licita; Si fiat alternatim & versiculatim, si unus alterum audiat, si socius sua proferat, esto non attendat, non obligetur &c. *Quid si recitet quis cum planè ebrio, amente vel alio, cuius recitatio non est oratio?* R. Non satisfacit: quia officium Canonicum est oratio vocalis, recitatum autem cum tali socio non est oratio vocalis ex parte socii.

### *Intentio & attentio.*

Intentio requiritur orandi seu laudandi Deum, absque ea enim recitatio Horarum, utpote secundum se in differens, non est officium divinum. Sufficit implicita vel in actu exercitum v. gr. quod accipias Breviarium, vadas ad chorum, cogites recitare, vel advertas te recitare,

H s

sic,

sic, ut interrogatus, quare id facias, responderes, te facere ad satisfaciendum tuæ obligationi &c. Navarrus *cap. 13. num. 6.* Fructus à recitantes in choro applicandus est Ecclesiæ seu fidelibus: quia choriste officium divinum peragunt nomine Ecclesiæ adeoque pro Ecclesiæ seu fidei populo. D. Thom. 2. q. 83. Quoad extra chorum & privationem recitantes idem universim affirmat Suarez & multi: quia recitant officium publicum Ecclesiæ ab & pro Ecclesiæ ordinatum, & pro ea ordinariè recitandum. Attentio interna requiritur saltem virtualis vel ad Deum, vel ad verba, vel ad sensum: quia oratio externa sine interna juxta SS. PP. nec est, nec meretur nomen orationis.

*Coroll.* Mortaliter peccat 1. Qui orans scribit, pingit, legit novellas, aliàsve exercet actiones cum attentione incompatibiles. 2. Per notabilem partem voluntariè distractus, nisi repetat. Less. ex D. Thoma c. 37. d. 11. Estque sententia magis pia & vera contra multos RR. volentes, sufficere attentionem merè externam, quàm aliquis se habet per modum orantis.

#### *Causæ excusantes à Recitatione.*

Excusant 1. Impotentia tum physica, tum moralis. 2. Gravis ac necessaria occupatio. 3. Legitima dispensatio. 4. Carentia fructuum ex Beneficio, cessante aliâ obligatione. *Commun.*

#### COROLLARIA CASUUM.

*Coroll. 1.* Horas omittunt sine peccato 1. Inculpabiliter immemor unius vel plurium Hora-

rum. 2. Carens Breviario. 3. Mutus. 4. Cæcus: nisi sciat memoriter, aut commodè orare possit cum socio; Beneficiarius, pingue habens Beneficium, etiam tenetur socium pretio conducere. Suarez, Bonazina &c. Percipit fructus, ergo recitare debet modo, quo potest. 5. Graviter infirmus. 6. Febriticans, saltem quando patitur paroxysmum. 7. Infirmus, cui Confessarius, Medicus aut alius expertus dicunt recitationem esse nocivam. 8. Scrupulosus dispensatus. 9. Parochi, Confessarii, Concionatores; si recitatio cum eorum functionibus sit incompatibilis. Gobat *num.* 476.

*Coroll.* 2. Rei sunt peccati M. 1. Qui prævidens impedimentum post meridiem, vespere non recitat manè: *quia jam adest obligatio.* 2. Qui non potens recitare omnes Horas, omittit, quas aut quam potest. *Ex propos. 54. damnata ab Innocent. XI.* 3. Qui non recitat, dubius an recitaverit; Secus, si dubius, an obligeatur ad Horas, vel certus de recitatione, dubitet, an omiserit aliquem Psalmum. *Sporer ex commun.* Quia in priori casu lex est in possessione, in posteriori homo.

### CAPUT III.

#### De Obligatione Festorum.

*A quo Festa possint institui?*

**P**ossunt à Summo Pontifice & Conciliis generalibus pro universa Ecclesia, ab Episcopo cum consensu Cleri & Capitum populi pro Diocesi. *c. 1. d. 3. de consecrat.*

*Quos*



*Quos obligent ?*

Universalia obligant universam Ecclesiam, Diocesana Dioecesim, etiam Regulares, & probabiliter peregrinos.

*Ad quid obligent ?*

Obligant de se sub peccato M. ad audiendum sacrum & abstinendum à serviliis.

*Omnes.*

## COROLLARIA CASUUM.

*Coroll. 1.* Illicita sunt in festo à media nocte ad mediam noctem opera mechanica & ruralia; juxta communem tamen sententiam apud Sporer non sunt P. M. nisi protracta ultra duas horas, vel nimium sint servilia. Item abstinendum est à quatuor, etsi de se non servilibus, nempe à mercatu publico, exceptis per consuetudinem nundinis; ab actionibus forensibus, à Judicio ad mortem, à Juramento in Judicio. *c. Omnis. De feriis.*

*Coroll. 2.* Licita sunt 1. Coquere, mundare domum, pabulari, & quæ quotidiana postulat necessitas. 2. Scribere, ludere. 3. Iter facere, non verò currus vel equos onustos agere, quod tamen à M. excusat Diana. 4. Venari, aucupari, piscari; si labor sit exiguus. Probabiliter etiam licet pingere, sed sine magno apparatu; item collocare typos. Layman fol. 693. Quia non sunt servilia, aut saltem modica. Acu pingere in tela nobilissimis matronis & puellis concedit Pellizanus, sed suadet Tambur. ut faciant pro Ecclesia.

*Coroll. 3.*

*Coroll. 3.* Excusante necessitate vel consuetudine licitè faciunt opus servile 1. Operarii publici reparantes pontes, vias publicas &c. Milites contruentes propugnacula, fossas &c. 2. Pauperes, quibus deficit alimonia. 3. Laborantes in sæno, messe &c. ad avertendum damnum ex pluvia. 4. Sub vesperum acuentes falcem, vel materiam præparantes pro die sequenti. 5. Pharmacopolæ præparantes medicinam. 6. Aurigæ, carbonarii, coctores laterum, quorum opera nequeunt interpolari; sartores conficientes vestimenta lugubria aut sponsalitia, quæ non pariuntur moram. Herinx. 7. Famuli & ancillæ à dominis coacti, aut suas reficientes vestes. *Sporer num. 50.*

*Coroll. 4.* Si causa excusans sit dubia, petenda est dispensatio, quam dare potest Episcopus omnibus dioecesanis, Parochus parochianis, Superior subditis, non famulis secularibus, in hos enim nulla ipsi Jurisdictio. Confessarius pro foro conscientie declarare potest, an causa excuset, nec ne, non dispensare ob defectum Jurisdictionis. *Sporer citat.*

## CAPUT IV.

### De Voto.

#### *Quid Votum? quotuplex?*

**V**otum est promissio vera, Deo facta, de meliori bono cum intentione se obligandi.

Divi-

Dividitur 1. In solemne & simplex. Solemne fit publicâ Ecclesiæ autoritate & acceptione, ejusmodi est professio religiosa. Simplex fit privata voventis voluntate. 2. In personale, reale, & mixtum; primum afficit solam personam; secundum rem; Tertium rem & personam, ut infra. 3. In absolutam & conditionatum: hoc fit cum, illud, sine conditione.

*Violatio Voti quale Peccatum?*

Est de se M. in re levi V. Omnes.

*Quos obliget?*

Votum personale v. gr. peregrinandi obligat solum voventem, reale v. gr. dandi Ecclesiæ calicem etiam ejus rem, mixtum v. gr. peregrinandi & dandi Ecclesiæ calicem, in quantum est personale, obligat solum voventem, in quantum reale etiam rem. Reale transit ad hæredes, sic, ut obligentur ex Justitia, non propriè ex voto, conditionatum obligat impletâ conditione, etsi turpis; quia hæc posita licitè potest impleri.

*Quando Votum tollatur.*

Tollitur 1. Desitione materiæ, si fiat physice aut moraliter impossibilis, vel illicita, vel cesseret finis principaliter intentus, sic mater vovens Novenam ad obviandam filio sanitatem, eo moriente non obligatur. 2. Irritatione. 3. Commutatione. 4. Dispensatione. Omnes.

Coroll. 7.

*Coroll. 1.* Nullum est votum 1. Sinè voluntate aut potestate se obligandi, non tamen, ut sit votum, requiritur voluntas implendi, hæc enim non requiritur ad votum, bene autem voluntas vovendi. 2. Si involuntarium, utpote ex errore circa substantiam aut extortum metu gravi & injusto. 3. Si indeliberatum, utpote ex motibus primò primis. 4. Ex ignorantia, quid votum, & quod obliget. 5. Factum B. Virgini vel Sancto, nisi solum in ejus honorem. 6. De re mala, vel indifferente ut tali, vel bonâ quatenus melioris impeditiva: quia votum debet esse de re Deo grâ. Hinc non valet votum in sabbatho non nendi, incundi matrimonium &c.

*Coroll. 2.* Votum dubium non obligat: quia melior conditio possidentis, quæ stat pro dubitante. Certum obligat secundum proportionem materiæ, nisi aliter intenderit vovens; qui tamen in materia levi nequit se obligare graviter; Deus enim non acceptat.

### Irritatio Voti.

*Quid sit, & quadruplex?*

Est ablatio obligationis voti, facta ab habente potestatem in voventem vel voti materiam. Sanch. cum commun. Quia existens sub alterius potestate vovere non potest, nisi dependeret à voluntate illius & tacitâ conditione: nisi is contradicat vel quamdiu non contradicit. Est duplex: Prima directâ, quâ tollitur ipsum votum,

tum, promissionem annullando: Altera indirecta, quâ votum impeditur, opus aliud præcipiendo, prima fieri potest, etiam sine causâ, ab habente potestatem in voventem, secunda ab habente potestatem in voventis operam. Reiffenst. & commun.

Coroll. Irritare directè possunt citra causam  
 1. Parentes & Tutores omnia vota liberorum impuberum & pupillorum, imò & vota puberum, si in impubertate emissa, & post eam non ratificata, etiamsi alias sint reservata vel in favorem tertii facta. Gobat, Less, Reiffenst. Vota in pubertate emissa, sicut & vota famulorum irritare non possunt, nisi indirectè, quatenus dominus, voto famuli v. gr. peregrinandi sibi præjudicante, præcipere potest opera impeditiva. 2. Superior regularis, etiam monialis, omnia vota à subditis emissa post professionem, excepto voto strictioris ordinis, hic enim permittitur de jure. 3. Maritus vota uxoris, & hæc illius, quæ præjudicant debito conjugali; alia indirectè, sed solum illa, quæ & quatenus præjudicant rei domesticæ. c. ex multa. §. in tanta. hoc tit.

## Commutatio Voti.

### Quid Commutatio Voti?

Est mutatio illius in opus honestum, sub eadem voti obligatione persolvendum. Commun.

### Quis possit commutare?

Votum mutare in melius potest ipse vovens auctoritate propriâ, etiam absque causâ. Mutare



tare in æquale aut minus bonum, potest ex causa Superior & habens facultatem dispensandi: quia est actus Jurisdictionis Ecclesiasticæ.

*Quæ Vota nequeant commutari?*

Nequeunt commutari 1. Vota reservata Summo Pontifici, nisi in solum votum solemne Religionis, in quod vota omnia ante professionem emissæ commutari possunt, & in professione proficiens commutare censetur, nisi aliud intendat. Layman & commun. ex cap. Scriptura. De Voto. Quid si votum sit juramento confirmatum? Adhuc commutari potest: quia juramentum sequitur naturam actus, cui additur, eoque ruente ruit. Sanch. Gobat, & commun. DD. 2. Commutari nequeunt vota in favorem tertii facta & ab eo acceptata v. gr. votum dotandi certam puellam, hoc post acceptationem sine consensu puellæ commutari nequit: quia acquisivit sui, quo invita privari non debet.

*Qualiter Vota commutanda?*

Plerumque reale in reale, personale in personale, perpetuum in perpetuum: potest tamen aliter fieri, spectatis circumstantiis personarum, sexu, conditione &c.

*Quid post commutationem observandum?*

Voventi licet redire ad prius votum, etiam operis subrogati novam petere commutationem: quia commutatio facta in favorem voventis. Sed non tenetur, etsi opus subrogatum fiat impossibile,

sibile, modò commutatio sit facta ab habente potestatem Jurisdictionis: quia per hanc prius votum extinguitur; tenetur autem, si facta sit auctoritate propriâ: quia per hanc non transfertur vinculum voti, sed Deo satisficit per equipollens; si autem non sufficit per hoc, fieri debet per ipsum votum. Sporer num. 137.

## Dispensatio Voti

### Quid sit?

Est ablatio vinculi voti, facta nomine Dei ab habente Jurisdictionem spirituales in foro externo.

*Coroll.* Dispensatio, ut sit valida, requiritur 1. Justa causa: quia dispensans, etiam Summus Pontifex, dispensat nomine Dei, qui non censetur ratam habere dispensationem sine justa causa factam. Quodsi causa dispensandi non appareat sufficiens, votum est commutandum; imò plerumque admiscenda aliqua commutatio. 2. Potestas vel ordinaria, qualis competit Pontifici respectu omnium fidelium; Episcopis & Prælati exemptis, etiam localibus de mente Sanch. apud Sporer (non Abbatissis) respectu suorum subditorum; vel delegata, ut est in confessariis ordinum mendicantium pro sæcularibus, etiam extra confessionem. Sanch. 4. Mor. c. 43. Sannig.

### Quæ Vota sint reservata?

Vota Summo Pontifici reservata sunt 5. scilicet castitatis perpetuæ, Religionis approbatæ, per-

peregrinationis Romanæ, Compostellanæ, Jerusolymitanæ. In his dispensat Episcopus & juxta Reiffenst. l. 2. tit. 34. negante Sporer, etiam Regulares; Si difficilis sit ad Pontificem accessus, & urgens necessitas. Non sunt reservata; si sint dubia, meru extorta, si disjunctiva, poenalia, si conditionata & non impleta conditio, imò si impleta, ut docent Sanchez, Ledesma & alii, quorum doctrinam Sporer censet tutam, Reiffenst. iustissimam.

## CAPUT V. De Juramento.

*Quid sit Juramentum & quotuplex?*

**E**st invocatio Divini Numinis in testem aliqujus rei. Dividitur principaliter 1. In assertorium, quo presentia vel præterita affirmantur vel negantur, v. gr. juro, quod sim Christianus. In promissorium, quo aliquid futurum promittitur, v. gr. juro, quod sim in fide permanens. Si jurans minetur poenam, dicitur comminatorium, v. gr. testis mihi Deus, quod sim te exhereditaturus. 2. In contestatorium & execratorium; Primò Deus vocatur simpliciter in testem, ut supra; Secundò etiam in vindicem, v. gr. diabolus me auferat, non siam salvus, si non sit ita. Sed non jurat dicens: Si mentiar, volo suspendi, vivus comburi &c. Quia Deus non invocatur in testem aut vindicem.

*An jurare liceat ?*

Licet in veritate, in Judicio, & in Justitia; hoc est: Si jurans certò judicet, rem ira se habere; Si jurandum esse, recta ratio seu Judicium dicet; Si Juramentum sit de re honesta & licita. *Commun. T T.*

## COROLLARIA CASUUM.

*Coroll. 1.* Ut sit Juramentum fieri debet 1. Per Deum vel explicitè, v. gr. testis est mihi Deus, vel implicitè, nimirum per creaturas respectivè ad Deum, v. gr. testis mihi coelum. 2. Cum voluntate jurandi. 3. Cum invocatione D. vini Testimonii: unde non jurant ad singula ferè verba effutientes: *per Deum, per animam, per Sacramentum &c.* nisi fortè intendant & se jurare sciant.

*Coroll. 2.* Jurans peccat M. 1. Si juret falsum, etsi in re levi, *quia non datur parvitas materia.* Item si falsum juret, etsi sinè animo jurandi, aut cum restrictione strictè mentali, *quia saltem exterius invocatur Deus in testem falsi.* 2. Si juret, se peccaturum, plures tamen contra Henno in re levi excusant à Mortali. 3. Si juret animo non implendi, isque implere tenetur: *quia vales & obligat Juramentum, factum sinè animo implendi.* 4. Si fide juret promissoriè, saltem in re gravi, sed ad nihil tenetur non secuto damno. *Herinx. d. 6.*

*Coroll. 3.* Juramentum promissorium factum Deo de re meliori, vel homini de re quacunque licita, obligat ad sui executionem sub mortali,

tali, si res sit notabilis; probabiliter sub veniali, si res sit levis: quia in *Juramento promissorio Deus vocatur in testem intentionis, non executionis*; unde defectus executionis non est perjurium, sed infidelitas, in qua datur parvitas materiæ. Non obligat factum de re illicita, aut ex errore vel dolo, qui tota causâ Juramenti; quia *deest consensus*, aut in præjudicium tertii. Factum ex metu injuste incusso potest relaxari. *Sbogar tract. 107.*

*Coroll. 4.* Juramentum contractui invalido additum, illum non firmat, adeoque si res sit licita, jurantem solum obligat ex virtute Religionis. Hinc qui sponsalibus invalidis vel promissioni invalidæ addidit Juramentum, obtentâ hujus relaxatione, ad nihil tenetur.

*Coroll. 5.* Qui puellæ cum Juramento promisit matrimonium, tenetur eam ducere, nec potest eâ dissentiente suscipere sacros ordines, nec manere in cœlibatu: quia *Juramentum promissorium homini obligat, etsi majoris boni sit impeditivum.* Potest tamen is ingredi Religionem: quia hanc non impedit matrimonium ratum, minùs Juramentum. Henno.

*Coroll. 6.* Juramenti promissorii obligatio tollitur 1. Mutatione materiæ; si fiat impossibilis, illicita &c. 2. Remissione promissarii. 3. Morte jurantis, si obligetur tantum ex virtute Religionis, si etiam ex virtute Justitiæ, utpote quia Deo vel homini acceptanti promisit, transit ad hæredes. Sanch. 3. *Moral.* 4. Irritatione: hæc potest quilibet & quælibet sibi subditorum,



nempe Parentes filiorum sub patria potestate existentium, Tutores pupillorum, Mariti uxor-  
um, Domini servorum, Superiores Religioso-  
rum Juramenta etiam homini facta tollere, si  
sint de materia sibi subiecta, ut supra de irrita-  
tione voti. 5. Commutatione & dispensatio-  
ne, ut supra de voto.

## CAPUT VI.

### De Superstitione.

#### *Quid Superstitio & quotuplex?*

**S**uperstitio est falsa Religio, quâ colitur vel  
creatura cultu divino, vel Deus modo in-  
debito. Cultus Dei indubitus est vel falsus, v. gr.  
falsa prædicare miracula, falsas intrudere reli-  
quias &c. vel superfluous, v. gr. novas addere  
in officio caeremonias, quædam preces &c. pri-  
mus est per se mortalis, secundus venialis. Cul-  
tus creaturæ divinus est vel Idololatria, vel Ma-  
gia, vel Divinatio, vel vana observantia.

#### *Quale peccatum?*

Est peccatum Mortale in quacunque mate-  
ria, nisi excuset bona fides, indeliberatio, jo-  
cus &c. *Commun. TT.*

#### *Quid Idololatria, Magia, Divinatio, vana observantia?*

Idololatria est superstitio, quâ cultus divinus  
tribuitur creaturæ, v. gr. Diabolo, tanquam  
Deo.

Deo. Dividitur in externam tantum, & in ex- & internam simul.

Magia est superstitio, quâ magus mira quâdam operatur ope dæmonis ratione pacti. Dividitur in artem notoriam, mirificam, & maleficam seu maleficium; primâ procurantur scientiæ, secundâ bonum corporale, tertiâ nocuumtum proximo. *Pactum* cum dæmone potest esse vel *expressum*, quo dæmon expressè invocatur & respondet, vel *implicitum*, quando homo tentat aliquid efficere per ea, quæ naturaliter non possunt.

Divinatio est prænuntiatio rerum occultarum ope dæmonis ex pacto tacito vel expresso. Variis fit modis: 1. Per dæmonia. 2. Per astra. 3. Per somnia. 4. Per sortilegia. 5. Ex aliis signis, v. gr. ex lineamentis manuum, ex garritu avium &c.

Vana Observantia est superstitio, quâ adhibentur media inutilia ad efficiendum aliquid, ad quod nec à natura, nec à Deo ullam habent virtutem.

*An liceat à malefico petere dissolutionem maleficii?*

Non licet, si dissolvere non possit nisi per novum maleficium; quia hoc intrinsecè malum. Licet, si possit arte sibi cognita, etiam à dæmone habitâ, destruendo signa & pacta: quia artem à dæmone discere non licet; cû tamen, ubi sit sine novo interventu dæmonis, non licet.

*Unde cognoscitur, opus esse superstitiosum?*

Cognoscitur 1. Ex modo operandi, ut si, seclusâ Dei ope, sanitas restituatur in instanti; Si unâ die Fuldâ transferaris Romam. 2. Ex causis, neque ex natura sua, neque à Deo connectionem habentibus cum effectu, ut si adhibeas characteres, verba, vel signa ad sistendum subitò sanguinem, ad te reddendum impenetrabilem &c. 3. Ex effectibus, si constet non posse naturaliter in talibus circumstantiis produci, & non esse à Deo; ut si sereno coelo veniant subitò tonitru, fulmina, imbres &c.

*Coroll.* Superstitio saepe alia peccata habet annexa, ut sunt: hæresis, idololatria, profanatio rerum sacrarum, luxuria, damna proximorum &c. De quibus interrogandi sunt poenitentes. Herinx d. 7.

## CAPUT VII.

### De Sacrilegio.

*Quid Sacrilegium & quotuplex?*

**E**st violatio seu indigna tractatio rei sacræ, sive cultui divino deputatæ. Aliud est personale, quo persona sacra; aliud locale, quo locus; aliud reale, quo res sacra violatur.

*Quale sit peccatum?*

Est peccatum ex genere suo M. quia contra Religionem graviter obligantem. Ex parvitate materiæ potest esse veniale, v. gr. furtum rei sacræ levis.

COROL-

## COROLLARIA CASUUM.

*Coroll. 1.* Sacrilegium personale committit

1. In Clericos vel Religiosos violentas manus injiciens, eos ad tribunal saculare pertrahens aut injustè vectigalia imponens. 2. Actum venerem exercens cum persona Deo sacrata per votum, estque sacrilegium duplex, si utraque persona sacra.

*Coroll. 2.* Sacrilegium locale committit 1. Ecclesiam polluens. vide c. 4. de Sacrificio Missæ. 2. In ea exercens actum prohibitum, ut sunt strepitus forensis, mercatura, furtum quodcunque. 3. E loco sacro injustè extrahens personam ibi asylum habentem.

*Nota:* Nomine loci sacri intelligi Ecclesiam, sacellum, altare & quemcunque locum ad Missam vel officium Divinum publicâ autoritate deputatum, sive sit consecratus, vel benedictus, sive non; unde excluduntur Eremitoria & Oratoria privata, licet in eis celebrentur Missæ, si non sint consecrata vel benedicta. Henno in Decal. d. 1. q. 5.

*Coroll. 3.* Sacrilegium reale committit 1. Sacramenta indignè recipiens, ministrans, profanans &c. 2. Indecorè tractans sacras imagines, reliquias, sacra vasa, sacram scripturam &c. 3. Auferens rem sacram de non sacro; si de sacro erit sacrilegium duplex & locale & reale. 4. Bona Ecclesiastica injustè retinens, destruens &c. Bona verò Ecclesiæ legata & nondum ab ea acceptata injustè detinens, injustitiam

committit, non sacrilegium, quia nondum Ecclesiastica.

Coroll. 4. Nota; Si actus sit contra id, ad quod persona, locus, vel res sunt sacra; est sacrilegium, alias non.

## CAPUT VIII.

### De Simonia.

*Quid Simonia & quæ ad eam requirantur?*

**S**imonia est studiosa voluntas emendi vel vendendi pretio temporali rem spiritualement aut spirituali annexam: *Omnes.* Ad eam requiruntur tria: 1. Materia spiritualis, & est talis vel quoad substantiam, ut omnes gratiæ, virtutes infusæ, dona Spiritûs Sancti; Vel causativè, ut Sacramenta; vel effectivè, ut actus Jurisdictionis, Absolutio, Dispensatio, Excommunicatio, Electio &c. vel Spirituali annexa, ut Jus Patronatus, labor in administrandis Sacramentis &c. 2. Pretium temporale; quod ex D. Thom. est triplex: munus à manu, scilicet pecunia & res quælibet temporalis pretio æstimabilis; munus ab obsequio, scilicet servitium & quodlibet opus præstitum vel præstandum; munus à lingua, scilicet recommendatio, laus, preces &c. 3. Pactum scil. obligatorum, sive expressum sit, sive tacitum.

### *Divisio Simoniæ:*

Dividitur 1. In Simoniam Juris Divini & Simoniam Juris humani. Prima prohibetur lege Divi-



Divinâ; secunda Ecclesiasticâ; Primam committunt ementes vel vendentes res propriè spirituales, v. gr. Sacramenta; Secundam committunt ementes vel vendentes res ex se vendibiles, sed ab Ecclesia vendi prohibitas, v. gr. Beneficium Ecclesiasticum, officium Sacristæ, Thesaurarii, Advocati Ecclesiæ; item Beneficia permutantes, dantes pecuniam pro recommendatione ad accipiendum Beneficium &c. Layman apud Sporer. 2. In mentalem, conventionalem & realem. Prima committitur solâ intentione, intendendo Simoniam; Secunda externâ conventionem seu pacto, absque tamen executione, saltem utrimque factâ; Tertia traditione utrimque factâ scilicet traditione pretii ex parte ementis, & rei spiritualis ex parte vendentis. Simonia confidentialis reducitur ad aliquam ex memoratis.

*Quale peccatum sit Simonia?*

Est peccatum sacrilegii M. nunquam V. ex parvitate materiæ. *Omnes,*

**COROLLARIA CASUUM.**

*Coroll. 1.* Non est Simonia 1. Dare rem spirituales extra materiam Beneficiorum pro spirituali; vel temporalem pro spirituali materialiter sumptâ, v. gr. pro calice, quantum valet argentum. 2. Accipere aliquid pro sustentatione admissi ad Religionem. Marchant. 3. Post acceptum spirituale dare aliquid, ut donum gratuitum. 4. Donare aliquid ex intentione, ut  
aher

alter suo tempore citra obligationem sit gratus. *Commun. contra Henno.* 5. Post Jus acquiritum dare aliquid ad redimendam injustam vexam. 6. Ministrantibus spiritualia dare aliquid ut stipendium in sustentationem, aut pro labore extrinseco. *Herinx d. 9.*

*Coroll. 2.* Est Simonia 1. Dare vel accipere pretium pro Sacramentis, gratiis &c. pro functionibus sacris quâ talibus, pro statu Religionis, pro sepultura in loco sacro, pro Beneficio, pro actu Jurisdictionis, ut sunt absolutio, dispensatio &c. 2. Dare vel accipere ex pacto per modum gratitudinis, contra varios apud Platel. 3. Dare aliquid tanquam pretium motivum aut compensationem pro re spirituali. 4. Dare pecuniam alteri, ut sibi apud collatorem procuraret beneficium, vel competitori pro beneficio litigioso, ut à lite desistat. 5. Rosaria & ejusmodi carius vendere, *quia benedicta.* 6. Carius vendere fundum propter Jus Patronatus. *Reiffenst. l. 5. t. 3.*

*Coroll. 3.* Beneficium simoniacè acceptum dimitti debet, etiam ante sententiam Judicis; omnes fructus sunt restituendi, nisi consumpti bona fide. *Extrav. cum detestabile. de Simonia.* Pretium rei spiritualis, si hæc jam tradita, restituendum est Ecclesiæ, vel in pios usus erogandum; si nondum sit tradita, restituendum est danti, & contractus rescindendus. *Less. d. 31.*

## CAPUT IX. De Blasphemia.

*Quid & quotuplex Blasphemia?*

**E**st contumeliosa in Deum vel Sanctos locutio. Dividitur in Hæreticalem & Simplicem: prior v. gr. Deus est immisericors, injustus &c. annexam habet hæresim, seu errorem contra fidem, estque peccatum duplex scilicet blasphemix & hæresis; posterior v. gr. pereat Deus, maledicta Sacramenta &c. non aliam habet malitiam nisi blasphemix, omnēque ejusdem sunt speciei, quatenus tendunt in Deum; quatenus verò blasphemia committitur contra Sanctos opponitur Dulix. *Commun.*

*Quale sit peccatum?*

Peccatum est gravissimum, nunquam veniale ex parvitate materiæ, quandoque ex subreptione & inadvertentia. *Commun. TT.*


### COROLLARIA:

*Coroll. 1.* Peccatum blasphemix est 1. Deo attribuire falsa, negare vera, loqui in ejus vilipensionem; huc reducitur, contra Deum in coelum spuerere, frendere dentibus &c. item cogitatio blasphema. 2. Maledicere vento, pluvix &c. quatenus proveniunt à Deo. 3. Injuriosè nominare Sanguinem Christi, Sacramenta &c. etsi proferantur ex indignatione contra hominem, modò seriò & proferens advertat vili-

vilipensionem Dei & rerum sacratum. Tann.  
*hkim. 134.*

*Coroll. 2.* Non est blasphemia 1. In ira im-  
 precari aliis dæmonem, fulgura &c. est tamen  
 peccatum contra charitatem, idque M. si de-  
 liberatè & seriò fiat; si lècus, V. 2. In ira  
 contra hominem vel jumenta nudè absque  
 motu pravo in Deum nominare Sacramenta,  
 mortem Dei, Sanguinem Christi &c. est ta-  
 men nomen Domini assumere in vanum. Sanch.  
*2. Mot. 32.*

*Coroll. 3.* Pro Confessario: advertat 1. An  
 verba in se sint blasphemia. 2. An prolata in-  
 deliberatè ex impetu iræ sinè reflexione ad  
 blasphemiam, sic non sunt formaliter blasphe-  
 mia. 3. An prolata ex intentione Deum inho-  
 norandi, vel ex maligno in Deum affectu, aut  
 saltem cum advertentiâ blasphemix; sic torm-  
 lis committitur blasphemia. 4. An prolata sinè  
 advertentiâ ex consuetudine: blasphemia est,  
 si consuetudo sit culpabilis. 5. An verba sint  
 hæretica & cum interno assensu prolata: sic  
 peccatum sunt blasphemix & hæresis. 6. An  
 sint contumeliosa in Sanctos: & sic sunt pecca-  
 tum contra Deliam; quatenus contumelia in  
 Sanctos; & contra Larriam, quatenus con-  
 tumelia ista redundat in Deum.



Tann.

ira im-  
tamen  
. in de  
In ira  
absque  
nenta,  
est ra-  
Sanch.

1. An  
ata in-  
ne ad  
asphe-  
u, aut  
forma-  
ta sine  
ia est,  
ba sint  
ra: sic  
6. An  
perca-  
elia in  
con-

RA.

## TRACTATUS VIII.

### De Statu Religioso.

#### Quidditas :

#### *Quid sit Status Religiosus ?*

**E**st Status immobilis, hoc est immutabilis, hominum sub certa regula ab Ecclesia approbata tendentium ad perfectionem per vota obedientiæ, paupertatis & castitatis. *Communis.*

#### COROLLARIA CASUUM.

*Coroll. 1.* Ut quispiam sit Religiosus requiruntur tria vota præfata in ordine approbato (sufficiunt simplicia *post Declaration. Gregor. XIII.*) eaque perpetua, seu statûs immobilitas saltem ex parte profitentis, & hujus à Superiore receptio. *Trid. Sess. 25. cap. 19.* Unde Novitii Societat. Jesu post primam profess. sunt Religiosi: quamvis enim ex causa dimitti possint, ipsimet tamen societatem, nisi transeundo ad ordinem strictiorem, dimittere non possunt. *Pelliz. tom. 1.*

*Coroll. 2.* Religiosus sub M. tenetur tendere ad perfectionem, quia Religio est status perfectionis acquirendæ. *D. Thom. 2. 2. q. 185.* adeoque peccat M. 1. Habens animum non proficiendi. 2. Ex contemptu transgrediens statuta, quæ media sunt & via ad perfectionem. 3. Habens propositum statuta universaliter non servandi, aut de iis minimè curatis: quia pro-

posi-



positum illud opponitur perfectioni acquirendæ. Reiffenst. l. 3. tit 31. num. 5. Excusatur à M. statuta hinc inde transgrediens solum ex quadam negligentia & tepiditate.

### Receptio.

*Quis possit recipere, quis recipi?*

Ad Religionem recipere potest omnis & solus ille, cui competit ex Jure, Consuetudine vel Privilegio. Recipi possunt omnes, qui sunt sui Juris, nec aliquo impedimento naturali aut positivo sunt ligati. *Commun.*

*Ad quid teneatur, qui vovit Religionem?*

Qui vovit Religionem determinatam, diligentiam adhibere tenetur, ut admittatur ad eam; Si voverit Religionem in genere, non admissus ad unam, laborare tenetur, ut admittatur ad aliam, modò habilis sit & spes admissionis. Si admissus non studio suo dimittatur, aut ex justa causa egradiatur, satisfecit. Si habens votum Religionis contrahat matrimonium animo consummandi, peccat mortaliter & contrahendo & consummando: post consummationem tamen debitum conjugale reddere tenetur & petere potest, at matrimonio dissoluto votum rursus obligat, si adhuc impleri possit.

### COROLLARIA:

*Coroll. 1.* Peccat 1. Recipiens supra numerum qui ex redditibus, vel consuetis elemosynis

com-

commodè possit sustentari. *Trid. Sess. 25. c. 3.*  
 2. Recipiens inutiles. 3. Sinè iusta causâ negans habitum idoneo, aut novitio (quem scit dignum) votum ad professionem. In 1. casu peccat solum contra charitatem, in 2. contra iustitiam.

*Coroll. 2.* Recipi possunt sponsi de futuro; nisi injuriam patiatur sponsa, utpote imprægnata vel deflorata. Item conjux ante matrimonii consummationem, etiam invitâ comparte, quæ tamen post alterius professionem, licitè transit ad alias nuptias; post matrimonium consummatum recipi nequit, nisi compars consentiat, vel sit adultera, vel per divortium perpetuum separata. *c. constitutus. de convers. conjugat.*

*Coroll. 3.* Conditiones recipiendorum sunt varæ; de quibus præcipuè examinandi sunt 1. Patria. 2. Parentes. 3. Ætas. 4. Status. 5. Sanitas mentis & corporis. 6. Competens literatura. 7. Morum & vitæ integritas. 8. Spiritus vocationis.

## Novitiatus

### *Quid sit?*

Est activa & passiva novitii probatio in monasterio vel domo istius Religionis, quam novitius cogitat profiteri. Annus novitiatus debet esse omninò integer & moraliter continuus.

### COROLLARIA CASUUM.

*Coroll. 1.* Novitiatus non est completus, si deficiat vel una hora; etsi novitius, simulque

K

Reli-

Religio renunciet juri probationis annuæ, *quia non possunt.* Ægroti tamen in mortis articulo, *ex concess. Pii V.* validè profitentur. *Quid, si convalescant?* Novitiatum debent complere, & de novo profiteri.

*Coroll. 2.* Novitiatum non est moraliter continuus, si novitius relinquat ordinem, aut justè expellatur, licèt post aliquas horas readmittatur: *quia cessavit esse novitius.* Secus est: si novitius de licentia superioris per unum aut alterum mensem absit à Conventu, non tantum infirmitatis, sed etiam recreationis causa: *quia cum licentia Prælati ad breve tempus existens extra Conventum, censetur commorari in illo.* Item si discedat furtivè cum animo revertendi post 2. vel 3. horas; Si expellatur injustè & readmittatur; Si habitum exuat vel exuatur, & nondum egressus rursus induatur: *quia adhuc est in Religione, vel animo, vel jure, vel corpore.*

*Coroll. 3.* Effectus probationis sunt 1. Quòd novitius omnibus gaudeat privilegiis, quibus professi, ut Religiosi. 2. Jus ad professionem. 3. Quòd de bonis novitii nihil possit recipi notabile, nisi expensæ pro victu & vestitu. *Trid. Sess. 25. c. 16.* atque ad has obligari potest egrediens. 4. Quòd nulla renunciatio aut obligatio (nisi rerum modicarum) à novitio facta valeat, nisi fiat intra 2. menses ante professionem, neque sortiatur effectum, nisi securâ professione. *Trid. cit.* *Quid, si donatio fiat ante ingressum?* Si fiat illius intuitu, adhuc probabilius non valet. *Sorbo citans declar. Card.* Pro-

## Professio

*Quid sit? Quid si invalida?*

Professio est promissio liberè facta & legitimè acceptata, quâ quis se astringit Religioni sub votis obedientiæ, paupertatis & castitatis. Invalidam profitens debet aut ratificare (si ratificabilis) aut contra eam reclamare.

### COROLLARIA:

*Coroll. 1.* Ad valorem professionis requiruntur 1. Aetas 16. annor. *Trid. Sess. 25. c. 15.* 2. Annus probationis, ut suprà. 3. Verus & liber consensus profitentis absque metu gravi. 4. Debitus sexus: non valet, si vir aut hermaphroditus, in quo prævalet sexus virilis, profiteatur apud moniales, & è contra. 5. Acceptatio ex parte Religionis. 6. Ut nulla adsit conditio Religionis substantiæ repugnans, neque ullum subsit impedimentum dirimens.

*Coroll. 2.* Effectus professionis præcipui: 1. Omnia omninò vota in ipsam professionem commutat, saltem si id intendat profitens. 2. Dissolvit matrimonium ratum, & sponsalia, etiam jurata. *Trid. Sess. 24. can. 6.* 3. Tollit irregularitatem, quæ ex defectu natalium, in ordine ad suscipiendos sacros ordines, non ad Prælaturam. 4. Parit obligationem mutuam inter Religionem, & Religiosum. 5. Extrahit filium à patria potestate. 6. Bona novitii, si profiteatur, nulla de eis facta dispositione, cedunt mo-

nasterio; hæredibus, si moriatur ab intestato. Less. c. 41. d. 10.

Coroll. 3. Credens professionem suam esse nullam, contra illam reclamare potest intra quinquennium à die professionis, non post; imò nec ante habitu dimisso. *Trid. Sess. 25. c. 19.* Elapso tamen quinquennio juvari potest restitutione in integrum, scilicet in jus agendi, quod erat amissum. Hæc fieri potest Minoribus tum ratione minoris ætatis, tum ratione impotentiae reclamandi, sive provenerit ex metu, sive ex ignorantia; Majoribus autem solum ratione impotentiae reclamandi. Sanchez. *Quid, si non amplius audiat?* certò sciens professionem esse invalidam, poterit fugere, modò fiat sine scandalo. Less. d. 7. n. 65. Sanchez, Navarr.

Coroll. 4. Peccat M. 1. Reclamans contra suam professionem, quam scit esse validam, vel ratificavit: *quia hæc nequit declarari nulla.* 2. Qui professionem suam sciens esse nullam, vel aufugit ante reclamationem: nam justè inhihet Tridentinum & censetur apostata; vel manet sine reclamatione & ratificatione: nam graviter decipit ordinem, accipiens ea, quæ non debet.

Coroll. 5. Ad ratificandam professionem requiritur ex parte ratificantis cognitio nullitatis, & novus consensus; quomodo quis revalidare potest, quod non scit esse invalidum? non tamen novus requiritur novitatus, neque novus consensus ex parte Religionis, ratificationem acceptante Papa. c. significatum. de Regular.

Obe-



## Obedientia

*Quid sit ?*

Est vinculum spirituale, obligans Religiosum ad obediendum Prælato suo in omnibus & singulis, quæ ad regulam & regularem observantiam pertinent.

## COROLLARIA:

*Coroll. 1.* Religiosus obedire tenetur Superiori præcipienti juxta Regulam seu Statuta. Unde Frater Minor tenetur obedire in omnibus, quæ non sunt contraria animæ suæ & regulæ; nam ita præcipit *Reg. c. 10.* Non ideo liberum est Superiori mandare, quæ lubet; debent enim præcepta esse rationabilia & ex causa justa. *Heirinx. d. 5. n. 63.*

*Coroll. 2.* Religiosus non tenetur obedire Superiori 1. Præcipienti contra regulam vel animam. 2. Præcipienti supra regulam, v. gr. longa jejunia, abstinentias &c. potest tamen ejusmodi imponere in justam poenam vel ob publicam necessitatem. 3. Præcipienti præter regulam, v. gr. jejunia, labores, & quæ ad regularem observantiam impertinentia. 4. Præcipienti infra regulam, v. gr. laxitates, nisi justa subsit causa. *S. Bernard. l. 1. de præcepto. col. 4. Prælatus vota mea nec augeat sine mea voluntate, nec minuat sine necessitate.*

*Coroll. 3.* Obedientia Religiosa obligat sub M. si materia sit gravis vel ex se, vel ex circumstantiis, & Superior præcipiat in virtute S. Obedien-

tia. Quod si hâc præcipiendi formâ non utatur, non videtur velle obligare sub P. M. Less. c. 41. num. 74.

## Paupertas

### *Quid sit ?*

Est votum solemne, quo Religiosus abdicat à se proprietatem & usum juris bonorum temporalium quorumcunque.

### COROLLARIA :

*Coroll. 1.* Religiosus ex voto paupertatis 1. Non potest habere aliquid tanquam proprium; adeoque invalidè sine facultate Superioris donat, vendit, emit &c. 2. Non potest habere rei usum, licet dominium maneat apud datorem, nisi de licentia Prælati vel expressâ, vel tacita, vel præsumpta: prima est optima, secunda sufficit in iis, quæ Superior sciens liberè non improbat; tertia sufficit, si præsumi possit, quod Superior rogatus non solum licentiam daret, sed etiam velit eam in illis circumstantiis non peti: tunc enim licentia re ipsâ adest, aliàs non. 3. Vitare debet rerum superfluitatem, curiositatem & pretiositatem. *Qualis alioquin paupertas ?* Less. cit. num. 78.

*Coroll. 2.* Ut rerum usus Religioso sit licitus, debet illis uti 1. Tanquam non suis, aliàs proprietarius est. 2. Cum vera & rationabili licentia. 3. Moderatè juxta modos suæ Religionis. March. tr. 2. tit. 1. q. 4.

*Coroll. 3.*

*Coroll. 3.* Peculium Religioso est licitum sub his conditionibus 1. Ut Regula non inhibeat. 2. Incorporatum sit Monasterio, quoad dominium & Religiosus simplicem habeat usum. 3. Ut habeatur ex licentia Superioris. 4. Sit moderatum. 5. Ut expendatur in usus licitos & necessarios.

## Castitas

*Quid sit?*

Est votum solemne, vi cuius Religioso illicita est omnis delectatio venerea in- & extra conjugium.

## COROLLARIA:

*Coroll. 1.* Ex voto castitatis tenetur Religiosus abstinere 1. A conjugio; illud attentans invalidè contrahit. 2. Ab omnibus, quæ sunt contra virtutem castitatis.

*Coroll. 2.* Religiosus peccans contra votum paupertatis committit sacrilegium contra votum, & furtum contra iustitiam, si res monasterii auferat, alienet &c. vel si res ab alio dominium abdicante acceptas, & consequenter transeuntes in dominium monasterii sibi appropriet. Siverò donans rei dominium sibi reservet nolens obvenire Monasterio, tunc Religiosus eam sine licentia accipiendo ad simplicem usum, solum committit sacrilegium proprietatis. Peccans contra votum castitatis, peccat contra castitatem & contra votum peccato sacrilegii carnalis. Less. c. 41. n. 80.

## Clausura

*Quid sit ?*

Sunt certa Regularium loca, nimirum claustrum, dormitorium, hortus, refectorium & aliaë officinæ interiores, quæ ingredi quibusdam non licet. Sacristia, Chorus, Capella juncta Ecclesiæ, si detur accessus sine transitu per monasterium, non pertinent ad clausuram. Henno tract. 3. quest. 10.

*Quæ poenæ violentium clausuram ?*

Mulieres non exemptæ, nec aliunde excusatz, ingredientes clausuram Regularium incurrunt excommunicationem Papæ reservatam, & ipsi Religiosi introducetes poenam privationis officiorum & inhabilitatis ad illa, ac etiam suspensionis à Divinis. Eandem poenam incurrit quælibet persona cujuslibet sexûs, statûs aut conditionis non exemptæ ingrediens clausuram Monialium sine licentia Superioris legitimi. Pius V. Cura Pastoralis. Ab excommunicatione & suspensione à Divinis absolvere possunt Confessarii Mendicantium virtute privilegiorum; alias verò poenas, nempe privationis officiorum & inhabilitatis ad illa (quæ non incurruntur ante sententiam Judicis, criminis declaratoriam) tollere possunt mendicantium Prælati: quia non reservata. Excusantur ab excommunicatione sæpe mulieres ratione bonæ fidei vel ignorantiz, etiam vincibilis: quia requiritur præsumptio & scientia.

COROL-

## COROLLARIA CASUUM.

*Coroll. 1.* Ingredi licet clausuram Regularium 1. Imperatricibus, Reginis, earum filiabus & neptibus; item fundatricibus: *quia exemptæ.* 2. Dum in clauetro celebrantur missæ, aut divina officia. 3. In processione. 4. In magno populi & pœnitentium confluxu.

*Coroll. 2.* Clausuræ violatæ sunt rei 1. Prælati & janitor fœminas (modò attingerint usum rationis) ingredi permittentes aut ingressas non educentes: *quia ad illos pertinet cura clausuræ.* 2. Alii Religiosi introducetes. 3. Ingressas diutius detinentes confabulationibus &c. *Quia sunt causa, clausuram diutius violari.* Præter peccatum tamen non incurrunt pœnas Ecclesiasticas; hæ enim sunt contra introducetes, non verò detinentes.

*Coroll. 3.* Moniales obligatæ sunt ad clausuram, ita ut his non liceat egredi, nec aliis ingredi. *Trid. Sess. 25. c. 5.* Saltem in actu primo, sic ut à Superioribus possit, debeatque cessante impedimento introducti.

*Coroll. 4.* Ingredi licet clausuram monialium 1. Personis exemptis, de quibus supra. 2. Habentibus licentiam à Superiore. 3. Visitatoribus ad actum visitationis. 4. Confessariis ad infirmas. 5. Opificibus, Medicis, Chirurgis, & omnibus; quos & quando postulat necessitas sive spiritualis, sive temporalis.



## Transitus &amp; Ejectio.

*An liceat transire de ordine ad ordinem?*

Religiosis de jure communi transire licet ad ordinem strictiorem; de facto tamen in omni ferè Religione ob specialia cujusque privilegia requiritur licentia Papæ. Donatus tom. 1. quest. 22.

*Quis & à quibus possit ejici?*

Nullus legitimè professus imposterum à Religionibus potest ejici, nisi sit verè incorrigibilis, & prius unius anni spatio in jejunio & poenitentia probetur in carceribus. *Constit. 28. Urbani VIII.* Ejectio fieri debet ab ipso Generali ut assensu 6. Patrum &c. *Constit. cit.*

*Quæ pœnæ Apostatarum, & quæ Superiorum circa illos obligatio?*

Fugitivi & Apostatæ ipso facto sunt excommunicati. Pelliz. Donat. Superiores tenentur eos revocare, & vel spontè vel coactè venientes recipere. *c. fin. de Regular.*

## COROLLARIA CASUUM.

*Coroll. 1.* Ejecti tenentur 1. Ad tria vora, & universaliter ad omnia, quæ sub peccato obligant, & extra ordinem ab eis servari possunt. Pelliz. Donat. Reiff. 2. Ad emendationem; quâ factâ sunt recipiendi, nisi ex receptione scandalum vel aliud malum Religioni timeatur. *Comm. ex c. fin. de Regular.*

*Coroll. 2.*

Coroll. 2. Fugitivi & Apostatae tenentur 1. Omnibus ordinis sui obligationibus. 2. Sine morâ redire, de his Responst. l. 3. tit. 31.

\*\*\*\*\*

## TRACTATUS IX.

### De Actibus humanis in communi.

#### CAPUT I.

#### De libero Arbitrio.

*Quid sit liberum Arbitrium ?*

**L**iberum arbitrium est facultas activa, seu ipsa voluntas cum indifferentiâ contradictionis vel contrarietatis; id est, quatenus positus omnibus ad agendum requisitis agere potest, & non agere, vel ex contrariis utrumlibet. *Commun. DD.*

*An detur ?*

Datur & convenit homini in statu naturæ lapsæ, etiam in iis, quæ sunt virtutis & vitii. *Trid. Sess. 6. can. 5.* Movetur ab appetitu sensitivo, à Deo, ab Angelis, astris & objecto; non tamen necessitatur: aliàs non peccaret.

*Quid actus humanus & quotuplex ?*

Actus humanus est, qui procedit liberè & deliberatè ab homine, ut hic liber & rationalis est.

est. Unde ad actum humanum & moralem requiritur ex parte intellectus cognitio bonitatis vel malitiae, ex parte voluntatis libertas indifferentiae, ut supra. Dividitur 1. In elicitedum & imperatum: Primus elicitur ab ipsa voluntate sine praevio illius imperio; Secundus ex voluntatis imperio elicitur vel ab ipsa voluntate, vel & potissimum ab aliis potentiis. 2. In internum, qui sunt actus voluntatis elicitus; & externum, qui sunt actus potentiarum externarum, qui & liberi mediate, seu participative. 3. In moraliter bonum, moraliter malum & indifferentem, de quibus c. 3. Moraliter bonus, alius est merè naturalis, qui solis naturae viribus elicitur; alius supernaturalis, & vitae aeternae meritorius, qui procedit ex speciali gratiae concursu.

*Coroll.* Non est actus humanus, qui elicitur sine usu rationis, ut à puero, amente, ebrio; vel absque advertentia ad honestatem aut turpitudinem, ut actus primò primi; vel sine libertate indifferentiae, de hoc patet ex propositione. 3. *Jansenii damnata.*

## CAPUT II.

### De Voluntario.

*Quid sit voluntarium?*

**V**oluntarium est, quod procedit à voluntate ex praevia cognitione. Hinc quod fit ex metu, concupiscentiâ, vel ignorantia consequente, est simpliciter voluntarium.

Quod

Quod enim fit ex metu sive ab in- sive extrinseco, vel ex concupiscentia, voluntas vult directe sive in se; quod fit ex ignorantia consequente seu vincibili, voluntas vult indirecte sive in causâ: volens enim causam, v. gr. ignorantiam, vult, quod ex causâ sequitur. Quod verò fit ex ignorantia antecedente, vel concomitante aut ab extrinseco per violentiam, est simpliciter involuntarium. *Quia de facto non est à voluntate, quatenus ignoratum est vel violentum.* Est autem ignorantia antecedens, quæ præcedit omnem suspicionem mali, unde dicitur invincibilis; consequens est, quæ sequitur eam, & potest vinci; hæc quandoque est affectata; non affectata est vel crassa vel levis, prout minor vel major ad eam tollendam adhibetur cura. Ignorantia concomitans est, quæ nec movet ad actum, nec removet, sed concomitanter se habet; tali laborat, qui ignorans esse Jejunium comedit carnes, quas tamen comederet, si jejunium esse sciret.

*An voluntas possit violentari?*

Voluntas non potest pati violentiam quoad actus à se elicitos. Aliàs veller & non veller, potest quoad cessationem ab actu, sed à solo Deo: *quia potest suspendere concursum;* item quoad actus aliarum potentiarum: *Quia ab extrinseco ad actum moveri possunt, & removeri, contra nitente voluntate.*

*Quotu-*

*Quotuplex Voluntarium?*

Voluntarium est à voluntate directè vel indirectè, elicitive vel imperative, necessariò vel liberè, positivè vel privativè: *Quia voluntas potest aliquid velle in se vel in causa, elicere actum vel imperare, necessario tendere in objectum vel liberè, ponere actum, vel omittere.*

*An dabilis omissio pura?*

Omissio libera potest esse (sed vix unquam est) pura, etiam peccaminosa, sine actu voluntatis eam causante, vel occasionante. *Quia voluntatem, dum exercet libertatem contradictionis, nihil necessitat ad ullum actum; ergo sine omni potest omittere; Si autem omittere sit prohibitum, peccat; ergo dabilis est omissio pura, libera, peccaminosa.*

## COROLLARIA CASUUM.

*Coroll. 1.* Metus regulariter non excusat à culpa, tamen minuit. Metus mortis vel gravis mali excusat 1. A lege naturali quoad actus aliquà ratione cohonestabiles, ut est occisio cum moderamine inculpatae tutelæ; actus verò ita intrinsecè mali, ut nullà sint ratione cohonestabiles, v. gr. blasphemia, negatio fidei, perjurium, fornicatio, &c. sunt peccata, nullo excusante metu. 2. A lege divinà positivà, v. gr. de observandis votis, festis, &c. excipe leges respicientes bonum commune totius Ecclesiæ, cujusmodi sunt de valore Sacramentorum, de

Sigil-



Sigillo Confess. 3. A lege purè humana : quia  
*hac cum tanto onere non ligat.*

Coroll. 2. Ignorantia (si neque affectata sit,  
neque crassa) & violentia excusant à culpa :  
non peccat 1. Comedens carnes in die jejunii  
ex illius ignorantia. *Quid si tamen comederet, si je-  
junium sciret ?* adhuc non peccat, nisi actu ita sit  
resolutus, quod velit comedere, sive jejunium  
sit, sive non. 2. Puella oppressa ; modò  
non consentiat, impediatque quantum pot-  
est, & debet ; cum periculo vitæ impedire  
non tenetur, quamdiu abest periculum con-  
sensûs.

Coroll. 3. Qui vult ebrietatem, prævidens  
rixas ; Somnum, prævidens omissionem Ho-  
rarum ; Vesperis turpes delectationes, prævi-  
dens pollutionem nocturnam ; illi rixæ, omis-  
sio Horarum, pollutio sunt peccata, & qui-  
dem eo ipso, quo vult causam : *quia in hac sunt  
indirectè voluntaria.* At verò motus carnales  
Confessario obvenientes ex peccatorum vene-  
reorum auditione, Theologo ex eorum lectio-  
ne, Chyrurgo ex medicatione &c. Non sunt  
peccata, seculo consensu, ejusque periculo :  
*Quia effectus pravus est indirectè voluntarius & peccatum  
tantum illi, qui vult causam, quam potest & debet non  
velle.* Licitè ergo agis : Si actio tua sit ex se  
honestà, effectum autem pravum non inten-  
das, te habens permissivè, & impedire non  
tencaris. Sporet.

*CAPUT*

## CAPUT III.

## De Speciebus Moralitatis.

*In quo consistat moralitas? quid & quomodo duplex actus moralis?*

**M**oralitas consistit in libertate morali, quæ ex parte intellectus importat cognitionem bonitatis vel malitiae, ex parte voluntatis indifferentiam ad agendum; proinde actus moralis est, qui liberè fit & deliberatè. Si fiat conformiter ad rectam rationem dictantem quod honestum, est bonus; Si disformiter, malus; Si neutraliter, est indifferens in individuo; & hic rectæ rationi est conformis negativè & bonus aptitudinaliter, de quo S. Hier. *Epist. ad Aug. 11.* Bonum est continentia, malum est luxuria, inter utramque indifferens, ambulare . . . hoc nec bonum nec malum est, sive enim feceris, sive non feceris, nec iustitiam habebis, nec non habebis.

*Unde sumatur bonitas & malitia? an convenire possint eidem actui? an distinguantur externo?*

Bonitas & malitia desumuntur ex objecto, circumstantiis & fine extrinseco; Sunt essentielles actui in esse moris, non in esse naturæ: nam idem physicè actus potest esse bonus & malus successivè, quamvis non simul.

Actus externus habet bonitatem vel malitiam, quam non habet internus: Scot. 2. d. 42. q. 4.

Et-

Etenim externus est liber participativè ; distinctum ipsi correspondet præmium accidentale, v. gr. Martyrio palma, virginitati aureola &c. estque exprimendus in confessione.

### COROLLARIA CASUUM.

*Coroll. 1.* Non omnes actiones humanæ sunt necessariò referendæ ad finem ultimum : nullibi id scriptum ; nec ratio dicat, nisi tantum de consilio, quod & nos.

*Coroll. 2.* Peccat, qui mentitur, tametsi ad avertendum malum. Item qui furatur sive daturus pauperi in eleemosynam, sive meretrici ad fornicandum : quia actus est simpliciter malus, sive bonus referatur in finem malum, sive malus in finem bonum ; hic tamen minus, quàm iste. Bonum ex integra causa ; malum ex quolibet defectu.

*Coroll. 3.* Actus, aliàs indifferens, v. gr. comestio, fit bonus, si referatur in bonum finem ; fit malus, si in malum. Actus bonus si referatur in bonum finem, aut malus in malum : hic fit malus novâ malitiâ, iste bonus novâ bonitate, uterque bonitate vel malitiâ ejusdem speciei, cujus est finis, v. gr. furtum, ad dandum meretrici fornicationis causâ, præter malitiam furti, quæ ex objecto, habet malitiam fornicationis, quæ ex fine. Actus fit diversarum virtutum, si eliciatur ex earum motivis ; bonitas tamen ex objecto est prima & specifico - substantialis : patet in vorto non bibendi vinum ex motivo sobrietatis, castitatis & poenitentiae.

## CAPUT IV.

## De Circumstantiis.

*Quid Circumstantia & quotuplex?*

**C**ircumstantia est accidens morale, actum humanum in esse specifico constitutum afficiens, v. gr. occulta rei alienæ ablatio constituit actum in esse specifico furti; quod autem quis auferat calicem, est circumstantia illius, quatenus furtum est; nam si consideretur ut sacrilegium, circumstantia illa actum constituit in nova specie & est essentialis. Circumstantiæ aliæ sunt formales, quæ se tenent ex parte actûs, v. gr. major vel minor intensio, major libertas & deliberatio; aliæ sunt objectivæ, quæ se tenent ex parte objecti, v. gr. objecti qualitas, quantitas, ubi &c. Hæ sunt vel solum aggravantes, quæ bonitatem vel malitiam augent intra eandem speciem virtutis vel vitii; aut sunt mutantes speciem quæ transferunt actum ad aliam speciem, v. gr. circumstantia personæ conjugatæ facit copulam soluti cum illa, non esse fornicationem, sed adulterium.

*An circumstantiæ actui humano addant bonitatem vel malitiam? quæ sint?*

Addunt: quia sunt vel laudabiles vel vituperabiles.

Formales & aggravantes addunt bonitatem vel malitiam in eadem specie virtutis vel vitii, mutantes verò speciem in diversâ: quia hæ, non illæ, faciunt actum esse juxta vel contra diversam virtutem.

Nome-

Numerantur septem hoc versu : Quis, quid, ubi, quibus auxiliis, cur, quomodo, quando.

1. *Quis* significat personæ operantis conditionem & qualitates: mutat speciem in peccatis carnalibus, si persona sit conjugata, cognata carnaliter vel spiritualiter, ligata voto castitatis &c. Item in peccatis contra charitatem: Si non avergens damnum vel scandalum sit obligatus ex iustitia, seu vi officii. Insuper ad Confessarium pertinet attendere: an poenitens sit consuetudinarius vel occasionarius, ideoque neganda sit, vel differenda ablo urio.

2. *Quid* significat 1. Objecti quantitatem: an parum vel multum noceat proximo, sive in fama, sive in corpore, sive in bonis fortunæ.

2. Qualitatem: an res ablata sit sacra; an persona percussa sit Pater aut Mater, Sacerdos aut Religiosus. 3. Effectum secundarium: an ex homicidio sequatur damnificatio, ex adulterio suppositio prolis illegitimæ, &c.

3. *Ubi* notat locum: furto, homicidio, fornicationi, pollutioni adfert malitiam sacrilegii: si fiant in loco sacro.

4. *Quibus auxiliis* significat media ad operandum, item adiutores. Addit malitiam specie distinctam, si media sint specialiter mala: ut si usus sis ope dæmonis ad furandum, superstitione ad sanandum &c.

5. *Cur* denotat finem extrinsecum operantis: Sæpè mutat speciem, ut si dederis pecuniam Testi ad dicendum falsum testimonium, meretrici ad fornicandum &c.

L 2

6. *Qua-*



6. *Quomodo* denotat modum operationis. Mutat speciem, ubi modus operationis differt specie ab ipsa operatione: ut si violenter deiores virginem, & est stuprum; Si rapias alienum, & est rapina; Si fraude contrahas, & est injustitia.

7. *Quando* significat tempus. Mutat speciem, si actus pro tali tempore sit prohibitus: Ut si labores in festo, celebres post meridiem &c. *Commun. TT.*

\*\*\*\*\*

## TRACTATUS X.

### De Conscientia.

#### CAPUT I.

#### De Conscientia recta & erronea.

*Quid Conscientia? quid recta & erronea?*

**C**onscientia est dictamen practicum intellectus de re ut hic & nunc licita vel illicita, benè aut malè facta. Si dictet licitum aut illicitum, quod tale est à parte rei, est physicè recta; Si minùs, est physicè erronea. Si dictet aliquid prudenter & certò, est practicè recta; Sivè etiam sit physicè recta, sivè non. Conscientia erronea, alia est vincibilis, quando intellectus errorem cognoscere potuit; alia invincibilis, quando non potuit.

*An*

*An voluntas teneatur sequi Conscientiam  
& quam?*

Conscientia practicè recta est regula proxima actionum humanarum, eamque (dum est præcipiens vel prohibens) tenetur voluntas sequi. *Omnes.* Quia voluntas est potentia cæca; ergò sequi tenetur intellectum prudenter & certò dictantem, hoc vel illud esse præceptum aut prohibitum.

**COROLLARIA CASUUM.**

*Coroll. 1.* Illicitum est 1. Agere contra conscientiam, sive recta sit sive erronea: quia quod non est ex fide seu persuasione quod liceat, peccatum est. *Rom. 14.* 2. Sequi conscientiam vincibiliter errantem: quia error culpabilis.

*Coroll. 2.* Si conscientia dicat aliquid esse peccatum, non cogitando, an grave an leve; contra eam operans peccat graviter juxta Regim. Leviter juxta Gob. Huic consentiendum: Si res apprehendatur ut levis; illi verò, si ut gravis, aut operans velit peccatum, sive sit M. sive V. Quod si nullo modo quis adverteret ad gravitatem vel levitatem, hæc aut illa judicanda esset ex ipsa materia. *Marchant.*

*Coroll. 3.* Legitimè excusatus, conscientia dictante omissionem esse peccatum, non peccat: Si opus implere non possit absolute; peccat, si possit. Ideo incarceratus omitendo sacrum non peccat, etsi se peccare putet; peccat autem

febricitans, si idem putet: quia omīssio huic libera, non illi. Dicast. *de Juram. num. 234.*

*Coroll. 4.* In casu perplexitatis, conscientiā distāte ex duobus, in quorum alterutrum oportet incidere, utrumque esse æqualiter malum, homo non peccat, quidquid elegerit ex utroque. At conscientiā distāte unum esse majus malum, eligendum est minus.

*Coroll. 5.* Quod est ex conscientiā inculpabiliter erronea, non est peccatum; imò (ut censet Sporer contra Marchant) moraliter bonum, puta formaliter. *Quid si cognito errore quis de tali opere, v. gr. perjurio delectetur?* Peccat: si delectetur de illo materialiter sumpto, prout in se malum; non peccat, si delectetur de illo formaliter sumpto, quatenus factum sinè peccato. *Comm.*

*Coroll. 6.* Pœnitentem, qui laborat conscientiā erroneâ, Confessarius tenetur instruere, si pœnitens interroget aut dubiet; vel si putet esse peccatum, quod non est; aut non esse necessaria ad salutem, quæ omnino sunt. Per accidens non tenetur instruere, si pœnitens ex conscientiā invincibiliter errante committat peccatum, quod creditur non emendaturus. Caveat igitur conjugem monere de nullitate matrimonii, nisi prius obtenta sit dispensatio, & speretur fructus. vide Sporer *de Conscient. num. 28.* Quid si error noceat bono publico, v. gr. invalidè ordinatus ministret sacramenta, monendus est, etsi peccaturus sit formaliter, ne patiatur innocens.

## CAPUT II.

## De Conscientiâ probabili &amp; certâ.

*An liceat sequi opinionem probabilem?*

**A**D licetè operandum requiritur conscientia certa, saltem practicè, nimirum ut operans prudenter & certò judicet, se licetè operari: aliàs exponit se periculo peccati. Conscientia autem practicè certa formari potest ex probabili, non quidem immediatè sed mediatè, hoc similiv. judicio reflexo: Possum facere absque peccato formali, quod verè est probabile licere; atqui probabile est, quod liceat, v. gr. pingere in fetto; ergo hîc & nunc possum &c. Facta saltem virtualiter ejusmodi resolutione, licet sequi opinionem minùs probabilem, etiam minùs tutam relictâ probabiliori, & tutiori. Est contra multos communissima D.D. apud la Croix *Tem. 1. num. 269.* Ratio: Sententia probabilior & tutior potest esse falsa; ergo non teneris eam sequi; probabilis potest esse vera, nititur autoritate & ratione; ergo potes eam sequi, fundando in ea dictamen practicum, prudens & moraliter certum.

## COROLLARIA CASUUM.

*Coroll. 1.* Illicitum est 1. Operari ex judicio tantùm probabili, cum formidine practica de opposito. *Quis operans se exponit periculo peccandi.* Post factum autem se retolvere aut revolvere A.A. An commissum sit peccatum; est medi-

cinam sperare post mortem, inquit Heriox.  
 2. Sequi opinionem dubiè, tenuiter vel extrinsecè tantum probabilem. Carden. num. 262. 3. Eodem tempore usurpare utramque opinionem probabilem in præjudicium tertii; ut si velles hereditatem adire ex Sententiâ: *quod testamentum non solemne valeat pro foro conscientia*; & tamen ex Sententiâ: *quod non valeat, velles solvere legata.* Haunold. 4. Opinionem semel electam mutare, cum certâ violatione alicujus legis: ut si die Sabbathi velis comedere carnes, quia in uno horologio audita est 12. Noctis; & simul celebrare in Dominica: quia necdum audita in altero. Gob. Tr. 106.

Coroll. 2. Licitum est sequi sententiam probabilem alienam, relicta suâ probabiliori. *Quid si operans alienam judicet falsam?* Non potest eam sequi, stante hoc judicio. Schild. Tr. 2. num. 25. Confessarius debet absolvere poenitentem de cætero dispositum, qui tenet sententiam verè probabilem suæ probabiliori contrariam. Laym. Sto. 2. Subditus tenetur obedire Superiori imperanti aliquid probabiliter licitum, etsi subito probabilius videatur illicitum. Sanch. in Decal. l. 6. c. 3. Consultus potest dare consilium juxta Sententiam verè probabilem suæ contrariam. Quod si consulens de obligatione restituendi juxta unam sententiam obligetur, juxta aliam non, consultus peccat contra justitiam: Si consulenti ex sua sententia absolute respondeat, ipsum obligari, & non indicet sententiam oppositam.



si. am. Platellus p. 101. Licet aliquis sequitur opinionem, quam vel legit in probato Authore, vel audit à viro prudenti; quamvis sciat alios tenere oppositum, nec possit solvere rationes in contrarium. Sporer *num. 41.*

*Coroll. 3.* Non licet sequi sententiam minùs probabilem, minùsque tutam, ubi agitur de valore actus, aut timetur damnum proximi. Hinc 1. Minister Sacramenti illicitè sequitur probabilem de valore Sacramenti. *ex propos. 1. Damna ab Innocent. XI.* Licet tamen in casu necessitatis, sed sub conditione. Medicus tenetur adhibere remedia tutiora & probabiliora, his deficientibus, licita sunt probabilia & dubia; imò periculosa, si desperatum foret de vitâ infirmi. 3. Judex in causa civili tenetur decidere pro par e probabiliore. *ex propos. 2. Damna ab Innocent. XI.* In casu parit utrimque probabilitatis, res inter litigantes est dividenda. Thom. Sanch. *ex commun.* contra Ledes. Advocatus tamen potest defendere partem minùs probabilem, ut supra fol. 98.

### CAPUT III.

#### De Conscientia dubia & scrupulosa.

*An liceat operari cum Conscientia practicè dubia? quæ illa?*

**N**Unquam licet operari cum conscientia practicè dubia, qualis est: an hic & nunc liceat operari. Licet cum speculativè dubia (qua-

lis est: an hoc vel illud secundum se licitum) formando practicè certam; quæ prudens est judicium: quod hic & nunc, non obstante dubio speculativo, operari liceat.

*Quid Conscientia propriè scrupulosa?*

Est inanis & anxiosa suspicio peccati, ubi nihil est. Si enim intellectus firmiter judicet, aliquid esse vel non esse peccatum, est conscientia certa, eaque recta vel erronea; Si opinetur, est probabilis; Si dubiter, est dubia; Si habito iudicio, non esse peccatum, tamen ex nullo vel inani motivo anxie formidet, esse peccatum, est scrupulosa.

*An liceat agere contra Conscientiam scrupulosam?*

Licet: quia talis agit contra inanem formidinem, sequendo iudicium firmiter vel suum vel Confessarii. Tutissimum tamen est, talem conscientiam deponere, innitendo firmo prudentium iudicio.

**COROLLARIA CASUUM.**

*Cor. II. 1.* Dabimus peccat. 1. Si operetur in dubio practico; peccatum autem est M. vel V. & ejusdem speciei, quale & cujus speciei est illud, de quo dubitatur. 2. Si eligens partem minus tutam se quidem resolvat, sed obiter. 3. Si non, aut minus, quam debet, inquirat de rei veritate ad Dubium speculativum vincendum. *Quid si invincibile?* Formanda est conscientia practicè certa. *Quid si non possit?* Tutior pars est eligenda.

*Coroll. 2.*

Coroll. 2. Ad deponendum dubium practicum, manente speculativo, Tituli sunt: Praxis communis timoratorum, consilium viri prudentis & potissimum iusta possessio, juxta Regul. Juris 6. In pari causa melior est conditio possidentis. At pro quo fiat possessio extra materiam justitiae? Accipe sequentes Regulas: 1. In dubio juris de legis existentia, promulgatione, vero sensu, vel transgressionem fundante legem, homo manet in possessione libertatis suae. Hinc dubitans invincibiliter: an sit jejunium, festum &c. an fecerit votum, juramentum &c. ad nihil horum tenetur. Dubitans an irregularitatem (nisi sit ex homicidio dubio c. ad audient. de homicidio) censuram vel poenam incurrit, non censetur incurrisse. 2. In dubio facti supponentis legem, lex manet in possessione obligationis: quia est lex certa, libertas dubia. Hinc dubitans: an votum impleverit, valide voverit, an hic & nunc excusetur a lege &c. manet obligatus, nemine contradicente. Certus de debito & dubius de solutione, tenetur solvere, nisi etiam creditor dubitet; tunc enim juxta Sanchez obligatur adhuc ad integram solutionem, juxta Tanner. ad nullam, juxta Laym. ad partem & probabilius, apud Sporer num. 85. 3. In dubio, an tempus obligationis inchoaverit, homo est in possessione suae libertatis; in dubio autem, an tempus obligationis sit finitum, lex manet in possessione obligationis. Hinc dubius de auditu.

12. Noctis die Jovis potest comedere carnes, non

non die Sabbathi. Dubius, an compleverit annum 21. ætatis, teneatur abstinere à succipiendis Ss. Ordinibus, non verò jejunare. 4. In dubio de quantitate obligationis contractæ conscientia formanda est ex Reg. 15. in 6. Odia restringi & favores convenit ampliari. Hinc dubius, an vovendo religionem intenderit strictiorem, ingredi potest minùs strictam, Sporer.

*Coroll. 3.* Confessarius scrupulosi notet sequentia: 1. Attendat, an sit verè scrupulosus. *Sed quando est?* Si inaniter dubitet, sæpè interroget; timeat, ubi timoratis non est timor; resolutione acceptâ, non aut vix acquiescat; confessiones anxie repetat &c. 2. Sit patiens, blandus, quandoque austerus. 3. Reipositionibus rationem non addat, nisi sit manifesta; minùs cum scrupuloso disputet. 4. Judicium formet ex ipsâ natura rei, non scrupulosi narratione. 5. Non permittat iterare confessionem eorundem peccatorum; nec unquam de absolutionem, si poenitens meros adferat scrupulos, sed à se ad celebrandum vel communicandum repellat. 6. doceat de remedia contra scrupulos, quæ sunt: ut per occupationes scrupulis ocludat aditum; eundem servet confessarium; non judicet esse peccatum, nisi certò sciat; dubium & opinionem peccati contemnat velût scrupulum, insistens per omnem modum resolutioni confessarii, aliàs peccaturus ex conscientia erroneâ. de his Rosella.

TRA-

# TRACTATUS XI.

## De Legibus.

### CAPUT I.

#### De Lege in communi.

*Quid lex? quomodo obliget? quotuplex?*

**L**Ex est constans & recta agendorum vel omittendorum regula. Ut obliget actualiter, requiritur promulgatio, non acceptatio. *Quia legislator non vult legem obligare sine promulgatione, potest velle sine acceptatione.* Lex dividitur in naturalem, quæ indita à natura, & positivam, quæ posita à Legislatore. Positiva in divinam & humanam: hæc est immediatè ab homine, illa à Deo, quæ si idem præcipiat ac naturalis, dicitur divina naturalis; aliàs simpliciter, positiva, est, quæ tum vetus tum nova; humana in Ecclesiasticam & civilem, utraq; in affirmativam & negativam; de omnibus infrà.

#### COROLLARIA CASUUM.

*Coroll. 1.* Lex positiva formaliter consistit in actu voluntatis, quò Legislator vult obligare. *Scot. 1. d. 44. n. 3.* De ratione ejus est: ut sit justa, de se stabilis, à potestate legitima, in bonum communis, eamque obliget. *Comm.*

*Coroll. 2.* Lex non obligat: Si non promulgata, si moraliter impossibilis, vel dubia, vel certò injusta. Etenim si lex sit dubia, possessio est



est pro libertate subditorum, si probabiliter injusta, præsumptio est pro iustitia legis. Andr. à M. D. & alii commun.

## CAPUT II.

### De Lege æterna & naturali.

*Quid Lex æterna & naturalis ?*

**L**ex æterna est regula practica necessariæ & æternæ veritatis, v. gr. Deus est colendus; cuique tribuendum, quod suum &c. ut in Deo est scilicet subjectivè, dicitur Divina naturalis; estque actus divinæ voluntatis, quo legem æternam à creaturis vult servari. Ut in nobis scilicet objectivè, dicitur naturalis, estque præfata regula practica, in rebus ipsis fundata, per dictamen rationis nota, obligans independentè ab omni præcepto positivo.

*Quos obliget Lex naturalis ? An dispensabilis ?*

Lex naturalis inclinetur quidem omnes obligat creaturas; de absoluta tamen potentia sua Deus dispensat in quibusdam præceptis naturalibus, v. gr. secundæ tabulæ Decalogi, excepto octavo; creatura in nullo. Scot. 3. d. 37. n. 3. Hinc S. Bern. de Disp. & Præcept. c. 3. Non occides, non mœchaberis, non furtum facies & reliqua illius tabulæ scita, quæ etsi nullam humanam dispensationem admittant, Dominus tamen horum, quod voluit, & quando voluit, solvit.

COROL-

## COROLLARIA CASUUM.

*Coroll. 1.* Lex naturalis versatur 1. Circa principia un.versalia practica, v. gr. Declina à malo & fac bonum. Deus est colendus, nulli facienda injuria &c. Et horum à nullo prætendi potest ignorantia. 2. Circa illa, quæ ex præfatis principiis evidenter deducuntur, v. gr. non est mentiendum, occidendum, furandum &c. Et horum accedente circumstantiâ apparenter bonâ, ignorantia dari potest in rudibus, v. gr. putantibus licitum mentiri ob necessitatem, furari ad dandum pauperi. 3. Circa illa, quæ principiis naturalibus sunt consona non ita clarè, v. gr. quod illicitum sit lucrum ex mutuo, illicita pollutio etsi ad vitæ conservationem unice necessaria &c. Et horum ignorantia dari potest in Emunctoribus, ut ipsi fatentur.

*Coroll. 2.* Odium Dei, idololatria, blasphemia, negatio fidei, perjurium, mendacium, in nullis circumstantiis sunt licita; non ita est de homicidio etiam innocentis, fornicatione, & furto quæ licent ex dispensatione divina, quam habuit Abraham ad immolandum filium, Osèe ad faciendum filios fornicationis, Israëlitarum ad surripienda vasa Aegyptiorum.

*Coroll. 3.* Quod est de jure naturæ positivè & propriè, quatenus natura illud præcipit, aut vetat, semper obligat & ubique, nulla subsistente Epikeiâ. Quod verò de jure naturæ negativè & impropriè, quatenus lex naturæ id non præcipit, nec inducit contrarium, potest mutari: Sic matrimo-

monium clandestinum, quod negativè validum de jure naturæ, est positivè invalidum de jure positivo; communitas rerum permittà jure naturali, est sublata jure gentium. Est autem jus gentium, quod ex consensu populorum constitutum, illis omnibus aut ferè omnibus est commune.

### CAPUT III.

#### De Lege divina, veteri & nova.

*Lex vetus quæ, à quo, ad quos, quamdiu?*

**L**ex vetus seu Mosaica (continens præcepta moralia, Cæremonialia, & judicialia) data est à Deo per Moysen in monte Sinai; obligavit solum populum Judæorum, & quidem ex genere suo sub culpa M. est à Christo abrogata; expiravit autem non in morte ejus, sed post à promulgatione legis novæ facta Jerosolymis in die Pentecostes; quâ factâ legalium observatio fuit inutilis, non statim mortifera, ut modo est. S. Bonav. 4. d. 3. q. 2.

*Lex nova quæ & qualis?*

Lex nova seu Evangelica (continens præcepta Sacramentalia, fidei & moralia) hodiè obligat omnes homines, & obligabit usque ad consummationem sæculi. *Trid. Sess. 6. can. 21.* Dispensabilis est per solum Deum. D. Thom. apud Metzger. Scot. 4. d. 25. q. 3. Cadere potest in eam Epikeia, declarando, legem in re admodum difficili, modò non sit essentialiter mala, non obli-

obligare : quia Deus non censetur obligare ad moraliter impossibile. Marchant.

### COROLLARIA CASUUM.

*Coroll. 1.* Gentiles obligati fuerunt ad præcepta moralia quatenus juris naturalis ; ea servando , & contra Originale applicando remedium legis naturæ , potuerunt salvari extra Synagogam ; potuerunt etiam se aggregare populo Judæorum recipiendo circumcisionem , quâ receptâ dicebantur Proselythi , & debitores erant universæ legis faciendæ. *Galat. 5.*

*Coroll. 2.* In lege merè divinâ nequit dispensare potestas humana , nequidem Pontificia. *Commun. contra Sanchez.* Quia inferior non dispensat validè in lege Superioris , nisi ab eo concedatur ; Deus autem nullibi concessit ; *nam ad quid ?* Dans legem , infinitâ suâ scientiâ penetravit omnes casus particulares , adeoque vel vult legis obligationem se extendere ad talem casum , vel non vult ? Si vult , non valet dispensatio : Si non vult , ad quid dispensatio ? *Sed Summus Pontifex dispensat in voto , in matrimonio rato ?* R. Lex divina implendi votum supponit actum voluntatis humanæ votantis , hæc autem subiacet Summo Pontifici tanquam Supremo Pastori , quo iusta ex causa aliter ordinante cessat obligatio legis. Marchant. *Tom. 2. tit. 1. q. 3.*

## CAPUT IV.

De obligatione Legis humanæ.

*An Lex humana obliget in Conscientia?*

**D**atur potestas legislativa humana, etiam pro foro conscientiae, tum Ecclesiastica, tum civilis. *Rom. 13.* Subditi estote . . . etiam propter conscientiam. *Et versu 2.* Qui potestati resistit, Dei ordinationi resistit; qui autem resistunt, ipsi sibi damnationem acquirunt.

*Quos actus & qualiter præcipiat Lex humana? quos obliget?*

Lex humana præcipit actum honestum, non tamen ut exerceatur ex motivo honestatis, vel ex scientia præcepti, aut voluntate illud implendi. *Herinx ex commun.* Actus pure internos nequit ulla lex humana directe præcipere aut prohibere quoad vim coactivam. *Omn.* Probabilius tamen id potest Ecclesiastica, quoad vim directivam. *Medina, Rosella,* alique apud *Henr.* Leges obligant juxta mentem Legislatoris & capacitatem materiarum suos respectivè subditos: Ecclesiasticæ solos Baptizatos, Legislatorem solum quoad vim directivam, Subditos etiam quoad coactivam. Hi enim cogi possunt in foro fori, non Legislator; non Baptizati autem sunt extra Ecclesiam, ejusque jurisdictionem. *Commun. TT.*

COROL-



## COROLLARIA CASUUM.

Coroll. 1. Subdiri tenentur lege; et si Legislator sit discolor, hæreticus, vel infidelis. *ex*

1. Petri 2. Et si mortuus: quia lex stabilis, secus est de præcepto. Hæretici tenentur legibus Ecclesiasticis: quia per Baptismum subduntur Ecclesie. Non tenentur iis infantes, & perpetuo amentes; his licite dantur carnes in quadrag. non licite inducuntur ad actum à natura prohibitum, v. gr. pollutionem.

Coroll. 2. Clerici tenentur indirectè & quoad vim directivam legibus Reipubl. sicut iis: quæ pro bono publico sunt & Clericis & Laicis communes, v. gr. præscribentes pretia rebus, modum ædificiis, formam contractibus. Religiosi exempti regulariter non tenentur ad ordinationes Synod. Episcopor. Roderiq. Tr. 2. q. 16. Ad festa, interdicta & quasdam correptiones tenentur. *ex Trid. Sess. 25. c. 12.*

Coroll. 3. Non tenetur peregrinus legibus sui Territorii, *ex c. 1. de constit. in 6.* etiam exiens ex proposito se eximendi. Sanchez. Quia utitur suo jure. Existentes tamen in terris infidelium tenentur ad Quadragesimam: Quia obligat Catholicos ubique. Tenetur peregrinus legibus Territorii, in quo est: Gonet, Her. & alii contra varios, qui volunt peregrinantes teneri legibus proprii Territorii: Quia leges immediate afficiunt Territorium, adeoque existentes in eo, si legis sint capaces, & illi servandæ moram proportionatam trahant.

*Coroll. 4.* Vagi tenentur legibus locorum, per quæ transeunt, aliàs essent exleges. Aliubi figentes Domicilium, aut habentes quasi domicilium, ut studiosi, famuli, opifices peregrinantes tenentur legibus talis loci, ibique sortiuntur forum.

*Coroll. 5.* Lex humana in materia gravi ordinariè obligat graviter; leviter, si ita velit Legislator. In materia undequaque levi non obligat graviter, etsi velit Legislator: *quia talis obligationis est incapax.* Planè non obligat, quando ex ejus observatione imminet periculum mortis vel gravis damni; excipe: nisi violatio legis cedat in scandalum vel contemptum Religionis; aut vita subditi meritò exponatur pro bono Reipubl. Sic exponuntur milites in bello, Medici & Sacerdotes tempore pestis. Metzg. pag. 323.

*Coroll. 6.* Subditus tenetur tollere aut non ponere, quæ vel ex natura rei vel proximè moraliter legis executionem impediunt; non verò omnia impediencia. Primum, non secundum, teste praxi, vult Legislator. Hinc, licet ex causa honesta venari, itinerari, laborare, etsi inde servari nequeat jejunium; potest aliquis ex motivo rationabili die Veneris aut Sabbathi summo manè discedere, etsi in Dominica non sit habiturus sacrum. *DD. commun.*

*Coroll. 7.* Lex affirmativa non impletur, nisi per actum humanum; unde recitans Horas in ebrietate non satisfacit. Secus est de lege negati-

gativa ; unde servat jejunium , qui dormit de die in diem : *Quia affirmativa precipit actum humanum*, non verò negativa similem omissionem.

*Coroll. 8.* Legi v. gr. de audiendo sacro satisfacit : 1. Qui audit ex fine malo : modò sit vera & moralis auditio sacri. 2. Qui audit ignorans, esse festum. 3. Qui audit, sed non intendit satisfacere. 4. Qui audit, & positivè non vult satisfacere ; peccat tamen actu interno. Quodsi nolit satisfacere per hoc sacrum , auditurus summum, non tenetur illud audire ; modò desistat ab animo non implendi legem per prius sacrum. Non sic omninò est de voto : Qui vovit Rosarium , recitans illud voti immemor satisfacit ; recitans verò cum animo vel tunc, vel planè non implendi votum, non implet, sed denuò recitare tenetur ; sicut qui alteri debet 10. Flor. dans 10. gratis , non solvit debitum. *Sporer num. 45. & seq.* 5. Satisfacit, qui sub sacro legit Horas , implet pœnitentiam, Sicque pluribus actibus eodem tempore pluribus satisfacit prœceptis ; imò unico actu pluribus satisfacere potest obligationibus , si cadant supra eandem materiam : Sic plura habens beneficia satisfacit unâ lectione Horarum , habens votum jejunandi in Quadrag. satisfacit uno jejunio. *Sporer citat.*

*Coroll. 9.* Lex præcipiens orationem , indirectè præcipit attentionem , etiam internam ; præcipiens contractum , juramentum &c. præcipit indirectè intentionem contrahendi , ju-

randi &c. Et sic de aliis actibus internis, qui externo annexi, & sine quibus externus nequit subsistere.

*Coroll. 10.* Lex merè poenalis non obligat sub peccato, nisi indirectè scilicet ad poenam acceptandam: Si latæ sit sententiæ, poena ordinariè incurritur ipso facto. Invincibilis ignorantia legis excusat à poena, secus vincibilis. Ignorantia solius poenæ non excusat à poena, nisi sit Censura Ecclesiastica, ut infra. Nulla ignorantia impedit effectum legis irritantis; quæ, si simul sit prohibens, obligat in conscientia. *DD. commun.*

## CAPUT V.

### De mutatione Legis.

*An Lex humana mutari possit & cessare?*

**P**otest 1. *Cessatione finis*: Si cesset adequatus & universaliter, *Omnes*. Non verò si solum respectu alicujus in particulari: contra *Dian.* Ratio est? quia cessante legis *ne adequate & universaliter*, cessat ratio obligandi; non cessat, cessante *sine particulari, vel respectu alicujus in particulari*. 2. *Interpretatione*, explicando sensum legis; quod ad talem casum se non extendat. Et *Epikria*, explicando mentem Legislatoris, quod in tali casu nolit obligare. Interpretari possunt Legislator, consuetudo, & viri docti. 3. *Consuetudine*: quæ potest legem interpretari; Si hoc vel illo modo communiter serverur; veterem abrogare,

gare, si planè non ampliùs servetur; novam instituere, si inducatur à majori parte communitatis, & cum voluntate se obligandi, accedente saltem tacito Principis consensu.

4. *Ab. vel derogatione*; Si eam totaliter vel partialiter tollat Legislator. 5. *Dispensatione*; Si persona quædam, etiam ficta, v. gr. monasterium, fodalitas &c. ab habente potestatem vel ordinariam vel delegatam eximatur; aliàs obligata. *Commun. DD.* Potestas ordinaria dispensandi competit illis, qui habent jurisdictionem ordinariam in foro externo, ut sunt Papa, Episcopi, Vicarii generales, Prælati Regulares.

### COROLLARIA CASUUM.

*Coroll. 1.* Peccant 1. Legens librum hæreticum, etsi respectu illius non sit periculum perversionis. 2. Legem interpretantes, aut Epikeia utentes, non ut oportet. 3. Insistentes consuetudini, quæ semper corruptela, contra legem divinam. 4. Introducentes consuetudinem contra legem humanam, sed non peccant bonâ fide eam prosequentes. 5. Legislator suam aut inferioris legem abrogans sine iusta causa.

*Coroll. 2.* Dispensatio est illicita: 1. Si dispensans aliquid acceptet, nisi per modum mulctæ ad pios usus, aut pro labore extrinseco. 2. Si Legislator, aut ejus Superior dispenset sine iusta causa; est tamen valida.



*Coroll. 3.* Invalida est dispensatio 1. Si inferior dispense in lege Superioris; non habitâ ad hoc facultate, aut habitâ dispense sine iusta causâ, saltem putatâ. Inferior habens jurisdictionem in foro externo vel Privilegium, dispense in lege Pontificis circa levia, circa frequenter occurrentia, & quando periculum est in mora vel difficilis ad Pontificem accessus. Si causâ certò excuset, superfluit dispensatio. 2. Si obrenta sit ex causâ falsâ, quæ bona fide allegata. 3. Si sit sub-vel obreptitia; ut si petens tacuerit verum, quo cognito Superior non dispensasset; vel expresse falsum, quod fuit dispensandi causâ finalis. *ex c. fin. de Filiis Presb. in 6.* Valet tamen, si ex pluribus causis in Rescripto positis verificetur finalis. De modo recurrendi ad Poenitentiarium Romanam. Vide la Croix l. 1. num. 796. Reiffenstuel post lib. 4. Decret.

*Coroll. 4.* Non cessat dispensatio per mortem dispensantis, nisi ad hanc fuerit restricta; cessat tamen cessante causâ dispensationis temporaneâ, v. gr. cessante infirmitate cessat dispensatio comedendi carnes, omittendi Horas &c.

## CAPUT VI.

### De Privilegiis.

**Q**uiditas: Privilegium est lex privata contra vel præter jus aliquid concedens. *c. Abbas. de V. S.* Lex est: quia ligat, non privilegiatum ad privilegio utendum, sed alios indirectè ad

ad non oblitendum. Privata est: quia beneficium concedit & particulare v. gr. exemptionem fori, & particularibus v. gr. Clericis, ut sunt pars communis.

*Divisio*: Dividitur 1. In reale & personale: Primum conceditur intuitu rei, loci vel officii; Secundum personæ individuae ut tali. Personale expirat cum personâ; reale transit ad omnes, apud quos officium vel res privilegiata. 2. In gratiosum & remuneratorium. 3. In perpetuum & temporale. 4. In scriptum & vivæ vocis oraculum. 5. In commune, quod conceditur pluribus, v. gr. Privilegium fori Clericis; & in privatum, quod uni.

*Communicatio*: Ordines mendicantes inter se & cum non mendicantibus plenissimam habent communicationem privilegiorum concessorum & concedendorum etiam Societati Jesu cum clausulâ communicationem prohibente. Reiffenst. l. 5. f. 470. ex variis SS. Pont. Constit. Signanter Clemens VII. Ordini nostro communicavit, & Clemens VIII. Bullâ: Ratio Pastoralis. Pro eodem innovavit & confirmavit omnia privilegia quibusvis Ordinibus mendicantibus & non mendicantibus quomodolibet concessa, non obstantibus quibusvis clausulis. Hæc communicatio currit de Prælati ad Prælatos, de Fratribus ad Fratres &c. ut quod concessum Generali, aliisque Superioribus, & Fratribus unius Ordinis, concessum sit iisdem alterius, ex Constit. Julii II. apud Reiffenst. citat. Privilegium tamen concessum uni Religioso privato non commu-

nicatur aliis; idem est de indultis & indulgentiis uni loco concessis ob rationem specialem, vel in honorem alicujus Sancti. Metzger. *de Privileg. num. 13.*

*Revocatio*; In Concilio Trid. expressè revocata sunt omnia & sola Regularium privilegia, quæ sunt contraria alicui ex *Decretis Sess. 25. de Regular.* vel etiam alicui priorum Sessionum decreto cum clausulâposito. *commun. DD.* Reliqua verò, quæ contraria alicui decreto sine clausulâ derogatoriâ; ne tacite sunt revocata. Reiffenst. *cit. num. 139.* contra Donat. Peyrin. Privilegia vivæ vocis oraculo concessa usque ad Urban. VIII. ab eodem *constit.* *Alias felix recordat.* Pro utroque foro sunt revocata; exceptis iis, quæ per Officiales & Ministros, quibus competit, sunt authenticata, & videri possunt in nostro compendio *Privil. auth.* Hieron. à Sorbo signata *lit. maj. O.* Unde vivæ vocis oracula post Urbanum VIII. concessa & concedenda manserunt intacta; valent pro foro interno, si constet, quod fuerint concessa; valent etiam pro foro externo, si habeatur testimonium ad probandum in foro externo sufficiens. Reiffenst. *cit. num. 163.*

*Cessatio*: Privilegium cessat 1. Si quis mutet statum vel amittat officium, cui privilegium est annexum; nam pereunte re perit, eâ reparatâ reviviscit reale. 2. Cessante conditione sub quâ, expirante tempore ad quod, vel actu peracto, ad quem est concessum. 3. Cessante totali-

taliter causâ finali motivâ. 4. Per renunciatio-  
nem privilegiati, si in privati favorem privile-  
gium sit concessum; non verò per mortem pri-  
vilegiantis vel eius amotionem ab officio, nisi  
sit ad hanc vel illam limitatum. 5. Per abusum  
privilegiati; ordinariè tamen non ipso facto.  
6. Privilegia onerosa, seu concessa cum onere  
aliorum, amittuntur per non usum aut usum  
contrarium; & hoc vel viâ præscriptionis, vel  
tacitæ renunciationis. Privilegia, quæ meræ  
gratiæ, sive sint affirmativa, v. gr. indulgentiæ,  
sive negativa, v. gr. non jejunandi, non amit-  
tuntur per non usum. Reiffenst. citat. Metzg.  
d. 38.

\*\*\*\*\*

## TRACTATUS XII.

### De Peccatis.

#### CAPUT I.

#### De Peccatis in genere.

**Q**uiditas Peccati: Est dictum, factum vel  
concupitum contra legem æternam.  
S. Aug. l. 2<sup>a</sup>. contra Faust. c. 27. Ubi  
peccata omissionis comprehenduntur reducti-  
vè; peccata verò contra legem Ecclesiasticam  
sunt contra legem Dei æternam mediata, qua-  
tenus ab eâ omnis Lex.

*Diviso:* Dividitur in actuale & habituale; ori-  
ginale & personale; proprium & alienum; in  
pec-

peccata cordis, oris, operis; commissionis & omissionis; ex passione, ignorantia & malitia: de quibus alibi.

*Causa peccati*: Est sola voluntas creata, Deo permittente, & incitantibus mundo, carne, diabolo. Effectus sunt corruptio naturæ, quæ hebetatur intellectus, induratur voluntas &c. reatus poenæ, & variæ quandoque obligationes.

*Distinctio peccatorum*; Specifica ab intrinseco sumitur ex diversis specie rectitudinibus, quarum sunt privationes; ab extrinseco sumitur ex legibus formaliter diversis, quarum sunt transgressiones. Distinctio & multiplicatio numerica accidit, quando idem physicè actus privatur pluribus numero rectitudinibus, aut idem specie actus moraliter interrumpitur & renovatur.

### COROLLARIA CASUUM.

*Coroll. 1.* Sunt peccata specie distincta 1. Furtum, fornicatio, mendacium, & similia, quæ & quia opponuntur diversis specie virtutibus. 2. Sacrilegium, Superstitio, Simonia, Perjurium &c. quia opponuntur eidem quidem virtuti Religionis, sub diversa tamen ratione formali. Idem est de homicidio, adulterio, detractione, furto, rapina & aliis peccatis contra iustitiam.

*Coroll. 2.* Non sunt peccata specie distincta, quæ contra præcepta diversa materialiter tantum utpote data sub eodem motivo. Hinc non committit plura peccata: 1. Qui negligit sacrum



sacrum die Festo incidente in Dominicam, qui non jejunat Vigilia concurrente cum feria 4. tempor. 3. Franciscanus non jejunans feriâ sextâ in Quadrag. quia præcepta Regulæ suæ non obligant ut vora. AA. Ordinis contra Vasq. Gonet. 4. Qui omittit Horas, obligatus ratione Ordinis & Beneficii.

*Coroll. 3.* Unico actu plura committit peccata, qui plures odio habet, pluribus detrahit, dat scandalum &c. Si actus tendat in plura moraliter objecta; Secus si tendat in ea per modum unius, ut habent connexionem: Sic unum peccatum est, uno actu detrahere monasterio, omittere omnes Horas, nolle servare jejunium Quadragesimale; est tamen pluribus æquivalens.

*Coroll. 4.* Actiones physicè plures sunt unum numero peccatum: 1. Si una censeantur actio in genere moris. Hinc unum committit peccatum, qui plura eidem dat verbera, plures effudit maledictiones, pluries eidem apud eundem detrahit &c. 2. Si referantur ad consumptionem ejusdem peccati. Hinc qui ad fornicandum impudica habet verba, oscula, tactus, unum committit peccatum fornicationis. Qui verò successivè fornicatur, aut se polluit bis, ter &c. tot committit peccata: quia quilibet fornicatio aut pollutio est opus consummatum & una non ordinatur ad aliam.

*Coroll. 5.* Ob interruptionem moralem peccat toties, quoties: qui priorem voluntatem: v. gr. fornicandi retractat, eamque resumit; qui

qui voluntariè cessat à delectatione morosa, odio &c. atque redit in id ipsum. E contra ob interruptionem solum physicam unum committit peccatum: qui comedens carnes in ieiunio parum surgit, postea continuaturus, qui conficit iter aliquot dierum ad furandum; qui cessat ab odio involuntariè, utpote per distractionem, vel somnum & postea resumit: quia actus moraliter unus.

## CAPUT II.

## De Actuali &amp; Habituali.

Peccatum actuale, quod est vel commissio, vel omissionis, est actio vel omisio de presenti, voluntaria contra legem. Formaliter consistit in privatione rectitudinis à lege intentæ. Scot. 2. d. 37. q. 1. Unde Aug. tract. 1. in Joan. Peccatum nihil est. Greg. Nis. Vitium est improbitas in boni privatione suam habens formam. Peccatum habituale est eadem actio vel omisio, ut moraliter perseverans, donec remittatur. Dupasq. ex Scot. 4. d. 50. q. 6. Quia sicut homo à peccato physicè existente dicitur peccator actualiter, ita ab eodem moraliter perseverante dicitur peccator habitualiter.

## COROLLARIA CASUUM.

Coroll. 1. Omisio præcepti est peccaminosa in se, si voluntaria sit in se; peccaminosa

nosa in sola causa, si in causa voluntaria. Hinc propinans venenum fit reus homicidii eo instanti, quo propinat, non quo sequitur mors; poenas tamen fori externi non incurrit, nisi morte secuta. Voluntarie infirmato imputantur omnes pravitæ præceptorum omissiones. Se committens somnium periculo omitrendi Horas, si adhuc recitet, non peccat in effectu omissionis, tamen in affectu.

Coroll. 2. Peccatum habituale non consistit formaliter in privatione gratiæ: quia non omne peccatum, puta non veniale, nec mortale necessitate absoluta causat eam. Neque consistit in obligatione passiva seu condignitate ad poenam: 1. Quia hæc non est peccatum moraliter perseverans, sed in eo fundatur ut effectus; estque reatus poenæ, non culpæ: nam reatus poenæ, etiam ut respicit culpam ex qua, non est formaliter reatus culpæ; peccatum autem habituale non importat solum reatum poenæ, ut voluit Mich. Bajus, & dampnavit Pius V. Sed culpam. Peccatum habituale M. totum remittitur per poenitentiam; non semper tota obligatio ad poenam: quia sæpè, ut definit Trid. Sess. 6. Can. 30. remanet reatus poenæ temporalis. Nota: Remanet, ergo ante fuit; Sed is non fuit reatus culpæ, aliàs hic maneret, sicque Mortale transiret in Veniale, quod dixerit nemo.

## CAPUT III.

## De Mortali &amp; Veniali.

*Quid Peccatum Mortale? quid Veniale?*

**P**eccata sunt inæqualia: quædam de se sunt mortalia, quædam venialia. *De Fide.* Mortale est transgressio præcepti graviter obligantis; Veniale est transgressio vel minus voluntaria præcepti graviter obligantis, vel perfectè voluntaria præcepti leviter obligantis. Henno.

*Quinam sint effectus Peccatorum?*

Mortale infert mortem animæ & reatum poenæ æternæ. *De Fide.* Non tamen in ratione offensæ est simpliciter & intrinsecè infinitæ malitiæ. Scot. contra Thomist. Quia Deus magis offenditur per unum peccatum mortale, v. gr. blasphemiam, quàm per aliud, v. gr. furtum. Veniale non solvit amicitiam cum Deo, nec poenam causat æternam, sed tantum temporalem. *De Fide.* Etiam in damnatis, contra Thomist. quia poenam æternam non meretur. Esse potest cum solo originali, contra eosdem: quia adultus ante baptismum & contritionem peccare potest prius venialiter, quàm mortaliter.

*An veniale fieri possit mortale?*

Potest per accidens, sic ut aliàs veniale fiat mortale ratione finis, scandali, conscientiæ erroneæ &c. Non tamen venialia præcisè ut multiplicata, ascendere possunt ad mortale. *commun.*

*Quia*

*Quia multiplicare peccatum veniale, non est peccatum mortale: mille mendacia jocosa manent mille peccata venialia; Si verò venialia moralem habeant connexionem ratione materiæ concrementis, vel ratione damni causati, tandem efficiunt mortale, ut infra.*

*Quid requiratur ad mortale?*

Ad mortale committendum requiritur ex parte intellectus perfecta advertentia gravis malitiæ, ex parte voluntatis perfectus consensus, ex parte objecti gravitas materiæ. *Omnes.*

**COROLLARIA CASUUM.**

*Coroll. 1.* Peccata cæteris paribus sunt graviora, quæ intrinsecè mala; sic peccatum gravius est fornicatio, quàm comestio carnis prohibita. Inter intrinsecè mala sunt graviora, quæ contra Deum, ut blasphemia, hæresis, perjurium &c. Deinde quæ nobiliori opponuntur virtuti. Inter peccata contra hominem sunt graviora, quæ meliori privant bono, sic gravius est homicidium, quàm detractio, furtum &c. Inter peccata contra legem positivam sunt graviora, quæ adversantur præcepto majoris momenti.

*Coroll. 2.* Peccatum dignoscitur esse mortale  
 1. Si contra Decalogum, vel Præcepta Ecclesiæ in materia gravi. 2. Si contra proximum, graviter lædat charitatem vel iustitiam in bonis animæ, corporis, famæ aut fortunæ. 3. Si contra seipsum cum gravi corporis vel animæ nocu-



mento. 4. Si imposita sit poena gravis, v. gr. gehennæ, mortis, maledictionis, censuræ. 5. Si ita communiter sentiant T. T. & timorati.

*Coroll. 3.* Peccatum aliàs veniale fit per accedens mortale. 1. Ratione affectûs nimii; ut si ludens malis omittere Horas, quàm lufum. 2. Ratione scandali, conscientiæ erroneæ vel gravis detrimenti, ut si jocosè proferas verba turpia cum scandalo, vel putes ea esse P. M. vel inde sequantur rixæ, odia &c. 3. Ratione periculi, ut si leviter excedas in potu, prævidens fornicationem, omissionem Horarum &c. 4. Ratione contemptûs formalis, ut si statutum violes ex illius ut statuti, vel præcipientis ut præcipientis contemptu. 5. Ratione finis, ut si leviter mentiaris ad carnalem copulam extorquendam. Ubi nota, mendacium non esse P. M. distinctum à copula, quam proinde sufficit confiteri, & sic de aliis.

*Coroll. 4.* Peccata V. disparata multiplicando non peccant mortaliter: 1. Opifex per annum in festis unâ horâ laborans, per Quadragesimam quotidie sumens modicum extra refectiorem, quotidie parum omittens in horis; imò sic laborare, sumere, omittere intendens. *At Cajus vult omittere omnia Venialia, quæ occurrunt, & sola vicare M.?* Excusant à M. Granado, Tambur. non verò Sanch. Laym. eo quod se exponat periculo P. M. Horum sententia cum Basæo n. 8. est tenenda de Religioso, nolente servare statuta, vel præcepta Superioris, nisi obli-

gent

gent sub M. 2. Qui vovit quotidie orare tria Pater & Ave, & toto anno omittit, vel vovit quotidie bazium in eleemosynam & dat medium: modò eleemosyna (idem est de oratione) cujuslibet diei sit eidem affixa; & non omne, per modum unius intentæ. 3. Qui ex voto tenetur ad Rolarium, Missam, jejunium, eleemosynam &c. & ex singulis o nutrit modicum. 4. Qui plures inducit, ut modicè frangant jejunium, modicè laborent in festo &c.

*Coroll. 5.* Peccata V. inter se ratione materiæ concrementis, vel effectûs connexa multiplicando peccat mortaliter: qui sæpe in officio ejusdem diei parum voluntariè distractus, vel in die jejunii sæpe parum comedit, vel in festo per modica intervalla laborat, vel plura committit furta minuta, vel mensuras & pondera modicè falsificat, vino miscet aquam &c. quando pervenit ad materiam notabilem. *Sed Cajus in furto minuci sæpissimè repetitis judicavit semper, se peccare venialiter?* R. Non peccavit mortaliter auferendo, postea ramen advertens materiam ablatam esse notabilem (nisi statim proponat restituere) peccat M. injustè detinendo. *Sanch. Moral. c. 21.*

*Coroll. 6.* Peccatum ex genere suo M. fit V.

1. Ex conscientia erronea, ut si putes perjurium in re levi esse V.
2. Ex causa excusante à tanto, non toto: ut si feceris ex ignorantia, necessitate, metu, non omnino excusantibus.
3. Ex imperfectione actûs: ut si non adfuerit

perfecta deliberatio, aut non plenus consensus. 4. Ex parvitate materiæ: ut si parum furatus. Sed

*Quæres 1. Quæ sint signa deliberationis imperfecta?*

R. Hæc sunt: 1. Si tenuiter & quasi semidormiens apprehendisti, aliquid esse malum. 2. Si verè semidormiens vel semiebrius fuisti. 3. Si vehementi passione, distractione turbatus fuisti. 4. Si post factum rem meliùs considerans iudices, te omnino non fecisse; Si ita cognovisses, si plene tibi præsens, si mente serenâ fuisses.

*Q. 2. Quæ sint signa consensûs imperfecti vel nullius?*

R. Hæc sunt: 1. Si facilè potuisti peccatum exequi, & non es executus. 2. Si advertens cogitationes pravas vel morus, statim sentis dolorem, aversionem &c. 3. Si sæpe soleas protestari contra tale peccatum. 4. Si timorata sis conscientia & non soleas consentire in ejusmodi peccatum.

*Q. 3. Quid de consensu conditionato?* R. Sufficit ad peccatum M. si conditio non præscindat omnem malitiam, secus si præscindat. Hinc peccat M. dicens: vellem furari, si non esset patibulum; fornicari, si non essem conjugatus; apostatare, si scirem quorsum. Qui dicit: Si non essem Religiosus, fornicarer; non committit sacrilegium, peccat tamen desiderio fornicationis. Qui de ipsa fornicatione delectans dicit: fornicarer, si esset licitum: peccat, non desiderio, sed delectatione; secus, si delectans de comestione carnis secundùm se in die jejunii dicat: comederem,

derem, si liceret: quia comestio carnis secundum se est licita, non fornicatio. 2. Non peccat dicens: Si non essem Sacerdos, inirem matrimonium; Si non esset præceptum, omitterem sacrum: quia præinducitur malitia.

Q. 4. In quibus non detur parvitas materia excusans à M. ? R. In omnibus, in quibus reperitur gravis malitia, siue materia parva sit siue magna. Hinc non datur 1. In peccatis contra virtutes Theolog. fidem, spem, charitatem. 2. In superstitionibus. 3. In blasphemia formali. 4. In perjurio assertorio. 5. In sacrilegio carnali & plerisque realibus, v. gr. in Simonia saltem juris divini, in irritatione Sacramentorum, in fractione Sigilli Sacri, in jejuniis naturali ante Eucharistiam. 6. In homicidio, & vix non in mutilatione. 7. In peccatis carnalibus, etiam delectatione venerea per aspectus, tactus, oscula &c. directe intentâ. 8. In tempore requisito ad Sacros Ordines, ad sponsalia & matrimonium, ad professionem, ad jejunium &c. quia hoc à jure taxatum consistit in indivisibili. Sporer num. 30.

Coroll. 7. In reliquis datur parvitas materiae. Est autem quantitas magna & parva prudenter æstimanda ex tribus: ex ipsa re secundum se spectatâ, ex comparatione ad totum, ex fine præcepti. Sic omittere unam Horam Canonicam, in festo laborare tribus vel quatuor horis, à 100. florenis ex voto ad pias causas debitis subtrahere 10. censetur secundum se notabile

& M. E contra in festo unâ horâ, ut sentit Suar. vel duabus, ut Diana, Tambur. laborare, omittere Sacrum usque ad offertorium exclusivè; in Missa omittere Gloria vel Credo, ex Rosario 6. decadum, quod vovisti, omittere duas, ex 100. florenis, quos debes ex voto, non dare 3. vel 4. censetur modicum comparativè ad totum, vel finem præcepti & veniale. Sporer *sitat.*

### CAPUT IV.

#### De Delectatione morosa.

*Quid sit, quotuplex, quale peccatum?*

**E**st simplex complacentia de re mala, sine desiderio eam opere implendi. Alia est rationalis, quæ in voluntate; alia sensibilis, quæ in corpore. Tam hæc, quàm illa, si voluntaria sit & absoluta, est peccatum pro ratione materiæ M. vel V. Mortale, si objectum delectationis sit moraliter malum; Veniale, si malum venialiter, estque peccatum illius speciei, cujus est objectum.

#### COROLLARIA CASUUM.

*Coroll. 1.* Delectatio non est peccaminosa:  
 1. Si sit involuntaria; sic licite se habet permissivè (Tu autem resiste) motus sentiens pravorum, modo absit consensus, & illius periculum. 2. Sub conditione, quæ omnem aufert malitiam. 3. De opere malo materialiter, quòd factum sit sine peccato, v. gr. de pollutione in somno.

4. De



4. De effectu bono secuto ex causa mala. 5. De objecto secundum se non malo, ut est comestio carnis in die jejunii. 6. De copula licite habitâ vel habendâ; si delectatio sit merè rationalis, seclusâ sensibili cum commotione Spirituum & partis veneræ. 7. De scientia mali vel modo, quo fit.

*Coroll. 2.* Delectatio est peccaminosa: 1. Si sit de opere malo formaliter, v. gr. voluntario homicidio, ebrietate, fornicatione &c. sive secundum de sumptis, sive ut commissis vel committendis. 2. De opere malo materialiter, v. gr. pollutione in somno.

*Coroll. 3.* Delectatio de objecto malo est peccatum tale, quale est objectum, quod in confessione explicandum, v. gr. an delectatus sis de copula cum conjugata, consanguinea &c. ut tales sunt. Item explicanda est conditio delectantis: an Sacerdos, an ligatus voto, juxta aliquos, an conjux?

*Coroll. 4.* Desiderium absolutum rei malæ habet eandem specie malitiam, quam res ipsa desiderata, quæ proinde à confitente exprimenda. *At dicis:* desidero rem tantum materialiter malam, v. gr. fornicationem vel homicidium in ebrietate; Adhuc malè: quia objectum secundum se malum. Affectu tamen simplici, qui non influit, desiderare licet, ut pollutio ob sanitatem naturaliter eveniat in somno, ut quid naturale. *Sporer & commun. DD. contra Hen.*

## CAPUT V.

## De Peccatis Capitalibus.

Sunt illa, quæ velut capita influunt in alia peccata, & numerô septem:

## I. SUPERBIA.

*Quid sit, quale peccatum, quæ filia ejus?*

Est inordinatus appetitus propriæ excellentiæ super alios. Superbia erga Deum, excludens debitam hominis subjectionem, est peccatum M. sed erga hominem est V. nisi gravis intercurrat contemptus, aut detrimentum. Filia ejus sunt vana gloria & ambitio. Ad has pertinent iactantia, hypocrisis, præsumptio, pertinacia, inobedientia, contemptus aliorum, ingratitude. Sunt peccata M. vel V. pro gravitate vel levitate materiæ, damni, finis &c.

## II. AVARITIA.

*Quid sit, quale peccatum, quæ filia ejus?*

Est inordinatus appetitus bonorum temporalium. Opposita soli liberalitati est peccatum V. opposita charitati vel iustitiæ in materia gravi est peccatum M. Filia ejus sunt neglectus divinorum, immisericordia erga pauperes, inquietudo, fraus, usura, corruptela per munera &c. Prodigalitas, huc pertinens, inclinatur ad dandum ultra, quàm oportet, est ex se V.

## III. LU-

## III. LUXURIA.

*Quid sit, quæ Species ejus?*

Est inordinatus appetitus vel usus venereorum. Peccatum vix unquam V. septem sunt illius species: Fornicatio, adulterium, stuprum, raptus, incestus, sacrilegium, peccatum contra naturam, quibus additur impudicitia.

1. Fornicatio est congressus naturalis soluti cum soluta. Dicitur naturalis, ut excludatur Sodomia. Si sit continuata cum eadem persona, dicitur concubinatus. Concubinaris ordinariè non est absolvendus, nisi prius dimiserit concubinam, nam vix unus ex mille aliter emendatur.

2. Adulterium est violatio thori alieni. Peccatum M. etiam consentiente marito, quandoque duplex: Si concubitus conjugis fiat cum conjugè non suo vel non suâ.

3. Stuprum est violenta virginis oppressio. Opprimitur per vim, metum gravem, preces importunas junctis minis, fraudem &c. Peccatum M. etiam contra justitiam.

4. Raptus est violenta foeminae cujuscunque abductio in alium locum ad exercendam libidinem. Peccatum M. etiam contra justitiam. Ut rapta, aut stuprata non peccet, duo requiruntur: 1. Ut nullatenus consentiat. 2. Ut positivè resistat, quantum potest & debet. Oppressorem occidere non tenetur, neque clamare cum periculo vitæ suæ, modò absit periculum consensûs.

5. Incestus est peccatum luxuriæ cum persona consanguinea intra 4. gradum inclusive, vel cum affine, etiam intra 4. gradum, si affinitas sit ex copula licita; usque ad secundum, si ex illicita, vel cum cognata spiritualiter, aut legaliter; ut habetur *c. 12. de Matrimon.* vel cum persona sibi non desponsabili ob impedimentum publ. honestatis. *Lugo sect. 6.* Omnes incestus sive inter consanguineos sive inter affines, & in quocunque gradu probabiliter sunt ejusdem speciei. *D. Thom. 2. 2. q. 154. apud Sporer.* Incestum naturalem copulâ completâ committens cum consanguinea uxoris in 1. vel 2. gradu, amittit jus petendi debitum, de quo *c. 10. de Matrimonio.*

6. Sacrilegium est peccatum luxuriæ à vel cum persona Deo sacrata sive per Ordinem Sacrum, sive per professionem Religiosam, sive votum simplex castitatis saltem reductivè. Illud committit 1. Persona non sacra venereè agens cum sacra, vel sacra cum non sacra, aut secum ipsa. 2. Sacra cum sacra, & est sacrilegium duplex. 3. Sacerdos & simul Religiosus se polluens, & est sacrilegium unum; nullum est, si id doceat Laicum, committit tamen peccatum scandali in materia contra castitatem. 4. Confessarius sollicitans ad turpia in confessione vel occasione ejusdem, & est sacrilegium tum personale, tum reale. Peccans verò cum filia confessionis, omnino impertinenter ad confessionem, solum committit sacrilegium ex parte sua,

non

non complicitis. Sanch. Laym. 5. Se polluens, (et si pollutio sit occulta) in loco sacro, & est sacrilegium locale, de quo & reali c. 7. de Religione.

7. Peccatum contra naturam est voluntaria seminis effusio extra vas debitum, vel intra, sed indebito modo. Ejus Species sunt: 1. *Pollutio*: quæ est voluntaria seminis effusio extra concubitum. Peccatum M. si quomodocunque procurata & directè intenta, sive voluptatis gratiâ, sive morbum, mortis-ve periculum evadendâ causâ. Sanch. Less. Item si indirectè voluntaria in causâ, quæ ex natura sua notabiliter influit in illam; ejusmodi causâ sunt cogitationes impuræ, turpiloquia, tactus, aspectus &c. quæ & quando sunt peccata M. unde pollutio ex illis sequens est peccatum M. et si non intenta, modo prævisâ. Si causâ tantùm sit peccatum V. in genere luxuriæ, vel M. in alio genere, v. gr. gulæ, pollutio secuta & prævisâ, sed non intenta, & secluso periculo consensûs, est peccatum V. Laym. Diana. Nullum est, si causâ licita, v. gr. equitatio, & pollutio non intenta, ut supra. Se polluens cum imaginatione solutæ vel conjugatæ, committit simul fornicationem vel adulterium in affectu. 2. *Sodomia*: quæ est coitus inter homines ejusdem sexûs, v. gr. masculi cum masculo, & dicitur *perfecta*; vel inter masculum & feminam, non servando debitum vas, & dicitur *imperfecta*. *Bestialitas*: quæ est commixtio hominis cum bruto, sive sagarum cura



eum doemone. 4. *Innaturalis concumbendi modus*, servato tamen debito sexu & vase; ut si vir succumbat &c. inter conjuges est peccatum V. cessante periculo effundendi seminis Sanchez.

8. *Impudicitia*: Est Species luxuriæ incompleta, non pertingens ad copulam aut seminationem; ut sunt oscula, turpiloquia, tactus & aspectus impudici &c. Sunt peccata M. si fiant animo libidinoso cum delectatione venerea aut illius periculo. Excusantur à M. oscula ob delectationem merè organicam vel amicitiam, tactus & aspectus ex mera curiositate, joco, levitate, sine commotione veneris, & affectu libidinoso. De his Sporer p. 4. c. 3. Unde ordinariè peccat M. qui seipsum studiosè & morosè contrectat in verendis, qui absque necessitate tangit alterum cujuscunque sexûs in partibus secretioribus, aut genitalia pecorum grandiorum: quia tactus illi libidinem quasi naturaliter excitant & ad pollutionem disponunt. Agitans canem usque ad emissionem seminis peccat mortaliter, in se excitando venerem, non verò prodigendo semen animalis: possumus enim animalia viventia occidere, ergò & impedire, ne nascantur. Ancillas & nutrices inter vestiendum ex curiositate in pudendis tangentes pusiones, & impuberes ejusdem sexûs inter balneandum ex joco tangentes se invicem, à mortali immunes censet Sporer citat. num. 692.

## IV. INVIDIA.

*Quid invidia, quale peccatum?*

Est tristitia de bono alieno, quatenus invidentis excellentiæ est diminutivum. Peccatum ex genere suo M. potissimum in materia spiritali. Tristitia de bono proximi, quatenus eo indignus, est indignatio, & in se non mala. Tristitia mercatoris vel opificis, quod vicinus vendat, non ipse, est æmulatio, ordinariè peccatum V. Filiæ invidiæ sunt odium, susurratio, detractio, afflictio ipsiusmet invidi &c.

## V. GULA.

*Quid & quale peccatum?*

Est excessus in cibo & potu. Peccatum ex genere suo V. quia excessus in re aliàs indifferente. Fit autem M. ratione enormis excessus vel nocuenti.

*Quid ebrietas? quibus imputetur?*

Ebrietas est voluntarius excessus in potu usque ad privationem usûs rationis vel gravem perturbationem. Huius peccati M. sunt rei: 1. Eam expressè volens, nisi velit ex præscripto Medici, quando ustio vel sectio est sustinenda. Sporer *Tract. 1. num. 69. Less.* 2. Interpretativè volens, utpote advertens se inebriari, & pergens in potu, vel non curans, an inebrietur, aut non. 3. Inducens alium, nisi ob gravissimum impediendum malum, & ebrietas sit solum materia-

terialis. 4. Caupones: qui faciunt potum inebriativum, aut ministrant iis, quos prævident inebriandos, si absque gravi incommodo possint negare.

## VI. IRA.

*Quid ira, quando peccatum?*

Ira est commotio animi, vindictam aut quasi vindictam appetentis. Fit peccaminosa: 1. Ex parte modi irascendi, ut si nimium effervesceas, estque veniale. 2. Ex parte vindictæ, ut si appetas injuriam, estque ex genere suo mortale. Filia ejus sunt indignatio, tumor mentis, clamor, rixa, contumelia, blasphemia.

## VII. ACEDIA.

*Quid acedia, quale peccatum?*

Est tedium seu tristitia de bonis divinis, quatenus ad nos pertinent & à nobis laboriosè sunt obtinenda, v. gr. si quis doleat, quod coelum sit, & arcta ad illud via, non curans ea, quæ sunt salutis. Peccatum ex genere suo M. quia vilipendit aeternam beatitudinem. Veniale est, si quis tristis, quod Religiosus sit, quod jejunium &c. & tamen faciat ea, quæ sunt obligationis suæ. Operari bonum cum & contra teporem est meritorium. Filia ejus sunt malitia, qua odio habentur bona spiritualia, rancor, pusillanimitas, desperatio, torpor, evagatio mentis ad illicita. D. Greg. 31. Moral. c. 17.

CAPUT

## CAPUT VI. De Peccato Originali.

### *An detur Peccatum Originale ?*

**A**dam primus homo præceptum non comedendi de ligno vetito. *Genes. 2.* habuit pro se & suis posteris ; virtute enim decreti divini in voluntate Adami , ut capitis moralis , constitutæ erant voluntates posterorum in ordine ad actum , à quo dependebat iustitia aut iniustitia originalis. Unde in Adamo peccante omnes ejus peccaverunt posterii. *Rom. 5.* ipsòque conceptionis instanti (nisi specialiter præserventur) contrahunt peccatum , quod dicitur originale , & dari fides docet contra Pelag.

### *Quid Peccatum originale ?*

Formaliter est ipsum Adæ peccatum , ut ab omnibus in Adamo commissum , & moraliter in illis perseverans. Cavellus, Poncius, Herinx, Dupasq. &c. *cum RR.* Ratio : Peccatum originale in parvulis ab utero matris veram habet rationem peccati. *Trid. Sess. 6.* Sed quodnam illud : Non aliud , quàm ipsum Adæ peccatum , ut moraliter nostrum & in nobis , donec remittatur , perseverans.

### *Pœnalitates & pœna Peccati originalis ?*

Pœnalitates peccati originalis in hac vita sunt ignorantia , concupiscentia , afflictiones , morbi ,

morbi, mortalitas &c. quæ resultant ex subtractione donorum statûs innocentia. Poena ejus in altera vita est poena damni, non sensus. *Commun. TT.*

### COROLLARIA CASUUM.

*Coroll. 1.* Privatio gratiæ, ut debita haberi per obedientiam Adami, cum donis justitiæ originalis est poena peccati originalis non ipsum; quod à P.P. dicitur mors animæ, nuditas justitiæ originalis non formaliter, sed casualiter, quatenus ea causat. Scotus verò 1. d. 22. dicens: *Peccatum originale non est nisi carentia justitiæ debite: non loquitur de privatione ullius doni habitualis, sed de privatione justitiæ & rectitudinis debite inesse actui Adæ, quem ille agebat physicè, posterius moraliter, & qui ut carens rectitudine debita dicitur reatus culpe personalis respectu Adami, originalis respectu posterorum.* Scholiales in locum Scoti citat. Poncius in *Commentar.*

*Coroll. 2.* Peccatum Adæ, ut hic peccavit in persona propria, est physicè unum; ut peccavit in persona posterorum, & hi moraliter in illo, est moraliter multiplicatum in singulis ab Adamo per viam generationis naturalis descendentibus.

*Coroll. 3.* Macula originalis non fuit in B. V. Deipara, præservante eam Unigenito suo: Sic potuit, decuit, ut prophgnavit Parisiis coram Legatis Apostolicis Scotus Ord. Min. qui inde  
*Doctor*



Doctor Subtilis ; & post Scotum (sententiam contrariam publicè defendi, & nostram impugnari prohibente Sede Apostolicâ, à qua etiam festum immatriculatæ Conceptionis de præcepto) tenet Orbis Christiano - Catholicus.

*An saltem debitum habuit peccati originalis contrahendi ?* R. Non habuit debitum proximum, quasi in Adam peccâisset, & consequenter in conceptione originale contrahere debuisset : quia electa fuit *Mater Christi* ante prævisum peccati originalis, ut infra : & postea Deo legem ponente Adamo etiam pro posteris, ab ea fuit excepta ex meritis filii sui prævisi ; ut patet ex Sixto IV. in *Extrav. cum præcelsa* : Omnes moriemini, quia in Adam peccavistis ; tu verò ne timeas, ô Maria, non enim pro te, sed pro omnibus hæc lex constituta est. R. 2. Habuit tamen remotum, quatenus ut filia Adæ in eo peccâisset, nisi, ut præfertur, fuisset excepta.

*Coroll. 4.* Parvuli cum originali decedentes privantur visione beatifica. *Joan. 3. Nisi quis renatus &c.* Probabiliter inde non afficiuntur tristitiâ : quia voluntas eorum recta cum voluntate divina. Nec patiuntur poenam ignis. *Apoc. 18.* Quantum se glorificavit, & in deliciis fuit, tantum date illi tormentum ; illi autem in deliciis non fuerunt, nec sensu peccaverunt.



TRA

## TRACTATUS XIII.

## De Censuris.

## CAPUT I.

## De Censura in communi.

*Quid Censura? An detur?*

**C**ensura Ecclesiastica est poena spiritualis ac medicinalis, privans usu quorundam bonorum spiritualium externorum ad correctionem culpæ externæ. *Commun.* Dicitur: *medicinalis*: quia non est vindicativa sceleris jam patrati, sed impeditiva patrandi, tendens ad correctionem delinquentis contumacis. Datur in Ecclesia potestas ferendi censuram. *Est de fide ex Concil. Const. Sess. 8. Sumitur ex Matth. 18. Si Ecclesiam non audierit, sit tibi sicut Ethnicus & Publicanus.*

*Quotuplex Censura?*

Dividitur in Excommunicationem, Suspensionem & Interdictum; de quibus infra. In *lata & ferenda Sententia.* In eam, quæ à *jure* scil. per Canones, & quæ *ab homine* scil. per Sententiam judicariam.

*Quis possit ferre Censuram? in quos? quando?*

Censuram ferre potest, qui in foro Ecclesiastico habet jurisdictionem non impeditam, sive ordinariam, sive delegatam; Sed non potest nisi

nisi in  
propt  
suppo

C  
Abba  
mam  
tus:  
risdi  
de p  
roch  
nili  
in ce  
C  
mor  
incu  
fidel  
mat  
non  
ram  
qui  
gel  
qui  
test  
affici  
que  
à p  
exit  
Pra  
gios

nisi in baptizatos & subditos; neque potest nisi propter peccatum M. externum completum, suppositâ contumaciâ peccatoris.

### COROLLARIA CASUUM.

*Coroll. 1.* Censuram ferre non possunt: 1. Abbatissa, Laicus Religiosus non habens primam censuram, Parochus, Clericus conjugatus: quia in foro externo Ecclesiastico non habent jurisdictionem. Possunt, committente S. Pontifice de plenitudine potestatis. 2. Parochi in Parochianos, Episcopi in Regulares exemptos, nisi illis in specie sit concessum. 3. Superior in censura existens, nisi sit occulta.

*Coroll. 2.* Censura ferri non potest: 1. In mortuos, nisi solum declarando eam, quam incurrerunt vivi. 2. In Judæos, aliosque infideles; potest in hæreticos, apostatas & schismaticos: quia hi, non illi subsunt Ecclesie. 3. In non subditos; unde & nemo incurrit censuram à se latam; potest tamen in peregrinos, qui ordinario loci, subditi pro tempore. Engel. num. 35. 4. Ab Episcopo in subditum, qui existit extra Diocesim, per legem; potest per speciale præceptum: quia hoc immediate afficit subditum, lex diocesim. Ferri potest utroque modo nempe per legem & præceptum à Prælato in subditum Regularem ubicunque existentem. Layman. c. 13. Quia jurisdictio Prælati non limitatur loco, immediate afficiens Religiosum.

*Coroll. 3.* A censura excusat: 1. Quidquid excusat à peccato M. 2. Legitima appellatio ante censuram absolutè latam. 3. Invincibilis ignorantia censuræ; eam enim ignorans, quamvis sciat se peccare, non censetur contumax. 4. Si effectus externus, v. gr. post lethalem vulnerationem mors, non sequatur; si sequatur, postquam vulnerans est absolutus à peccato adhuc incurritur. Lugo, Boico: quia censura est poena in foro fori seu Ecclesiastico, quæ incurri potest, si culpa in foro poli seu divino sit remissa.

*Coroll. 4.* Censura redditur invalida: 1. Ex defectu jurisdictionis in ferente. 2. Ex defectu substantialis ordinis judicialis in censura *ab homine*, ad quem pertinet trina monitio, rei citatio, causæ probatio. Si verò censura sit à *jure*, ipsum satis monet, ut transgrediens contumatur contumax. 3. Ex defectu iustæ causæ: ut si crimen nec commissum, nec probatum; vel commissum, sed non probatum. *Quid sit crimen non sit commissum, & tamen juridicè probatum?* Censura non ligat in foro conscientia, servanda tamen est in foro externo. Reiffenst. Layman.

*Coroll. 5.* A Censuris nemini reservatis potest absolvere, qui potest à P. M. à reservatis potest: 1. Reservans etsi non Sacerdos, ejus Superior & Successor, etiam absentem & extra confessionale: quia absolutio hæc non est Sacramentalis; item ab una censura, manente alterâ: quia per censuram non aufertur, nec per ejus absolutionem confertur  
status

*status gratie.* 2. Delegatus, habet enim potestatem delegantis. 3. Quilibet Sacerdos in articulo mortis: quia in eo nulla est reservatio. *Trid. Sess. 14. c. 7.*

## CAPUT II.

### De Excommunicatione.

*Quid Excommunicatio? quotuplex?*

**E**Xcommunicatio est censura privans Communionem Ecclesiæ. Alia est minor: quæ tantum privat receptione Sacramentorum & incurritur propter communicationem, etiam ex materia levem, cum excommunicato vitando. *c. nuper. de sent. excomm.* Alia major: quæ privat omni communionem cum fidelibus; hac excommunicatus vel est toleratus, quem fideles vitare non tenentur; vel non toleratus: quem vitare tenentur, estque *post Concilium Constant.* publicè denunciatus, vel notorius Clerici percussor.

### COROLLARIA:

*Coroll. 1.* Excommunicatus excommunicatione minori recipiens Sacramentum peccat Mortaliter, unde Sacramentum poenitentiae recipit invalidè, non alia. 2. Collatio Beneficii ei facta est irrita juxta Navarr. irritanda juxta Layman. Absolvi potest ab eo, qui potest à mortali.

*Coroll. 2.* Excommunicatus excommunicatione majori est privatus: 1. Communionem Sacramentorum, sic ut Sacramentum nec recipere



possit licitè, nec ministrare, etsi sit toleratus, nisi ex causa requiratur à fidelibus. 2. Communibus Ecclesiæ suffragiis; licet tamen pro eo orare privatim. 3. Usû divinorum officiorum; sic non potest interesse Horis Canonicis (eas tamen, si aliunde obligatus, recitare debet privatim sine *Dominus vobiscum*) Processionibus, Sacrificio &c. concioni tamen. 4. Usû jurisdictionis spiritualis. Si toleratus sit, acta ejus probabiliter sunt valida, sed mortaliter illicita. 5. Habilitate ad Beneficia Ecclesiastica, quorum collatio ipsò jure est nulla. 6. Sepulturâ Ecclesiasticâ, etiam toleratus, de cujus excommunicatione publicè constat. 7. Communionem politicâ cum fidelibus.

*Coroll. 3.* Communicatio cum excommunicato vitando fidelibus est illicita per se mortaliter in sacris, venialiter in profanis juxta verba *os, orare, vale, communicio, mensa negatur*: per *os* prohibentur colloquia, per *orare* communicio in sacris, per *vale* salutationes, etiam signis, vel gestu factæ, per *communicio* conversatio politica in actionibus, per *mensa* convictus, etsi excommunicatus sit in eadem domo, collegio &c. Communicantes in profanis ab omni culpa excusant quinque causæ: *Utile, lex, humilis, res ignorata, necessesse*. Hoc est 1. Utilitas. 2. Lex matrimonii, sic uxor licitè communicat cum marito. 3. Subjeçtio; sic commun-cant filii cum patre, avo, Religiosi cum Præ'lato, servi cum Domino. 4. Ignorantia juris aut facti. 5. Necessitas, scil. animæ, corporis, famæ aut fortunæ.

*Coroll. 4.*

*Coroll. 4.* Percussor Clerici non est vitandus, si percussio non sit notoria, utpote non facta coram multis; aut non certò P. M. utpote aliquo juris suffragio excusabilis. *Excommunicatio Canonis. c. si quis. 17. q. 4.* hæc est:

*Si quis* scilicet cujuscunque sexûs, statûs, aut dignitatis personâ.

*Suadente diabolo:* Ita ut percussio sit P. M. in ratione sacrilegii.

*In Clericum:* Scilicet primâ saltem tonsurâ initiatum, modò deferat habitum, serviâtque alicui Ecclesiæ; etsi conjugatus, modo non bigamus; imò degradatus, modò non realiter.

*Vel Monachum:* Scil. Religiosum, etiam Laicum, Novitium, utriusque sexûs; item Tertiarios, si gescent habitum & vivant in communitate; item Tertiarios in habitu monachali servientes monasterio sub obedientia Superioris. Idem de Tertiariis extra septa monasterii habitantibus affirmat Reiffenst. si ferant habitum, servant Regulam approbatam & vivant sub obedientia Prælati, prout Tertiarios Ordinis S. Francisci Guardianis & Superioribus localibus subjecit Benedictus XIII. de vagis igitur Eremitis negatur.

*Manus violentas injecerit:* Scil. quavis actione mortaliter injuriosâ in personam, sive per se, sive per alium efficaciter mandando, consulendo; imò non impediendo, si teneatur ex officio vel justitia.

*Anathematis vinculo subjaceat* : Scil. ipso facto excommunicatus ut supra. Absolvi potest Religiosus à suo Prælato, Prælatus à Confessario ad hoc electo. La Croix num. 321. Sæcularis (in foro tantum interno) à Confessario Mendicantium extra Italiam. Herinx. Nequeunt intra Italiam propter reservationem Clementis VIII.

*Coroll. 5.* Excusatur à præfata excommunicatione percussus Clericum : 1. Causâ correctionis justæ. 2. Cum moderamine inculpatae tutelæ. 3. Repertum in flagranti delicto cum matre, uxore, filia, sorore. 4. Si putet esse Laicum : quia non est sacrilegium formale ; Vel percussus Laicum, putet esse Clericum : quia non est percussio Clerici.

### CAPUT III.

#### De Suspensione, Interdicto &c.

*Quia Sussensio & Interdictum ?*

**S**uspensio est censura Ec.lesiastica, quâ Minister Ecclesiæ ad tempus prohibetur vel ab omni officio & beneficio, estque suspensio totalis; vel ab aliquo actu exercendo, estque partialis. Interdictum est censura, quâ prohibetur usus : 1. Centorum Sacramentorum (puta extremæ Unct. Ordinis & Eucharistiæ extra articulum mortis) & suscipiendorum & ministrandorum ; 2. Divinorum officiorum juxta limitationem c. alina Mater. de sentent. ex commun. in 6to. apud Reiffensl. Quod concedit in Monasteriis singulis

gulis diebus celebrari Missas, & Divinum Officium, sicut prius, januis tamen clausis & campanis non pulsatis, nisi in Festis Nativitatis Domini, Paschæ, Pentecostes, & Assumptionis; idemque pro festo Corporis Christi, & pro Religiosis in eorum festis specialibus concesserunt Pontificis teste Sannig l. 5. Decret. tit. 39. c. 5. intelligendo de interdicto locali generali. 3. Sepultura Ecclesiastica. Si interdictum directè feratur in locum, quatenus prohibentur in eo fieri Divina, dicitur *locale*, & quidem locale generale, si comprehendat plura loca; Si in personam (sive Clericus sit, sive Laicus) quatenus arcetur à præfatis, dicitur *personale*; Si in locum & personas simul, dicitur *mixtum*.

### *Quid Depositio, Degradatio, Infamia?*

Non sunt censuræ, sed pœnæ Ecclesiasticæ vindicativæ: *Depositi* est, quâ Clericus per verba in perpetuum privatur omni officio & beneficio Clericali. *Degradatio* est, quâ realiter spoliatur omni officio, beneficio, & insuper privilegio clericali tum fori, tum canonis. *Infamia* est privatio bonæ famæ; alia est juris, alia facti.

### COROLLARIA CASUUM.

*Coroll. 1.* Suspendio ab officio per se non includit suspensionem à beneficio, & è contra; nec suspendio ab ordine suspensionem à jurisdictione, & è contra. Engel. 76. Si tamen

suspensio imponatur indefinitè, censetur esse totalis. Herinx. Layman.

*Coroll. 2.* Omnes & soli Clerici, præter Papam sunt capaces suspensionis. Exercens actum, à quo est suspensus, peccat M. & si actus ille sit Ordinis, ipso facto incurrit irregularitatem. Reiffenst. num. 87.

*Coroll. 3.* Interdicti effectus est triplex, ut supra. Unum interdictum non infert aliud: Si interdicta Ecclesia, non ideò interdictus est populus; nisi qui interdicto dederunt causam; Si populus est interdictus: interdicti sunt etiam innocentes, non verò Ecclesia.

*Coroll. 4.* Violantes interdictum peccant mortaliter. Si Clerici sint, simul incurrunt suspensionem, & exercentes actum Ordinis irregularitatem; Si Religiosi sint, excommunicationem. Post *Concil. Constant.* nemo tenetur servare interdictum locale, nisi sit denunciatum; nec ullus tenetur vitare personaliter interdictum, nisi similiter sit denunciatus.

## CAPUT IV.

### De Irregularitate.

*Quid sit? A quo? In quem?*

**I**rregularitas est impedimentum canonicum, impediens susceptionem Ordinum (etiam 1. tonsuræ) susceptorumque administrationem. Infligitur à solo jure Pontificio. Illius capaces sunt & Laici & Clerici. Irregularis ordinatur validè,



validè, sed mortaliter illicitè; éstque inhabilis ad beneficium. *ex commun.*

### Quotuplex?

Irregularitas alia est ex delicto scil. M. externo, alia ex defectu. Ex delicto sunt quinque: 1. Ex reiteratione Baptismi. 2. Ex indebita susceptione vel usu ordinis; eam incurrit, qui ministrat in Ordine sacro, quem non habet, vel existens in censura; qui Ordines suscipit furtivè, vel in excommunicatione majori, vel ab Episcopo excommunicato. Qui verò ordinatur ante legitimam ætatem, extra tempora, sinè dimissorialibus, vel per saltum, non fit irregularis, sed ipso jure est suspensus. 3. Ex hæresi. 4. Ex infamia, si crimen factum vel jure publicum. 5. Ex injusto homicidio vel mutilatione; eam incurrunt etiam efficaciter cooperantes iustione, consilio, auxilio &c.

Irregularitates ex defectu sunt octo scil. ex defectu 1. Animi. 2. Corporis. 3. Natalium. 4. Ætatis ad Ordines requisitæ. 5. Libertatis. 6. Famæ. 7. Sacramenti, seu ex bigamia. 8. Lenitatis, seu ex iusto homicidio vel mutilatione licita. Hinc irregulares sunt ex 1. Defectu lunatici, illiterati, neophyti. Ex 2. Cæcus, mutilus, abstemius, affectus paralyfi, leprâ &c. Ex 3. Illegitimi. Ex 4. Qui infra annum 21. Ex 5. Milites, conjugati. Ex 6. Infames. Ex 7. Bigamus verè, qui contraxit

traxit matrimonium cum duabus & consummavit; vel interpretativè, qui duxit viduam non virginem, vel ab alio corruptam, vel cognovit uxorem suam post adulterium ab ea commissum, vel relictâ uxore suâ carnaliter cognitâ attentavit contrahere cum alia, eamque affectu maritali cognovit; vel similitudinariè, qui post professionem Religiosam, aut suscepto Ordine Sacro attentat contrahere matrimonium & consummat. Ex 8. Cooperantes ad sententiam sanguinis & executionem, effectu secuto, milites occidentes in bello offensivo, occidens bannitum. Non sunt irregulares: inculpate occidens invasorem vitæ; Princeps causam sanguinis committens alteri; accusator factâ protestatione, quod non intendat mortem; Confessarius dicens reo, ut iuridicè interrogatus fateatur veritatem, suppositâ sententiâ: quod teneatur; Clericus adhortans in bello iusto, non verò ipse pugnans. Ex variis *Can.* apud Reiffenst. *tr.* 13.

*Quomodo tollatur?*

Irregularitas tollitur vel per dispensationem Pontificis; vel cessante causâ, si sit ex defectu. Episcopi ex *Trid. Sess. 24. c. 6.* Præati verò Regulares ex concessione Sixti IV. dispensare possunt in quibusdam, de quibus Herinx, Reiffenst. *citat.*



## TRACTATUS XIV. De Virtutibus Theologicis.

*Quid Virtus & quotuplex?*

**V**irtus est habitus, qui facit habentem & opus ejus bonum. Dividitur ratione principii in naturales, acquisitas & infusas: Infusæ enim aliquæ à natura, aliquæ acquiruntur, aliquæ infunduntur; ratione subiecti in intellectuales, quæ in intellectu; & morales, quæ in voluntate; ratione obiecti in Theologicas, quæ circa Deum; & morales, quæ circa mores.

*Quid Virtus Theologica, quotuplex?*

Theologica est habitus supernaturalis, à Deo infusus, elevans animam, ut immediatè tendat in Deum tanquam obiectum. Sunt tres scilicet fides, spes, charitas; major horum charitas, deinde sp.s. Charitas amittitur per quodlibet P. M. Fides per infidelitatem, Spes per desperationem. Charitas manet in patria, non fides, neque spes. *ex communi.*

### CAPUT I. De Fide Theologica.

*Quid sit? quodnam obiectum ejus?*

**F**ides Theologica est habitus supernaturalis, inclinans ad assentiendum omnibus revelatis pro-

propter authoritatem Dei revelantis. Obiectum materiale sunt res omnes revelatæ; *Formale* quo est veritas Dei in revelando, & in hanc resolvitur ultima ratio credendi: quia credimus propter veritatem Dei revelantis; & quod credimus, sunt res revelatæ.

### COROLLARIA CASUUM.

*Coroll. 1.* Fides Theologica infusa (manente acquirità) non est in hæretico: quia amittitur per peccatum infidelitatis, vel hæresis. In peccatore fidei est informis: quia est sine gratia sanctificante.

*Coroll. 2.* Revelatio est mera obiecti credibilis applicatio: quia solum proponit, quid credendum; sufficit clara & obscura, mediata & immediata, publica & privata: quia qualibet sufficienter proponit obiectum fidei.

*Coroll. 3.* Articuli fidei sunt, quidquid Deus credendum revelavit. 1. Sunt necessariò veri: aliàs fidei divinæ posset subesse falsitas. 2. Multiplicabiles per novas revelationes. 3. Necessariò obscuri: nam si vides, non est fides. Aug. tr. 68. in Joan. 4. Evidenter tamen credibiles evidentia morali, propter evidentia credibilitatis motiva, quæ sunt Religionis nostræ antiquitas & stabilitas, Doctrinæ puritas, Personarum sanctitas, miracula, ultio cœlestis in persecutores &c. 5. Omnes credendi; si credibiliter proponantur. 6. Præcipui continentur in quatuor Symbolis: Apostolico, Niceno, Constantinop. & S. Athanasii.

CAPUT

## CAPUT II. De Fidei Articulis.

### *Quæ sit Regula Fidei ?*

**R**egula fidei (proponens quid credendum, quid non) inanimata est verbum Dei, tum scriptum, tum traditum; animata est Ecclesia cum capite ex *Matth. 18. Si Ecclesiam non audierit, sit tibi &c.*

### *Quid sit Ecclesia? qualis? an visibilis? indefectibilis &c.?*

Vera Christi Ecclesia (quæ Romano-Catholica) est coetus fidelium sub uno capite Christo in coelis, & ejus Vicario Pontifice Romano in terris. Extra eam nemo salvatur, de Fide. Est una, Sancta, Catholica & Apostolica. *Symbol. Constantinop.* Est visibilis: quomodo alias ad eam fieret conversio gentium? indefectibilis: quia porta inferi non prevalebunt; & infallibilis: quia firmamentum veritatis. *1. Timoth. 2.*

### *An Papa caput Ecclesiæ? An & quando infallibilis?*

Caput Ecclesiæ visibile est Romanus Pontifex: quia Successor S. Petri, qui Primatum Ecclesiæ accepit à Christo, *Joan. 21. Pasci oves meas*, & Romæ moriens immobiliter reliquit. Pontifex definiens ex Cathedra est infallibilis in materia fidei & morum, etiam sinè Concilio Generali, hoc verò non nisi cum Pontifice: quia promissiones



fiones de infallibilitate *Math. 16. Tu es Petrus &c. Luc. 22. Rogavi pro te, ut non deficiat fides tua &c.* factæ sunt in Petro Successoribus & toti Ecclesiæ cum capite.

*An de fide, Papam electum esse verum Pontificem?*

Hæc propositio: *Clemens XII. est verus Pontifex*, non est fidei: quia nullibi evidenter revelata. Item juxta Adversarios probabiliter non est fidei; ergo potest esse fallia, ergo nequit esse fidei. Est tamen moraliter certa.

### COROLLARIA CASUUM.

*Coroll. 1.* In Ecclesia militante sunt prædestinati & reprobi, contra Calvinum; iusti & peccatores, contra Pelag. Non verò sunt de corpore Ecclesiæ: 1. Catechumeni: quia non baptizati. 2. Hæretici: quia non profitentur fidem. 3. Schismatici: quia respuunt Caput. 4. Excommunicati: quia privantur communione.

*Coroll. 2.* Papa cum vel sinè Concilio non condit novos fidei articulos, sed implicite in Scriptura vel Traditionibus contentos proponit, controversos decedit, & quid credendum definiit.

*Coroll. 3.* Papa definiens est infallibilis in quæstionibus facti juri annexis, scil. ubi ex negatione facti sequitur negatio juris seu propositionis revelata; Sic propositiones Jansenii sunt damnatae, ut excerptæ ex Jansenii libro & in sensu

sensu ab Authore intento; & in Concil. Constantiens. exigitur fides hujus artic. Joannes Hus est hereticus & ejus libri sunt perversi. 2. In Canonizatione Sanctorum: aliàs tota Ecclesia posset induci in errorem.

Coroll. 4. Papa est infallibilis sinè acceptatione Ecclesiæ: quia potestas ejus immediatè à Deo, unde & supra Concilium; oppositum damnavit Alexand. VIII. & Synodus Synuessana in causâ Marcellini pronunciavit: Prima sedes à nemine judicatur. Nihilominus potestatem suam potest amittere: 1. Renunciatione voluntariâ. 2. Perpetuâ amentia. 3. Hæresi formati.

### CAPUT III. De Actu Fidei.

*Quid Actus fidei? An necessarius?*

**A**ctus fidei est assensus firmus articuli vel articulorum fidei propter autoritatem Dei revelantis. Omnes. Adultis est necessarius ad salutem: Qui non crediderit condemnabitur. Marc. 16.

*Quæ sunt scitu necessaria necessitate medii?  
& qua necessitate præcepti?*

Necessitate medii credi debent implicitè omnia revelata, explicitè: 1. Deus ut unus, ut existens, ut remunerator, ex Hebr. 11. 2. In lege Evang. mysterium Incarnationis & Trinitat. ex Joan. 17. Hæc est vita æterna, ut cognoscant Te solum Deum verum,

rum, & quem misisti Iesum Christum. Necessitate præcepti sciri debent & explicitè credi Oratio Dominica, Symbolum Apostol. Præcepta Dei & Ecclesiæ, Sacramenta necessaria. *Commun. DD.*

*An teneamur fidem exterius confiteri?*

*An liceat negare?*

Datur præceptum affirmativum, fidem exterius confitendi. *Rom. 10. Si confitearis in ore tuo Dominum Iesum, & in corde tuo credideris, salvus eris.* Datur etiam præceptum negativum, non negandi, *Matth. 10. Qui me negaverit coram hominibus, negabo & ego eum coram Patre meo.* Primum obligat, si honor Dei aut salus proximi fidem confiteri exigat; Secundum obligat ad & pro semper: quia fidem negare, nunquam licet.

### COROLLARIA CASUUM.

*Coroll. 1.* Actum fidei præcedunt 1. Notitia mysteriorum & motivorum. 2. Judicium credentitatis propter revelationem Divinam. 3. Spiritus Sancti adiutorium & in fidelibus habitus fidei. 4. Pia affectio voluntatis. 5. Sequitur actus fidei.

*Coroll. 2.* Actus fidei est 1. Certitudine tum adhesionis, tum infallibilitatis certior scientiæ naturali ob motivum certius, quod est veracitas Dei, idque immediatum; unde quæ talis non est discursivus. 2. Obscurus, stante etiam evidentiâ revelationis: quia objectum revelatum manet obscurum. 3. Supernaturalis quoad modum; ut

ut enim sit, sicut oportet, procedere debet à gratia. *Trid. Sess. 6. c. 3.* 4. Liber & meritorius.

*Coroll. 3.* Ad actum fidei tenentur 1. Pueri rationis usum adepti. 2. Infideles convicti per motiva credibilitatis. 3. Fideles aliquoties in vita, *ex propos. 17. damn. ab Innocent. XI.* 4. Existens in tentatione contra fidem aliter non vincendâ, vel in articulo aut periculo mortis.

*Coroll. 4.* Contra præceptum exterius confitendi fidem, peccat non confitens: Si inde honor Deo debitus vel utilitas proximo impendenda subtrahatur sive privativè, live contrariè. Extra hos casus

*Coroll. 5.* Non peccat fidem solum occultans: 1. Tacendo, vel interrogationem eludendo; nisi interrogetur à potestate publica, *ex propos. 18. damn. ab Innocent. XI.* 2. Fugiendo; nisi sit Pastor: bonus dat animam suam pro ovibus suis. 3. Portando infidelium vel hæreticorum vestem, modo non sit in signum falsæ Religionis. 4. Si Clericus sit, portando vestem Laicorum. 5. Apud hæreticos comedendo carnes; neque est contra præceptum Ecclesiæ, si fiat ad gravia vitanda incommoda. *Reiffenst. d. 2. q. 4.*

*Coroll. 6.* Contra præceptum fidem non exterius negandi peccat 1. Negans se Christianum, Catholicum; Secus, si neget se monachum: quia negans se monachum non negat fidem, sed *Scatum Religiosum.* 2. Accedens fictè ad coenam hæreticorum: quia proficitur eorum fidem; Secus est de adeunte eorum conciones, comi-

tante funus. 3. Portans vestem vel aliud signum; Si hoc vel illa falsam denotet Religionem.

## CAPUT IV.

### De Infidelitate.

*Quid sit? Quotuplex? Quale peccatum?*

**I**nfidelitas est defectus vel error contra fidem. Species ejus sunt Paganismus, Judaismus, & Hæresis. Infidelitas quælibet, si culpabilis, est P. M. & Hæresis (quæ error pertinax contra fidem in Christiano) varias etiam annexas habet poenas Ecclesiasticas, signanter excommunicationem & reservationem.

### COROLLARIA CASUUM.

*Coroll. 1.* Peccant contra fidem 1. Scienter persistens in infidelitate aut hæresi. 2. Apostata à fide. 3. Deliberatè dubitans sine causa. 4. Sectam suam judicans probabiliorē, & non ulterius inquirens. 5. Exponens se periculo hæresis. 6. Metu mortis negans fidem solum exterius; non tamen est hæreticus. 7. Legens aut retinens aut imprimens libros hæreticorum hæresim continentes, aut de Religione tractantes, v. gr. Sacram Scripturam exponendo Postillis, concionibus &c. etsi manifestam hæresim non contineant. Sporer *tr. 2. c. 3. num. 41.* Item legens libros prohibitos in indice; hic incurrit excommunicationem non reservatam, iste excommunicationem Bullæ Coenæ. Hanc evadunt



dunt 1. Legentes libros Catholicorum, hæresim continentes: quia non sunt libri hæretici. 2. Legentes concionem hæreticam Hæretici, & quidquid non venit nomine libri. Sanch. Layman & alii apud Sporer citat. num. 39. contra Suarez. 3. Legentes modicum. 4. Legentem audientes. 5. Censuram ignorantes. Peccant tamen omnes ratione periculi in fide, si cui se exponant; item incurrunt excommunicationem Bullæ, quatenus est contra fautores Hæreticorum, si eis faveant, defendendo, approbando, laudando &c.

Coroll. 2. Hæreticus est formalis, qui assentitur errori contra fidem pertinaciter; quatenus in eo persistit, postquam veritas Catholica sufficienter sibi proposita & agnita. Hinc solum est materialis: 1. Qui errat contra fidem, paratus iudicio Ecclesiæ, ubi cognoverit, sese submittere. 2. Qui de fide Catholica nihil scivit, aut de sua non dubitavit. 3. Qui dubitans, proponit inquirere. 4. Qui conversionem propositam ex respectu humano vel incuriâ distulit; peccavit tamen contra præceptum affirmativum fidei.

Coroll. 3. Ad incurrendam excommunicationem ob hæresim, requiritur 1. Hæresis formalis. 2. Externa, quæ sit P. M. externum; nimirum ut sit manifestata (etsi nullo præsentem) animo eam asserendi seu proficendi. Reiffenst. d. 4. q. 3. quia tunc est peccatum mortale externum hæresis, & propter hoc solum lata est excommunicatio.

## CAPUT V.

## De Spe Theologica.

*Quid spes? Quodnam objectum ejus?*

**V**irtus est divinitus infusa, quâ desideramus infinitum nobis bonum ex Dei gratia & nostris meritis. Objectum materiale primum est Deus possidendus visione & fruitione: non enim sperare possumus Deum sine possessione, nec possessionem sine Deo; Formale est bonitas Dei respectiva, sive Deus ut bonus nobis: sic enim pertinet ad amorem concupiscentiæ, qui actus Spei.

*An Spes sit certa?*

Spes est certa ex parte Dei, incerta ex parte nostrâ: quia Deus est fidelis in promissis suis, homo autem inconstans in bono, & non certus de perseverantia.

*Quando obliget Præceptum Spei?*

Præceptum Spei negativum, ut non desperemus, obligat pro semper: quia nunquam desperare licet. Affirmativum, ut eliciamus actum spei, obligat directè aliquoties in vita (cui obligationi satisfiit per actus spei in exercitio aliarum virtutum concurrentes) in illius principio & fine: quia homo tunc in Deum tanquam in finem suum per actum Spei tendere tenetur.

## COROLLARIA CASUUM.

*Coroll. 1.* Ad spem requiritur 1. Ex parte objecti, ut sit absens, obtentu difficile, probabili-  
liter

liter futurum. Hinc spes non est in Beatis, nec in damnatis; Est in animabus purgatorii & quibusdam viatoribus. 2. Ex parte actûs erectio animi adversus difficultates, innixa auxiliis & promissionibus Divinis.

Coroll. 2. Peccata spei opposita sunt 1. Per defectum *desperatio*. Quid si damnatio alicui esset absolute revelata? Desperare posset, cessando à prosecutione beatitudinis propter certam ejus non futuritionem; non verò beatitudinem contemnere, Deum odisse, aut aliter peccare, aliàs aucturus damnationem. 2. Per excessum *præsumptio*; ut si quis cum Pelagio præsumat beatitudinem consequi viribus naturæ, aut cum modernis Hæreticis solâ fide sinè bonis operibus. Desperatio & præsumptio de se sunt P. M. & quandoque annexum habent peccatum hæresis: ut si quis desperet, judicans Deum immisericordem, injustum &c. præsumat ut supra.

## CAPUT VI.

### De Charitate Theologica.

*Quid Charitas? Quodnam objectum ejus?*

**V**irtus est divinitus infusa, quâ diligimus Deum propter se, proximum propter Deum. Objectum ejus *materiale*, nimirum quod diligitur, est Deus, nos ipsi, & proximus; Deus tamen primum. *Formale*, nimirum propter quod, est bonitas Dei absoluta, quâ bonus in se, & amabilis amore amicitiae: quia hac sola movet ad actum charitatis.

*Quando & qualiter obliget Præceptum  
Charitatis ?*

Præceptum charitatis *negativum*, ut non agamus contra charitatem, obligat pro semper; *Affirmativum*, ut eliciamus actum charitatis, obligat directe sæpius in vita & quidem ad diligendum Deum super omnia, non solum appreriativè, amorem Dei omnibus præferendo; Sed probabiliter etiam intensivè, Deum vehementius præ omnibus amando. Scot. 3. d. 27. Deus sic potest diligere, ergo debet; aliàs non diligitur ex totis viribus, ut præcipitur *Deuteronom. 6.*

COROLLARIA CASUUM.

*Coroll. 1.* Charitas habitualis 1. In substantia est supernaturalis: sic differt à charitate naturali & habitu acquisito, etsi per actus supernaturales. 2. Augetur per gradus, sicut gratia sanctificans: quia eadem est cum illa; unde & eadem est in via & in patria; alia tamen specie est charitas actualis viæ, & alia patriæ, ob diversum essentialiter modum tendendi.

*Coroll. 2.* Præceptum charitatis in Deum obligat 1. Circa initium usûs rationis. 2. Circa finem vitæ. 3. Sæpius in vita, ex *proposit. 5. 6. 7. damnatis ab Innocent. XI.* 4. In tentatione aliter non vincendâ. 5. Quando elicienda contritio.

*Coroll. 3.* Præceptum negativum charitatis in proximum obligat pro semper: sic nunquam licet proximo malum velle per odium, aut bonum nolle per invidiam; positivum obligat in  
casi-

calibus necessitatis tam corporalis, quàm spiritualis; quando concurrunt necessitas proximi, facultas succurrendi, indemnitas succurrentis & spes fructûs.

*Coroll. 4.* Peccatores & inimici ex charitate sunt diligendi, non ut tales, sed ut proximi nostri scil. ut homines nobiscum capaces beatitudinis. *Matth. 5.* non actu solum ex - sed etiam interno, *ex proposit. 10. 11. damnatis ab Innocent. XI.*  
**Q.** *Ad quid tener inimico?* Teneris 1. Offensam remittere. *Matth. 5. 18.* debitam tamen petere licet satisfactionem, & in peccatoribus odisse peccatum, atque optare, ut ad emendationem puniatur. 2. Exhibere communia charitatis signa, quæ exhibes aliis ejusdem conditionis hominibus, non verò specialia. Hinc inimicum excludere non licet à communibus eleemosynis, salutatione, mercium venditione &c. nisi ad tempus in justam punitionem vel correctionem. E contra inimico exhibere benecia vel opera misericordie, quæ sunt cibare, potare, vestire &c. consili est, non præcepti extra casum necessitatis & scandali. *Layman. 17. 3. c. 4.*

## CAPUT VII.

### De Ordine Charitatis.

#### *Quis Ordo Charitatis?*

**S**ervandus est iste: ut Deus præferatur omnibus, anima propria alienæ, aliena corpori proprio, & hoc corpori alieno. *Commun. 11.*



## COROLLARIA CASUUM.

*Coroll. 1.* Peccat M. 1. Qui creaturam præponit Deo, v. gr. Deum amat propter bona temporalia tanquam causam motivam, aliàs non amaturus; vel optat semper manere in hac vita, delicias ejus præferens beatitudini. 2. Pater amore filiorum exercens injustitias; non tamen committit peccatum speciale contra charitatem; quia hujus obligatio est generalis imbibita in omnibus præceptis. 3. Pro anima proximi non exponens periculo vitam corporalem. 4. Vitam propriam exponens pro aliena; licet per accidens ad salvandam vitam Principis, similisve Personæ, à qua pender salus Reipublicæ.

*Coroll. 2.* Inter proximos præferendus est, qui conjunctior; inter indigentes indigentior, de quibus Sporer c. 5. num. 135.

## CAPUT VIII.

## De Actibus Charitatis.

*Qui sint Actus Charitatis?*

**P**recipui sunt 1. *Dilectio*: quâ Deo vel proximo propter Deum, benè volumus affectu interno vel complacentiæ, de ejus bono habito gaudendo; vel desiderii, bonum nondum habitum optando, & dicitur amor affectivus; vel benefacimus, & dicitur amor effectivus; uterque est vel concupiscentia, ut si Deum ames, quia bonus tibi, vel amicitia, ut si Deum ames, quia bonus in se. 2. *Eleemosyna*: quæ opus misericordiæ, quo

quo alteri us indigentiam sublevamus propter Deum. Est in præcepto *Luc. 21.* prout necessitas indigentis & facultas dantis. 3. *Correctio Fraterna* : quæ monitio charitativa ad peccatum proximi impediendum vel emendandum. Est in præcepto *Matth. 18.* ex genere suo mortali.

### COROLLARIA CASUUM.

*Coroll. 1.* Danda est eleemosyna sub M. in extrema pauperis necessitate ex superfluis vitæ, in gravi ex necessariis ad decentiam statûs, in communi quandoque ex superfluis vitæ & statui; puta, si alius non adsit, qui indigenti debeat & possit ac velit succurrere: quia vita proximi, & gravis ejus necessitas præfatis præferri debent.

*Coroll. 2.* Uxor de bonis familiæ, filii de bonis parentum, famuli de bonis Dominorum, Religiosi de bonis Monasterii, quorum non habent administrationem, non possunt dare eleemosynas, nisi qualis & quantæ dantur ab aliis ejusdem conditionis; pro quibus vel expressam vel rationabiliter præsumptam habent licentiam.

*Coroll. 3.* Præceptum correctionis fraternæ solum obligat, concurrentibus conditionibus, quæ sunt: 1. Certitudo de peccato proximi mortali committendo, vel commissio non emendato. 2. Spes emendationis, aliàs non secuturæ. 3. Opportunitas secundum circumstantias personæ, temporis, loci &c.

*Coroll. 4.*

*Coroll. 4.* Non tenentur ad correctionem fraternam : 1. Dubius de peccato proximi. 2. Non sperans fructum. 3. Qui non potest sine gravi suo incommodo ; nisi sit superior.

*Coroll. 5.* Peccat privatus, corrigens publicè peccatum occultum, vel immediatè denuncians superiori ; nisi peccatum sit perniciosum Reipubl. & secreta monitio, vel etiam testium adhibitio videatur non profutura.

## CAPUT IX.

### De Vitiis Charitati oppositis.

*Quæ Vitia opponantur Charitati ?*

**O**pponuntur odium, discordia, contentio, schisma, scandalum, duellum & bellum.

*Quid sint ?*

1. *Odium* est aversio ab aliquo. Aliud est *abominatio* : quo alium quis averſatur, ut sibi est contrarius ; aliud *inimicitia* : quo alium averſatur secundum se, eique malè vult. Odium Dei peccatum est gravissimum ; Levius est, tamen mortale, odium proximi quoad personam, quo proximo quis verè malum vult, quod & quatenus ei malum.

2. *Discordia* est dissensio animorum in iis, quæ velle debemus. 3. *Contentio* est impugnatio veritatis acerbis verbis. 4. *Schisma* est illicita divisio ab unitate Ecclesiæ vel Pontifice. Raro

est purum, læpius conjunctum cum hæresi.  
 5. Scandalum est dictum vel factum minùs re-  
 ctum, præbens alteri occasionem peccandi.  
*Activum* est ex genere suo P. M. *Passivum* est  
 ipsum peccatum scandalizati. 6. *Quellum* est  
 certamen duorum ex conditio initum, de-  
 signato tempore & loco, cum periculo occi-  
 sionis. Prohibitum omni jure. 7. *Bellum in-  
 justum* est conflictus illicitus multorum contra  
 multos extraneos. *Commun. DD.*

## COROLLARIA CASUUM.

*Coroll. 1.* Non est reus odii in proximum  
 1. Odio habens in ipso vitium; Sic Deo odio  
 sunt impius & impietas ejus. 2. Optans ei ma-  
 lum v. gr. morbum, mortem &c. quatenus ipsi  
 in bonum. 3. Furi optans furcam, hosti in-  
 justo stragem &c. ex affectu Justitiæ, honoris  
 Dei, vel boni communis. 4. Affectu conse-  
 quenti & conditionato gaudens de morte patris  
 propter hæreditatem, Prælati propter accipien-  
 dam Prælaturam, v. gr. si Deus vellet mori  
 Patrem, tibi placeret &c. Sporer non licet affe-  
 ctu simplici antecedente & absoluto, v. gr. uti-  
 nam moreretur Pater, ut succederem &c. ex  
*propositione 13. damnata ab Innocent. XI.*

*Coroll. 2.* Scandalum committit 1. Directè  
 intendens peccatum alterius, estquæ diaboli-  
 cum. Excusatur, qui paratum ad peccatum  
 gravius inducit ad minus. *Sanch. de Matrim. d. 11.  
 num. 15.* 2. Indirectè inducens, faciendo aliquid,  
 ex

ex quo prævideret vel prævideri debet peccatum alterius, etsi fortè non sequatur. 3. Paterfamilias ponens pecuniam ad probandos domesticos. Hen. contra Sporer num. 65. vel tacens ad scandalosa in ædibus suis. 4. Custodes vinearum, sylvarum &c. Se abscondentes præcisè ut deprehenso mulctentur: *quia intendendo mulctam, intendunt peccatum, quod nunquam licet.* Sporer num. 68.

Coroll. 3. Scandalizans præter peccatum scandali, committit peccatum illius speciei, ad quod alterum inducit, idque exprimere debet in confessione, sicut & numerum personarum, quibus scandalum dedit, imò earum qualitatem, si inde mutetur species peccati, ad quod induxit. Sic sollicitator puellæ peccat peccato fornicationis propriæ, alienæ, & scandali.

Coroll. 4. Prævidens scandalum merè passivum, licetè illud permittit: 1. Si aliquid indifferens, ex quo putat alterum scandalizandum, faciat ob justam causam necessitatis vel utilitatis. 2. Si ob similem causam petat ab alio, quod is sine peccato præstare potest, licet cum peccato sit præstiturus. 3. Si opus, quod alteri est occasio peccati, non possit omitti sine peccato.

Coroll. 5. Quicumque alium induxit in peccatum vel errorem noxium, obligatur procurare eius emendationem, & quidem ex iustitia, si induxit per vim vel fraudem, aliàs solum



solum ex charitate. Less. Layman. aliisque citat. Sporer.

*Coroll. 6.* Excommunicationem contra duellantes incurrunt : 1. Ipsi pugnantes. Excipe, nisi acceptatio vel oblatio duelli sit absolute necessaria ad defensionem famæ vel bonorum fortunæ, & hæc ad vitam ipsam. Reiffenst. l. 5. Decret. tit. 14. num. 31. 2. Permittentes, excepto casu ad finiendum bellum. 3. Patrini. 4. Adjutores. 5. Spectatores ex industria.

*Coroll. 7.* Conditiones belli iusti sunt : 1. Autoritas legitima scil. Principis, Superiorem non recognoscentis. 2. Causa iusta. 3. Intentio recta. 4. Debitus modus in bellando. Mast. d. 10. num. 107.

*Coroll. 8.* Peccant in bello : 1. Regi suo infideles. 2. Militi subtrahentes stipendia. 3. Militum supposititiorum stipendia sibi arrogantes. 4. Totum onus militum diverterentes in unum aut alterum pagum, aliis ad contributiones pecuniarias adactis. 5. Hospites suos vexantes, indebita extorquentes. 6. Desertores, qui præter peccatum iniustitiæ violant iuramentum. 7. Quidquid demum in bellis vel nocendi cupiditate vel immani crudelitate, vel scandalosa impietate, vel effræni libidine committitur, peccatum est mortale juxta rationem materiæ. March. tr. 6. tit. 2. 3. 4.

# TRACTATUS XV.

## De Gratia, Justificatione & Merito.

### CAPUT I.

#### De Gratia.

##### *Quid sit?*

**E**st donum Dei supernaturale (*quia non à Deo ut authore naturæ*) creaturæ rationali ex meritis Christi gratis concessum in ordine ad vitam æternam. Dupasq. Equidem augmentum gratiæ cadit sub meritum, sed fundatum in gratia.

##### *Quotuplex sit?*

Dividitur 1. In habitualem & actualem: *Habitualis* est qualitas permanenter inhaerens animæ, eamque formaliter sanctificans. Infunditur à Deo, augetur per opera meritoria, amittitur per quolibet P. M. non distinguitur realiter à charitate habituali. Scotus l. d. 17. q. 2. Ad quid habitus illi multiplicarentur? Charitas habitualis ex ordinatione divina præstat, quod gratia habitualis, & juxta *Trid. Sess. 6. c. 7.* fides per charitatem operatur. Quæ illa charitas? Utique gratia sanctificans, sine qua fidelium opera sunt mortua. Idem igitur habitus in ordine ad diversos effectus, dicitur modò charitas, modò gratia. *Actualis* est auxilium divinum,

num, quo transeunter homo ad bonum movetur vel adjuvatur. Ejusmodi sunt p<sup>ri</sup> inspirationes, cogitationes, motiones &c. quas juxta Aug. *Deus operatur in nobis sine nobis.* 2.) Actualis subdividitur per ordinem ad consensum liberi arbitrii in prævenientem seu excitantem, & in concomitantem seu cooperantem; de his Aug. *Deus, ut velimus, operatur incipiens, qui volentibus cooperatur perficiens.* Præveniens in merè sufficientem, quæ non sortitur effectum defectu cooperationis, & in efficacem, quæ effectum sortitur, accedente hominis cooperatione.

*An quilibet habeat Gratiam, eaque  
necessitet?*

Cuilibet homini datur gratia saltem remotè sufficientem ad beatitudinem: nam 1. *Timoth. 2. Deus vult omnes homines salvos fieri.* Non necessitat: nam damnata est hæc propositio Jansenii: *Interiori gratia . . . nunquam resistitur.*

*An & ad quid Gratia necessaria?*

Necessaria est cuilibet ad quodlibet opus, ut sit meritorium vitæ æternæ. Cath. contra Pelag. Potest quidem homo, etiam injustus, facere opus moraliter bonum, ut patet ex *proposit. 1. damnata à Clement. XI.* non tamen, ut oportet ad salutem. ex *Trid. Sess. 6. c. 3. 2.* Justus non potest ad tempus notabile sine speciali privilegio vitare omnia venialia collectivè.

Q

*Trident.*

*Trident. Sess. 6. can. 23.* Neque perireverare in  
Sanctitate usque ad mortem sine speciali au-  
xilium Dei. *Trident. citat. can. 22.*

## CAPUT II.

## De Justificatione.

*Quid sit ?*

**J**ustificatio impii est translatio hominis à  
statu peccati ad statum gratiæ. *Commun.* In  
ea peccata verè delentur ac remittuntur. *De*  
*Fide in Trid. Sess. 5. can. 5* Unum mortale de  
potentia ordinaria non potest remitti sine  
alio : quia remittendo infunditur gratia cum peccato  
incompatibilis. Potest de absoluta : quia unum  
debitum remitti potest sine alio ; non tamen fieret  
Justificatio.

*Quæ sit forma Justificationis.*

Forma Justificationis est Justificatio intrin-  
seca & inhærens. *De Fide contra Luther.* Eaque  
gratia sanctificans ; hæc tamen peccatum non  
expellit physicè ex natura sua , sed moraliter  
ex ordinatione divina. *Scot. 2. d. 23. num. 7.*  
Hinc de potentia absoluta gratia materialiter  
sumpta stare potest cum peccato , & Justifi-  
catio fieri per solam condonationem extrin-  
secam absque infusione gratiæ. *D. Bonav.*  
*Alenf. Suarez.*

*Quæ*

*Quæ requiratur dispositio?*

Dispositio ad Justificationem hæc est: in adulto requiritur 1. *Fides*. Rom. 3. *Arbitramur hominem justificari per fidem*. Lutherus addidit: *sola*. Cumque à Catholico quodam argueretur quasi fallarius, ita respondit: *Doct̃or Martinus Lutherus vult sic habere, & dicit Papistam & asinum rem esse unam; Sic volo, sic jubeo, sit pro ratione voluntas; nolimus Papistarum Scholares esse sed Judices*. Lutherus ita vult, & ait se Doct̃em super omnes Doctores totius Papistis. Tom. 4. Operum Germani Lutheri, quæ excusa Wittenbergæ 1551. fol. 475. contra hunc in Trid. Sess. 6. can. 9. non sufficit sola fides. Requiritur 2. *Spes*. Rom. 8. *Spe salvi facti sumus*. 3. *Dilectio*. Joan. 3. *Qui non diligit, manet in morte*. 4. *Pœnitentia*. Luc. 13. *Nisi pœnitentiam egeritis &c.* Sufficiunt tamen actus fidei & spei antea elicitī & moraliter perseverantes, attritio cum Sacramento, vel contritio charitate formata extra Sacramentum. Dispositione hac positâ homo solum moraliter est certus de sua Justificatione. Eccles. 9. *Nescit homo, utrum amore, an odio dignus sit.*

*Quæ sint Causæ Justificationis?*

Causa dispositiva sunt actus nostri, ut supra. Meritoria est Christus. Efficiens est solus Deus. Formalis est gratia infusa. Finalis est honor Dei, gloria Christi & beatitudo hominis. Tit. 3. *Salvos nos fecit per lavacrum regenerationis Spiritus Sancti, quem effudit in nos per Jesum Christum, ut justificati gratia ipsius heredes simus secundum spem vitæ æternæ.*



## CAPUT III.

## De Merito.

*Quid sit ?*

**M**eritum Theologicum est opus bonum, cui præmium debetur supernaturale per modum retributionis.

*Quotuplex ?*

Aliud est de condigno, aliud de congruo: primo debetur præmium ex quadam quali Iustitia & fidelitate: quia promissum, ideoque confertur infallibiliter. Secundo debetur tantum ex decentia.

*An detur ?*

Potest homo mereri apud Deum. *Matth. 5. Merces vestra copiosa est in celis.*

*Quas postulet conditiones ?*

Ad meritum de condigno requiritur 1. Ex parte operis, ut sit moraliter bonum præmio proportionaliter æquivalens ex acceptione divina, & procedat ex gratiæ auxilio (*aliàs non esset supernaturale*) & referatur ad Deum. 2. Ex parte operantis status viæ & gratiæ. 3. Ex parte Dei præmiantis promissio de dando tali præmio. *Aug. in Psal. 83. Debitorem Deus ipse se fecit, non accipiendo, sed promittendo.*

*Quid cadat sub meritum ?*

Quod cadit sub meritum de condigno est augmentum gratiæ & gloriæ. *Trid. Sess. 6. can. 32. Non*

Non verò gratia prima actualis: quia principium meriti. Nec prima habitualis: quia justificamur gratis. Rom. 3. Nec Justificatio post lapsum: aliis peccator posset mereri de condigno. Nec perseverantia finalis in gratia: quia nullibi promissa. Hac tamen omnia cadunt sub meritum de congruo, exceptâ gratiâ primâ actuali, quam nemo sibi potest mereri: alius mereretur sine gratia; potest alteri, & eâ mediante Justificationem, obtinendo illi gratiam, qua sese ad Justificationem disponat.

\*\*\*\*\*

*TRACTATUS XVI.*  
*Ex Libro III. Sententiarum*  
*de Incarnatione.*

*CAPUT I.*

*De Essentia, & Existentia Incarnationis.*

*Quid Incarnatio?*

**I**ncarnatio est assumptio naturæ humanæ à verbo in unitatem Personæ divinæ. Illius possibilitas nequit positivè cognosci lumine purè naturali: Quia nullum datur medium naturaliter cognoscibile, quod tanquam causa vel effectus ducere possit in ejus cognitionem.

*An peracta?*

Incarnatio est peracta in JESU Nazareno, qui fuit Messias, natus ex Maria Virgine, verus Deus & verus homo. *De Fide contra Judeos.* Conveniens fuit Deo & homini: quia Deus per eam glorificatur, homo justificatur. In ordine ad reparationem generis humani convenientius fuit naturam humanam assumi, quam Angelicam: quia Christus in carne exemplum dedit nobis, ut quemadmodum ipse fecit, ita & nos faciamus. Joan. 13. Item homines redimi, quam Angelos: quia hi peccarunt voluntate propria, isti aliena &c.

*Quomodo fuerit necessaria?*

Incarnatio non fuit simpliciter necessaria, etiam post lapsum Adæ: quia sicut Angelos lapsos Deus reliquit sibi remedio, sic potuisset & homines, vel peccata remittere gratis; Supposito autem decreto de lapsu hominis reparando per viam satisfactionis condignæ, ita satisfecere de potentia Dei absoluta potuisset pura creatura. Scotus 3. d. 2. C. n. 3. Quia potuisset Deus alicui homini conferre plenitudinem gratiæ Christi, illum constituere caput hominum in ordine gratiæ, ejus merita acceptare in satisfactionem pro peccatis. Conf. Purus homo potuit omnes inficere, cur non purus homo potuisset redimere?

## CAPUT II.

## De Causis Incarnationis.

*Quæ Causa efficiens Incarnationis.*

**E**fficiens est tota Ss. Trinitas, nam opera Trinitatis ad extra sunt indivisa. *At Filius in Symbolo dicitur incarnatus de Spiritu Sancto? R.* Per appropriationem.

*Quæ Causa illius meritoria?*

Causa meritoria Incarnationis quoad substantiam de facto nulla datur: 1. Incarnationem non meruit humanitas Christi; nec per merita illam tempore præcedentia: quia nullo eum instanti præcessit; nec per priora ordine naturæ: quia connaturaliter prius est naturam subsistere, quam operari; Potuisset tamen de potentia absoluta: quia actiones non sunt essentialiter posteriores subsistentiæ. 2. Incarnationem non meruit, nec potuit Christus per opera illam subsequenter: quia hæc necessario præsupponunt illam, hæc existentia illam existentem, hæc prævisa illam prævisam; insuper incarnatio est principium meriti, adeoque nequit cadere sub meritum. 3. Incarnationem non meruerunt Ss. Patres: quia Christus est primogenitus omnis creatura; meruerunt tamen de congruo Incarnationis executionem, orantes illud *Isai. 16* Emitte agnum Domine Dominatorem terra &c. & B. Virgo maternitatem, ut in tempore collatam; secundum quod canit Ecclesia: *Quem meruisti portare &c.*

Q1

Quod-

*Quodnam motivum Incarnationis ?*

Causa finalis seu motivum Incarnationis non fuit solum remedium peccati. *Quid amplius ?* Excellentia hujus mysterii, nostra Justificatio, Dei Glorificatio. *An ergo præcisò Ade peccato Christus venisset ?* Imò, etiam vi præsentis decreti, sed non in carne passibili. *Unde constat ?* Ex S. Script. juxta hanc Christus est finis omnium creaturarum, nam Coloss. 1. In ipso condita sunt universa. 1. Corinth. 3. Omnia vestra sunt, vos Christi, Christus autem Dei. Item in ordine intentionis Christus est factus ante omnes creaturas; nam Coloss. 1. dicitur *Primogenitus omnis Creatura*; & Præcursor ejus testatur Joan. 1. *Qui post me venturus est, ante me factus est, qui prior me erat.* Ergo Christus prius est volutus à Deo, quam ulla creatura, vel peccati permissio, ejusque remedium, adeoque hoc præcisò venisset.

## CAPUT III.

## De Unionè Hypostatica.

*An vera Unio inter humanitatem & Verbum ? Quid illa ?*

**U**Nio humanitaris ad Verbum sit vera & physica. *De Fide contra Nestor.* Consistit formaliter in Relatione: quia totum ipsius esse, est referre humanitatem Christi ad Verbum; eaque est extrinsecus adveniens: quia potest esse Verbum & hac humanitate, & tamen non unita Verbo; Subjectata in humanitate,



tate, non in Verbo; quia immutabile; & terminata immediate ad solam Personalitatem Verbi: quia hoc solum est caro factum.

### *Qualis sit Unio illa?*

Unio hæc dicitur Hypostatica: quia est ad Personam Verbi seu Hypostasim; dicitur substantialis: quia necit Substantias; est supernaturalis: quia omnem superat naturæ ordinem & exigentiam; est maxima unionum in ratione tum unionis: quia indissolubilis, uniusque infinite distantia; tum operis: quia terminus ejus totalis est Christus Dominus, qui excedit, quidquid non est Deus; tum domini: quia per eam natura assumpta perfectius participat esse Divinum, quam per gratiam & gloriam.

## CAPUT IV.

### De Persona assumente & natura assumpta.

#### *Quid sit assumere naturam?*

**A**ssumere naturam, est ejusdem terminare unionem: quia sic sufficienter est Persona assumendi unita, quamvis unio in ea non sit subiectata; ut patet de unionem materiali in corpore ad animam spiritualementem.

*An una Persona Divina possit assumere plures Naturas, & plures unam?*

Una Persona Divina potest plures assumere Naturas: quia habet realiter virtutem assumendi infinitam

*tam & natura habent compatibilitatem in unitate Persona. Non tamen plures Personæ possunt assumere eandem numero naturam : quia natura illa haberet suum esse personale totaliter & adquatè ab unaquaque Personarum ; item ab unaquaque redderetur incommunicabilis alteri supposito , & non redderetur ; quod utrumque implicat. Unde ait S. Anselm. l. 2. Cur Deus homo. c. 9. Plures Personæ neque unum , eundemque hominem assumere in unitatem Persona.*

*An Verbum potuerit assumere naturam Angelicam , vel aliam ?*

Potuit à Verbo assumi natura Angelica , potuit & quælibet alia ; quia Subsistentia Divina continet vim terminativam cujuslibet subsistentie creatae & qualibet natura creata habet terminabilitatem obedientiam cujuslibet subsistentie. Ergo Verbum posset dici lapis : Posset per communicationem idiomatum , quod non est indecens positivè.

*An Verbum assumpsit verum corpus, veram animam , sanguinem &c.*

Verbum caro factum assumpsit verum corpus & veram animam. De Fide contra Eutych. Item immediate & hypostaticè assumpsit sanguinem : quia pertinet ad corporis integritatem , & Clem. VI. ait in Extrav. de Penitent. & Remiss. Modicam sanguinis guttam pro redemptione totius generis humani sufficere propter unionem ad Verbum.

*An*

*An Sanguis effusus manserit Verbo  
unitus ?*

Sanguis effusus in resurrectione resumen-  
dus mansit Verbo unitus, sicut caro & ani-  
ma in triduo mortis; resumptus est torus mo-  
raliter: quia Christus resurrexit homo perfectus; non  
torus physice: quia asservatur aliquis Mantua, ap-  
probatus à Leone III. aliquis Venetiis; aliquo rubescit  
Lancea Roma, Spina Parisiis, Syndon Taurini &c.  
At quomodo S. D. masc. dicit: *Quod Verbum  
assumpsit nunquam dimisit*? Dicit de partibus ad  
corporis integritatem necessariis, non de qui-  
buscunque. Scot. 3. d. 6. q. 62.

*CAPUT V.*

*De Composito Theandrico.*

*Quid & quis Compositum Theandricum ?*

**C**ompositum Theandricum est Deus-ho-  
mo, hoc Christus est, qui mediante  
unione hypostatica compositus (quamvis non  
compositione rigorosa) immediatè ex natura  
humana & Personalitate Verbi, mediatè ex na-  
tura humana & Divina. Synod. VI. gen. act. 11.

*Quæ naturæ in Christo & quot Per-  
sonæ ?*

In Christo proinde sunt duæ Naturæ integræ,  
Divina & humana. *De Fide contra Eutych.* Sed  
una tantum Persona, eaque Verbi. *De Fide con-*

*tra Nestor.* Non tamen Christus est duo, nec masculinè, nec neutraliter. *De Filio.* Non masculinè: Sic S. Athan. in Symbolo: *Licet Deus sit & homo, non duo tamen, sed unus est Christus; putata ob unitatem suppositi.* Nec neutraliter: sic Concil. Constant. damnans errorem Joannis Hus, qui erat: *Christus est dua natura.* In obliquo tamen dici potest habens duo, scilicet Divinitatem & humanitatem.

*Quomodo Christus Dei Filius naturalis  
& Servus?*

Christus ut homo (ut sumendo specificativè) est Filius naturalis Dei Patris, ratione suppositi, humanitatem suppositantis; unde Angelus ad Mariam *Luc. 1. Quod ex te nascetur sanctum, vocatur Filius Dei.* Est & servus Dei, ratione humanitatis præciè. Unde S. Chrysost. *serm. 7. Sicut in forma Dei perfectus est Deus, ita in forma Servi perfectus est Servus.*

*An detur in Christo & quid sit Communicatio Idiomatum?*

Datur in Christo Communicatio Idiomatum, sive naturæ Divinæ & humanæ, earumque proprietatum in concreto de se invicem prædicatio, fundata in dictarum naturarum adunatione in eodem supposito. *De Fide.* Sic de filio Dei dicitur in Symbolo Apost. *Qui conceptus est de Spiritu Sancto, natus ex Maria Virgine, passus &c.* Bene dicimus: album est dulce: quia est unum subje-

subjectum, nempe lac, habens albedinem & dulcedinem; ergo etiam bene: Homo est Deus, & Deus est homo: quia est unum suppositum, quod significatur in recto, habens naturam Divinam & humanam; hinc illius in Symb. Et homo factus est: Sensus est: Suppositum habens Divinitatem, factum est habens humanitatem.

## CAPUT VI.

## De Scientia Christi.

*An in Christo duo intell. &us, isque duo intelligentes?*

**I**N Christo sunt duo intellectus. De Fide contra Monoth. Ut Deus, habet intellectum Divinum, ut homo humanum; est tamen unus intelligens, ob unitatem suppositi. In Christo ad Coloss. 2. sunt omnes Theauri Sapientiae & Scientiae absconditi.

*Quæ Scientiæ in Christo?*

Præter scientiam increatam, quam habet ut Deus, fuit in eo ut homine scientia triplex:

1. Beata, quâ ab instanti conceptionis clariùs præ omnibus Sanctis vidit Deum, sicuti est extensivè, omniaque in eo objecta tum actualia, tum possibilis, non quidem actualiter, sed quasi habitualiter: quatenus Verbum erat paratum humanitati ostendere successivè, quæ hæc utpote finita non potuit cognoscere simul. S. Bonav. Hanc scientiam exigebat unio hypostatica,



rica, at non indispensabiliter, quæ enim absoluta connexio inter unam & alteram? 2. *Infusa*, quâ res naturales & supernaturales, quarum scientia ipsum decebat, cognovit extra Verbum in se per Species: nam in Christo ad Coloss. 1. condita sunt universa, atque que competeabant eorum Species. 3. *Acquisita* seu experimentalis, quâ objecta per scientiam infusam cognita abstractivè, in seipsum præsentia cognovit intuitivè, ea tangendo, videndo &c. de hac teste Ambros. dicitur Luc. 2. *Iesus proficiebat ætate & sapientia.*

## CAPUT VII.

## De Libertate Christi.

*An & quomodo voluntas Christi fuerit libera?*

**H**Umana Christi voluntas fuit libera, non tantum à coactione, sed etiam à necessitate. *De Fide.* In Christo fuit libertas, quæ necessaria ad merendum; hæc autem desinente Innocent. X. contra Jansen. est libertas à necessitate seu indifferentia.

*An libera in materia præcepti?*

Hanc libertatem habuit ad actus inæqualis perfectionis (quia non necessitatus ad optimum saltem materialiter) imò in materia præcepta: quia Patri sui præcepta servavit, Joan. 15. & ea servando verè meruit. At liberè implevit præcepta, ergo potuit non

non implere; & quomodo fu-  
 R. 1. Petere potuit & obtinere dispensationem,  
 sicque non implere sine peccato. Lugo, Wa-  
 ding. R. 2. Liberè implevit non libertate pro-  
 ximâ & ab extrinseco, sed remotâ & intrinsecâ  
 indifferentiâ voluntatis; nam ob affluentiam  
 gratiarum & negationem concursûs ad malum  
 non habuit libertatem extrinsecam, proximam  
 & moralem, quæ necessaria ad peccandum;  
 ob indifferentiam tamen intrinsecam & physi-  
 cam voluntatis, quæ, quantum ex se, poterat  
 implere præceptum & non implere, habuit li-  
 bertatem indifferentiæ intrinsecam & physicam;  
 quæ tametsi non in nobis, tamen in Christo ex  
 dispensatione erat sufficiens ad merendum;  
 cum enim ex dispensatione viator fuerit & com-  
 prehensor, ut comprehensor impeccabilis, ut  
 viator capax meriti, relicta est illi libertas suffi-  
 ciens ad merendum, quæ dispensativè præfata.  
 Mastrius ex Scoto 3. d. 12. A. n. 2.

## CAPUT VIII.

## De Sanctitate Christi.

*Quotuplex Christi Sanctitas?*

UNA est substantialis, quæ à Persona Ver-  
 bi; altera est accidentalis, quæ à gratia  
 habituali. De utraque S. Bernard. Homil. 4.  
 Sup. Miss. Singulariter sanctum fuit, quidquid Virgo  
 concepit, & per Spiritûs Sanctificationem, & per Verbi  
 Assumptionem.

Per

*Per quid humanitas Christi fuerit formaliter sanctificata?*

Humanitas tamen Christi non fuit formaliter & immediatè sanctificata per unionem hypostaticam: quia hæc non est forma sanctificans, non habens formaliter nisi unire; nec per Deitatem: quia hæc unita humanitati non constituit ipsam formaliter æternam, immensam &c. ergo nec formaliter sanctam, quodsi ita, esset infinite sancta. Sed sanctificata est per gratiam habitualement: hæc fuit in Christo Joa. 1. Quidni ergo sanctificavit?

*Quanta fuerit Gratia Christi?*

Gratia Christi habitualis fuit summa negativè: quia nulla illi æqualis; non positivè, & infinita: quia creata; An ergo augeri potuisset? Potuisse de potentia Dei absolutâ, mens est Mastrii, Becani, Gonet &c. Quia potentia productiva augmenti gratiæ in Deo, & potentia obedientialis illius receptiva in anima Christi, carent terminò.

## CAPUT IX.

### De Impeccabilitate.

*An fuerit in Christo peccatum, vel esse potuerit?*

**E**X sanctitate Christi sequitur ejus impeccabilitas, non fuit in eo peccatum originale: quia non fuit Filius Adæ; nec actuale: quia 1. Petri 2. peccatum non fecit; nec ullum esse potuit: quia

*cum summa Gratia & Gloria, quæ in Christo, quodlibet est incompatible.*

### *Unde impeccabilitas Christi?*

Impeccabilitas igitur Christi proximè & formaliter est ex plenitudine gratiæ & gloriæ, remotè & radicaliter ab unione hypostatica. Scot. 3. d. 2. q. 1. Quid, si Verbum assumeret naturam sibi in naturalibus re etiam, cum proxima libertate indifferentiæ ad bonum & malum & cum decreto concurrendi ad utrumque? Posset peccare non obstante unione hypostatica; hæc enim non absolutâ necessitate sanctificat & beatificat; nec de se formaliter repugnat cum peccato, relinquens naturam in suis intrinsecis, adeoque in peccabilitate.

## CAPUT X.

### De Merito Christi.

*An Christus verè meruerit, per quid, quando?*

**C**hristus D. noster verè meruit, de Fide, per omnes actus suos liberos, & quidem à primo instanti vitæ intrinseco usque ad instans mortis extrinsecum; nihil enim tunc ad merendum deerat.

### *Quibus & quid meruerit?*

Sibi i meruit gloriam corporis. Luc. 24. Nonne hæc oportuit pati Christum, & ita intrare in gloriam suam?

R

suam ? Non animæ , quam ante habuit ; ergo corporis. 2. Nominis sui exaltationem & alia bona extrinseca , quæ accipit post passionem. Philip. 2. *Humiliavit semet ipsum . . . propter quod & Deus exaltavit illum &c.* Angelis meruit gratiam & gloriam : nam Jo. 12. ait : *Nemo* (scil. hominum & teste Suarez quoque Angelorum) *venit ad Patrem , nisi per me.* S. Bernard. *serm. 1. de Circumcis.* Idem & Angeli Salvator & hominis , sed hominis ab Incarnatione , Angeli ab initio creatura. Homini bus meruit Justificationem : nam Luc. 19. *Venit querere , & saluum facere , quod perierat.*

*Merita Christi an & qualiter infinita ?*

Merita Christi sunt infinita secundum quid & extrinsecè : quia excedunt omnium creaturarum merita , & propter dignitatem Personæ sunt à Deo acceptata (nam exauditus est pro reverentia sua. Hebr. 5. in satisfactionem pro omnibus peccatis , adeoque extensivi sunt infinita. Non verò infinita simpliciter & intrinsecè. Scot. 3. d. 19. ubi ait : *Si infinitum , cui non fuit meritum plus secundum velle creatum , quam secundum velle Verbi increatum ; at secundum hoc non meruit : opera enim Christi meritoria fuerunt humana , non propriè Theandrica , non elicitive à Supposito Divino , adeoque in se finita ; ratione Suppositi tamen sunt proportionaliter dignificata & in supremo ordine , ut nequeant ad illorum æqualitatem crescere merita hominum & Angelorum.*

CAPUT



## CAPUT XI. De Satisfactione.

*An Christus sit mortuus pro omnibus ?*

**C**hristus verus Messias satisfecit pro peccatis & mortuus est pro salut omnium & singulorum hominum. De Fide contra Calvin. Luther. Jansen. nam 2. Corinth. 5. Pro omnibus mortuus est Christus. 1. Timoth. 2. Qui dedit semetipsum redemptionem pro omnibus. & ibid. 4. Qui omnes homines vult salvos fieri. At non omnes salvi fiunt ? Eit ex culpa hominum ; audi S. Ambros Non vult efficaciter omnes salvari, nisi ipsi velint cooperando. Ad idem S. Aug. Sanguis Christi volenti salus est, nolenti supplicium.

*Quomodo Satisfactio Christi fuerit  
condigna ?*

Satisfactio Christi fuit condigna in actu primo : quia secundum se sufficiens, imò superabundans ; & Psal. 29. Copiosa apud eum redemptio. Non tamen condigna in actu secundo sinè acceptatione Divina : Si enim Deus, ut potuit, satisfactionem Christi non acceptasset, hic in actu secundo non satisfecisset.

*An fuerit de toto rigore Justitiæ ?*

Satisfactio Christi non fuit de toto rigore Justitiæ : intercessit gratia offensi, dum opera Christi, quæ jam Dei erant & aliunde debita, in satisfactionem pro peccatis nostris accepavit,

vir, qui satisfactionem exigere poterat ab ipso offendente, imò hac reculatâ poenam promeritam. Lugo, Valsq. & commun. Scotist.

## CAPUT XII.

### De Virtutibus Christi.

*An fuerint in Christo Virtutes Theologicæ?*

**F**uit in Christo charitas, ipso teste Joann. 14. *Diligo Patrem.* Non verò fides, neque spes; quia vidit Verbum, & in Verbo facta per Verbum; fides autem Hebr. 11. *Est argumentum non apparentium;* & Rom. 8. *Spes, quæ videtur, non est spes.*

*An morales?*

Ex moralibus fuerunt in Christo plurimæ, earque infusæ, excipe illas, quæ connotant imperfectionem, ut est Poenitentia, quæ in subiecto supponit peccata commissa, vel committi possibilia.

*An gratiæ gratis datæ, dona Spiritûs Sancti, & passiones humana?*

Præter virtutes fuerunt in Christo novem gratiæ gratis datæ, quæ enumerantur 1. Corinth. 12. *Sermo Sapientia, Sermo Scientia, Fides, Gratia Sanitatum, Operatio Virtutum, Prophetia, Discretio Spirituum, Genera Linguarum, Interpretatio Sermonum.* Item 7. *dona Spiritûs Sancti;* ita vaticinatus est Isaias c. 11. *Requiescet super eum Spiritus Domini: Spiritus Sapientia & Intellectus, Spiritus Consilii & Fortitudinis.*

*Spiri-*

Spiritus Scientiæ & Pietatis, & replebit eum Spiritus timoris Domini. Denique fuerunt in Christo 11. passiones humanæ, quæ sunt: Amor & Odium, Desiderium & Fuga, Gaudium & Tristitia, Spes & Desperatio, Timor & Audacia atque Ira; Sed fuerunt in eo ordinatissimæ, & sine defectibus, quibus subjacent in nobis. Commun. ex Leone Magno Epist. 25. ad Julianum c. 30.

## CAPUT XIII.

## De Potentia Christi &amp; Dignitate.

*Quotuplex in Christo Potestas, quâ fecerit miracula?*

**D**E se ait Matth. ult. Data est mihi omnis potestas in cælo & in terra, scil. quâ Filio Dei ratione generationis Divinæ potestas Divinitatis, quâ Filio hominis ratione unionis hypostaticæ potestas excellentiæ; illa physicè, hæc solum moraliter (merendo, petendo) influxit in miracula. ita S. Bonav. unde Damasc. l. 3. de Fide. c. 15. Humana actionis opus fuit, quod puella manum pertraxerit; Divinæ, quod eam ad vitam revocaverit.

*An & quomodo Christus Caput hominum & Angelorum, Sacerdos, Mediator, Redemptor, Rex, & Judex?*

Christus ut homo est 1. Caput Ecclesiæ militantis & totius Triumphantis: Ephes. 1. Ipsum dicit Caput supra omnem Ecclesiam, addit Hieron. Non solum hominum, sed etiam Angelorum; nam re-

spectu horum æquè ac illorum habet præmi-  
nentiam, unionem & influxum. 2. Sacerdos,  
imò Pontifex, qui *Hebr. 9. per proprium sanguinem*  
*introiit semel in Sancta &c.* se ipsum obtulit tum  
in cœna, tum in cruce, & adhuc quotidie per  
manus Sacerdotum in Altari. 3. Mediator:  
*1. Timoth. 2. Unus Mediator Dei & hominum Christus*  
*Jesus.* Unus principaliter, qui se interposuit in  
reconciliationem hominis cum Deo. 4. Re-  
demptor: *Leo Papa in Serm. de Nativitat. Sicut à*  
*reatu neminem liberum reperit, sic liberandis omnibus ve-*  
*nit.* 5. Rex, certò spiritualis, *Luc. 1. probabi-*  
*liter & temporalis quoad actum primum, titu-*  
*lo unionis hypostaticæ; sic dicitur Apocalyps. 19.*  
*Rex Regum, Dominus Dominantium;* non quoad  
actum secundum seu exercitium: sic dixit *Joan.*  
*18. Regnum meum non est de hoc mundo.* 6. Iudex:  
*Act. 10. Constitutus est à Deo Iudex vivorum & mortuo-*  
*rum. de hoc Tract. 3. cap. 4.*

## CAPUT XIV.

### De Adoratione Christi & Sanctorum.

*Quæ Adoratio competat Christo Deo- homini,  
Cruci ejus, humanitati, & Virgini  
Deipara?*

**A**Doratio triplex est, scil. Latriæ, Hiperdu-  
liæ, Dulciæ: Prima est cultus ob alterius  
excellentiâ supremam seu increatam; secun-  
da ob excellentiam creatam supernaturalem ex-  
traor-

traordinariam ; tertia ob ordinariam scilicet gratiæ & gloriæ. Christus Deus-homo est adorandus adoratione Latriæ. *Concil. Ephes. can. 4. Deitas & humanitas unum constituunt compositum Theandricum, adorabile una adoratione, ut definit Synod. V. ergo & humanitas coadoratur, non quasi motivum adorationis, quod sola Deitas, sed terminus ejus ; sicut enim totus homo, consequenter & corpus animæ unitum terminat cultum Dulæ ; sic humanitas Christi, ut unita Verbo Divino, terminat adorationem Latriæ. Eâdem, sed respectivâ scil. transeunte ad Christum, adorantur ejus Crux, Reliquiæ & Nomen Jesu. Humanitas verò secundum se spectata adorari potest solum adoratione Hiperdulæ, similiter & Virgo Deipara : Hæc propter Maternitatem Divinam, illâ propter unionem hypostaticam.*

*Quo cultu colantur Sancti, Reliquiæ  
& Imagines ?*

Sancti in coelo piè coluntur cultu Dulæ & quidem absoluto, Reliquiæ & Imagines respectivo. *Trid. Sess. 24.* Quia in Sanctis est dignitas & excellentia intrinseca, in Reliquiis & Imaginibus extrinseca.

*An liceat Sanctos invocare ?*

Bonum & utile est, Sanctos invocare. *Trid. citat.* Etenim intercessione sua juvare nos & possunt & volunt. S. Hieron. contra Vigilant. Si Apostoli & Martyres adhuc in corpore potue-



rint orare pro ceteris, quantò magis post coronas, victorias, & triumphos? At unde sciunt preces nostras? Audi S. Gregor. 2. dial. 33. *In illa aeterna felicitate omnes communi claritate Deum respiciunt; quid est, quod ibi nesciant, ubi scientem omnia sciunt.* Audi S. Bernard. 5. de Consid. c. 1. *Beati vident Verbum, & in Verbo facta per Verbum.* Hoc caro factum sit nobis Verbum oris, ut loquamur; Verbum cordis, ut diligamus; Verbum mentis, ut credamus, postea visuri.

\*\*\*\*\*

## TRACTATUS XVII.

Ex Libro IV. Sententiarum  
de Sacramentis.

### CAPUT I.

De Quidditate & Numero.

*Quid sit Sacramentum?*

**S**acramentum est signum se simile gratiam Dei ex divina institutione efficaciter significans, ordinatum ad salutem hominis viatoris. Scotus 4. d. 1. Vel cum S. Aug. *Est invisibilis gratia signum visibile.* Ratio est: quia per Sacramentum nihil aliud intelligitur, quam signum sensibile seu ritus externus, à Deo institutus, ad conferendum efficaciter gratiam ex Meritis Christi.

An

*An fuerit Sacramentum in Lege naturæ  
& veteri?*

In Lege naturæ & veteri fuit unicum, quod cum modernis univocum, nempe remedium contra peccatum originale; idque in lege naturæ fuit externa fidei protestatio in venturum Messiam; In lege veteri fuit Circumcisio pro masculis. *Mastrius d. 1. q. 1.* quia Deus volens omnes homines salvos fieri, nunquam parvulos reliquit sine remedio contra peccatum originale. Hoc autem remedium fuit verum Sacramentum: quia contulit gratiam ex merito Christi prævisis, independentem à dispositione suscipientis & ministrantis.

*Quot sint Sacramenta in Lege nova?*

In Lege nova sunt septem, quæ enumerat Concilium Florentin. Baptismus, Confirmatio, Eucharistia, Pœnitentia, extrema Unctio, Ordo, Matrimonium. vide *Controvers. c. 4. controvers. 4.*

## CAPUT II.

### De Materia & Forma.

*Ex quibus perficiantur Sacramenta?*

**S**acramenta tribus perficiuntur: Rebus tanquam materiâ, verbis tanquam formâ, & Personâ Ministrum cum intentione. *Concil. Florent. in Decret.*

*Quid sint Materia & Forma?*

Materia alia est remota, alia proxima: Remota est res, quæ applicatur, proxima est illius

R §

appli-

applicatio, v. gr. in Baptismo materia remota est aqua, proxima est ablutio. Forma sunt Verba Mini tri. Res & verba in Sacramentis vocantur materia & forma per respectum ad materiam & formam physicam; sicut enim hæc materiam indifferentem determinat ad tale compositum physicum; Sic verba Mini stri cum intentione prolata determinant rem v. gr. ablu tionem ad constituendum Sacramen tum, velut compositum morale. Non tamen ad quodlibet Sacramentum requiruntur res & verba propriè, ut suo loco.

*An materia & Forma constituent Sa-  
cramenta intrinsecè?*

Sic constituunt consistentia in usu: quia Sacramentum verè constituunt in esse tali, seu morali; sicut materia & forma physica compositum in esse phy sico. Sola Eucharistia non componitur intrin secè ex materia & forma: quia his transeunti bus, ipsa permanet.

*An liceat materiam & formam mutare  
aut separare?*

Non licet: quia materiã & formã substantia liter mutatis, aut moraliter non conjunctis, nullum efficitur Sacramentum. T T. Omnes.

**COROLLARIA CASUUM.**

Coroll. 1. Mutus nullum potest ministrare Sa-  
cramentum, nisi matrimonium; quia hoc utpote  
con-

contractus, perfici potest signis; cetera perfici debent  
verbo strictè dicto.

Coroll. 2. Sacrilegium committit, qui materiam vel formam adhibet dubiam aut probabilem; quia Sacramentum exponit periculo nullitatis. Item qui super eandem materiam repetit formam; Secus, si præ anxietate unum vel alterum verbum. Excusatur uterque, si fiat in necessitate sub conditione. Boscio ex communi.

Coroll. 3. Valet Sacramentum, si mutatio materiæ aut formæ sit accidentalis, ut 1. Si in forma mutetur idioma vel ex toto vel ex parte. 2. Si verba mutantur in Synonyma. 3. Si transponantur, aliqua addantur, aut subtrahantur, manente eodem substantialiter sensu. 4. Si forma parum interrumpatur, v. gr. per Sternutationem. 5. Si error committatur Grammaticalis. Ratio omnium: quia manent quoad substantiam materia & forma. Mutatio accidentalis peccatum est vel M. vel V. pro mutationis qualitate, substantialis verò est peccatum semper M. quia invalidum reddit Sacramentum.

Coroll. 4. Peccat M. qui Baptizans priùs abluvit, postea pronunciat formam, vel è contra: quia Baptismus dubius, imo invalidus juxta Cajet. Navarr. applicantes hoc ipsum Sacramentis Confirmationis, Ordinis & extremæ Unctionis. In poenitentia differri potest absolutio, sicut in aliis Judiciis; In matrimonio, sicut in contractibus, consensus unius tamdiu sequi potest sensen-

sentum alterius, quamdiu hic moraliter permanere censetur.

### CAPUT III.

#### De Sacramentorum Ministro.

*Quis sit Sacramentorum Minister?*

**S**acramentorum Minister regulariter est solus homo viator. D. Th. p. 3. q. 64. non quilibet omnium. *Trid. Sess. 7. can. 10.* & patet in Sacramento Eucharistiæ & Poenitentiae.

*Quid requiratur, ut validè & licitè ministret?*

Ut validè ministret, requiritur in eo intentio saltem virtualis faciendi, quod facit Ecclesia, non verò fides. *Trid. citat. c. 11.* Intentio autem virtualis est actualis, physice præterita, in Actibus ab ea procedentibus virtualiter permanens. Ut licitè ministret, requiritur ex parte Ministri consecrati status gratiæ; ex parte subiecti dignitas, nisi indignitas sit nota ex confessione, vel occulta, & Sacramentum peratur publicè. *Rituale Roman.*

#### COROLLARIA CASUUM.

*Coroll. 1.* Invalidè administratur Sacramentum 1. A puero, amente, ebrio, etiamsi hic ante ebrietatem habuerit voluntatem administrandi: quia administratio debet esse actus humanus, adeoque ab habente usum rationis. Validè tamen in ebrie-



ebrietate vel amentia recipit Baptismum, qui antea petuit *c. maj. de Bapt.* 2. A non ordinato, præterquam Baptismus & Matrimonium. 3. Ab habente intentionis formaliter contrarias: ut si velit baptizare, non autem conficere Sacramentum, Bosco. 4. Si intentio sit retractata, vel per actiones impertinentes interrupta: tunc enim nec adest virtualis. 5. Si intentio non versetur circa determinatam personam vel materiam; Sufficit tamen, eam dirigi ad materiam vel personam præsentem, quæcunque sit in individuo; & sic valide absolvit, qui poenitentem putat esse virum, cum sit femina; Petrum, cum sit Paulus. Becan. cum *commun*

*Coroll. 2.* Valide conficitur Sacramentum

1. A distracto: quia cum distractione stat intentio virtualis. 2. Sub conditione ac præterito vel præsentem, conditione subsistente; solum matrimonium, etiam sub conditione de futuro: quia consensus in hoc moraliter manet, donec ponatur conditio. 3. A Baptizante, qui intendit facere, non quod Ecclesia facit Romana, sed quod Calvinistica, putans hanc esse veram: vult enim re ipsa, quod Romana. 4. Ab excommunicato, depolito vel degradato; excipe Sacramentum poenitentiae, nisi poenitens sit in articulo mortis: quia ad hoc Sacramentum requiritur potestas jurisdictionis, quam amittunt; ad alia sufficit potestas Ordinis, quam retinent.

*Coroll. 3.* Valide sed sacrilegè operantur, si existant in peccato M. 1. Episcopus confirmandus & or-

& ordinans. 2. Sacerdos baptizans, consecrans, absolvens & inungens. 3. Probabiliter Diaconus distribuens Eucharistiam vel solemniter baptizans, Sporer n. 172. Et quidem tot numero committunt sacrilegia, quot administrant Sacramenta, interruptis talem moraliter ministeriis. *Commun. TT.* Indignè distribuens Eucharistiam unicui committit peccatum, quando una est moraliter distributio; idèmq; de ministro pœnitentia plures successivè absolvente sentit Sporer num. 175. contra varios. Sed

Quid facient præfati, ut dignè ministrent? *xx.* Celebraturus obligatur ad Confessionem ex *Trid. Sess. 13. c. 7.* nisi desit copia confessarii, & necessitas postulet celebrare: tunc enim sufficit elicere contritionem cum proposito proximè confitendi. Aliud Sacramentum administraturus tenetur vel confiteri, quod consultius, vel perfectam elicere contritionem: quia sic ponitur i: *statu gratia.*

*Coroll. 4.* Non operantur sacrilegè, quavis sint in statu peccati: 1. Episcopus consecrans Templum, calicem &c. 2. Diaconus & Subd. ministrantes in ordinibus suis. 3. Laicus baptizans; oppositum tamen docent Vasq. & nonnulli. 4. Contrahens matrimonium, ut minister. 5. Parochus coniungens matrimonio. *Commun.* quia non conficit Sacramentum, sed contrahentes.

*Coroll. 5.* Cooperatur formaliter peccato, qui Eucharistiam dat peccatori occultè petenti, vel publicè.

publicè perenti hostiam non consecratam, tamen ex conventionē: quia potest & debet negare; Pœnitente tamen indisposito, fingere oportet absolutionem, dando benedictionem; ne indispositio eius innotescat circumstantibus. Sbo-  
gar. 2. Qui indigno administrat aliquod Sacramentum: est enim causa sacrilegii, saltem externi; excipe contrahentem matrimonio cum existente in peccato: quia ad eum non pertinet, recognoscere de gratia & dispositione alterius contrahentis.

## CAPUT IV.

### De Sacramentorum subjecto.

*Quis possit suscipere Sacramentum?*

**S**olus homo viator capax est Sacramenti suscipiendi, non quilibet cuiuslibet. Gob. num. 225. quia Sacramenta sunt instituta pro hominibus, non tamen omnia pro quolibet, ut patet in non baptizato & foemina.

*Quid requiratur, ut validè & licitè suscipiat?*

Ut validè suscipiat: requiritur in adulto rationis compote intentio saltem habitualis; quæ est intentio actualis actu & virtute præterita, sed non revocata. Ut licitè suscipiat: requiritur in suscipiente Sacramentum vivorum status gratiæ, qui pro Eucharistia obtinendus per Confessionem, Trid. citat. pro aliis per Confessionem vel contritionem. Layman.

COROL.

## COROLLARIA CASUUM.

*Coroll. 1.* Parvuli & perpetuò amentes validè recipiunt Baptismum, Confirmationem, Eucharistiam, & probabiliter Ordinem. *Cur non? intentio non requiritur.*

*Coroll. 2.* Invalidè Sacramentum recipit adultus: 1. Qui habet voluntatem non recipiendi. 2. Qui nullâ ratione unquam pervenit. 3. Qui se habet tantum negativè: quia non adest intentio.

*Coroll. 3.* Validè verò recipit: 1. Qui in Sacramentum consentit ex metu, aliàs non consensurus. 2. Moribundus, qui Sacramenta non petit, nisi implicite, Christianè vivendo. 3. Judæus morituriens baptizatur validè, tametsi priùs contradixerit; dummodo habeat attritionem & propositum servandi necessaria ad Beatitudinem, Gobit *Tr. 1. sect. 6.* quia in omnibus illis sufficiens adest intentio.

*Coroll. 4.* Illicite Sacramentum suscipit: 1. Qui cum obice, idque quoad Sacramenta vivorum est peccatum M. 2. Qui petit à Ministro indignè ministraturo; excipe casum necessitatis & magnæ utilitatis; imò in necessitate extrema licitum est saltem Baptismum, Absolutionem, & probabiliter viaticum petere à Ministro, aliàs non tolerato Navarr.

CAPUT

## CAPUT V.

## De Effectu Gratiae.

*Quid Gratia habitualis prima, & quid  
secunda?*

**Q**uid Gratia sit, quod habitualis & actualis, vid. *supra* Tractat. de Grat. c. 1. Habitualis prima dicitur, quæ infunditur homini nullam gratiam sanctificantem habenti; Secunda verò dicitur, quæ confertur homini in gratia jam existenti.

*Quæ dicantur & sint Sacramenta mortuorum, & quæ vivorum?*

Sacramenta mortuorum dicuntur, quæ suscipi possunt à peccatore, utpote spiritualiter mortuo; & sunt Baptismus & Pœnitentia. Vivorum dicuntur, quæ petunt suscipi in statu gratiæ; & sunt Confirmatio, Eucharistia, Extrema Unctio &c.

*An & unde Sacramenta conferant gratiam?*

Sacramenta non ponentibus obicem conferunt gratiam ex opere operato, hoc est, vi institutionis & mentorum Christi. *Trident. Sess. 7. can. 5.*

*Quam conferant gratiam?*

Baptismus & Pœnitentia conferunt per se gratiam habitualement prima; per accidens conferunt secundam; omnia æqualiter dispositis æqualem, inæqualiter dispositis inæqualem, omnibus



nibus insuper suo tempore gratias actuales, nimirum auxilia divina ad finem, cuique Sacramento proprium vel obtinendum, vel conservandum: Sic Baptismus confert gratiam ad Christianè vivendum, Confirmatio ad resistendum tentationibus contra fidem, *ex communi.*

*Coroll.* Qui invincibiliter ignorans, se esse in peccato, vel erroneè putans se absolutum, cum attritione accedit ad Eucharistiam; aut cum contritione putata, quæ tamen attritio, ad aliud Sacramentum vivorum, accipit per accidens gratiam primam & justificatur. *DD. communiter.* quia talis, quantum potuit & nunc debuit, removet obicem; estque dispositus ad gratiam accipiendam. E contra Sacramenta mortuorum per accidens conferunt gratiam secundam, si nempe accedens acceperit gratiam primam per contritionem.

## CAPUT VI.

### De Sacramentorum Reviviscentia.

*Quid sit Sacramentum reviviscere?*

**E**st conferre effectum gratiæ, quem in actuali sui susceptione non contulit propter indispositionem susipientis.

*Quenam Sacramenta reviviscant?*

Baptismus validè sine effectû susceptus, ad eum reviviscit sublato obice. S. Aug. *l. 1. de Bapt. c. 12.* Idem probabilius est de Confirmatione,

tionem, Ordinem, extrema Unctione & Matrimonio, S. Bonav. quia congruit bonitate Dei, ut si Sacramentum non iterabile sit receptum sine fructu, postea ablato obice homo percipiat fructum ejus, alias nunquam eum, qui tamen necessarius, percepturus.

*Quando Sacramentum suscipiatur cum obice?*

Suscipitur Sacramentum cum obice & quidem positivo, quando suscipiens scit, se ad effectum Sacramenti esse indispositum; cum negativo, quando putat se dispositum & non est.

*Coroll.* In peccato M. confirmatus, ordinatus &c. Si contritus fuerit vel absolutus, consequitur gratiam Confirmationis, Ordinis &c.

## CAPUT VII.

### De Characterem.

*Quæ Sacramenta imprimant Characterem, quid sit, & efficiat?*

**B**aptismus, Confirmatio & Ordo in anima imprimunt Characterem, hoc est, signum spirituale & indelebile; unde nequeunt iterari. *Trid. Sess. 7. can. 9.*


### COROLLARIA CASUUM.

*Coroll. 1.* Ista Sacramenta etiam sacrilegè, sed validè suscepta, imprimunt Characterem; huius enim non datur obex: quia non est gratia san-

*ificans, sed solum signum Sacramenti suscepti cum peccato mortali compatibile.*

*Coroll. 2.* Sacrilegium est, iterare Baptismum, Confirmationem vel Ordinem. In dubio tamen de Baptismi vel Sacerdotii valore, iterari debent sub conditione.

*Coroll. 3.* Sacerdos resuscitatus ad vitam mortalem non esset denuò ordinandus; Conjuges verò resuscitati, non essent conjuges sine novo matrimonio, *Sporer num. 64.* nam horum vinculum manet tantum usque ad mortem, istius Character semper.



## TRACTATUS XVIII.

### De Baptismo.

#### CAPUT I.

#### De ejus Quidditate & Materia.

##### *Quid Baptismus?*

**B**aptismus est Sacramentum Regenerationis per aquam in verbo vitæ. *Catech. Rom.* Sic breviter exprimitur effectus ejus, materia & forma.

##### *Quæ materia Baptismi?*

Materia ejus remota est aqua vera & naturalis. *Trid. in Sess. 7. can. 2.* sumitur ex *Joan. 3.* Nisi quis

quis renatus fuerit ex aqua &c. Materia proxima est ablutio consistens formaliter in fluxu aquæ supra corpus baptizandi, factio à baptizante. Scot. 4. d. 3. q. 3. quia materia proxima est applicatio remota; hæc autem in Baptismo est ablutio.

### COROLLARIA CASUUM.

*Coroll. 1.* Valet Baptismus in aqua marina, pluviali, fontana, sive dulcis sive salsa. Item in aqua resoluta ex nive, glacie, granidine. Item in aqua adhærente fenestris: quia sunt aqua naturalis.

*Coroll. 2.* Non valet Baptismus: 1. In aqua artificiali, quæ ex floribus vel herbis distillatur. 2. In humoribus naturalibus, quales sunt sputa, sudores, lacrymæ, sanguis; item succi arborum. 3. In mixtis, ut vino, lacte, oleo. Beccan. quia non sunt aqua naturalis.

*Coroll. 3.* Dubius est Baptismus in iusculo vel cerevisia tenui, lixivio, aqua resoluta ex sale; item juxta aliquos in aqua ex arboribus, & herbis, sive defluente sive distillata, quia sunt materia dubia. Hæc in necessitate debet adhiberi sub conditione, & taliter baptizatus habitâ materiâ certâ est sub conditione rebaptizandus.

*Coroll. 4.* Nullus est Baptismus: 1. Si aqua tantum attingat vestes baptizandi. 2. Si quis unâ vel alterâ guttâ aspergatur, eaque sistat & non defluat: quia non est lotio. 3. Si unus proferat formam & alter abluat: quia falsificatur forma.

*Coroll. 5.* Dubius est Baptismus ob probabilem utrimque sententiam : 1. Si tantum abluta sit pars minus principalis, v. gr. manus vel pes; aut tantum capilli sint tincti. 2. Si infans adhuc involutus sit secundinæ. 3. Si abluatur adhuc existens in utero, nondum natus. In praxi ablui debet caput trinâ aquæ Baptismalis affusione. *Agenda.*

## CAPUT II.

### De Forma Baptismi.

*Quæ sit Forma Baptismi, & quæ verba essentialia, sive necessitate Sacramenti exprimienda ?*

**F**ORMA apud Latinos est : Ego te baptizo in nomine Patris &c. apud Græcos : Baptizetur talis Servus Christi in nomine Patris &c. Concil. Flor. In utraque exprimi debent necessitate Sacramenti : 1. Persona baptizantis saltem implicite : quia ablutio fieri debet à pronunciante formam, ergo is aliquo modo exprimi. 2. Persona baptizandi per Pronomen Te, vel æquivalens : quia exprimi debet, quis baptizetur; Sicut in Pœnitentia, quis absolatur. 3. Actio baptizantis per verbum Baptizo vel Synonymum : patet ex hac proposit. damnata ab Alexandro VIII. Valuit aliquando Baptismus sub hac forma collatus : in nomine Patris . . . omittis verbis : Ego te baptizo. 4. Unitas Divinæ Naturæ per voces : in nomine. 5. Trinitas Personarum sub propriis nominibus Patris & Filii & Spiritus



*Spiritus Sancti* ; quia Baptismus est Sacramentum fidei, adeoque præcipuum fidei objectum clarè in eo exprimendum.

### COROLLARIA CASUUM.

*Coroll. 1.* Invalidus est Baptismus sub his formis : 1. Christus te baptizat. 2. Ego te baptizo in nominibus &c. 3. Ego te baptizo in nomine Christi. Sub hac tamen ultima valuissè in principio Ecclesiæ censent DD. nostri *Seraph. & Subrilus cum Angelico q. 66. a. 6.* imo an hodie valeat, indecitem relinquit Sannig. d. 2. q. 9.

*Coroll. 2.* Dubius est Baptismus sub his formis : 1. Te baptizo nomine Patris &c. 2. In nomine Genitoris &c. 3. In nomine Patris, in nomine Filii, & in nomine Spiritus Sancti. Valet Baptismus, si ter reperatur forma tota cum triplici affusione ; Sed secunda repetitio est iteratio Baptismi & sacrilega.

### CAPUT III.

#### De Ministro.

*Quis baptizet validè ? quis licitè ?*

**V**alidè baptizat, adhibitis adhibendis, omnis homo ratione utens ; licitè extra casum necessitatis solus Sacerdos, habens Jurisdictionem, & ex commissione Diaconus ; in casu autem necessitatis omnis, qui potest validè, baptizat licitè ; servandus tamen est ordo : ita ut cæteris paribus Clericus præcedat Laicum,

vir mulierem, fidelis infidelem. *Commun. ex Flor.* quod in Decreto *Unionis* de Armenis ita habet: in casu necessitatis non solum Sacerdos vel Diaconus, sed etiam Laicus vel mulier, imò etiam paganus & hæreticus baptizare potest. Ratio est: quia postulat maxima Baptismi necessitas.

*Coroll.* Illicite baptizat, quamvis valide:  
 1. Parochus sine licentia infantem alterius Parochiæ. 2. Baptizans extra Ecclesiam, exceptis Regum & Principum liberis. *Hen. ex Concil. Vien.*  
 3. Pater extra necessitatem baptizans vel suscipiens prolem propriam. *c. dictum. 30. q. 1.* qui & privatur jure petendi debitum, ut docet Sanchez excusat Marchant. si interveniat ignorantia Juris aut facti. 4. Unus extra necessitatem baptizans simul plures, & plures simul baptizantes unum. *Scor. d. 6. q. 2.* 5. Laicus baptizans præsentente Sacerdote, quamvis cedente, & probabiliter etiam præsentente Diacono. In reliquis inversio ordinis non est mortalis, imò per accidens licita: ut si obstetrix præferatur Patri vel viro rudi, aliquando etiam docto, dum non decet hunc ad parientem ingredi.

## CAPUT IV.

### De Subjecto Baptismi.

*Quodnam Subjectum Baptismi?*

**B**aptismi subjectum est omnis homo viator, nondum baptizatus; patet ex verbis Christi

Iti ad Apost. Marci 16. *Prædicate Evangelium omni creatura, baptizantes eos &c.*

*Quid in eo requiratur ?*

In adulto ad effectum Baptismi requiritur fides actualis, *Altorum 8.* Et si in peccato sit personali M. actualis poenitentia, saltem attritio, *ex Trid. Sess. 14. c. 1.* Unde adultus, qui non credit, volens tamen baptizari, vel de peccatis non dolet, baptizatur quidem valide, sed absque fructu.

COROLLARIA CASUUM.

*Coroll. 1.* Valide & licite baptizantur: 1.

Parvuli & perpetuò amentes, *Trid. Sess. 7.*

2. Abortus dans signa respirationis.

3. Proles infidelium in articulo mortis, vel si unus Parentum aut proles ipsa perat. *Commun.* imò etiam extra articulum mortis & sine consensu Parentum; quia nec Baptismo formalis fit irreverentia, nec proli injuria; sit, quod fortè non vivet Christianè, cui nocet? *Arctinus.*

*Coroll. 2.* Baptizari debent sub conditione:

1. Infans, de cuius vita, & monstrum, de cuius humanitate dubitatur. 2. Puer nondum

natus, si possit in se ablui. 3. Expositivus sine certo indicio, quod sit Baptizatus. 4.

Baptizatus in necessitate; Si de Baptismi valore ullum oriatur dubium.

## CAPUT V.

## De Baptismi necessitate.

*Quid Baptismus Fluminis, Flaminis,  
& Sanguinis?*

**B**aptismus fluminis seu aquæ est descriptus <sup>supra c. 1.</sup> Baptismus fluminis est Baptismus fluminis in voto cum contritione. Baptismus sanguinis est Martyrium cum voto saltem implicito Baptismi flaminis.

*An & qualiter Baptismus Fluminis  
necessarius?*

Baptismus fluminis est ad salutem necessarius, de Fide; & quidem necessitate medicinali parvulis extra casum Martyrii in re, adultis in re vel in voto. Commun. Ex illo Joan. 3. *Nisi quis renatus fuerit &c.*

## COROLLARIA CASUUM.

Coroll. 1. Delinquant M. 1. Parentes, non procurantes aut diu differentes, proles suas baptizari. Quod si mater sit vicina morti, non potest nisi post mortem excindi infans & baptizari. Bagan. ex D. Thom. quia infantem non licet directè occidere, ut eveniat bonum. 2. Adultus Baptismum differens sine causa.

Coroll. 2. Baptismus flaminis sive contritio cum voto Baptismi & sanguinis sive Martyrium, supplere possunt effectum gratiæ Baptismi fluminis, & quidem Martyrium ex opere operato, quod

quod in adulto mortaliter lapso requirit salutem attritionem per modum dispositionis. Beccan. c. 11. Quia contritio perfecta justificat, ut docet *Trid. Sess. 14. c. 4.* Item justificat Martyrium, ut colligitur ex Festo Ss. Innocentium pro Christo occisorum, quorum multi, qui nondum erant circumcisi, non aliter quàm per Martyrium sunt justificati.

## CAPUT VI.

## De Effectibus Baptismi.

*Qui sint Effectus Baptismi?*

**E**ffectus Baptismi sunt 1. Gratia sanctificans cum habitibus fidei, spei & charitatis. 2. Remissio culpæ tum originalis, tum actualis ante commissæ. 3. Remissio totius pœnæ. 4. Character. 5. Subjectio in Ecclesia. *de Fide ex Concil. Flor. in Decreto Eugenii. & Trid. Sess. 5. can. 5.* Manent tamen in baptizatis pœnalitates, nempe passio corporis, dolores, agritudines &c. quæ non immediatè ex peccato, sed ex ipsa natura corrupta post amissam justitiam originalem sequuntur.

*Coroll.* Ecclesiæ præcepta observare tenentur quicumque Baptizati, sive Orthodoxi sint, sive hæretici. *Trid. Sess. 7. de Bapt.* Unde hæretici formales peccant, transgrediendo præcepta vel præceptum Ecclesiæ.

## CAPUT



## CAPUT VII.

## De Patrinis.

*Quis Patrinus ?*

**E**st ille, qui Baptizatum tenet vel levat de fonte baptismali, eumque suscipit Christianè instruendum.

*An necessarius ?*

In Baptismo solemni adhibendus est Patrinus; sufficit unus, quamvis possint esse unus & una, nempe Patrinus & Matrina, non plures. *Trident. Sess. 24. c. 2.*

*Inter quos Cognatio spiritualis ex Baptismo ?*

Patrini, sicut & Baptizans contrahunt cognationem spiritualem cum baptizato, ejusque Parentibus, & hi cum illis; non autem Patrini inter se, neque cum baptizante. *Trident. citat.*

## COROLLARIA CASUUM.

*Coroll. 1.* Ut quispiam sit validè Patrinus, requiritur 1. Ufus Rationis. 2. Animus obcundi munus Patrini. 3. Ut sit baptizatus. 4. Ut sit designatus à Parentibus, vel his deficientibus à Parocho, *Trident. citat.* 5. Ut in ipso Baptismo baptizatum teneat, vel tangat, vel de manu baptizantis immediatè suscipiat sive per se, sive per Procuratorem Communis.

*Coroll. 2.*

Coroll. 2. Validè sed illicitè est Patrinus

1. Incapax instruendi baptizatum. 2. Hæreticus aut moribus infamis ; licitè tamen Catholicus suscipit prolem hæretici. Catholicum admittit spes prolem , quæ baptizatur, convertendi ; hæreticum arceri periculum , eam pervertendi ; In Germania tamen consuetudo hinc inde obtinet contrarium. 3. Monachi & Sanctimoniales , *c. non licet. d. 4. de Conf. excipit Glossa in caput : Statutum. 18. q. 1.* Religiosos Episcopos , & consuetudo , ubi viget , Abbates.

Coroll. 3. Peccant M. 1. Parochus solemniter baptizans , non adhibito Patrino 2. Parochus plures admittens Patrinos , quàm unum & unam ; illi tamen plures , si designati , contrahunt cognationem spirituales. Henno *ex Declar. Card.* 3. Admittens duos Patrinos ejusdem sexûs, Bonac. contra Sanch. 4. Patrinus Filiastrum non instruens in fide & moribus , nisi suppleatur ab aliis. 5. Patrinus fornicans cum prole suscepta , qui committit incestum ; idemque est de aliis , inter quos Cognatio spiritualis.

Coroll. 4. Cognationem spirituales contrahit baptizans etiam in necessitate , Gob. *num. 578.* non verò in necessitate suscipiens , aut quando suppleantur Cæremoniæ. Sanchez apud Herinx *d. 7. q. 31.*

TRA-

## TRACTATUS XIX.

## De Confirmatione.

## CAPUT I.

## De ejus Quidditate, Materia, &amp; Forma.

*Quid Confirmatio?*

**C**onfirmatio est Sacramentum, probabilius in Coena Domini institutum, quo baptizatus inungitur in fronte unctione Chrismatis sub præscripta verborum forma ad fidei robur consequendum. Scot. 4. d. 7. q. 1. Esse Sacramentum, est de fide in *Trid. Sess. 7. can. 1.* & sumitur ex illo *Añor. 8.* Tunc imponebant manus super illos & accipiebant Spiritum Sanctum.

*Quæ materia ejus & forma?*

Materia remota est sacrum Chrisma ex oleo olivarum & balsamo, ab Episcopo benedictum; Proxima est unctio in fronte in formam crucis facta pollice confirmantis. Forma in Ecclesia latina hæc est: Signo te signo crucis & confirmo te Chrismate Salutis in nomine Patris &c. *ex Florentino.*

*Coroll.* Non conficitur Sacramentum: 1. Si non adhibeatur Chrisma. Apostolos ramen hoc Sacramentum sine Chrismate per nudam manuum impositionem contulisse ex dispensatione Christi admittit D. Bon. 2. Si Chrisma non

non sit benedictum. An verò sufficiat esse benedictum à Presbytero ex commissione Papæ, multi cum Scoto affirmant, multi negant. 3. Si Unctio non fiat in fronte : quia sic sentiunt P. P. in fronte enim sedes est verecundiæ ad confitendum fidem ; vel non fiat in modum crucis : quia non verificaretur forma ; vel non fiat pollice aut saltem alio digito : quia non adesset manus impositio, qua fit Chrismatione.

## CAPUT II.

## De Ministro &amp; Subjecto.

*Quis Minister Confirmationis ?*

**M**inister ordinarius Confirmationis est solus Episcopus, de fide ex *Trid. Sess. 7. can. 3.* Extraordinarius ex commissione solus Pontifex est quivis Sacerdos, colligitur ex *Trid. citat.*

*Quodnam Subjectum ejus ?*

Subjectum est omnis homo baptizatus, nondum confirmatus ; etiam infans. Habere debet Patrinum vel Matrinam. *c. 100. d. 4. de Conf.*

## COROLLARIA CASUUM.

*Coroll. 1.* Episcopus illicitè confirmat : 1. In aliena diœcesi, etiam sibi subditos, *Trid. Sess. 6. c. 5.* 2. In propria diœcesi subditos alterius Episcopi sine hujus licentia, sufficit tamen præsumpta.

*Coroll. 2.*

*Coroll. 2.* Invalide confirmatur, qui nondum baptizatus, vel jam confirmatus: quia Baptismus est Sacramentorum janua, & Confirmatio nequit iterari; illicitè verò confirmatur: 1. Existens in peccato M. 2. Non habens Patrinum; exculat tamen difficultas nanciscendi, Gobat. num. 780. Infantes ante sepennium confirmari non expedit, ut docet Catechismus Concil. Trident. nisi per accidens: quando Episcopus rarò confirmat in tali loco, vel quando talis viget usus.

*Coroll. 3.* Circa confirmandi Patrinum præter dicta de Patrinis in Baptismo requiritur 1. Ut sit unus vel una, c. fin. de cogn. Spir. in 6to. tutò admitti unum & unam conformiter Baptismo censet Gobat. 2. Ut sit confirmatus. Pontif. Rom. 3. Ut sit distinctus à Patrino Baptismi, saltem extra necessitatem, c. in Catech. d. 4. de Conf. 4. Ut non sit monachus, c. placuit. 6. q. 1. nisi confirmandus sit monachus.

### CAPUT III.

#### De Confirmationis Effectibus & Necessitate.

*Qui sint Confirmationis Effectus?*

**E**ffectus sunt 1. Gratia tum habitualis magis sanctificans, tum actualis confortans in fide. Con. Flor. 2. Character. De fide. 3. Cognatio spiritualis, quæ est ex Constitutione Ecclesiæ, aut confirmantem & confirmatum, illiusque



que Patrem & Matrem ac tenentem non egreditur. *Trident. Sess. 24. c. 2.*

*An Confirmatio ad salutem necessaria?*

Confirmatio non est ad salutem necessaria necessitate medii, neque per se præceptum: quia præceptum non extat; & sine ea homo etiam adultus justificari, iustus esse, & mori potest.

*Coroll.* Peccat M. hoc Sacramentum reipsoens vel ex contemptu, vel cum gravi scandalo; item omittens cum periculo peccandi graviter contra fidem. Gobat. num. 771. quia nec contemnere, nec scandalum dare, nec periculo contra fidem sese committere licet.

\*\*\*\*\*

## TRACTATUS XX.

### De Venerabili Sacramento

#### Eucharistiæ.

#### CAPUT I.

#### De ejus Natura.

*Quid sit Sacramentum Eucharistiæ?*

**E**ucharistia est Sacramentum Corporis & Sanguinis Christi sub speciebus Panis & Vini consecratis. ex S. Bon. d. 8. q. 2. Institutum est à Christo in ultima coena, Lunâ 14. Martii ad vesperam. *Marc. 14.* prout signum

T

est

est gratiæ substantialis nempe Corporis & Sanguinis Christi, consistit in solis speciebus; ut verò signum gratiæ sanctificantis, consistit in Christi Corpore & speciebus. Scot. 4. d. 8. q. 1. Quia species solæ significant Corpus & Sanguinem Christi, non solæ causant gratiam Sacramenti. Unde Innocent. III. ait c. cum Martha. Christi Corpus esse rem Sacramenti respectu specierum, & Sacramentum respectu gratiæ.

*An Eucharistia sub duplici specie duplex  
Sacramentum?*

Eucharistia sub duplici specie, si spectetur physicè, est duplex specie Sacramentum; si moraliter ut spirituale convivium, est unum. Scot. citat. quia Eucharistia sub duplici specie nempe Panis & Vini confecta importat diversas materias, diversas formas & diversa directè significata; ergo diversa physicè & materialiter sunt Sacramenta. Moraliter verò, sicut cibus & potus, sunt unum spirituale convivium, est unum simpliciter Sacramentum.

*Coroll.* Eucharistia non est Sacramentum tantum in usu, de fide ex Trident. quia Corpus & Sanguis Christi in Eucharistia ponuntur vi verborum consecrationis; ergo illis prolatis adsunt, aut certè verba sunt falsa, utpote dicentia, esse Corpus, & non est. Item ante usum & manducationem dixit Christus: hoc est Corpus meum, ergo fuit, & nunc est.

CAPUT

## CAPUT II.

### De Reali Præsentia.

#### *Quid sit in Eucharistia?*

**S**ub speciebus panis & vini consecratis realiter continetur Corpus & Sanguis Christi unâ cum anima & Divinitate. *De Fide*, & quidem sub singulis cujusque speciei partibus tum ante divisionem, ut docent *commun. TT.* Quia Christus in Hostia est definitivè; totus in tota, & totus in qualibet parte; tum post divisionem, ut definit *Trid. Sess. 13. can. 3.*

#### *Quid sub speciebus Panis? & quid sub speciebus Vini?*

Sub speciebus Panis vi verborum ponitur solum Corpus: *quia hoc solum verba significant.* Sanguis verò, anima & Divinitas per concomitantiam; *quia Corpori connectuntur.* Sub speciebus vini vi verborum ponitur solus sanguis, reliqua similiter per concomitantiam. Ratio eadem.

### COROLLARIA CASUUM.

*Coroll. 1.* In consecratione fit conversio totius substantiæ panis in Corpus Christi & totius substantiæ vini in Sanguinem, manentibus duntaxat panis & vini speciebus; quam conversionem Ecclesia appellat Transubstantiationem. *Trident. citat. c. 2.*

*Coroll. 2.* Per Transubstantiationem non producit corpus Christi; sed tantum, substantiâ panis & vini desinente, adducitur præsens: quia

non destruitur, quando destruuntur species; ergo nec produciitur, quando consecrantur, sed sufficit adduci.

*Coroll. 3.* Christus in Eucharistia omnem habet quantitatem, non tamen ejus modum sive extensionem localem; nequit ibidem alterari & pati, neque videri oculo corporeo: quia corpus ibi definitivè & indivisibiliter positum, quod impassibile & non emittit species.

### CAPUT III.

#### De Materia Eucharistiæ.

*Quæ Materia Eucharistiæ?*

**M**ateria Eucharistiæ est panis triticeus, & vinum de vite: iste ad consecrandum Corpus Christi, hoc ad consecrandum sanguinem, *de Fide ex Flor.*

*An vino miscenda aqua, eaque convertatur in sanguinem?*

Vino consecrando necessitate præcepti Ecclesiastici admiscenda est in calice modicissima aqua. *Trident. Sess. 22. c. 3.* quæ convertitur in sanguinem mediatè, scilicet facta vinum. Ratio: quia hoc solum est materia calicis. D. Thom. Scot. & utriusque Schola.

*An & quando materia consecranda debeat esse determinata & præsens?*

Materia per intentionem consecrantis debet esse determinata, sensu perceptibilis & morali-

ter præiens : quia pronomina *Hoc* & *Hic* significant materiam determinatam, demonstrabilem & præsentem.

### COROLLARIA CASUUM.

*Coroll. 1.* Materia insufficiens sunt : 1. Panis ex hordeo, avena, fabis &c. sive solis, sive tritico abundè admixtis. 2. Panis ex farina triticea, & lacte vel oleo, butyro, aut simili liquore aquæ, si affusa, prædominante : quia non est usualis. 3. Panis corruptus, placenta, torta, pulmentum &c. *Commun.* Panis ex sili-gine vel speltra est materia dubia.

*Coroll. 2.* Quamvis materia sit valida, est tamen prohibita Græcis, panis azymus, Latinis fermentatus, in *Concil. Flor.* etiam ad dandum morituro viaticum. *Commun. contra Bosco.* Peregrinantes tamen se conformare possunt Ecclesiæ, in qua sunt, vel propriæ morem retinere Herinx.

*Coroll. 3.* Non sunt materia calicis : 1. Sicerca, cerevisia, succus ex pyris, aliisque fructibus. 2. Omphacium sive liquor ex uvis immaturis. 3. Lora sive aqua affusa racemis expressis. 4. Accutum. *Commun.* quia non sunt vinum. 5. Vinum in rane imbibitum, *Sporer num. 154.* quia in eo statu non habet rationem potûs.

*Coroll. 4.* Sunt materia illicita : 1. Vinum congelatum. 2. Aromatibus immodicè conditum : quia *consecratio dubia.* 3. Vinum acescens, item mustum ex uvis maturis. *Sporer citat.*



nisi excuset necessitas, aut pro musto in aliquo festo consuetudo.

*Coroll. 5.* Consecratio est invalida : 1. Si celebrans ex cumulo Hostiarum intendat consecrare decem, non determinatas; aliud est, si putans esse decem, cum sint 12. velit consecrare materiam præsentem. 2. Si Hostiæ sint appositæ, incio Sacerdote. 3. Si sint in Sacrario clauso, sub Corporali vel pede calicis; Valida tamen est juxta Tambur. dubia juxta de Lugo.

*Coroll. 6.* Consecratio est illicita : 1. Si celebrans consecret guttas calici adhærentes. 2. Si consecret in vase non sacro. 3. Si Hostiæ sint allatæ post Offertorium; in casu, quo cœnites essent dimittendi sine communione, sufficit eas adferri ante consecrationem. Gobat. num. 85.

## CAPUT IV.

### De Consecratione utriusque Materiæ.

*An liceat consecrare sub una specie?*

**C**onsecratio utriusque materiæ non est de necessitate Sacramenti; unde enim essentialis dependentia unius consecrationis ab altera? Sed de necessitate præcepti tum Divini. Luc. 22. tum Ecclesiastici, c. comperimus. d. 2. de consecras.

COROL-

**COROLLARIA CASUUM.**

*Coroll. 1.* Valida est consecratio Hostiæ sine consecratione calicis, sed mortaliter illicita, nisi physica vel moralis superveniat impotentia; ut si in sumptione calicis gustetur aqua, & vinum nequeat haberi, aut si celebranti immineat vitæ periculum ex ruina templi, incendio, vel incurſu hostium.

*Coroll. 2.* Celebrans post consecrationem Hostiæ advertens se non jejunum, tenetur pergere; advertens in sumptione aquam, tenetur de novo consecrare vinum, si autem non possit perficere sacrificium factus infirmus post consecrationem, substitui debet alius, qui jejunus, & in hujus defectu non jejunus. *Rubrica Missæ.*

**CAPUT V.**

**De Forma Consecrationis.**

*Quæ sit Forma Consecrationis?*

**F**orma Consecrationis est duplex; Prima Hostiæ: *Hoc est enim Corpus meum.* Secunda Calicis: *Hic est enim calix Sanguinis mei &c. de Fide.*

*Quomodo Forma Consecrationis pronuntianda?*

Pronunciari debet in Persona Christi; aliàs non significatur Corpus & Sanguis Christi, & quidem non solum recitativè, ut placuit Durando; neque solum significativè, ut contendit Vasq. sed recitativè & significativè simul & qui-

dem practicè; hoc est: ut consecrans recitet verba Christi, eisque velit efficere, quod significant. Hos autem sensus sufficientissimè habet Sacerdos, si intendat facere, quod Christus instituit & Ecclesia facit, Sporer num. 197.

### COROLLARIA CASUUM.

Coroll. 1. Consecratio est invalida: 1. Si dicatur: Hoc est Corpus Christi; quia non profertur in Persona Christi. 2. Si per pronomina HOC & HIC intelligatur substantia panis & vini: Significant enim ex Scoto d. 8. q. 2. individuum entis, quod est Corpus & Sanguis Christi. 3. Si omittatur verbum aliquod essentialia sunt: *Hic est corpus meum. Hic est calix Sanguinis mei*; quia aliquo omissio non significatur, poni Corpus & sanguinem Christi; significatur autem, omnibus & solis positus; ergo omnia illa & sola sunt essentialia.

Coroll. 2. Valida quidem, sed mortaliter illicita est Consecratio: 1. Si forma calicis mutiletur omittendo: *novi & aeterni Testamenti &c.* 2. Si unum verbum lapsius repetatur, diu post aliud proferatur; si tamen ex scrupulositate fiat à mortali excusat Gobat. 3. Si verba proferantur altâ voce, ut audiantur ad 40. passus. Gob. num. 69. Si verò audiantur ad 6. vel 8. passus, damnat peccati venialis, si à solo Ministro, nullius.

CAPUT

**CAPUT VI.**

**De Ministro Eucharistiæ.**

*Quis sit Minister Consecrationis? quis Distributionis.*

**C**onsecrationis Minister est omnis & solus Sacerdos, *de Fide.* Distributionis Minister Ordinarius est Sacerdos, habens Jurisdictionem saltem delegatam aut privilegium. *Trident. Sess. 13 c. 8.* quia Consecratio est actus Ordinis Sacerdotalis, distributio insuper actus est Pastoris.

**COROLLARIA CASUUM.**

*Coroll. 1.* Valide consecrat Sacerdos, etsi in peccato M. etsi hæreticus, suspensus, degradatus &c. quia Consecratio est actus potestatis ordinis, quam retinet. Item juxta *commun. DD.* plures Sacerdotes consecrare possunt eandem materiam, sicque probabiliter consecrant in ordinatione N. omystæ.

*Coroll. 2.* Extraordinariè ex legitima Sacerdotis commissione Eucharistiam dispensare potest Diaconus, *Concil. Carthag. IV.* In hujus & Sacerdotis defectu etiam Subdiaconum, imò & Laicum, posse tum sibi, tum aliis ministrare viaticum secluso scandalo, sententia tuta est multorum apud *Sporer num. 308.* contradicunt tamen alii cum *Vasq. & Praxis.*

*Coroll. 3.* Peccat M. 1. Sacerdos ministrans Eucharistiam sine licentia Pastoris Ordinarii,

Religiosi inluper incurrunt excommunicatio-  
nem, *Clement. Religiosi. de Priv.* 2. Parochus  
non dispensans parochianis, quando ratio-  
nabiliter petunt, etiam tempore contagionis;  
nisi petens sit absolutus, & vita Parochi plu-  
ribus, aliàs sine absolutione morituris, ne-  
cessaria.

*Coroll. 4.* Regulares in suis Ecclesiis toto  
anni tempore omnibus utriusque sexûs fide-  
libus dispensare possunt Eucharistiam *ex Privile.*  
*Nicolai V. Leonis X.* excipitur Communio Pascha-  
lis & viaticum.

*Coroll. 5.* Regulares dare possunt Com-  
munionem etiam tempore Paschali: 1. Quan-  
do habent facultatem ab Ordinario vel Paro-  
cho. 2. Quando communicans præcepto  
jam satisfecit, aut adhuc satisfactorus est, vel  
non potest in propria Ecclesia. 3. Quando  
Parochus ipse non potest dare, aut injustè  
non vult. 4. Si communicantes sint adve-  
næ, peregrini, vagi &c. Layman. *tr. 4. c. 7.*  
Similiter Regulares dare possunt Eucharistiam  
moribundis, si Parochus dare non possit,  
aut injustè nolit, vel absens præsumatur con-  
sentire. Item si ægrotus viaticum jam sump-  
serit, vel nondum in eo sit statu, ut sume-  
re teneatur; ast in hoc casu non licet Reli-  
giosis Eucharistiam publicè deferre per plateas.  
*Sporer. num. 314.*



## CAPUT VII. De Suscipientibus.

*Quis possit Eucharistiam suscipere ?*

**Q**uilibet homo baptizatus capax est Eucharistiam suscipiendi, S. Bon. d. 12. quia Eucharistia sacramentaliter & spiritualiter suscipienda in subiecto solum requirit Baptismum & statum gratiæ; unde & pueri suscipere possent, nisi arceret periculum irreverentiæ.

*Quid requiratur in suscipiente ?*

Ut dignè suscipiat, requiritur in eo ex præcepto Divino status gratiæ per Confessionem obtinendus. 1. Corinth. 11. Ex Ecclesiastico jejunium naturale à media nocte, consistens in eo, quod communicaturus omnino nihil sumpserit.

### COROLLARIA CASUUM.

*Coroll. 1.* Communicans peccat M. 1. Si existat in mortali vel excommunicatione. 2. Si non præmittat Confessionem, sciens se esse in M. Omnes. Vel de hoc dubitans; plerique contra nonnullos. 3. Si ante Communionem recorderetur peccati in Confessione obliti; idque, dum potest, non confiteatur. Commun. contra paucos.

*Coroll. 2.* Solum contritus accedit licitè, si desit Confessarius & celebrandi adsit necessitas, celebransque postea quàm primum confiteri proponat. *Trid. Sess. 13. c. 7.* Confessarius deest, si abs-

si absque gravi incommodo nequeat adiri aut advocari, vel illi, qui solus præsens, fieri confessio. Item si habeas peccatum reservatum & nullum aliud mortale, præsens autem Confessarius te non possit absolvere; *Ledesma*. Necessitas censetur urgere, quando communicandus moribundus, vel populus tenetur audire sacrum; & quoties sine scandalo vel injustitia sacrificium nequit omitti. *Commun.*

*Coroll. 3.* Non solvitur jejunium: 1. Si deglutiantur lapis, lignum, vel simile quid indigestibile; Item saliva, aut sanguis ex gingiva, non verò ex digito. 2. Si Musca, pulveres Tabaci, aqua Hungarica &c. deglutiantur cum aëre per respirationem. 3. Si quis ex lotionis oris, aut masticatione aromatum parum deglutiat per modum unius cum saliva. *Commun.*

*Coroll. 4.* A non jejunio licitè sumitur Eucharistia: 1. In articulo mortis per modum viatici; non tamen licet Sacerdoti non jejunio celebrare ad dandum viaticum, ut communis fuit sententia apud Laym. quamvis oppositum probabile censent Gobat. aliique plures. 2. Ad perficiendum sacrificium. 3. Ne Sacramentum profanetur ab hæreticis. 4. Si Sacerdos post ablutionem advertat aliquas particulas, vel alias Hostiæ à se consecratæ nequeant asservari.

*Coroll. 5.* Dubitans, utrum sit jejunus, celebrare potest; vel si Laicus, communicare; ex *communiori sententia multorum contra multos teste Sporerum. num. 474.* quia possessio stat pro dubitante.

**CAPUT**

**CAPUT VIII.**

**De Necessitate Eucharistiæ.**

*An sumptio Eucharistiæ ad Beatitudinem  
necessaria?*

**S**umptio Eucharistiæ est ad salutem necessaria, tantum necessitate præcepti, tum Divini, quod obligat omnes, sed non sub utraque specie, *Trident. Sess. 21. can. 1.* tum Ecclesiastici, quod obligat solos baptizatos, ubi ad annos discretionis pervenerint, ad recipiendum Eucharistiæ Sacramentum singulis annis, idque circa festum Paschæ. *c. omnis. de pœnit. & remiss.*

*Quos, ad quid, & quando obliget præceptum Communionis Divinum?*

Præceptum *Joan. 6. Nisi manducaveritis &c.* obligat omnes, etiam infideles: quia est universale, & suscepto Baptismate in pleri potest. Obligat ad ipsum Sacramentum, non ad modum sub utraque specie, *Tri. ent. citat. vide Controv. cap. 4. contr. 6.* obligat in articulo mortis & aliquoties in vita: quia tunc Eucharistiæ sumptio maximè est necessaria.

**COROLLARIA CASUUM.**

*Coroll. 1.* Danda est Eucharistia in articulo mortis, in Paschate, imò sæpius, semisæpius, Energumenis, surdis & mutis, Epilepticis: si non appareant indispositi & absit periculum irre-

reverentiæ. Neganda verò pueris & perpetuò amentibus, atque illi, qui in voluntaria ebrietate incurrit periculum mortis. Gobat.

*Coroll. 2.* Est P. M. 1. Si viaticum nonumat moribundus, tametsi ante octiduum communicâset, Gob. contra Tambur. 2. Si non rursus communicet, qui viaticum sumpsit sacrilegè vel post illud incidit in mortale: quia eadem urget rursus necessitas. 3. Si non communicet constitutus in periculo mortis vel præsentè vel imminente v. gr. ex partu. Gob. num. 185.

*Coroll. 3.* Peccat M. 1. Qui Communio- nem Paschalem omittit sine iusta causa, omnes; vel ex iusta; postea tamen, dum potest, non communicat per annum, communior; qui enim non sumpsit Communio- nem Paschalem adhuc tenetur ad Communio- nem annuam. 2. Qui tempore Paschali voluntariè ponit, vel quando potest, non tollit impedimentum Communio- nis Paschalis; prævenire non tenetur, nisi tempus Paschale jam inceperit; quia Communio sumpta ante tempus Paschale non est Paschalis; & qui non potest Missam audire in Dominica, non tenetur in Sabbatho. 3. Qui Communio- nem Paschalem sumit sacrilegè; i- que peccat dupliciter, non satisfaciens præcepto de ea sumenda ex Decreto Innocent. XI. & communicans sacrilegè.

# TRACTATUS XXI.

## De Sacrificio Missæ.

### CAPUT I.

#### De Natura Sacrificii & Ministro.

##### *Quid Sacrificium? quotuplex?*

**E**st oblatio externa rei sensibilis legitimè instituta, & à Ministro legitimo per realem victimæ immutationem facta Deo, ad testandum supremum ejus dominium præsertim in vitam & mortem. *Commun.* Sacrificia in lege veteri fuerunt varia, utpote Holocaustum, Hostia pacifica, Sacrificium pro peccatis &c. In lege gratiæ hæc omnia cessaverunt; omnes eorum differentias, ut dicit S. Leo, implente uno Sacrificio Corporis & Sanguinis Christi. Hoc ratione finis est vel Latreviticum vel Eucharisticum vel Propitiatorium, vel satisfactorium, vel impetratorium: Primum offertur præcisè ad cultum Dei; Secundum in gratiarum actionem pro beneficiis; Tertium in expiationem peccatorum; Quartum in satisfactionem eorundem; Quintum ad impetrandum hujus & æternæ vitæ bona.

##### *Quid sit Missa? an verum Sacrificium?*

Missæ est Sacrificium incruentum Corporis & Sanguinis Christi sub speciebus panis & vini. Dicitur incruentum ad distinctionem cruenti, quo



quo Christus Iesus se Patri obtulit in cruce. Esse verum novæ legis Sacrificium, est de Fide in Conc. Trid. Sess. 22. can. 1. & in Ecclesia semper à tempore Apostolorum usque modò oblatum fuit, vid. Controv. cap. 4. contr. 7.

*In quo consistat ?*

Essentia ejus consistit in sola consecratione. S. Bonav. Quia in hac fit mystica victimæ immolatio : quatenus vi consecrationis Corpus separatur à Sanguine ; ejusque fit oblatio : quatenus victima Christus sistitur in Altari, Deoque exercitè representatur in recognitionem Supremi Domini.

*Quis Offerens & quæ Victima ?*

Christus ipse est & Principalis Offerens & Victima : Offerit Sacerdotum ministerio & offertur immolatione mystica. Minus principalis Offerens est Sacerdos : quia offert ut Minister Christi in persona ejus. Hostia seu victima minus principalis est panis & vinum : quia in Offertorio offeruntur & in Consecratione destruuntur ; cumque destruuntur, ut Corpus & Sanguis Christi ponantur sub speciebus in testimonium Divinæ Excellentie, etiam ipsa dici possunt destitui in idem testimonium, saltem mediatè.

**COROLLARIA CASUUM.**

Coroll. 1. Sacrificium offertur soli Deo, non Sanctis, nisi in eorum honorem. Trident.

Coroll. 2.

*Coroll. 2.* Sacrificium immediatè offert omnis & solus Sacerdos; qui & stipendio accepto satisfacit celebrans in mortali: quia omnis & solus Sacerdos in Ordinatione accipit potestatem offerendi Sacrificium, idque effectum habet ex opere operato.

## CAPUT II.

## De Effectibus.

*Pro quibus possit offerri Sacrificium?*

**O**fferri potest Missæ Sacrificium pro vivis & defunctis. Ex Pontif. Romano, non tamen pro omnibus, ut infra.

*Quis effectus Sacrificii?*

Sacrificium quàm impetratorium valet ad impetranda bona animæ & corporis; Quà propitiatorium causat ex opere operato remissionem peccatorum, sed mediatè, impetrando gratiam ad poenitendum; Quàm satisfactorium ex eodem opere remittit & vivis & defunctis poenas peccatis remissis debitas, idque immediatè, nam defuncti in purgatorio juvantur Sacrificio Missæ immediatè (non enim possunt mediatè) ergo & vivi; tam pro his, quam illis satisfaciendo.

*An necessaria applicatio?*

Ut Sacrificium ex opere operato profit peccanti, necessaria est Sacerdotis applicatio: Sacrificium enim secundum se indifferens est, prodesse huic vel illi; ut igitur profit huic, non illi,

U

illi, Sacerdotis est applicare, cujus est sacrificare. Sufficit applicatio habitualis, nempe aliqua facta, etsi pridem, & non revogada. Fieri debet ante consecrationem: quia effectus ex opere operato habetur, quando est Sacrificium, & nequit suspendi. *Commun. DD.*

*Quotuplex fructus Sacrificii?*

Triplex: Generalissimus, Specialissimus, Specialis. Primus obvenit toti Ecclesie, & quorum meminit Sacerdos; Secundus celebranti, & quatenus ex receptione Sacramenti, nequit eum alienare; Tertius illi, pro quo Sacrificium specialiter offertur. Ratio est: quia illi omnes participant ex Sacrificio.

COROLLARIA CASUUM.

*Coroll. 1.* Est peccatum M. Sacrificium offerre: 1. Pro excommunicatis non toleratis. *c. Sacris. de sent. excomm.* 2. Pro damnatis. *S. Aug.* Pro aliis omnibus potest.

*Coroll. 2.* Fructus Sacrificii remanet in Thesauo Ecclesie: 1. Si nulli applicetur, vel incapaci, vel non indigenti. 2. Si applicetur ei, qui primus stipendium dabit, isque fructus sit incapax; Si capax, applicatur valide, sed illicite ob inhibitionem *Clem. VIII.* 3. Si non habens stipendium pro sacro, celebret sine applicatione, postea applicaturus ei, qui offert stipendium. Non valet, quia fructus nequit suspendi.

## CAPUT III.

## De Tempore Celebrationis.

*Quando liceat celebrare Missam?*

**L**icitum est celebrare singulis diebus, exceptâ feriâ 6. Hebdomadæ Sanctæ *ex commun.* Sed non, nisi semel indic *c. sufficit. de Conf.* regulariter ab aurora usque ad meridiem quâcunque horâ. Rubr. num. 15.

## COROLLARIA CASUUM.

*Coroll. 1.* Peccat M. 1. Sacerdos, qui negligit toto anno celebrare Marchant. contra Tambur. 2. Parochus non celebrans per se vel alium, quando Parochiani tenentur ad Missam ex Præcepto Ecclesiæ.

*Coroll. 2.* Licitè Sacerdos celebrat privatim in Coena Domini, ut habet praxis Piorum; etiam in Sabbatho S. non esse prohibitum, privatim ac secluso scandalo celebrare post officium solemne, existimant Lugo, Layman, Gobat, & alii; tutum omnino videtur, si in Ecclesia ista aliud sacrum non legatur. Imò & in Parasceve licitum esse, privatim celebrare ad habendum & dandum viaticum censent quidam Recentiores teste Sporer num. 451. de *Sacrament. Eucharist.*

*Coroll. 3.* Est peccatum M. celebrare duabus vel tribus horis ante aurorâ. *Commun.* Excipitur 1. Dies Nativitatis Domini, non ta-

men licet omnes tres Missas legere de nocte  
*ex Decreto S. Congreg. 1662. teste Neusser.* 2. Ca-  
 sus necessitatis, v. gr. ad dandum viaticum.  
 3. Consuetudo in his partibus celebrandi ho-  
 râ 4. in hyeme. 4. Habens privilegium: sic  
 Regularibus licet celebrare unâ horâ ante au-  
 roram & unâ post meridiem. *ex Privileg. Gre-  
 gorii XIII.*

*Coroll. 4.* Item peccatum est M. celebrare  
 unâ horâ post meridiem, Sylvest. excipe, nisi  
 postulet Solemnitas festi, confluxus populi,  
 consecratio Ecclesiæ, funus Principis &c. vel  
 Sacerdos in festo ad locum Ecclesiæ perve-  
 niens adhuc celebrare velit. Herinx, Lay-  
 man & alii. Item à peccato communiter  
 excusatur ante vel in meridie incipiens.

*Coroll. 5.* Rursus peccat M. Sacerdos, qui  
 celebrat bis in die, *commun.* Excipe casum  
 necessitatis, ut si non habeatur viaticum pro  
 infirmo, vel Sacerdos duas habeat Parochias,  
 debeâtque binare, vel multi non habeant Sa-  
 crum, vel adveniat Processio, Princeps &c.  
 debet tamen Sacerdos esse jejunos, & non  
 sumpsisse Purificationem; *c. consulisti. de ce-  
 lebr. Miss.* Ad dandum tamen moribundo  
 viaticum Sacerdotem, tametsi in priori Sa-  
 cro sumpserit ablutionem, iterum posse cele-  
 brare, post Tambur. probat Gobat apud Spo-  
 rer *num. 458.*



## CAPUT IV.

## De Loco Celebrationis.

*Ubi liceat celebrare Missam?*

**L**icitum est celebrare in Ecclesia consecrata, aut benedicta; imò & in Oratorio per Episcopum ad hoc deputato, quamvis non benedicto. *Trident. Sess. 22. can. 1.* extra autem illa loca celebrare, est peccatum grave; nisi iusta necessitas aut privilegium excuset. *Commun. TT.*

## COROLLARIA CASUUM.

*Coroll. 1.* Episcopis extra domum propriæ habitationis in domibus Laicis celebrare non licet, nec aliis concedere, inhibente *Decreto Clementis XI.* de quo infra. Item privilegia Regularibus olim concessa, celebrandi ubivis in Altari portatili, sunt revocata per *Trident. ex Decreto Clementis XI.* Anno 1703. apud *Reiffenst. tom. 3. pag. 953.* Possunt tamen Regulares in propriis monasteriis privata habere oratoria, ibique (imò in cellis tempore infirmitatis) Missam celebrare *ex Privil. Gregor. XIII.*

*Coroll. 2.* Sub dio vel in domibus privatis celebrare licet, quando magna urget necessitas, ut 1. Tempore pestis aut belli. 2. Si diruta aut combusta sit Ecclesia, *c. concedimus. de Conf.* 3. In castris militum. 4. In concursu populi, quem locus sacer non capit. *Layman. tr. 5. num. 3.* Num autem Episcopus dispensare valeat ad celebrandum in domo privata pro consolatione

infirmi, militant argumenta pro & contra apud Reiffenst. *citat.*

*Coroll. 3.* Celebrari potest Missa in domo privata, habito ad hoc à Pontifice privilegio, *cujus formula explicata apud Gobat.*

*Coroll. 4.* Est M. celebrare in Ecclesia interdicta, execrata, vel polluta, nisi gravis postulet necessitas. Polluitur autem Ecclesia factis sequentibus, si publica publicitate juris vel facti: 1. Homicidio culpabili, etsi occidens sit extra Ecclesiam. 2. Injuriosâ sanguinis effusione, si injuria seu percussio sit gravis, nempe peccatum M. 3. Illicitâ humani seminis effusione, etiam conjugali. 4. Sepulturâ pagani, etiam parvuli. *c. Si Ecclesia. de Conf.* 5. Sepulturâ excommunicati vitandi. Ecclesia polluta, si consecrata fuerit, reconciliari debet ab Episcopo, vel ab habentibus Privilegium, quod habent Prælati Fratr. Min. *ex Bulla Leonis X.* Pollutâ Ecclesiâ polluitur simul cœmeterium, si ei sit contiguum; non vice versâ: quia accessorium, uti est cœmeterium respectu Ecclesiæ, naturam sequi congruit Principalis. Si contingat Ecclesiam pollui sub Missa, hæc est dimittenda: Si accida ante Canonem. Si delictum polluens Ecclesiam sit occultum, illa quoad iudicium humanum non est pollutâ; censebitur autem polluta, quandocunque innotuerit. Quid si Sacerdos bonâ fide in ea celebraverit? Habendam esse pro reconciliata docent nonnulli Auctores apud Reiffenst. sed rejicit Layman, eo quod  
nul-

nullum suffragetur Jus; unde tutius est, verâ  
uti reconciliatione, ut norat Engel.

## CAPUT V.

## De Qualitate Missæ.

*Qualis debeat esse Missa, licitè legenda?*

**M**issa debet esse approbata, & regulariter  
conformis officio. *Rubrica.*

## COROLLARIA CASUUM.

*Coroll. 1.* Non licet legere Missam concessam pro una Dioecesi tantum, una Religione &c. *ex Declar. S. Cong. apud Neuss.* Missam tamen de S. P. FRANCISCO pro Ord. Minor. approbatam licitè in ejusdem festo loco Superioris cantat alius.

*Coroll. 2.* Peccat de mente Bosco M. qui obligatus ad Missale Rom. utitur Missali Prædicatorum, Carmelitarum &c. etiam in eorum Ecclesiis; nisi justa excusaverit causa; ut limitat Neusser.

*Coroll. 3.* Juxta diversitatem sententiarum peccatum est M. vel V. legere votivam aut de requiem, quando est duplex aut Dominica; potest in his cantari votiva ex gravi causa, v. gr. ob publicam necessitatem, propter Comitia Regularium & juxta Bosco in die Primitiarum. Item quando in duplici cantatur requiem, ut in die depositionis, tertio, septimo, trigésimo,

dici etiam probabiliter posse Missas privatas de Requiem saltem sub ipsis exequiis, responderet Sennyei *in examine ordin.* negant alii; Responsio Senn. admittenda, quando plures conveniunt Sacerdotes celebraturi, quorum aliqui habent festum duplex, alii non; Ratio: ut sit conformitas celebrantium, & nulla parentantibus occasio scandali.

*Coroll. 4.* Est peccatum V. in diebus permissis legere votivam absque rationabili causa, hanc enim postulant Rubr. num. 4.

## CAPUT VI.

### De Paramentis.

*Quæ requirantur ad Sacrificium Missæ peragendum?*

**A**D Sacrificium requiritur 1. Altare, idque lapideum & consecratum. *c. Altaria.* Tribus mappis benedictis debet esse cooperatum, Rubr. num. 20. Sufficere duas vel unam duplicatam, & in necessitate simplicem, etiam non benedictam, docet Layman aliique graves DD.

2. Super Altare collocari debent duæ candelæ ex cera; crux cum Crucifixo, etiam exposito Venerabili *ex De lar. S. Congreg. & Missale Rubr. citat.* In necessitate sufficere candelam unam tamen ex Sebo, aut lucernam ex oleo, consentiunt DD.

3. Sub

3. Sub mortali requiritur minister, isque masculus *c. inbibendum. de cohabit.* in gravi necessitate celebrandum potius sine ministro, quàm cum scemina. Gobat *num. 393.*

4. Requiritur Calix, isque ex auro, argento, vel stanno saltem quoad cuppam. In pauperioribus Ecclesiis calicem ex ære vel aurichalco, modò cuppa sit deaurata, admittit Facundez; & ex cupro, cuppà deauratâ, usus teste Sporer *num. 393.*

5. Corporale & Palla, utrumque lineum & benedictum. *Ritus celeb. num. 1.*

6. Requiruntur vestes sacræ, ut in Missali. Ex Privilegio benedici possunt ab Abbatibus & Superioribus Ordin. Mend. eorumque (si absint) Vicariis. Roderiq. Suar. apud Sporer extendentes ad benedicenda corporalia, sua oratoria, & paramenta aliarum Ecclesiarum. Celebrare sine omni veste sacra in nullo licet casu nisi mortis inferendæ. Gobat. Celebrare sinè alqua requisitarum vel cum non benedicta (excepto iugulo) est peccatum M. in necessitate tamen celebrantem sinè stola vel manipulo à M. excusant graves A. A. apud Bosco.

## CAPUT VII.

### De Defectibus.

*Quinam Defectus in Missâ supplendi?*

• **N**ecessario supplendi sunt defectus circa sacrificium substantiales, *ex commun.* Quia

U 5

defe-



defectus substantiales nempe ex parte Sacerdotis, materiæ vel formæ obstant valori sacrificii.

### COROLLARIA CASUUM.

*Coroll. 1.* Peccat M. Sacerdos non supplens defectum substantialem: proinde iterum debet consecrare & quidem absolute, si sciat consecrationem fuisse invalidam; conditionatè, si dubitet. 2. Non sumens species consecratas, quod si physicè propter effusionem, vel moraliter propter immutationem aut intoxicationem sumi nequeant, consecrandæ sunt aliæ. De Defectibus *num. 10.*

*Coroll. 2.* Sacerdos omissam collectam, credo, propriam præfationem &c. repetere non debet, postquam procul perrexit; *Quia turbatur Ordo Missæ.*

## CAPUT VIII.

### De Stipendio.

*An liceat accipere Stipendium?*

**P**Otest Sacerdos ab-que Simonia accipere stipendium pro celebratione Missæ, quo accepto obligatur ad eam ex iustitia. Ratio est: Quia stipendium non accipitur tanquam pretium pro ipso Sacrificio, neque pro labore intrinseco, qui est in ipso sacrificio legere, flectere &c. Sed accipitur pro labore extrinseco,

feco, qui est ire ad loca distantia, se præparare, procurare necessaria, cessare ab aliis operibus lucrativis &c. Nam dignus est operarius mercede sua. Luca 10. Item accipitur in sustentationem Sacerdotis; nam qui Altari deserviunt, cum Altari participant. 1. Corinth. 9.

## COROLLARIA CASUUM.

Coroll. 1. Non est peccatum: 1. Si stipendium accipiat Sacerdos dives. contra Cajet. Quia & ille potestatem habet, ut de Altari edat. 1. Corinth. 9. 2. Si accepto stipendio ad celebrandum, ut populus audiat sacrum, aliud accipiat pro applicatione. contra Gavant. 3. Si non applicet totum fructum non danti justum stipendium, dummodo applicet partem secundum proportionem stipendii. Gobat num. 566. 4. Si loco Votivæ vel de Requiem legat de testamento, nisi promiserit Votivam & Rubricæ permittant. 5. Si stipendium accipiat Parochus, tennes habens redditus; debet tamen applicare pro Parochianis saltem diebus festis, imò sæpius habitâ ratione reddituum; juxta Declarationem S. Congreg. apud Reiffenst. tom. 3. tit. 41.

Coroll. 2. Peccatum est respectivè M. 1. Si Sacerdos unam omittat Missam, pro qua accepit stipendium, quod materia est furti mortalis. Gob. Herinx. Quia juxta quantitatem stipendii mensuranda est obligatio. 2. Si stipendium exigat tanquam pretium sacri:

quia

*quia Simonia.* 3. Si obligatus legere in Altari privilegiato legat in alio. Gobat *num. 579.* attentâ etiam proportionem stipendii & voluntatē Sacerdotis se obligandi, si illud tenue. Satisfit tamen obligationi, & indulgentiæ animabus defunctorum suffragantur per celebrationem de festo in duplici, quando non est fas legere de Requiem. *ex Declaratione Clementis IX.* apud Sbogar. 4. Si sacra ex iustitia debita nimium differantur, juxta aliquos ultra mensem, juxta Herinx *num. 182.* differre licet ad duos menses, imò nonnulli extendunt ad tres; ubi spectandam esse voluntatem constituentium & necessitatem, bene monet Sporer cum aliis. 5. Si sacrum legendum committat alteri pro minore stipendio, retentiâ sibi parte, quod in Decreto Urbani VIII. vocatur damnabile lucrum. Excipiuntur Beneficiati, qui sacra ex fundatione legenda faciunt legi per alium, dando stipendium ordinarium. *S. Congreg.*

## CAPUT IX.

### De audienda Missâ.

*Quis & quando teneatur audire Missam?*

**O**mnis Baptizatus rationis compos tenetur ex præcepto Ecclesiæ audire Missam in diebus Dominicis & Festivis. *c. Omnes fideles. de Conf. d. 1.*

COROL.

## COROLLARIA CASUUM.

*Coroll. 1.* Non satisfaciunt præcepto 1. Qui non existunt corporaliter in loco sacrificii ; sufficit tamen præsentia moralis , quâ adlûnt , qui stantes ante januam aliis audientibus moraliter conjunguntur. *Commun.* Imò celebrantem audiens ex propriis ædibus juxta C. de Lugo apud Sbogar *tr. 121. num. 9.* contra varios. 2. Qui non assistunt religiosè. Sufficere attentionem merè externam defendit Tambur. cum Dicast. Layman &c. 3. Qui omittunt partem notabilem. Venientem post primum Evangelium à M. excusat Sbogar *citat.* Juxta quem & alios satisfacit , qui duas medietates à duobus celebrantibus audit successivè , non verò (quod damnavit Innoc. XI) qui simul. 4. Qui audiunt in loco prohibito. vide Reiffenst. *in l. 3. Decret. tit. 41.* Nequit tamen Episcopus cogere populum , ut sacrum audiat in Ecclesia Parochiali. Sbogar *ex Declar. Clement. VIII.*

*Coroll. 2.* Ab auditione Missæ excusant charitas , impotentia , consuetudo : excusatus tamen tenetur in Dominica ad alium cultum vi præcepti : *Memento ut diem Sabbathi sanctifices.* Marchant.

Charitas excusat 1. Assistentem infirmo. 2. Eum , qui alter impedire nequit grave malum , sive corporale , sive spirituale ; potest tamen scemina prævidens peccatum alte-

rius

rius uti libertate suâ ad exeundum : ille enim peccat liberè , adeoque potest ac debet abstinere , si non , imputet sibi.

Officium excusat 1. Milites in custodiis. 2. Pastores gregum. 3. Laborantes in furoriis. 4. Matrem assistentem infanti. 5. Famulos ab heris impeditos , etiam injustè , dummodo non fiat in Religionis contemptum , & ipsi sinè gravi damno nequeant se subducere. Layman , Marchant. &c.

Impotentia excusat : 1. Excommunicatos. Gobat *num. 410.* 2. Incarceratos. 3. Aegrotos , imò & convalescentes ; si timent vel dubitant exitum sibi nociturum. Dicast. 4. Timentes notabile damnum sive in vita , sive in honore , sive in bonis fortunæ. 5. Distantes à templo uno milliari , imò secundum Suar. unâ horâ , sed habenda ratio personarum & auriæ. 6. Custodem domus , ubi una legitur Missa. 7. Commorantes in locis hæreticis , quamdiu ibi commorandi justam habent causam. 8. Impeditos , qui impedimentum posuerunt tempore remoto à die festo , v. gr. ante 3. vel 4. dies exeundo à loco sacri , ut sentit Sporer , imò pridie festi , ut Gobat *num. 447.* cum aliis DD. *citat.*

Consuetudo excusat mulieres , post partum se domi continentes. Sbogar *ex commun.*





# TRACTATUS XXII.

## De Pœnitentia.

### CAPUT I.

#### De Pœnitentiæ Natura , Materia & Forma.

*Quid Pœnitentia Virtus ? & quid Pœnitentia Sacramentum ?*

**P**œnitentia alia est Virtus , alia Sacramentum : Prima est habitus inclinans ad peccati detestationem per contritionem vel attritionem ; Secunda est Sacramentum reconciliationis post Baptismum , consistens in actibus pœnitentis & absolutione Sacerdotis. D. Thom. 4. d. 14.

*Sacramentum Pœnitentiæ à quo & quando institutum ?*

Fuit institutum à Christo Joan. 20. Dum insufflando in Apostolos dixit : accipite Spiritum Sanctum &c. Trident. Sess. 14. c. 1.

*Quæ materia & quæ forma Sacramenti Pœnitentiæ ?*

Materia ejus remota & circa quam sunt peccata post Baptismum commissa tum venialia , tum mortalia ; hæc autem necessaria , illa libera. Materia proxima sunt actus pœnitentis scilicet Contritio, Confessio, Satisfactio. Forma essentialis :

tialis: *Te absolvo*: Quia verba ista sufficienter significant effectum Sacramenti.

### COROLLARIA CASUUM.

*Coroll. 1.* Invalidum est Sacramentum ex parte materiæ 1. Si Sacerdos absolvat non habitâ materiâ, vel tantum putatâ. Quod si materia sit prorsus dubia, & haberi nequeat certa, absolutio non est danda nisi sub conditione. 2. Si poenitens mentiatur confitendo peccatum mortale, quod non commisit, Gobat *num. 540.* contra Sylvest. Imò veniale, si sit tota confessionis materia. *Commun.* 3. Si repetatur absolutio sinè novo dolore: quia novum conficitur Sacramentum; ergo novus requiritur dolor, saltem renovatus, velut materia proxima. 4. Si omitatur peccatum M. quamvis remissum per contritionem. *Trident.* Quia est materia necessaria confessionis, & non remittitur per contritionem, nisi cum proposito subjiçendi clavibus.

*Coroll. 2.* Invalidum est Sacramentum ex parte formæ 1. Si absolutio detur nutu, signo, vel scripto. *ex Flor. & Trid.* Non tamen reprehendendus est sacerdos minus in extrema necessitate absolvens nutu vel scripto sub conditione, si valeat. *Pontius*: Quia in extremis extrema tentanda sunt, quæ nulli nocent, alteri fortè profunt. 2. Si detur absenti, quod sub excommunicatione prohibuit *Clemens VIII.* sufficit tamen præsentia moralis; unde absolvi potest

potest pœnitens acceptâ pœnitentiâ erumpens ex confessionalî, si non procul.

*Coroll. 3.* In concursu pœnitentium, cessante periculo celsuræ, adhiberi potest hæc forma: *Authoritate D. N. Jesu Christi ego te absolvo à peccatis tuis in nomine Patris &c.* Cave tamen omittere verba: à peccatis: Quia secundum multos sunt de essentia.

## CAPUT II.

### De Necessitate Pœnitentiæ.

*Quibus & qualiter necessarium Sacramentum Pœnitentiæ?*

**S**acramentum Pœnitentiæ Baptizatis mortaliter lapsus est in re vel in voto necessarium necessitate medii: quia sine eo saltem in voto nequit obtineri reconciliatio cum Deo. *Trid. Sess. 14. can. 2.*

*Quis effectus ejus?*

Remittit culpam & poenam æternam, remanente tamen læpe temporali. *De Fide.* Insuper opera mortificata nempe in statu gratiæ ante peccatum M. facta per Pœnitentiam reviviscunt: Quia per peccatum non sunt extincta, sed solum à valore & effectu impedita; ergo peccato sublato rursus valent & reviviscunt ad effectum. Peccata verò semel remissa per subsequens peccatum non redeunt. *D Thom. Scor. cum suis:* Quia fuerunt omnino deleta. Unde dicit Deus *Ezech. 18.* *Si impius egerit Pœni-*

*centiam, omnium iniquitatum suarum non recordabor amplius.*

### CAPUT III.

#### De Contritione.

*Quid Contritio? quotuplex?*

**C**ontritio in genere est animi dolor ac detestatio de peccato commisso cum proposito non peccandi de cætero. *Trident. citat. can. 4.* Si procedat ex motivo charitatis erga Deum, est contritio perfecta; si solum ex motivo turpitudinis peccati vel pœnarum à Deo infligendarum, est imperfecta sive Attritio.

*Quis Contritionis effectus?*

Contritio justificat etiam extra Sacramentum, cum voto tamen saltem implicito confitendi & Sacramentum suscipiendi; Attritio justificat non nisi in Sacramento, ad illud sufficiens etiam cognita. *Commun. ex Conc. citat.* Nihilominus extra Sacramentum Attritio delet peccata V. contra Vasq. etiam remanentibus mortalibus. Maius contra multos RR. Quia ad delenda peccata mortalia requiritur Contritio vel Sacramentum, ad delenda autem venialia requiritur minus, ergo sufficit Attritio, etiam remanentibus peccatis mortalibus: quia peccata venialia possunt stare cum gratia & amicitia Dei, cur non possent remitti manente inimicitia & peccato mortali:

tali: non enim in eorum remissione necessariò infunditur gratia.

*Coroll.* Ut valeat Sacramentum Pœnitentiæ  
 I. Requiritur dolor ante absolutionem: non tamen necessariò (ut docet Vasq. *ex commun.* contra Layman) ante confessionem; isque debet esse 1. Verus, unde non sufficit puratus. 2. Supernaturalis ex parte principii nempe gratiæ & motivi. 3. Summus saltem appetitivè, ut peccator in præparatione animi malit quodlibet malum subire, quàm peccare. 4. Universalis, extendens se ad omnia mortalia saltem in genere, & venialia, quæ sunt absolutionis materia. 5. Formalis. Sporer *num.* 77. Quia non sufficit virtualis inclusus in exercitio alicujus virtutis, v. gr. spei, timoris &c.

II. Requiritur propositum non peccandi de cætero, idque debet esse 1. Per se explicitum. 2. Efficax, saltem in affectu; cui non obstat, si pœnitens puret, se relapsum; modò seriò & sincerè peccatum vitare velit. 3. Absolutum & de se perpetuum circa mortalia, eorùmque occasiones proximas. Unde absolvendus non est concubinariùs, qui occasionem proximam potest & non vult deferere; si moraliter non possit, sufficit firmum propositum, addito quandòque voto vitandi peccatum & opportuna adhibendi remedia; quæ Confessarius præscribere debet, ex occasione proxima faciendo remotam; quod si pœnitens ea acceptare nolit, aut redeat iis non adhibitis, non est absolvendus.



## CAPUT IV. De Confessione.

### *Quid Confessio?*

**C**onfessio Sacramentalis est accusatio de peccatis propriis coram Sacerdote ad obtinendam absolutionem.

### *An necessaria? quibus? quando?*

Necessaria est necessitate præcepti divini. *Trident. Sess. 14. can. 7. & Ecclesiastici. c. omnis utriusque sexus.* Utrumque obligat omnes post Baptismum mortaliter lapsos: primum per se in periculo mortis & aliquoties in vita; secundum semel in anno. *c. citat.*

### *An esse debeat integra & quomodo?*

Confessio debet esse regulariter integra saltem formaliter, confitendo omnia M. peccata, quæ noscuntur sive sunt in conscientia; unde exprimenda sunt omnia peccata M. etiam (quod contra Marchant.) dubia, quoad speciem, numerum & circumstantias speciem mutantes. *Commun. ex Conc. citat.*

## COROLLARIA CASUUM.

- Coroll. 1.* Non obligantur ad Confessionem  
 1. Infideles. 2. Qui non peccârunt nisi venialiter.  
*Coroll. 2.* Obligantur ad Confessionem annuam:  
 1. Hæretici. 2. Muti. 3. Surdastr.  
 4. Qui in anno confessus est venialia, & ante finem

finem illius incidit in *M. Commun.* Quia Confessio venialium non fuit præcepta, nec præcepti impletiva.

*Coroll. 3.* Non satisfacit præcepto Confessionis, qui Confessionem facit invalidam. Alexander VII. eaque est repetenda, siue invalida fuerit ex parte pœnitentis, siue Confessarii.

*Coroll. 4.* A Confessionis integritate materiali excusantur: 1. Facto diligenti examine peccati immemor. 2. Putans non esse peccatum, aut non grave, quod verè est. 3. Impotens ad exprimendum omnia ob defectum loquelæ vel ignorantiam idiomatis. 4. Timens sibi vel Confessario grave ex integra Confessione damnum; non tamen excusat revelatio complicitis, neque concursus pœnitentium. 5. Naufragi. 6. Milites mox præliaturi. 7. Moribundus, accelerante morte. Quod si in terris Catholicorum reperiatur destitutus sensibus, & Confessionis signa nec det, nec dedisse aut catholicè vixisse constet, absolvendus est sub conditione. Marchant cum multis.

*Coroll. 5.* Pœnitens, non sciens numerum peccatorum certum, dicere debet probabilem, addendo: plus, minus. Quod si non possit, dicat tempus à quo peccatum continuavit, & quoties in septimana vel mense. *C. Lugo num. 79.* Inde Confessarius statum pœnitentis nosse poterit.

*Coroll. 6.* Circumstantiæ merè aggravantes non sunt ex obligatione exprimendæ, nisi per

accidens, dum causa sunt reservationis aut censuræ. S. Bonav. alique plurimi: Quia sola peccata mortalia sunt materia necessaria Confessionis; Circumstantiæ autem merè aggravantes non sunt mortale distinctum ab actu, nec faciunt alterius speciei, sed solum majus. Ex minuentibus illæ sunt exprimendæ, quæ malitiam vel omnino tollunt, vel ex mortali faciunt venialem.

## CAPUT V.

### De Satisfactione.

*An Satisfactio imponenda & acceptanda?*

**C**onfessarius regulariter tenetur aliquam poenitenti imponere satisfactionem peccatis proportionatam; quam & poenitens, volens absolvi, tenetur acceptare. *Commun. ex Trident. Sess. 14. c. 8.*

*An mutari possit? à quo? quando?*

Ex iusta causa poenitentiam mutare potest solus Confessarius, tum qui eam imposuit, tum quilibet alius: Sed primus etiam extra Confessionem, durante tamen moraliter adhuc iudicio, ut limitant multi; imo quovis tempore, ut censent Lugo, Arr. Haun. Secundus repetitâ Confessione. Herinx contra paucos, etsi poenitentia fuerit imposita pro peccatis reservatis. Dicast. num. 120. contra Suar. Quia sublata reservatione æqualis est in omnibus Confessariis potestas.

*Quis*

*Quis effectus Satisfactionis ?*

Effectus Satisfactionis (quem habet de mente Scoti d. 15. q. 1. contra nonnullos, etiam in peccato M. implera) est ex opere operato remittere pœnam peccatis remissis debitam. *Commun.*

## COROLLARIA CASUUM.

*Coroll. 1.* Confessarius pro peccato veniali non imponens pœnitentiam peccat leviter. Lugo. Peccare graviter, docet Sanch. Quia Sacramentum privat parte integrali. Nullam tenetur imponere, si pœnitens nullius sit capax, moribundo imponenda est vel levis, quam implere potest per se, vel gravis v. gr. eleemosyna, quam potest per alios.

*Coroll. 2.* In satisfactionem dari possunt 1. Auditio Missæ, jejunium, & similia opera, quamvis aliunde debita: Quia nova additur obligatio & virtus, nempe remittendi pœnam ex opere operato. 2. Confessionis frequentia, quæ congruit consuetudinariis. 3. Opus determinatum, v. gr. Rosarium, & alia exigentibus circumstantiis indeterminata, v. gr. quidquid boni feceris per septimanam. Marchant.

*Coroll. 3.* Minor pœnitentia dari potest ex causa, qualis 1. Tempus Jubilæi vel Indulgentiæ. 2. Magna contritio. 3. Incapacitas pœnitentis, majorem implendi vel periculum omittendi.

*Coroll. 4.* Ipse pœnitens nequit pœnitentiam mutare (quidquid opinetur Diana) nequidem

in meliorem: hæc enim non esset Sacramentalis, nec pœnas remitteret ex opere operato. Nec alium substituere, qui impleat, ex propositione damnata ab Alexandro VII. Satisfacit tamen eam implens in peccato M. &, si mutata fuerit in aliam, faciens alterutram. Bosco num. 360.

Coroll. 5. Omittens pœnitentiam, quæ data pro peccatis levibus, vel si pro gravibus, at levibus, probabilius peccat tantum leviter. Sbogar. Pœnitentiæ oblitus juxta Marchant tenetur ad nihil, juxta Sylv. ad iterandam confessionem, juxta alios, satius ad petendam in confessione sequenti similem.

## CAPUT VI. De Indulgentiis.

*Quæritur :*

**I**ndulgentia est remissio pœnæ temporalis, debitæ pro peccatis actualibus pœnitentium, facta ab habente potestatem de thesauro Ecclesiæ ex causa rationabili. Scot. q. 4. Miscell. num. 4.

Dicitur 1. *Remissio Pœnæ* : Quia hæc effectus est indulgentiarum, non verò Remissio ullius culpæ.

2. *Temporalis* : Quia æterna remittitur, dum remittitur culpa.

3. *Debitæ pro peccatis actualibus* : Ut excludatur Originale.

4. *Pœnitentiam* : Quia non remittitur pœna, nisi prius remissa fuerit culpa.

5. *Fa-*



5. *Facta*: Scil. Vivis per absolutionem & solutionem: quatenus Pontifex vi illius *Math. 16. Quodcumque solveris super terram &c.* remittit pœnam peccatis remissis debitam, ecce *absolutio*, & simul de thesauro Ecclesiæ exhibet, quantum sufficit pro illa pœna, ecce *solutio*. Defunctis verò non per modum absolutionis, (defectu Jurisdictionis in eos) sed per modum suffragii seu puræ solutionis: quatenus Pontifex Deo de thesauro Ecclesiæ offert æquivalens pro pœna, quam debet defunctus. *Cæn. de ind. art. 9.* Unde effectus pro defunctis pender ab acceptatione divina.

6. *Ab habente potestatem*: Hanc vi Jurisdictionis solus habet Papa; Episcopi tamen *c. cum ex eo. extra. de pœnitent. & remiss.* concedere possunt indulgentias unius anni in dedicatione, & 40. dierum in anniversario dedicationis, & quoties occasio.

7. *De thesauro Ecclesiæ*: Hic est cumulus meritorum Christi & Sanctorum existens in acceptance divina, dispensabilis extra Sacramentum per Pontificem Ecclesiæ militanti. In hoc thesauro ex parte Sanctorum reponuntur non tantum satisfactiones superflue, sed etiam eorum merita quoad fructum generalem, qui est portio obveniens toti Ecclesiæ vi Artic. in Symb. *Communione Sanctorum.* Item quoad fructum specialem; si ille, cui à merente applicatur, sit ejus incapax. Aliàs non verificaretur, quod Clemens VI. in *Extrav. Unigenitus. de pœnit. & remiss.*

*miss. sic ait : Ad cuius thesauri cumulum omnium Ele-  
ctorum à primo iusto usque ad ultimum merita admini-  
culum prestare nescuntur.*

8. *Ex causa rationabili :* Nam sine hac non  
valet. La Croix num. 1316. Quamvis probabili-  
ter valeat annexa (si quæ) facultas absolvendi  
à reservatis, commutandi vota &c. *Quia hæc  
juris est Ecclesiastici, indulgentia Divini.*

### *Divisio :*

Indulgentia alia est plenaria, quâ remittitur  
tota poena; alia partialis v. gr. 100. annorum,  
quadragena, septena &c. qua remittitur poena,  
quæ remissa fuisset per poenitentiam 100. an-  
norum, 40. dierum &c. si facta fuisset juxta  
Canones poenitentiales.

Utraque subdividitur in personalem, rea-  
lem & localem: prima conceditur personæ,  
secunda rei; tertia loco.

### *Dispositio lucrantis :*

Requiritur 1. Intentio saltem interpretativa.  
Expedi tamen, manè formare intentionem ob-  
tinendi per opera istius diei, quidquid per illa  
obteneri potest. 2. Status gratiæ in lucrante  
pro se ipso, saltem dum ultimum opus præsta-  
tur. Proinde si confessio præscribatur, proba-  
bilius est requiri solùm in mortaliter lapsis, ut  
dispositionem ad statum gratiæ. 3. Impletio  
operum juxta formam concessionis. *Commun. &  
quidem moraliter bene, ut non sufficiat opus  
vitia-*

vitiatum. Navarr. Lessl. contra Suarez. Repetens opera nequit secundo lucrari easdem indulgentias plenarias post decretum S. Congreg. 1678. poterit eadem die alias, si rursus peccaverit. Gob. Viva.

### *Cessatio Indulgentiarum :*

Cessant 1. Elapso concessionis tempore. 2. Si locus vel res destruat, cui annexa. 3. Cessante totaliter fine concessionis. 4. Per revocationem.

Indulgentias Regularibus concessas revocavit Paulus V. & alias dedit : 1. Si confessi & communicaverint plenariam in investitione, in professione, in festo primario sui ordinis, in articulo mortis; celebrantibus primitias, & qui interfunt, facientibus exercitia spiritalia per dies 10. quos reduxit ad 8. Alexander VII. 2. Indulgentias Stationum Romæ us, qui proprium templum visitant, ibique orant. Specialiter verò nobis Fratribus Minoribus ante Altare principale Ecclesiæ orantibus 6. *Pater & Ave cum Gloria Patri* ad finem cujuslibet, concessit magnam illam indulgentiam *Stationis Sanctissimi Sacramenti*, continentis omnes indulgentias Stationum Romæ, Jerusalem, Compostellæ & Portiunculæ. Hieron. Rodericus *resolut.* 77. Julius III. eidem Stationi dedit Indulgentias plenarias, & confirmavit Innocent. XII. in *Brevi: Debitum Pastorale*. Qui & indulgentiam plenariam semel quolibet mente, etiam applicabilem

lem defunctis, concessit iis, qui per totum mensem singulis diebus per duos quadrantes horæ continuos, aut saltem per unum orationi mentali vacaverint, si confessi & commun. ac pro Christianorum Principum concordia, hæresum extirpatione, & S. Ecclesiæ exaltatione piè oraverint. *De hu Rubrica Breviarii nostri num. 88. 89. 178.*

## CAPUT VII.

### De Jubilæo.

#### *Quidditas & Divisio.*

**J**ubilæum est indulgentia plenaria à Summo Pontifice certa opera facientibus concessa, cum facultate eligendi Confessarium, qui à censuris & peccatis reservatis possit absolvere, ac vota commutare.

Aliud est universale, aliud particulare: primum conceditur toti Ecclesiæ, secundum alicui Diœcesi tantum. Universale est vel ordinarium vel extraordinarium.

#### *Jubilæum ordinarium*

Dicitur, quod post Paulum II. celebratur Romæ quolibet Anno 25. ibique promulgatur die Ascensionis Domini, & incipit in Vigilia Nativitatis ejusdem à 1. Vesp. ad seq. anni Vesperas in eadem vigilia inclusivè.

Ad hoc Jubilæum requiri solet 1. Confessio, non Communio. 2. Visitatio quatuor Ecclesiarum scil. S. Petri, S. Pauli, S. Joannis Lateran.

ran. S. Mariæ Major. quæ visitandæ à Romanis per 30. à peregrinis per 15. dies continuos vel discontinuos. 3. Pœ ad Deum preces pro totius populi Christiani salute. *Ex Bulla Innocentii X.*

Durante anno sancto, suspensæ sunt per orbem omnes indulgentiæ plenariæ à Papa concessæ vivis, etiam applicabiles defunctis, ut declaravit *Clemens X.* etiam affixæ nummismatibus. Attamen suspensæ non sunt Lauretanæ, nec Compustellanæ, nec Portiunculæ Aethiopiæ, nec moribundorum, *ex Declaratione Clementis X.* Nec concessæ immediate pro defunctis in Altari privileg. Item non suspenduntur facultates absolvendi, commutandi vota &c. quas habent Regulares vi suorum privilegiorum. *Ex Declaratione. apud Viva.*

Extra urbem Jubilæum Romanum per orbem concedi solet 1. Monialibus & Anachoretis. 2. Susceptum iter Romanum prosequi non valentibus. 3. Incarceratis & infirmis, si aliàs iruri essent; Ita concesserat *Innocent. X. 1650.* requirens, ut verè sint pœnitentes & confessi, præstentque opera ab Ordinariis locorum seu Sanctimonialium & Anachoretarum Superioribus, vel de eorum mandato à prudente Confessario præscribenda.

### *Jubilæum extraordinarium*

Dicitur, quod pro duabus hebdomadibus, quæ 15. dierum, concedi solet 1. Post annum san-



sanctum. 2. Post coronationem Pontificis.  
3. Quando Ecclesia gravi aliquâ premitur necessitate.

### Capax Jubilæi

Est homo baptizatus, rationis compos, qui peccavit actualiter. Ut lucretur, requiritur 1. Ut opera præscripta exequatur per se ipsum, & durante Jubilæo. Peregrinus tamen, qui extra suam Dioecesim, durante in ea Jubilæo, potest idem lucrari domum reversus. *Ex Bulla Pontif.* 2. Ut existat in loco Jubilæi. Unde lucrari possunt in aliena Dioecesi, ibidem peregrini. 3. Ut nondum sit lucratus: quia nequit bis; *Ex Declarat. S. Congreg. testu Filiuc.* Adhuc potest probabiliter juxta Gobat. ideoque laudabiliter repetit opera, ut si non secundo, tamen certius lucretur. Qui verò lucratus est in una Dioecesi, juxta *commun.* iterum lucrari potest in alia. 4. Ut intendat lucrari sibi: quia nequit defunctis. Gobat *de Indulg. num. 206.* Hic tamen *cap. 1.* censet, fieri posse fructuose, non quidem applicatione fundata in potestate clavium, sed in sola Dei liberali acceptione, & per modum donationis. 5. Ut sit in statu gratiæ, saltem dum ponit ultimum opus; eo enim momento lucretur indulgentiam; alios verò favores absolutionis & commutationis votorum, quando accedit Confessarium animo lucrandi Jubilæum.

*Opera*

*Opera pro Jubilæo extraordinario*

Sunt 1. Processio seu Visitatio Ecclesiæ vel Ecclesiarum. 2. Oratio in illa vel illis. 3. Jejunium. 4. Eleëmofyna. 5. Confessio. 6. Communio. *Ex Bullis Pontif.*

Implenda sunt 1. Omnia (non tamen necessario certo inter ea servato ordine) & quodlibet moraliter integrum. 2. Probabilius non necessario omnia in eadem septimana. 3. Saltem ultimum in statu gratiæ. 4. Durante Jubilæo, nisi prorogentur. 5. In loco ejusdem quoad visitationem Ecclesiarum, reliqua fieri possunt in quocunque. *La Croix num. 1437.*

Sufficiunt opera aliunde debita, v. gr. jejunium ex præcepto Ecclesiæ. *Herinx num. 99.*  
Nunc de singulis:

*Visitatio Ecclesiarum*

Vel locorum piorum, aut processio semel est peragenda, prout Ordinarius conformiter Bullæ Pontificiæ ordinaverit. Debet esse devota, piè orando ad intentionem Papæ in Bulla expressam, quid & quantum orandum, relinquitur cujusque devotioni. Non requiritur Ecclesias visitari omnes eâdem die. Satisfacit rusticus, relicta Ecclesiâ suâ Parochiali, visitans Ecclesias in urbe. *Bellegambe pag. 158.*

*Jejunium*

Requiritur Ecclesiasticum trium dierum scil. Mercurii, Veneris & Sabbathi, & quidem intra ean-

candem septimanam, ut habet commun. sensus & praxis contra Dicast. num. 355. Servandum est omnibus Jubilæum lucraturis, etiam pueris, infirmis, laborantibus, aliàs dispensatis; nisi Confessarius commutet. La Croix cum Belleg.

### *Eleëmosyna*

Danda est corporalis (cujus nomine venit quodlibet opus ex 7. misericordiæ corporalibus. S. Thom. Gobat.) semel pauperibus, quorum nomine etiam veniunt Hospitalia, Ecclesiæ indigentes, Monasteria Religiosorum.

Si Bulla nihil determinet, sufficit quantacunque, suadenda tamen juxta cujusque facultatem. Satisfacit dans per famulum, modo hic non retineat, aliàs probabiliter non lucraturus.

Danda est ab omnibus: non habentes procurare debent, ut detur ab aliis pro ipsis, aut petere commutationem. Diana. Paterfamilias dans pro Domesticis, Prælati pro Subditis, iis insinuare debent, ut ratihabeant & censeantur dare. Lugo num. 117.

### *Confessio*

Juxta communior. non requiritur per se, sed ut dispositio ad statum gratiæ. Unde confiteri non tenetur, habens solum V. nihilominus eam requiri sicut alia opera, volunt non pauci cum Sanch. quorum sententia tutior, practicanda.

Non

Non requiritur confessio generalis, modò peccata semel bene confessa; nec sufficit sacrilega. *Ex Decreto Alexandri VII.* nisi solum pro tollenda censura & reservatione. Ut docent Lugo, Gobat, contradicentibus Roderiq. Sanch.

Per se sufficit confessio unica, per accidens requiritur altera: ut si factâ confessione quis peccet mortaliter ante communionem; si verò peccet mortaliter post commun. ante ultimum opus, ut hoc ponatur in statu gratiæ, suadenda quidem est confessio, sufficit tamen contritio.

Fieri potest ante vel post alia opera. Existens in M. contritiùs eam præmittit; modò curet, reliqua opera ponere in statu gratiæ. Belleg. pag. 197.

### Communio.

Hæc fieri potest quâlibet die intra alterutram hebdomadam; tutius intra hebdomadam, quâ præstantur alia opera, aut Dominicâ sequenti. Non sufficit sacrilega. Præscribitur omnibus lucraturis Jubilæum; unde qui communicare non possunt, egent commutatione. Belleg. citat.

### Operum commutatio & prorogatio.

Hæc suppositâ iustâ causa, saltem putatâ, fieri potest à Confessario etiam extra confessionem, etiam ab eo, cui lucraturus non cogitat confiteri. Gobat num. 240. etsi aliqua opera v. gr. jejunia exequendi tempus sit elapsum.

Y

Fieri

Fieri debet intra tempus Jubilæi, & commutatio in alia opera pietatis, æqualia moraliter; potest in aliunde debita, v. gr. ex voto, vel præcepto.

### *Electio Confessarii.*

Hæc conceditur cuilibet, etiam Regulari ex quolibet ordine, etiam Moniali, independentè à licentia sui Superioris. Lugo de Pœnit. num. 186. Fill. ex Declarat. S. Congreg.

Eligibilis est quilibet Confessarius, Sæcularis & Regularis. 1. Si approbatus ab Ordinario loci & pro loco, in quo fit confessio. Hinc approbatus à solo Prælato suo Regulari non potest eligi à Sæculari, nec à Regulari alterius ordinis, Regin. Lugo. Viva contra Dian. & quosdam. 2. Si non excommunicatus aut suspensus ab exercitio Jurisdictionis. Quid, si Regularis ab Ordinario approbatus à suo Superiore sit prohibitus audire confessiones Sæcularium? Valide absolvet, Dian. cum commun. non licitè. 3. Si approbatus respectu Eligentis, quando respectu hujus approbatio pertinet ad Ordinarium. Hinc non approbatus specialiter pro Monialibus, non potest eligi à Moniali. Viva. Pelliz. contra Peyrin.

### *Absolutio.*

Hæc conceditur 1. A Censuris. 2. A Casibus reservatis Papæ, etiam ab Hæresi, nisi expressè excipiat. Belleg. 3. A reservatis Episco-



Episcopo , etsi in Bulla non exprimeretur. Gobat *num.* 491.

Absolutio à Censuris dari potest extra Confessionem (at non facile danda) etiam ab eo, cui absolvendus non est confessurus. Qui publicè denunciatus incidisse in Censuras , potest absolvi , etsi res deducta ad forum contentiosum , pro foro interno ; si promittat satisfacere , ut debet , cum primùm potest parri læsæ. Belleg. *p. 3. sect. 11.*

Sæpius potest absolvi à reservatis 1. Qui intra eandem septimanam , qua præstat opera Jubilæi , relabitur. Lugo *de Pœnit. d. 20.* 2. Qui primâ hebdomadâ lucratus est Jubilæum , & secundâ relabitur ; si repetat opera præscripta. Navarr. *num.* 46. imò etsi non repetat , ut probabiliter tenet Rodriq. Diana.

Dari potest , antequam pœnitens alia opera perficiat ; modò verum habeat propositum ea perficiendi ; manérque absolutus , si postea omittat alia opera. Idem est de commutatione votorum. Platel. *num.* 914.

Reservatio nequit tolli extra Confessionem ab eo , qui habet potestatem delegatam. Lugo *num.* 104. contra quosdam. Nec in confessione saltem licitè ab eo , qui habet ordinariam , absolvendo dimidiatè , scil. à solis reservatis , non aliis mortalibus. Layman. *c. 12.*

*Commutatio Votorum.*

Hæc fieri potest à Confessario, non dispensatio. Commutari possunt vota quælibet quorumlibet fidelium, etiam jurata, adeoque & ipsa juramenta. Excipiuntur vota castitatis & Religionis, & quæ facta in favorem tertii, si ab illo vel ejus nomine fuerint acceptata. Sanch. Sporer.

Valet commutatio facta 1. In non notabiliter minus. 2. Extra Confessionem. 3. Ab eo, cui non facta nec facienda Confessio. 4. Ante alia opera impleta, si adfuerit animus implendi. 5. Post Jubilæum, si vovens obtinuerit. Sanch. Gobat num. 307.

*Pœnitentia & Indulgentia.*

Pœnitentia injungenda est aliqua, Tenor Bullæ, minor tamen, quàm extra Jubilæum.

Indulgentia conceditur plenaria; obtinetur eo momento, quo ultimum opus completur, si complens sit in statu gratiæ; aliàs nunquam: nisi fortè, ut volunt aliqui, indulgentia amoto obice reviviscat. Si complens ultimum opus sit in P. V. lucratur indulgentiam plenariam aliorum peccatorum, non istius venialis. Layman c. 6. num. 4. Gobat num. 278.

*Post tempus Jubilæi*

Potest Confessarius eum, qui Jubilæum lucratus, absolvere & vota commutare, uti potuisset

set tempore Jubilæi : qui enim lucratus ad hæc acquisivit Jus.

Hinc absolvere potest à reservatis ante vel tempore Jubilæi commissis. 2. Absolutionem continentis tempore Jubilæi potest ex causa differre, & post Jubilæum absolvere ab omnibus peccatis & censuris. 3. Absolvere potest à reservatis tempore Jubilæi inculpabiliter, vel ex iusta causa omissis. 4. Idem est de commutatione votorum, si pœnitens tempore Jubilæi oblitus sit petere, aut noluerit, aut Confessarius commutare distulerit. Si verò quis confessus sit animo lucrandi Jubilæum, & non sit lucratus, potest Confessarius post Jubilæum absolvere à reservatis antea oblitis; non tamen commutare vota. La Croix L. 6. num. 1473.

## CAPUT VIII.

### De Ministro.

*Quis Minister Sacramenti Pœnitentiæ ?*

**M**inister Sacramenti Pœnitentiæ est solus Sacerdos. *De Fide.* Institutus est à Christo, Jo. 20. quando dixit Apostolis & eorum in Sacerdotio Successoribus : quorum remiseritis peccata, remittuntur eis.

*Quid requiratur, ut validè & licitè  
absolvat ?*

Ut validè absolvat habere debet Jurisdictionem vel ordinariam, vel delegatam. *Frid. Sess.*

14. c. 7. Quia Sacramentum Pœnitentiæ habet rationem Tribunalis & Judicii; natura autem & ratio Judicii exposcit, ut sententia in subditos duntaxat feratur, qui non habentur sine Jurisdictione. Ad Jurisdictionem delegatam respectu Sæcularium, etiam Sacerdotum, accipiendam prærequiritur ex *Trident. Sess. 23. c. 15.* approbatio ab Ordinario. Ut licitè absolvat requiritur in eo status gratiæ & competens scientia.

*Quid Jurisdictio & approbatio?*

Jurisdictio est Superioritas super alios in foro conscientiæ judicandos. Una est ordinaria, alia delegata: prima habetur ex v. officii, secunda ex commissione Papæ vel Episcopi. Approbatio est iudicium authenticum de idoneitate Sacerdotis ad excipiendas Confessiones. *Commun. TT.*

*Qui sint alii Ministri Sacramenti*

*Pœnitentiæ?*

Actus ejus sunt pœnitentem disponere, de peccatis judicare, reo insinuare obligationes, peccata remittere vel retinere. Ratio est: *Quia pertinent ad officium ejus debite peragendum.*

**COROLLARIA CASUUM.**

*Coroll. 1.* Vi Jurisdictionis ordinariæ absolute potest in quocunque loco Papa omnes fideles, Episcopus suos Dioecesanos, Parochus Parochianos, Prælatus Subditum,

*Coroll. 2.*

*Coroll. 2.* Vi Jurisdictionis delegatæ à S. Pontifice, suppositâ Ordinarii approbatione, Regulares absolvere possunt quocunque Sæculares in quocunque loco & tempore, etiam Paschali, *ex Constitut. Pii V. &c.*

*Coroll. 3.* Vi Jurisdictionis dubiæ aut probabilis nequit Sacerdos absolvere, saltem licitè & absolutè, nisi postulet pœnitentis necessitas, & tunc defectum Jurisdictionis, si quis sit, supplet Ecclesia; sicut & 1. Quando communi errore ob titulum coloratum Sacerdos creditur habere Jurisdictionem, quam non habet, etiam sciens. Gobat. 2. Quando bonâ fide absolvit nesciens potestatem esse revocatam, Navarr. aut sequitur sententiam probabilem de sua Jurisdictione. Bonac.

*Coroll. 4.* Nequit absolvere 1. Sacerdos simplex, nequidem à venialibus, saltem licitè *ex Decreto Innocent. XI. excipe ex Trid. Sess. 14. c. 7.* articulum mortis, sed absente approbato, ut habet *communior*; imò præsentè, ut censet Her. 2. Præsumens absolutionem ab Ordinario rati habendam, aut facultatem ab eo, si peteretur, dandam. Ratio: *quia deest Jurisdictio actualis.*

*Coroll. 5.* Non approbatus absolvere potest Regularem; dummodò consentiat Prælatus, aut subditus licentiam habeat Confessarium talem eligendi. Religiosi ab uno Episcopo approbati, iter agentes, fidelium Confessiones audire possunt in locis, in quibus non existit



Episcopus, ex Privileg. Gregorii XIII. apud Spor-  
rer num. 678.

Coroll. 6. Defectu approbationis nequit ab-  
solvere Regularis 1. In Dioecesi, pro qua non  
est approbatus, quamvis approbatus pro alia,  
ex *proposit. damnat. ab Alexandro VII.* Item quam-  
vis poenitens sit ex Dioecesi, pro qua est appro-  
batus, ex *Const. Clementis X. superna.* quam tamen  
Platelius intelligit de publica administratione.  
Si verò sit approbatus pro Dioecesi, in qua mo-  
ratur, poterit in ea absolvere venientes ex Dioe-  
cesi, pro qua non est approbatus. *Sixtus IV.*  
2. Si approbatio sit denegata, etiam injuste, ex  
*proposit. 13. damnat. ab Alexandro VII.* 3. Si ap-  
probatio sit revocata ex causa concernente confes-  
siones. *Const. cit. Clemens X.*

Coroll. 7. Illicite absolvit Confessar. 1. Exi-  
stens in peccato M. Quid, si in eo plures suc-  
cessivè absolvat? Unum committere peccatum  
consent Spor-*r part. 1. num. 175.* Lugo, Diana,  
quia unum moraliter ministerium 2. Non sup-  
plens defectum examinis in materia necessaria.  
3. Non judicans de criminum gravitate & qua-  
litate, ubi moraliter possibile. 4. Non instru-  
ens poenitentem de necessariis. Quod si igno-  
rantia rei præceptæ v. gr. restitutionis sit incul-  
pabilis, & instructio videatur non profutura,  
relinquendus est poenitens in bona fide. 5. Cul-  
pabiliter errans cum damno tertii; isque tene-  
tur postea vel intra vel extra Confessionem mo-  
nere poenitentem, & quidem ex Iustitia, si erra-  
verit

verit positivè, v. gr. pœnitentem deobligando à restitutione, aliàs tenebitur ipse restituere; quod etiam debet, si pœnitens jam non possit, potuisset autem, si priùs monitus. *Sporer num. 781. ex communi.*

## CAPUT IX.

## De Absolutione.

*Quibus Absolutio danda, quibus non?*

**A**bsolutio danda est disposito, neganda indisposito. *TT. omnes.*

## COROLLARIA CASUUM.

*Coroll. 1.* Danda est absolutio, quando pœnitens sequitur sententiam probabilem: quia in materia facti, dum agitur de honestate actûs, non tenetur sequi sententiam probabilis orem Confessarii; sequendo quippe suam, non peccat.

*Coroll. 2.* Differenda est absolutio: 1. In dubio, an Confessarius possit absolvere. 2. In dubio de vero dolore & proposito pœnitentis, qui saepe monitus occasionem peccandi non vitavit, non restituit &c. 3. Ob utilitatem pœnitentis, ut dilatione territus peccati agnoscat gravitatem & emendationis necessitatem. 4. Ob defectum examinis & pœnitentis ruditatem, nisi Confessarius juvare possit. Qui notet, pœnitentem cum peccato M. non esse dimittendum sine absolutione, nisi priùs disponatur ad

contritionem, quantum potest; ut probabiliter sit extra statum damnationis.

*Coroll. 3.* Neganda est absolutio: 1. Non confitenti integrè, utpote neganti peccatum, quod Confessarius extra Confessionem certò novit esse commissum & nondum confessum. 2. Non habenti veram contritionem & propositum? cujus signa sunt: Si nolit restituere, inimico reconciliari, evitare occasiones proximas, v. gr. cohabitationem concubinæ &c. Si versetur in consuetudine, & post monitiones nulla appareat spes emendationis. *ex proposito. 6o. damnata ab Innocent. XI.*

## CAPUT X.

### De Reservatione.

*Quid Reservatio Casuum?*

**R**eservatio est negatio Jurisdictionis ad absolvendum à peccato aliquo M. externo. Unde casus reservatus est peccatum, à quo non potest quilibet absolvere defectu Jurisdictionis.

*An detur in Ecclesia potestas reservandi peccata?*

Datur, & est de fide in *Trid. Sess. 14. can. 11.* Colligitur ex verbis Christi *Joan. 20. Quorum remiseritis peccata, remittuntur eis, quorum retinueritis, retenta sunt.*

*Quis*

*Quis possit reservare, & quis à reservatis absolvere?*

Peccata reservare possunt Papa in tota Ecclesia, Episcopi in suis Diœcesibus, Prælati in suis Religionibus; iidemque sicut & delegatus ab eis absolvere possunt directè, non delegatus quandoque indirectè. *Commun.*

*Quid sit indirectè absolvi ab aliquo peccato?*

Pœnitens directè absolvitur à peccatis, quæ subicit clavibus, super hæc enim cadit absolutio; si autem alicujus obliviscatur, aut habeat reservatum & non competentem Confessarium, ab eo absolvitur indirectè, quatenus etiam remittitur; cum sit dispositus ad absolutionem, & unum mortale nequeat remitti sine alio. Postea verò, quando potuerit, peccatum illud tenetur subicere clavibus pro absolutione directâ.

### COROLLARIA CASUUM.

*Coroll. 1.* Non sunt peccata de facto reservata 1. Venialia: quia sunt materia libera Confessionis. 2. Interna: quia de his non iudicat Ecclesia. 3. Dubi, quamvis post absolutionem fiant certa: quia sunt absolutè remissa. 4. Non completa, v. gr. adulterium solum attentatum, Herinx. alique. quia reservatio est strictæ interpretationis. Demum S. Pontifex nullum reservat peccatum, ut habet communior DD. nisi ob annexam ei censuram,

ram ; si igitur ab hac , etiam Bullæ Coenæ , poenitens ob ignorantiam excusetur , peccatum non erit reservatum. Calus verò Episcopales incurruntur etiam ab ignorantibus reservationem. *Commun. contra Navarr. & quosdam alios.* Ratio est : quia reservatio non habet rationem poenæ , & illius ignorantia Confessario non tribuit facultatem absolvendi. Sporer tamen num. 735. cum Gobat & c. censet , poenitentem , si ignoret peccatum suum esse reservatum , saltem pro illa vice posse absolvi à quolibet Confessario , quod certum videtur de absolutione indirecta , aliàs poenitens , qui bonâ fide accessit , deberet sine absolutione recedere ; quod non censetur velle Ordinarii. Monendus tamen est , ut cum eo non redeat , aliàs non absolvendus , nisi ab habente facultatem in reservata.

*Coroll. 2.* Prælati majores Ordinum mendicantium in foro conscientiæ subditos suos etiam Novitios , absolvere possunt ex Bulla Pii V. ab omnibus casibus Papalibus , à quibus possunt Episcopi Dioecesanos ; Hi verò *jure Tridentini Sess. 24. c. 6.* absolvere possunt per se vel alium à se deputatum ab omnibus occultis , exceptâ hæresi , à qua non possunt , nisi per se immediatè ; excipiuntur , contradicente Sannig & nonnullis , casus Bullæ Coenæ , quæ derogat facultati , *Trident. ex prop. sit. 3. damnata ab Alex. VII.*

*Coroll. 3.* Confessarii Regulares ex Concessione Pauli III. absolvere possunt Sæculares pro foro conscientiæ tantum ab omnibus Papæ reservatis

ad



ad forum publicum seu contentiosum non deductis ; exceptis Casibus Bullæ Coenæ & reservatis Episcopo loci & quibusdam intra Italiam ibidem Papæ reservatis , qui sunt 1. Violatio immunitatis Ecclesiasticæ. 2. Violatio clausuræ Monialium ad malum finem. 3. Duellatio. 4. Injectio manuum in Clericos. 5. Simonia.

Coroll. 4. Confessarii Regulares vi privilegii Pontificii à Casibus Papalibus, etiam extra Bullam Coenæ, nequeunt absolvere Religiosos, etiam ejusdem Ordinis : *quia privilegium est pro absolvendis Secularibus.* Adeoque Religiosi absolviendi sunt à suis Prælati ; An etiam absolvi possint ab iis , qui à Provinciali facultatem habent absolvendi à reservatis, dependet à mente illius : an contulerit potestatem solum in casus in ordine reservatos , an etiam in Papales. Unde Confessarii pro casibus in ordine reservatis deputari nequeunt absolvere percussores Fratrum , nisi potestatem habeant , ut supra. *Sporer de Pœnitent. num. 743.*

Coroll. 5. Confessarii Privilegiati à peccatis reservatis absolvere nequeunt extra Sacramentum Confessionis : *quia requiritur absolutio Sacramentalis.* A Censuris verò absolvere possunt extra Sacramentum Pœnitentiæ : quia absolutio à Censura etiam in foro conscientiæ , separari potest ab absolutione è peccatis , Layman c. 10. num. 21. monens tamen , à Censura in foro conscientiæ non esse absolvendum , nisi vel auditâ con-

confessione vel hac sequente; hoc enim iuribus  
& usitatus.

Coroll. 6. Confessarius Regularis nōsse debet  
casus reservados, à quibus nequit absolvere, vi-  
delicet reservados in sua Religione, reservados  
Episcopo loci & reservados in Bulla Cœnæ sal-  
tem in hisce partibus contingentes, qui sunt  
Hæretis formalis & lectio Librorum Hæretico-  
rum; alios Papales, à quibus ex Privilegio  
potest absolvere, scire non tenetur; sufficit di-  
cere: *Absolvo te ab omni vinculo excomm. & inter-*  
*dicti, in quantum possum & tu indiges &c.*

Coroll. 7. Cessat reservatio 1. Si pœnitens sit  
in articulo vel periculo mortis. 2. Si ob im-  
pedimentum perpetuum nequeat adire Pontifi-  
cem vel delegatum; tunc enim casus Papalis,  
etiam Bulla Cœnæ, devolvitur ad Episcopos  
& Privilegiatos Mendicantes, Sporer num. 751.  
*Quid si nec horum aliquem adire valeat? adeat tunc*  
*Parochum vel quemcunque alium approba-*  
*tum. Ita rationabilissimè præsumitur de men-*  
*te Summi Pontificis, & censent Scotus, Lay-*  
*man. alique apud Sporer cit. modò pœnitens*  
*satisfacere velit parti læsæ, si quæ sit; iuretque*  
*quod sublato impedimento se præsentaturus sit*  
*Pontifici ad suscipiendum mandatum ejus; re-*  
*stringunt autem Tambur. de Confess. l. 3. c. 6. Go-*  
*bat num. 145. apud Sporer cit. hoc obligare so-*  
*lùm pro foro externo, addentes, si etiam obli-*  
*get in foro conscientie, sufficere, si pro hoc*  
*pœnitens se præsentet Delegato Papæ seu Regu-*  
*lari*

lari privilegiato. 3. Si Confitens reservata à Superiore absolvatur sacrilegè. Lugo d. 20. num. 106. quia absolvens intendit absolvere, quantum potest; potest autem à reservatione.

Coroll. 8. Confessarius conformare se debet reservatione Diœcesis, in qua absolvit; nihil faciente, sive peccata in Diœcesi, ex qua pœnitens, sint reservata, sive non, ex *Constitut. Clementis X. superna.* Ubi additur: *Nisi eosdem pœnitentes noverit in fraudem reservationis ad aliam Diœcesin pro absolutione migrasse.* Parochus tamen absolvere potest in aliena Diœcesi suum Parochianum, etiam à reservatis ibidem. ita Lugo, Bonac. Franc. à J. M. quia Jurisdictionem habet ordinariam, eamque in foro interno ubique in subditum exercere potest.

Coroll. 9. Habens casum reservatum & non competentem Confessarium, potest urgente necessitate confessionis à quovis Confessario absolvi indirectè, at cum onere postea comparandi coram Superiore, ejusve delegato ad iterum confitendum, vel saltem coram eodem Confessario, si is facultatem absolvendi petere velit. Dixi: *potest*; quia celebrare potest cum contritione & non tenetur prius confiteri, saltem si non habeat aliud mortale; si tamen confiteri velit, & indirectè absolvi, dicere debet peccatum aliquod non reservatum, ut habeatur materia absolutionis directæ; & probabilius etiam reservata, ut constet de dispositione confitentis. Sporer num. 757. ex comm. & tutissima.

CAPUT

## CAPUT XI.

## De Sigillo Confessionis.

*Quid sit? quando & quomodo obliget?*

**S**igillum Confessionis est obligatio Juris Divini semper suo mortali & in omni casu tacendi omnia in Confessione audita, quorum revelatio Sacramentum redderet odiosum; item non utendi notitiâ Confessionis, quando ullo modo fit in gravamen poenitentis, *commun. DD.* quamvis ei ex non ulû eveniret majus. *Henn. ex Declar. Card. 1682.* quia verè uteretur in gravamen poenitentis; item præberetur anîa gravandi poenitentes.

*Unde oriatur Sigillum Sacramentale?*

Oritur ex omni & sola Confessione Sacramentali, etiam non datâ absolutione: *quia est Sigillum Confessionis, illudque omnis & sola Confessio Sacramentalis postulat.*

## COROLLARIA CASUUM.

*Coroll. 1.* Violans Sigillum peccat & contra Religionem & contra Justitiam: contra hanc quandoque leviter, si leviter noceat bono famæ; contra istam in omni materia graviter: quia semper nocet graviter bono Religionis. *Sporer.*

*Coroll. 2.* Peccat contra Sigillum 1. Revelans audita ad averrenda damna, sint quæcunque; urgendus tamen est poenitens, ut damnum vel ipse

ipse avertat, vel Confessario de hoc loquendi facultatem faciat extra Confessionem. Sporer num. 816. 2. Confessarius extra Confessionem loquens cum pœnitente de Confessis sine eius licentia; sive propriè violet sigillum, sive non. 3. Revelans, etiam de licentia pœnitentis, audita in Confessione formaliter, sive ut audita in Confessione: quia sigillum non est in favorem solus pœnitentis, sed etiam Sacramenti. Scot. d. 21. q. 2. contra nonnullos. Ut igitur Confessarius de auditis possit loqui, post absolutionem dicat pœnitens: *qua dico vel dixi, sine dicta extra Confessionem.* Henno.

Coroll. 3. Materia sigilli sunt 1. Omnia peccata mortalia in genere & in specie, vel talia solum in specie. 2. Peccata publica, alias Confessario ignota. 3. Peccata aliena, à pœnitente manifestata. 4. Satisfactio imposita, talis gravis. 5. Pœnitentis indispositio, cui non absoluto negandum non est testimonium Confessionis. 6. Defectus, etiam naturales, tum pœnitentis, tum alterius, quorum revelatio odiosa. *ex Commun.* quia quodlibet illorum, si reveletur, Sacramentum reddit odiosum.

Coroll. 4. Illicitè utitur scientiâ Confessionis: ex ea pœnitentem corripiens, privans officio, negans suffragium, Eucharistiam, assistentiam Matrimonii, absolutionem &c. unde si sponsa neget peccatum ex confessione sponsi cognitum, caveat Sacerdos eam reprehendere, sed quasi non sciens de hoc, eam examinet, & si



neget, absolvat vel absolute, ut vult Sporer, vel conditionatè, ut alii.

*Coroll. 5.* Licitè utitur scientiâ Confessionis: 1. Prælatus ex ea agens suavius & liberalius. 2. Confessarius casus intricatos aliis, suppresso pœnitentis nomine, exponens. 3. Se abscondens ad declinandam alicujus Confessionem; modò pœnitens non advertat, nec alii desint Confessarii. 4. Domo exiens, vel non celebrans sub aliquo prætextu ad evitandam mortem; tamen si complices suspicentur fieri ex notitia Confessionis. Layman. quia ex tali usu nullum pœnitenti, nec alteri gravamen.

*Coroll. 6.* Ad Sigillum obligantur: 1. Confessarius, etiam fictus; Superior & Confiliarius, ad quos recurrit Confessarius de licentia pœnitentis. 2. Interpres. 3. Audientes, sive ex malitia, sive casu, peccata confitentis. 4. Omnes, quibus Sacerdos Confessionem aperuit, etiam mediatè. 5. Inveniens Confessionem scriptam. Roderiq. contra Navarr. Sannig &c. volentes teneri ad secretum naturale; Ratio: quia omnes illi notitiam habent immediatè vel mediatè ex Confessione Sacramentali, saltem à pœnitente intentâ.

*Coroll. 7.* Pœnitens non tenetur sub sigillo servare ea, quæ sibi dicta à Confessario; neque Confessarius, quæ sibi dicta sub sigillo extra Confessionem, vel in Confessione simulata, aut ad finem mortaliter malum. ex commun. quia sigillum oritur ex sola Confessione Sacramentali,

tali, atque sub illud cadunt tantùm ea, quæ  
manifestat poenitens.

\*\*\*\*\*

## TRACTATUS XXIII.

### De Extrema Unctione.

#### CAPUT I.

De ejus Existentia.

*Quid sit Extrema Unctio?*

**E**st Unctio hominis infirmi poenitentis à  
Presbytero facta oleo sacro sub præscripta  
verborum forma ex institutione Divina  
efficaciter significans alleviationem & curatio-  
nem animæ à reliquiis peccatorum. *Communis.*

*An Sacramentum? à quo & quando  
institutum?*

Extrema Unctio est Sacramentum à Chri-  
sto D. N. institutum, de Fide. & quidem imme-  
diatè, & post resurrectionem, quando Joann. 20.  
Apostolos instituit completè Sacerdotes. Her.  
d. 9. num. 8. Postea à S. Jacobo Apostolo pro-  
mulgatum Jacobi 5. *Infirmatur quis ex vobis? in-  
ducatur Presbyteros Ecclesia &c.*

*Quæ materia ejus & forma?*

Materia ejus remota est oleum olivarum,  
proxima est Unctio; Forma est hæc: per  
istam S. Unctionem &c. *Flor. in Decreto.*

## COROLLARIA CASUUM.

*Coroll. 1.* Ad extremam Unctionem requiritur necessitate Sacramenti 1. Oleum benedictum ab Episcopo, *Trident. Sess. 14. c. 1.* vel à Presbytero ex commissione Summi Pontificis, *commun.* contra quosdam, & praxis apud Græcos. 2. Quinque Unctiones quinque sensuum. *Commun. DD.* cum S. Th. In necessitate fieri possunt in uno oculo, aure, manu &c. sub una forma. *Per istas sanctas Unctiones & suam piissimam misericordiam indulgeat tibi Deus, quidquid deliquisti per omnes sensus.* Probabiliter tamen sufficit una Unctio; hinc ob periculum mortis in mora ungi potest sed conditionatè, sola frons sub hac forma: *Per istam . . . quidquid deliquisti per omnes sensus.* 3. Debita forma, ut supra, in qua non sunt verba essentialia: *Sanctam . . . & suam piissimam misericordiam;* reliqua sunt: quia significant partim Sacramenti materiam, partim effectum.

*Coroll. 2.* Requiritur necessitate præcepti tantum: 1. Ut oleum sit eo anno benedictum. 2. Ut Unctio fiat in modum crucis pollice manus dextræ. *Rituale.* Hinc peste grassante, fieri potest virgâ oblongâ, oleo tinctâ.

*Coroll. 3.* Extrema Unctio est Sacramentum unum unitate integritatis, ita ut quælibet Unctio cum forma sua parziale constituat Sacramentum, omnes unum totale. *Scotus 4. d. 23. q. 1m.* quia in qualibet Unctione habetur distincta materia, distincta forma, & distinctus effectus, omnes autem ad unum referuntur effectus.

atum totalem ; ergo sunt plura Sacramenta partialia , unum totale.

## CAPUT II.

### De Ministro, Subjecto, Effectu.

#### *Quis Minister Extreme Unctionis ?*

**M**inister est solus Sacerdos , de Fide. & omnis , etiam excommunicatus ; quia sufficit *Character Sacerdotalis*. Solus tamen proprius ungit per se licite , & debet ex obligatione *Iustitiæ* : quia sic permittit & postulat ratio *Pastoralis Officii*.

#### *Quodnam Subjectum ejus ?*

Subjectum sunt soli fideles post Baptismum lapsi , vitâ vi morbi etiam ex vulnere , partu , senectute &c. periclitantes ; qui tamen per se non obligantur ad illius susceptionem. *Commun. D D.* quia extrema Unctio est instituta pro infirmis ex *Jacobi s.* non tamen de præcepto.

#### *Quis Effectus Extreme Unctionis ?*

Effectus primarius est finalis remissio peccatorum venialium , non mortalium per se *S. Bonav.* quia est Sacramentum vivorum ; ergo forma ejus , quæ significat indulgentiam peccatorum , intelligi debet de peccatis venialibus.

*An possit iterari ?*

Iterari potest Extrema Unctio in diversa moraliter infirmitate ; *ex Trident. Sess. 14. c. 3.*

## COROLLARIA CASUUM.

*Coroll. 1.* Religiosi extremam Unctionem ministrantes sine proprii Sacerdotis licentia ipso facto incurrunt excommunicationem. *ex Clement. 1. de Privileg.* Excusantur, si ministrarent in necessitate, absente Parocho ; vel hic præsens injustè nolit dare. *Sann. ex Bull. Sixti IV.*

*Coroll. 2.* Infirmum absolutum Parochus non tenetur tempore contagionis inungere cum discrimine vitæ ; hæc enim aliis est necessaria, non Extrema Unctio infirmo absoluto.

*Coroll. 3.* Extremæ Unctionis sunt incapaces 1. Non Baptizati. 2. Qui non peccarunt actualiter. 3. Qui nunquam habuerunt usum rationis ; si habuerit postea factus amens, inungi potest, modò Christianè vixerit & non constet, fuisse in peccato M. quando incidit in amentiam. *Gobat num. 826.* 4. Captivi ad mortem. 5. Jam uncti, exstante adhuc eodem mortis articulo. 6. Infirmi non ad mortem : quia ungendus debet periculose egrotare, non tamen expectanda est ultima visa periodus.



# TRACTATUS XXIV.

## De Sacramento Ordinis.

### CAPUT I.

#### De Essentia & Effectu.

*Quid Ordo? quod duplex? an Sacramentum?  
an Episcopatus Ordo?*

**O**Rdo est signaculum quoddam Ecclesiae, quo spiritualis potestas traditur ordinato. S. Thom. Septem enumerantur à Trident. Sess. 23. c. 2. Ostiariatus, Lectoratus, Exorcistatus, Acolythatus, Subdiaconatus, Diaconatus, Presbyteratus.

Tres posteriores dicuntur sacri & majores, alii minores: quia hi in minore, isti majore aetate suscipiuntur, habentque annexam obligationem continentia. Saltem Presbyteratum esse Sacramentum docet fides, quidquid de aliis TT. Præter hos Episcopatus est verus Ordo, Gobat contra Vasq. &c. quia in Ordinatione Episcopi confertur potestas spiritualis; estque Ordo distinctus ab aliis propter distinctam materiam & formam.

*Quid sint singuli Ordines?*

Presbyteratus est Sacramentum, quo confertur potestas ad consecrandum & absolvendum. Diaconatus est, quo confertur potestas ad cantandum solemniter Evangelium & dispensandum sacra Mysteria. Subdiaconatus, quo con-

fertur potestas ad cantandam solemniter epistolam & præparandum in sacris vasis Sacrificii materiam, & sic proportionem servatâ de reliquis. Sannig.

*Quodnam Ordinatorum officium?*

Officium Sacerdotis est consecrare, absolvere &c. Diaconi cantare Evangelium, ex commissione Sacerdotis baptizare, prædicare, dispensare Eucharistiam. Subdiaconi est legere epistolam &c. Acolythi est præparare vinum in urceolis, accendere & deferre candelas. Exorcistæ est conjurare & ejicere dæmonia. Lectoris est legere libros Veteris & Novi Testamenti, Catechumenos instruere & novos fructus benedicere. Ostiarii est custodire claves templi, pulsare &c. ita varii Can. & Con.

*Quæ materia Ordinum? qualiter tangenda? quæ forma?*

Materia Ordinum remota est res, quæ ab Ordinante traditur tangenda, probabilis physice; proxima est ejusdem traditio. Forma cuiusque respectivè Ordinis sunt verba, quæ profert Episcopus. In specie materia Episcopatus est manuum impositio. Materia Presbyteratus est traditio patenæ cum hostia & calicis cum vino, dum confertur potestas consecrandi; & impositio manuum Episcopi, dum confertur potestas absolvendi. Materia Diaconatus est traditio Libri Evangeliorum, & impositio manuum.

num. Materia Subdiaconatus est traditio calicis vacui & patenæ vacuæ & Libri Epistolarum. De aliis patet ex eorum officiis, ut supra.

### *Quis effectus Ordinis?*

Effectus Ordinis 1. Est potestas spiritualis.  
2. Character. 3. Gratia habitualis & actualis.  
*Commun. DD.*

*Coroll.* Peccant M. Episcopus & Ordinandus omittentes tactum physicum: quia Ordinem exponunt periculo nullitatis. Et Sacerdos vel Episcopus taliter ordinatus rursus est ordinandus sub conditione, ad avertenda gravissima damna, quæ ex ordinatione invalida sequi nata; secus esset, si tetigisset physicè, sed mediâtè v. gr. manu opertâ chirothecâ. Gobat.

## CAPUT II.

### De Ministro & Subjecto.

#### *Quis sit Ordinationis Minister?*

**O**rdinationis Minister ordinarius est omnis & solus Episcopus, *Trident. citat.* Ex Commistione Pontific. s. potest quilibet Sacerdos conferre ordines minores & probabiliter Subdiaconatum & Diaconatum, Rodriq. Vasq. Tambur. probantes ex ipso facto. Dixi: *probabiliter*, propter A.A. qui in contrarium vel factum esse negant, vel aliter explicant. Non verò potest Sacerdos conferre Sacerdotium: ita cum S. Tho-

ma apud à M. D. *commun. P.D.* colligentium ex nunquam facto.

### *Quodnam Subjctum Ordinis ?*

Subjectum Ordinis est omnis & solus masculus baptizatus. *c. Mulieres. d. 32.* & sumitur ex institutione Christi in nocte Coenæ.

*Coroll.* Episcopus hæreticus validè ordinat: quia retinet Characterem Episcopalem; idem est de degradato. 2. Puer ante usum rationis ordinatus non obligatur ad castitatem: quia nec eam vovere potuit, nec ejus præcepto voluntariè (ut vult Ecclesia) se subjicere; potest autem & debet, si ordinem exercere velit. Sanchez. 3. Hermaphroditus ordinari valet, si prævaleat sexus virilis, quia censetur mas. Quod si post susceptum Presbyteratum prævaleat sexus foemineus, abstinere debet à consecratione: quia vel non fuit verus sexus virilis, vel in ratione hujus, quia evanuit, æquiparatur defunctis. Lugo. Ut licitè ordinetur, requiritur dispensatio in irregularitate ex sexu monstroso.

## CAPUT III.

### De Qualitatibus Ordinandorum.

*Quid requiratur, ut quis ordinetur licitè ?*

**A**D licitam Ordinationem requiritur, ut ordinandus sit Confirmatus, sed juxta ple-rosque sub obligatione levi, & primâ tonsurâ initia-

initiat. 2. Ut habeat legitimam aetatem, quæ est pro Subdiaconatu annus 22. pro Diaconatu 23. pro Sacerdotio 25. omnes saltem inchoati. 3. Ut sit in statu gratiæ & nullâ censurâ vel irregularitate detentus. 4. Ut habeat Ordinationis titulum; qui sit vel beneficii, vel patrimonii, vel Professionis Religiosæ. 5. Ut ordinetur à proprio Episcopo, qui est originis vel domicilii, vel beneficii; aut ab eo literas habeat dimissorias. Si verò ordinarius ordinandi non sit Episcopus, sed Abbas Jurisdictionem habens quasi Episcopalem, ut Reverendissimus Ordinarius Fuldensis, ad eum pertinet dare dimissorias subditis suis, etiam Sæcularibus. *ex Decisione Rota apud And. à M. D. tr. 8. c. 4.* 6. Ut ordines non suscipiat per saltum v. gr. Diaconatum ante Subdiaconatum; & majores non nisi in quatuor temporibus aut Sabbatho S. 7. Ut servet intersticia, post susceptum unum ordinem majorem expectando per annum Ecclesiasticum ad susceptionem alterius. Reiffenst. l. 1. *Decret. 11.*

*Coroll.* Regulares quoad ordinationem v. r. riis gaudent privilegiis tum ante tum post *Trident.* concessis. Ordinari possunt extra tempora à jure statuta tribus Dominicis aut Festis duplicibus continuis vel interpolatis; sic post *Trident.* concessit *Clemens VIII.* apud Reiffenst. *citat.* 2. Si Episcopus Diocesanus sive in cujus Diocesi existit monasterium, absens fuerit, aut non sit habiturus ordinationes, possunt Prælati Regulares subdi.



subditis Regularibus dimissoriales concedere ad quemcunque alium Episcopum; sic idem Clemens VIII. apud Reiffenst. num. 133.

## CAPUT IV.

## De Ordinatorum Obligationibus.

*Ad quid Ordinatos obliget Ecclesia?*

Constitutos in Ordinibus sacris vel aliquo ipsorum obligat 1. Ad horas Canonicas. Concil. Lateran. c. dolentes. 2. Ad continentiam. Can. 25. Apost. & Concil. Carthag. II. can. 2.

Coroll. Constitutus in ordine sacro non obligatur ad continentiam ex voto. ita Scotus & multi cum illo: quia ordinandi non jubentur emittere tale votum, nec emittere solent; multi verò Canones & Decreta Clericis obligationem continentiae imponunt. Nihilominus Clerici exercentes actum venereum committunt sacrilegium: quia præceptum continentiae est ex motivo Religionis; sicut percussores Clericorum committunt sacrilegium: quia ex eodem motivo est contra illos Canones: *Si quis suadente.* Quod si Clericus ad incontinentiam inducat alium cum alia, scandalum committit, non sacrilegium: quia vi præcepti Ecclesiastici, sive voti (si hoc velis) solum in proprio corpore continentiam servare tenetur.

*Quor*

*Quot & quæ sunt Clericorum  
Privilegia ?*

Sunt duo : Primum dicitur *Canonis*, quod eorum percussores incurrant excommunicationem latæ sententiæ, de quo *c. 2. Tr. de Censur.* Secundum dicitur *fori*, vi cujus exempti sunt à brachio & potestate sæculari.

*Utrum initiatus primâ Tonsurâ gaudeat  
dictis Privilegiis ?*

Gaudet privilegio *fori* : Si Beneficium Ecclesiasticum habeat ; aut Clericalem habitum & Tonsuram deferens, alicui Ecclesiæ ex mandato Episcopi inserviat ; vel in Seminario Clericorum, vel in aliqua schola, vel Universitate, de licentia Episcopi, quasi in via ad majores Ordines suscipiendos versetur. ita *Tri-dens. Sess. 23. de Reform. c. 6.* & sufficit, teste Reifsenst. quælibet harum trium conditio. Gaudet Privilegio *Canonis* : si habitum saltem deferat, serviatque alicuique Ecclesiæ, etsi conjugatus. Insuper Tonsuratus obtinere potest Beneficium Ecclesiasticum, & capax est Jurisdictionis Ecclesiasticæ ad excommunicandum, conferendum Beneficia &c.



# TRACTATUS XXV.

## De Sacramento Matrimonii.

### CAPUT I.

#### De Sponsalibus.

##### *Quid sint Sponsalia?*

**S**PONSALIA sunt futurarum nuptiarum mutua promissio inter personas ad contrahendum matrimonium habiles. *Commun.* dicitur: *fururarum nuptiarum*, ut excludatur contractus matrimonii, qui dici solet sponsalia de presenti. Dicitur: *mutua promissio*, quia sunt contractus onerosus, ultrò citròque obligationem inducens. Unde si quis puellæ promittat matrimonium merè gratuito sine conditione repromissionis, tenebitur is quidem stare promissis, promissio tamen non habebit effectum sponsaliorum, nec ligat puellam. Sanchez l. 1. d. 5.

##### *A quibus possint contrahi?*

Contrahi possunt solum ab illis, qui validdè & licitè contrahere possunt matrimonium; Quia promissio de re illicita non obligat, consequenter est nulla.

##### *Quis Sponsaliorum effectus?*

Primus eorum effectus est per se gravis obligatio contrahendi tempore debito matrimonium; Alter est Jus quoddam inchoatum sponsi

sponsi in corpus sponsæ, & è contra; ita ut peccet etiam contra Justitiam sponsus fornicans cum alia aut sponsa cum alio; non tamen hæc aut ille committit propriè adulterium: quia hoc est violatio thori alieni, sponsus autem & sponsa nondum habent unum thorum.

*Per quid Sponsalia dissolvantur?*

Dissolvuntur sponsalia 1. Mutuo sponsi & sponsæ puberum consensu, etsi fuerint jurata: nam quilibet juri suo, quod per sponsalia acquisivit, potest cedere. 2. Per Professionem Religiosam, non item per ingressum, nisi respectu remanentis in sæculo: quia professio dirimit matrimonium contrahendum, non verò ingressus; ingrediens tamen censetur renunciare juri suo ad matrimonium, adeoque sponsus vel sponsa manens in sæculo potest transire ad alia sponsalia. 3. Per superveniens impedimentum perpetuò dirimens matrimonium. Item dissolvi possunt per quamcunque mutationem notabilem in bonis naturæ, famæ, vel fortunæ sponsalibus supervenientem, aut contrahenti incognitam. *Commun. DD.* quia promissio sponsalitia, etiam jurata, intelligitur rebus ita permanentibus, vel non latente defectu aliquo notabili.

**COROLLARIA CASUUM.**

*Coroll. 1.* Valida sunt sponsalia contracta 1. Sine Parocho & Testibus. *Commun.* Horum enim præsentia nullo jure universali requiritur. 2. Sine con-

consensu parentum, nisi matrimonium cedat in eorum probum, familiarum rixas &c. Tunc enim nequit licitè contrahi matrimonium, adeoque nec promitti. 3. A parentibus nomine filii aut filiae, modò ratificet; alias non: *quia in his filius & filia sunt sui iura.* 4. Ex metu gravi injustè inculso, contra Mastr. Quia nec metus ex se, nec propter eum jus aliquod irritat sponsalia illa; sunt tamen irritabilia. 5. Cum obligatione ad poenam à resiliante solvendam: sunt tamen illicita, & poena non est solvenda. *L. Mulier. Cod. de Spons.*

*Coroll. 2.* Invalida sunt sponsalia contracta 1. Fictè; fingens tamen tenetur alterius damnis. 2. Sine intentione se obligandi. 3. Sine alterius repromissione. 4. Ante Septennium completum. *c. ad dissolv. de d. sponsat. impub.* 5. Sub conditione non tum impletâ; expectandus tamen est conditionis eventus. 6. Ab habente votum castitatis: *quia hoc est impedimentum matrimonii.* Ob eandem rationem sponsalia priora annullant posteriora.

*Coroll. 3.* Sponsus, idem est de sponsa, resiliens sinè iusta causa peccat M. contra Justitiam; absolvendus non est, nisi sponsæ satisfacere promittat, aut accusatus se Judicis accommodare sententiæ.

*Coroll. 4.* Sponsus vel sponsa impubes, adveniente pubertate, resilire potest, etiam alterâ parte invitâ, *c. de illis. mo. d. fiat statim*, scilicet intra triduum, & sponsalia non sint jurata.

*Coroll. 5.*



*Coroll. 5.* Causæ resiliendi sunt 1. Fornicatio sponsi vel sponsæ, etiam per vim oppressæ. 2. Crimen infamatorium ab alterutro sponso aut propinquis commissum. 3. Habitualis infirmitas. 4. Depauperatio. 5. Notabilis mora culpabilis in contrahendo. 6. Vani discessus in terram longinquam sine contenta alterius. Sbogar. quia ad hos, similesque casus sponsalia sese non extendunt.

*Coroll. 6.* Si sponsalia sint manifesta, & causa dissolvendi incognita vel dubia, ad ea solvenda requiritur authoritas & sententia Iudicis Ecclesiastici. Secus est, si causa dissolvendi sit manifesta & certa. Tanner. d. 8. q. 1. num. 72. & alii.

## CAPUT II.

### De Proclamationibus.

*An, quot, à quo & quando faciendæ*

*Proclamationes?*

**P**roclamationes tres matrimonio contrahendo regulariter sunt præmittendæ à proprio contrahentium Parocho. tribus continuis diebus festivis. *Trid. Sess. 24. c. 1.* Dies festivi (quorum nomine venit etiam Dominica) censentur continui, quando inter unum & alium non intercedit aliud festum, sed tantum dies feriati.

### COROLLARIA CASUUM.

*Coroll. 1.* Est peccatum M. omittere proclamationes, nisi dispensaverit Episcopus vel ejus

A a

Vica.

Vicarius, aut urgens excuset necessitas. Sanch. Quia præceptum *Concil. Trident. citat.* graviter obligat, & Parochus omittens proclamationes per triennium suspendi debet ab officio; ut statuit *Concil. Lateran.*

*Coroll. 2.* Si contrahentes ex diversis sint Parochiis, proclamationes fieri debent in utraque. *Declar. Card.* Si contrahentes sint vagi, præcipit *Trident.* diligentem de impedimentis facere inquisitionem.

*Coroll. 3.* Impedimentum non denuncians peccat graviter, quamvis sciat sub secreto naturali, vel juraverit nunquam manifestare, vel etiam, ut habet Sanch. contra Dian. nequeat probare; quia Parocho relinquitur inquisitio; secretum autem naturale & juramentum non obligant cum tanto animarum damno, prout evenit, si non denunciatio impedimento invalidè contrahatur matrimonium. Præmittenda tamen est admonitio fraterna, si profutura. *And. à M. D. tr. 9. c. 8.* Si admonitio nil juvet, dicendum est Ecclesiæ, etsi impedimentum sit infamatorium, utpote ortum ex delicto sponsi vel sponsæ, & hæc vel ille imputet sibi, quod non acquieverit monenti. Gobat *cas. 13. num. 536.* Imò sponsus ipse vel sponsa tenetur aut manifestare impedimentum, esto conjunctum sit cum infamia, aut à proposito contrahendi desistere: Quia tenetur non peccare. Sanch. *disput. 14.*

*Coroll. 4.* Cessat obligatio denunciandi impedimentum: 1. Quando grave imminet malum denun-

denunciandi v. gr. ex delicto complicit vel aliunde. 2. Quando grave timeatur scandalum. 3. Quando alteri innocenti imminet grave damnum in fama, fortuna vel vita. Sanch. citat. num. 9. Gobat num. 536. Quia nec reverentia Sacramenti, nec præceptum Ecclesiæ obligat cum tali incommodo.

### CAPUT III.

#### De Natura Matrimonii.

##### *Quid Matrimonium & quotuplex?*

**M**atrimonium spectari potest 1. In ratione contractus: & est legitimus contractus inter virum & foeminam, quo mutua corporum potestas ad procreationem proliis traditur & acceptatur. 2. In ratione vinculi: & est indissolubilis nexus maris & foeminae ex contractu ortus. 3. In ratione Sacramenti: & est ipse contractus matrimonialis; ut habet superadditam significationem gratiæ. Dividitur in legitimum, ratum, consummatum: primum est præcisè ipse contractus, & reperitur inter non baptizatos, secundum superaddit rationem Sacramenti, tertium copulam carnalem. *Commun.*

*Coroll.* Valet matrimonium 1. Sinè intentione copulæ, & sic fuit inter Deicaram, ejusque sponsum. *Commun.* 2. Inter baptizatos in ratione contractus absque intentione Sacramenti. And. à M. D. tr. 9. num. 78. Quia contractus matrimonialis

nialis non includit essentialiter rationem Sacramenti; excludere tamen non licet.

### CAPUT IV.

De Matrimonii institutione, materia, forma & Ministro.

*Matrimonium à quo & quando institutum?*

**M**atrimonium in ratione contractus & vinculi indissolubilis fuit institutum à Deo in principio mundi. *Trident. Sess. 24.* In ratione Sacramenti à Christo. *Matth. 19.* dum dicit: *Quod Deus conjunxit, homo non separet.* Ubi matrimonii indissolubilitatem explicitè confirmavit, & gratiam Sacramentalem implicitè annexuit.

*Quæ sit Matrimonii materia & forma?*

Materia ejus remota est dominium in mutua corpora, proxima est traditio, forma verò acceptatio. *Commun.* cum S. Thoma. Ratio: Eadem est materia & forma hujus Sacramenti, quæ est ipsius contractus; Sed contractus matrimonialis materia sunt corpora ad generandum tradita, forma est consensus seu acceptatio; ergo!

*Quis hujus Sacramenti Minister?*

Minister sunt ipsi contrahentes, sive per se contrahant, sive per Procuratorem. *Dupasq. d. 1. q. 4.* Quia Sacramentum Matrimonii est  
con-

contractus, ergo minister illius sunt, qui sunt contractus; Sed minister contractus sunt contrahentes, etsi contrahant per Procuratorem; ergo sunt etiam ipsius Sacramenti.

*Coroll.* In contrahente matrimonium requiritur status gratiæ, etiam si contrahat per Procuratorem: *Quia suscipit Sacramentum.* Non requiritur status gratiæ in ipso Procuratore; *Quia nec administrat, nec suscipit Sacramentum, sed solum celebrat contractum nomine sui Principalis.* Si Principalis contrahens sit in statu peccati, & Procuratore contrahente dormiat, non peccat tempore somni, sed ante, quando prævidet, se Sacramentum suscepturum in statu peccati; si vero ad gratiam sit dispositus, eam recipit, sive Procuratore contrahente dormiat, sive vigilet: *Quia nihil obstat.*

## CAPUT V.

### De Consensu Matrimoniali.

*An & qualis ad Matrimonium requiratur consensus?*

**A**D valorem matrimonii requiritur mutuus contrahentium consensus; isque debet esse verus, liber à metu gravi injustè ad hoc incusso, & sensibilibiter expressus sive per verba, sive per nutus aut alia indicia. *Commun.* Si consensus non sit verus, reputatur pro nullo; si non sensibilibiter expressus, nequit acceptari; si sit ex metu gravi, matrimonium est nullum sal-



tem Jure Ecclesiastico, ut tenent omnes; etiam Divino, ut tenent D. Thom. Scotus 4. d. 29. num. 7.

*An sufficiat consensus conditionatus?*

Sufficit consensus conditionatus, si conditio sit de presenti vel præterito, eaque subsistat, & non repugnet naturæ matrimonii, & tunc statim valet matrimonium: *Quia impleta conditione consensus est absolutus.* Quod si contrahens non sciat conditionem esse impletam, valet quidem matrimonium, sed usus ejus est illicitus; donec constet, conditionem esse impletam, & matrimonium validum. Si autem consensus sit de futuro contingenti, suspenditur valor matrimonii usque ad eventum conditionis, quâ eveniente probabilius renovandus est consensus coram Parocho & testibus, saltem ubi non valet matrimonium clandestinum. *And. à Matre D. 6. 7. num. 81.* Ratio est: Quia prior consensus conditionatus non constituerebat matrimonium & assentientia Parochi non erat vera assistentia matrimonii, adeoque repetenda est, ne Sacramentum matrimonii committatur dubio.

COROLLARIA CASUUM.

*Coroll. 1.* Valet matrimonium contractum:  
 1. Sinè consensu Parentum: *Quia proles sunt sui juris in electione statûs perpetui.* 2. Ex metu levi: *Quia non nocet libertati ad contrahendum requisita.* 3. Ex metu gravi justè incusso vel injustè, sed non ad

ad extorquendum matrimonium: *Quia per metum julte incussum non fit injuria; & si non fuerit incussum ad extorquendum matrimonium, manet hoc liberum.* 4. Ex metu gravi: qui à causa naturali, v. gr. tempestate, infirmitate &c. *Quia non infert injustitiam.* 5. Sub conditione turpi v. gr. parriedii impleta. *Herinx d. 3. q. 4. Quia impletâ conditione contractus est licitus, & subsistente consensu validus, contractus autem sub obligatione conditionis turpis implendæ non valet: Quia nequit esse vinculum iniquitatis.*

*Coroll. 2.* Non valet matrimonium contractum: 1. Sinè consensu interno ex gravi metu, etiam cum Juramento. 2. Sub conditione non impleta. 3. Sub conditione impossibili, seriò appositâ. 4. Sub conditione contra substantiam matrimonii, v. gr. contraho tecum usque ad annos 10. vel si des facultatem alias cognoscendi: *Quia in præfatis non adest legitimus & verus consensus.* Non tamen nocet matrimonio intentio non servandi fidem, non reddendi debitum, &c. *And. à M. D. c. 7.* Quia hæc non sunt de substantia matrimonii. Demum nota, non licere matrimonium contrahere sub conditione saltem de futuro, ad evitandum periculum nullitatis & varia inconvenientia.

## CAPUT VI.

## De Matrimonio clandestino.

*Quid Matrimonium clandestinum?*

**M**atrimonium clandestinum est, quod contrahitur sine assistentia Parochi & duorum vel trium testium.

*An validum?*

Regulariter nullum est, annullante illud jure *Trident. Sess. 24. c. 1.* ubi personas ad sic contrahendum reddit inhabiles, ipsumque contrahentem directè annullat; matrimonium autem in ratione Sacramenti irritat solum indirectè: destruendo scilicet contrahentem, sine quo subsistere nequit. Dixi: Regulariter, propter casus in Corollariis.

## COROLLARIA CASUUM.

*Coroll. 1.* Matrimonium clandestinum contrahitur validè: 1. In Parochia, ubi decretum *Trid.* non est promulgatum. *Commun. ex ipso Trident.* 2. Si incolæ loci, ubi *Trid.* obligat, ad locum, ubi non obligat, transeant. And à M. D. nisi fiat cum fraude. *Ex Brevis Urban. VIII. ad Ferdinandum Archiepisc. Colon. apud la Croix num. 712.* Censetur autem fieri cum fraude, si illuc se conferant non animo transferendi, neque ibi figendi quasi domicillum, sed solum animo contrahendi matrimonium sine Parocho & testibus; excipe vagos, qui non habentes ullibi domicillum,

lium, sese accommodare possunt & debent loco, in quo sunt.

*Coroll. 2.* Matrimonium clandestinum invalide contrahitur etiam ab ignorantibus Concilii decretum; item ab existentibus in urgenti necessitate ad contrahendum. Sanch. d. 17. num. 4. Quia ignorantia vel necessitas non habilitat alias inhabiles.

*Coroll. 3.* Parochus à Trid. requisitus debet esse proprius (isque est Parochus domicilii) saltem unius contrahentium, si ex diversis sint Parochiis. Testes verò, quicunque rationis compotes, etiam foeminae, impuberes, & infideles esse possunt. Sanch. Quia Concilium citat, non requirit certas testium qualitates; sunt igitur, teste Gobat, idonei, quos Jus Naturale non arceat.

*Coroll. 4.* Valide assistit matrimonio Parochus: 1. Qui non Sacerdos. Sanchez contra nonnullos; nequit tamen alium substituere, nisi Sacerdotem. Idem ex Trident. citat. 2. In sua Parochia vagos conjungens, etsi alter tantum sit vagus; ita non licite sine licentia Ordinarii. *Remiss. Trident.* 3. Suos Parochianos matrimonio jungens extra Parochiam imò Diocesim. 4. Excommunicatus etiam non toleratus, modò retineat Beneficium Parochiale. 5. Dolo indutus, aut metu coactus, imò contradicens. And. à M. D. c. 8. p. 4. Ratio omnium: Quia habetur assistentia Parochi, isque Ecclesiae testari potest de matrimonio contracto.

Aa 3

*Coroll. 5.*

*Coroll. 5.* Catholici contrahunt valide matrimonium coram vel linè Prædicante in terris hæreticorum, ubi *Concilium Tridentinum* nunquam fuit promulgatum, aut si promulgatum fuerit, expulsi verò Catholicis, non adsint proprii Pastores: Quia in casu Concilii non promulgati, hoc non obligat; & in casu promulgati, si expulsi sint veri Pastores, servari non potest: debet tamen, quantum valet, adhibendo testes & aliquem, si adsit, Sacerdotem. *Ex Declarat. S. Congreg. 1605.* Insuper juxta DD. Germanos apud *Sporer de impedim. num. 35.* valida sunt matrimonia hæreticorum, quæ in Civitatibus Germaniæ habentibus Episcopum, in quibus Catholici permixti hæreticis, ut Augustæ, Hildesii &c. celebrantur coram ministro hæretico: Quia fit sciente, & non contradicente, adeoque tacitè consentiente Summo Pontifice, ne gravia oriantur incommoda.

## CAPUT VII.

### De Unitate Matrimonii.

#### *Quid Polygamia & Bigamia?*

**P**olygamia est conjugium cum pluribus uxoribus simul retentis; Bigamia verò cum duabus successivè. Matrimonium foeminae cum pluribus simul viris dicitur Poliviria; quod omni jure illicitum & invalidum: Siquidem opponitur primario matrimonii bono, quod est generatio, quam impedit varium semen masculinum.



masculinum mixtum foemineo, ut patet in meretricibus.

### *An licita sit Polygamia?*

Polygamia seu pluralitas uxorum jure divino fuit inhibita ab initio mundi. *Commun. TT.* Ex illo *Genes. 2. Adharebit uxori suæ, & erunt duo in carne una.* Ubi non dixit Deus: *Adharebit uxori-bus.* Nec dixit: *Erunt tres vel plures, sed duo.* Nec obstat, quod Abraham, Jacob, alique Sancti Patriarchæ in Veteri Testamento plures simul uxores habuerint: quia c. *Gaudemus. de divortio.* Divinâ dispensatione Sanctis illis Patriarchis fuit permissum, ut populus fidelis multiplicaretur. 2. Polygamia jure divino pariter inhibita est in lege Evangelica. Est definitum in *Trident. Sess. 24. can. 2.*

### *An licita sit Bigamia?*

Bigamia seu secundæ Nuptiæ post mortem compartis sunt per se licitæ & Sacramentum. *De Fide.* Et patet tum ex praxi Ecclesiæ, tum ex illo *1. Corin. h. 7. Mulier alligata est Legi, quanto tempore vir ejus vivit; quod si dormierit vir ejus, liberata est; cui vult, nubat.*

### COROLLARIA CASUUM.

*Coroll. 1.* Uxor bonâ fide transiens ad secundas nuptias excusatur à peccato; sed comparente marito primo, debet ad illum redire & relinquere secundum: Quia matrimonium cum  
secun-

secundo est invalidum. *c. Dominus. de secundo Nuptiu.*

*Coroll. 2.* Ut vir vel mulier valeat transire ad aliud matrimonium, requiritur moralis certitudo de morte prioris conjugis, ita ut nulla prorsus remaneat dubitatio. Sed maritus Berthæ est mortuus, hæc autem de morte ejus dubitat, & in dubio hoc contrahit cum alio; an validè? *R.* Validè: Si intenderit contrahere modo, quo potest, vel sub conditione, si maritus sit mortuus; Invalidè: Si judicaverit, se validè contrahere non posse; nemo enim efficaciter fertur in impossibile.

### CAPUT VIII.

#### De Indissolubilitate Matrimonii.

*An & quo jure Matrimonium sit indissolubile?*

**M**atrimonium legitimè contractum jure divino est indissolubile. *Trident. Sess. 24.* Sumitur ex *Math. 19.* Quod Deus conjunxit, homo non separet. & *1. Corinth. 7.* ait Apostolus: *Hic, qui matrimonio juncti sunt, præcipio non ego, sed Dominus, uxorem à viro non discedere &c.*

*An dissolvi possit ob aliquam causam matrimonium consummatum?*

Consummatum inter Christianos nequit solvi quoad vinculum, nisi potestate divinâ. *TT. unanimiter.* Tum ex perpetuâ traditione Ecclesiæ,

tum ex verbis Christi Matth. 19. & Apostoli 1. Corinth. 7. Est contra hæreticos, volentes, matrimonium dissolvi posse propter fornicationem alterius conjugum, & nonnullas alias causas, sed oppositum definit Concil. Trident. Sess. 24. can. 5. & 7. Dixi: quoad vinculum; quia dissolvi potest quoad thorum, ut cap. seq.

*An dissolvi possit Matrimonium ratum?*

Potest, & solvitur per solemnem Religionis Professionem alterius conjugum; ut definit Trident. citat. can. 6. Et quidem probabilius ex privilegio Christi. Sanch. d. 19. num. 3. An solvi possit etiam jure Pontificio inter T. T. lis est: affirmat Gobat, negat Herinx &c. Sententia affirmans modò est communior & probabilior: Tum quia ad bonum Ecclesiæ regimen pertinet, Christum per verba Joan. 21. *Pasce oves meas*: dedisse facultatem dispensandi in votis, juramentis, matrimonio rato, ac hujusmodi, quando ratio dicat & necessitas postulat. Tum quia Sanch. l. 2. disput. 14. refert, Gregorium XIII. unâ die cum undecim dispensasse.

### COROLLARIA CASUUM.

*Coroll. 1.* In lege nova matrimonium infidelium etiam consummatum dissolvi potest, si unus converratur ad fidem; actuque dissolvitur; quando fidelis aliud contrahit matrimonium. Aud. à M. D. c. 4. p. 2. ex cap. *Gaudemus de divor.* & ex Apost. 1. Corinth. 7.

*Coroll. 2.*

*Coroll. 2.* Matrimonium ratum non dissolvitur per vota simplicia Societatis, ne per votum castitatis, si quod, in susceptione Subdiaconatus. Gobat num. 687. Quia Trident. citat. requirit professionem Religionis, eamque solemnem.

*Coroll. 3.* Conjux semper intrare potest Religionem, quamdiu matrimonium non est consummatum; ad quod requiritur copula perfecta cum seminatione. Sbogar. Imò primo brachii mestri consummare non tenetur *c. ex publico, de conver. Conjug.* Si autem injuriosè opprimatur matrimonium quidem consummatur, nec per professionem solvitur, Religionem tamen intrare potest: Sporer num. 398. Quia per alterius injuriam jure suo non privatur, & opprimens imputet sibi, quod manens in sæculo nequeat ad aliud transire matrimonium.

## CAPUT IX. De Divortio.

*Quid sit?*

**D**ivortium est separatio conjugum quoad thorum & habitationem, manente vinculo conjugii.

*Ob quam causam fieri possit?*

Fieri potest 1. Mutuo conjugum consensu, siue continentiam voveant, siue non; ut tamen vir vel mulier intrare possit Religionem, ultra consensum compartis requiritur, ut ipsa  
simi-

similiter Religionem intret, aut in sæculo manens emitrat votum castitatis: quia sic præveniuntur inconvenientiis, quæ timeri possent. 2. Ob conjugis sive viri sive foeminæ adulterium, & quidem in perpetuum: quia sic concessit Christus *Matth. 19. Quicumque dimiserit uxorem suam, nisi ob fornicationem &c.* ergo ob hanc licet. 3. Ad tempus ob compartis sævitiam, morbum contagiosum, apostasiam à fide &c. Quia cum periculo salutis spiritualis aut gravi damno temporali, quamdiu hoc vel illud durat, nequit conjux obligari ad cohabitandum. *Commun.*

### *Quâ auctoritate fieri possit?*

Divortium propter adulterium fieri potest quoad thorum auctoritate propriâ, quoad cohabitationem per se auctoritate legitimi Judicis. *Sannig d. 18. q. 4.* Quia separatio quoad thorum est res privata, separatio quoad cohabitationem est res publica; adeoque hæc, non illa, fieri debet iudicio Ecclesiæ, excipe nisi adulterium jam sit publicum & notorium. *c. significasti, de Divort.*

### COROLLARIA CASUUM.

*Coroll. 1.* Divortium fieri potest etiam ob copulam Sodomiticam, Bestialitatem, & quemcunque actum luxuriæ, quo conjux cum carne alterius commiscetur per effusionem seminis. *D. Thom. apud à M. D. c. 16.* Quia per copulas istas caro dividitur à conjuge, sicut per adulterium.

*Coroll. 2.*



*Coroll. 2.* Divortium non conceditur ob adulterium : 1. Quando est inculpabile : Ubi enim non est culpa , nec poena esse debet. 2. Quando vir mulieri præbuit causam aut facultatem : Quia particeps est delicti. 3. Quando innocens injuriam remisit. 4. Quando uterque commisit adulterium , esto unum sit occultum. *Sbogar Tr. 65.* Quia peria delicta mutuâ compensatione tolluntur. 6. *Intelleximus. de Adulterio.* Hinc si unus conjux propter adulterium sit dimissus , restituitur , si postmodum etiam alter fornicetur.

*Coroll. 3.* Vir per se non tenetur dimittere adulteram : Quia remittere potest injuriam & cedere juri suo ad faciendum divortium. Quod si dimiserit , innocens non tenetur recipere nocentem , etiam factâ emendatione : Quia divortium propter adulterium , si velit , est perpetuum. Si tamen velit , eum obligare potest ad redeundum. *Coen. d. 2. q. 5.* Quia sententia divortii est in favorem innocentis.

*Coroll. 4.* Tempore divortii temporalis nequit innocens , minus nocens , Religionem profiteri : Quia redire debent ad invicem. Potest tamen innocens tempore divortii perpetui , & post hunc nocens , qui & potest , si innocens nec recipere velit nocentem , nec ipse alium statum assumere. *Andr. à M. D. c. 16. p. 4.*

## CAPUT X.

### De Ufu Matrimonii.

#### *An Matrimonii Usus sit licitus ?*

**L**icitus est, & conjuges debitum conjugale petere possunt & licetè exercere; dummodo fiat debito jure, debito fine, modo & circumstantiis. Si enim secus, vitiatur, ut patebit ex Corollariis.

#### *An sit obligatorius ?*

Est obligatorius, & quidem conjux conjugi iterò petenti reddere per se sub mortali tenetur. *TT. unanimiter.* Ex illo 1. Corinth. 7. *Uxori vir debitum reddat, similiter uxor viro.*

### COROLLARIA CASUUM.

*Coroll. 1.* Conjux debitum nec petere potest, nec reddere 1. Quando scit matrimonium esse nullum, sive compars idem sciat, sive non: *Quia copula est fornicaria.* 2. Quando uterque contraxit malâ fide, utpote in damno de valore, idque periecerat: *Quia per contractum mala fidei nullum acquiritur jus.* 3. Quando uterque habet votum castitatis ex mutuo consensu. *And. à M. D. c. 15. p. 4.* Quia possunt & debent servare votum. Quodsi congregiantur, copula non est fornicaria, sed solum sacrilega, nempe contra votum.

*Coroll. 2.* Conjux debitum petere non potest, sed reddere tenetur: 1. Quando dubitat de va-

lore matrimonii, & compars est in bona fide: *Quia propter dubium unius conjugis alter non est privandus jure conjugii, quod acquisivit bonâ fide contrahendo.* Si tamen conjux dubitans bonâ fide contraxerit, factâ diligenti inquisitione potest etiam petere: *Quia Possessio stat pro valore matrimonii.* Herinx q. 6. 2. Si habeat votum castitatis emissum ante nuptias vel post, sine consensu compartis: *Quia voto suo aut dubio comparti præjudicari non potest.* Qui verò votum habet Religionis, peccat mortaliter matrimonium consummando: *Quia ante consummationem ingredi potest & debet Religionem.* At post consummationem debitum licitè reddere potest & petere, donec conjux moriatur vel adulteretur. Sporer num. 457. Quia eousque votum suum implere non potest. 3. Si contraxerit affinitatem cum propriâ conjuge ex incestu cum consanguineâ ejusdem in 1. vel 2. gradu; Si tamen incestum commiserit cum ignorantia facti vel juris, debitum etiam posse petere docet Sanch. item cum tali incestuoso, sicut & cum habente votum castitatis, dispensare ad petendum debitum possunt ex Oraculo Pii V. Confessarii Regulares à Provinciali deputati. Marchant. tir. 12. q. 3. Reiffenst. tr. 6. d. 3. num. 48.

Coroll. 3. Conjux conjugis debitum petenti reddere non tenetur: 1. Ex parte petentis: Si jure petendi sit privatus per adulterium vel incestum; item si perat in ebrietate, vel nimis frequenter & importunè. 2. Ex parte reddentis: Si timendum sit ipsi ex redditione grave malum.

malum. 3. Ex parte prolis: Si non possit ali; aut timeatur ei periculum mortis, abortûs, monstruositatis &c. 4. Ex parte actûs: Si petatur in loco sacro, cum periculo pollutionis &c. Sannig *d. 18. q. 2.* Ex quo

*Nota:* Quando conjux debitum petit illicitè ex parte personæ, v. gr. ob votum, alter reddere potest imò tenetur; Secus est, si petat illicitè ex parte actûs, v. gr. in loco vel modo indebitis: *Quia jus habet activè & passivè ad actum cum tali persona, non ad actum in loco vel modo illicitu.* Sporer *de Matrimon. num. 519.*

*Coroll. 4.* Actus conjugalis exercetur per se licitè: 1. Causâ prolis. 2. Causâ valetudinis. 3. In remedium continentiae; ob solam tamen voluptatem exercitus non caret omni culpâ *Innocent. XI.* 4. In festo solemnî. 5. Tempore menstrui & lactationis. 6. Quando uxor est gravida, si tamen absit periculum abortûs. *Cæn. ex commun.* Insuper sermones venerei, oscula & tactus licent conjugibus, seclusis semper tribus: dubio de valore matrimonii, voto castitatis, & periculo pollutionis. Sporer *cit. num. 505.*

*Coroll. 5.* Actus conjugalis exercetur illicitè: 1. Si abruptatur cum effusione seminis; huius tamen periculo cessante excusantur à Sanch. Pauperes eum abruptentes, ne proles generentur. 2. Cum imaginatione alterius personæ, estque adulterium. 3. In vase innaturali, & est Sodomia. 4. Si fiat stando, vel præposterè à tergo servato vase naturali, aut viro succubo;

Secluso tamen periculo pollutionis, solum est V. imò nullum, si iusta postulet causa. Andr. à M. D. c. 15. p. 5.

## CAPUT XI.

### De Impedimentis impediētib.

*Quæ dicantur Impedimenta  
impediētia?*

**I**mpedimenta impediētia sunt: quæ impediunt ne licitè contrahatur matrimonium, ipsum tamen contractum non irritant.

*Quot illorum sint?*

Sunt de facto quatuor: primum est tempus ab Adventu usque ad Epiphaniam, & feriâ 4. Cinerum usque ad Dominicam in Albis inclusivè; quo *Trident. Sess. 24. c. 10.* prohibet solemnes nuptias, non ipsum contractum matrimonialem. 2. Est prohibitio matrimonii ab Episcopo vel Parocho facta. 3. Est votum, sive sit simplex castitatis, sive Religionis, sive sacrorum Ordinum, sive coelibatûs. 4. Sunt sponsalia cum altera personâ. Omnia comprehenduntur hoc versiculo:

*Tempus sacratum, vetitum, Sponsalia, votum.*

Plura, quæ erant jure antiquo, sunt abolita. Reiffenst. tr. 14. d. 14. num. 2.

COROL-



## COROLLARIA CASUUM.

*Coroll. 1.* Contrahens matrimonium cum impedimento impediēte contrahit validè, sed per se peccat graviter. Dispensare potest in omnibus Episcopus, si excipias sponsalia & votum tum castitatis perpetuæ, tum Religionis: Quia per sponsalia acquisitum est jus sponso & sponsæ, quod tollere vel impedire nequit Episcopus; dispensatio autem in voto præfato est reservata Pontifici. *Commun.*

*Coroll. 2.* Qui habens votum simplex castitatis, contrahit matrimonium, peccat mortaliter tum contrahendo, si contrahat animo consummandi; tum debitum petendo; tum primâ vice reddendo: *Quia in omnibus illis agit contra votum, quod potuit & debuit observare.* Post consummatum autem matrimonium potest & debet conjugi petenti debitum reddere: *Quia per votum juri ejus non potuit præjudicare.* Petere verò debitum nunquam licet, donec à sacra Pœnitentia vel habente dispensandi facultatem, obtinuerit dispensationem.

*Coroll. 3.* Qui habens votum non nubendi, vel suscipiendi Sacros Ordines, contrahit matrimonium, peccat graviter contrahendo; debitum verò petere potest & reddere: *Quia ad non petendum & reddendum debitum votum se non extendit.* Qui verò habens votum Religionis, contrahit matrimonium, peccat & contrahendo, si habuerit animum consummandi, & consummando: *Quia per utrumque agit contra votum, reddens*

*illud pro tempore conjugii per se observatu impossibile. Fata autem semel consummatione matrimonii, potest & reddere & petere debitum, donec vel conjugē moriente, vel consentiente, vel adulterante, possit Religionem ingredi, sicque votum implere. Herinx, Reiffenst. & alii.*

## CAPUT XII.

### De Impedimentis dirimentibus.

*Quæ sint & quotuplicia?*

**I**mpedimenta dirimentia sunt, quæ obstant, ut nec validè contrahi possit matrimonium. Aliqua dirimunt matrimonium jure naturali, aliqua divino, aliqua Ecclesiastico, ut infra. In Ecclesia esse potestatem statuendi ejusmodi impedimenta, definit *Concil. Trident. Sess. 24. can. 4.*

*An obligent & afficiant ignaros?*

Obligant: Quia impedimentum, siue notum siue ignotum reddit inhabilem ad contrahendum; ignorantia autem inhabilem non habilitat. Unde bonâ fide contrahentes cum impedimento, a tunc contrahunt invalidè; excusantur tamen à peccato, & durante bonâ fide copula est fornicaria solum materialiter. *Quid si erroneè quis putet, subesse impedimentum?* Contrahit validè, si contrahere intendat, saltem efficaciter & expressè, quantum potest; Si tēsus, invalidè.

*Quot*

*Quot sint impedimenta dirimentia?*

Sunt numero 14. nempe 12. de jure antiquo & 2. de jure novo Tridentini; omnia comprehenduntur his versibus:

*Error, conditio, votum, cognatio, crimen,  
Cultus disparitas, viti, ordo, ligamen, honestas,  
Si sis affinis, si forte coire nequibus,  
Si Parochi & duplicis desit presertim testis;  
Si mulier sit rapti loco, nec reddita tui;  
Hæc facienda vetant connubia, facta retractant.*

## ERROR.

*Quis dirimat & quo jure?*

Error circa personam dirimit matrimonium jure naturæ; non circa qualitatem aut fortunam: Quia stante errore circa personam etiam concomitante, vel in eam redundante, ut si volenti primogenitam detur alia, deficit consensus in eam.

*Coroll.* Invalidè contrahit, qui putans ducere Cajam, ducit Titiam; Validè verò, qui Titiam putans virginem postea invenit corruptam; excipe nisi apposuerit conditionem: *Contraho tecum si sis virgo*; quia iterum deest consensus; non enim impleta est conditio, à qua in casu posito dependet. *Sporer num. 6.* Ubi nota, ad irritandum matrimonium non sufficere solam intentionem habitualement contrahendi cum persona sic qualificata, v. gr. quatenus si seivisses,

personam esse corruptam vel ignobilem, non contraxisses; nam in contractu non attenditur, quid voluisses in aliis circumstantiis, sed quid re ipsâ volueris circa substantiam contractûs. Uti igitur valor matrimonii dependeat à conditione, debet hæc actualiter aut virtualiter esse intenta: actualiter est intenta, si contrahens actum apponat; virtualiter, si antea declaraverit nolle se contrahere cum Martha, nisi sit nobilis, & hoc animo non revocato, etsi de tali intentione actu non cogitans, contrahat.

## CONDITIO.

*Quid intelligatur per conditionem  
servilem?*

Intelligitur servitus propriè dicta, quâ aliquis vel aliqua est mancipium, nimirum ita Domini sui, ut ab eo possit venundari.

*An & quo jure dirimat Matrimonium?*

Conditio servilis ignorata dirimit matrimonium inter liberum & servam, item servum & liberam. Ita omnes. Idque Jure Ecclesiastico, ita Sanch. cum multis ex c. ad nostrum. de Conjugio Servorum. est contra nonnullos, volentes dirimere jure naturali.

Coroll. Valet matrimonium: 1. Si servus contrahat cum servâ: Quia utrimque paritas. 2. Si liber sciat vel dubitet, esse servam, & tamen contrahat cum ea: Quia cedit juri suo. 3. Si contra-

tra-

trahat cum servis adscriptitiis vel originariis :  
Quia non sunt propriè servi, sed homines liberi,  
solum quoad aliqua obsequia Dominis suis ad-  
stricti, quales in Bohemia. Reiffenst. num. 59.

## VOTUM.

### *Quale Votum dirimat Matrimonium ?*

Votum solemne castitatis in Religione ap-  
probata dirimit matrimonium contrahendum,  
imò & contractum, si non sit consummatum.  
*Trident. Sess. 24. can. 6. §.*

*Coroll.* Matrimonium non dirimit votum  
simplex castitatis; excipe vota simplicia Societat.  
Jesu, post biennium Novitiatus emitte solita,  
quæ ante legitimam è Societate dimissionem  
dirimunt matrimonium contrahendum. ita Con-  
stitut. Gregorii XIII. Ascendente Domino.

## ORDO.

### *Quis Ordo dirimat Matrimonium ?*

Ordo sacer, nempe Subdiaconatus, Dia-  
conatus & Presbyteratus dirimunt matrimo-  
nium contrahendum. Est definitum in *Tri-  
dent. Sess. 24. can. 9.*

*Coroll.* Impedimentum Ordinis oritur ex jure  
duntaxat Ecclesiastico, quo Clerici in Sacris con-  
stituti redduntur inhabiles ad contrahendum  
matrimonium. Unde si quis eorum contra-  
here attentet, contrahit invalidè, & excommu-  
nicationem ipso facto incurrit. *Clem. eos qui. de*

Bb 5. cognat.



*cognat. & affin.* Si autem matrimonium iniêrit ante ordinationem, illud manet.

## COGNATIO.

*Quotuplex? quæ dirimat Matrimonium?*

Cognatio triplex est scilicet carnalis, spiritalis, & legalis: Carnalis sive consanguinitas est conjunctio personarum, quarum una per carnalem propagationem descendit ab altera, vel ambæ ab eadem tertia. Dirimit matrimonium usque ad 4. gradum inclusivè; & quidem jure naturæ in linea recta in 1. gradu juxta omnes, in secundo juxta communior. in quocunque juxta Scot. & in linea transversa in 1. tantum gradu juxta communior. In reliquis, secundo, tertio & quarto lineæ transversæ solo Jure Ecclesiastico. *Sporer num. 70. ex c. non debet. de consanguin. & affin.* Ubi

*Nota:* In linea recta, quæ est ordo personarum, quarum una descendit ab altera, esse tot gradus, quot sunt personæ, dempto stipite; sive tot gradus, quot generationes: Sic avus cum nepote est in 2. gradu. In linea transversa æquali, quæ est ordo personarum æqualiter à communi stipite distantium, tot gradibus personæ distant inter se, quot gradibus distant à stipite proximo: Sic frater & soror sunt in 1. gradu, utriusque nepotes in 3. In linea transversa inæquali, quæ est ordo personarum, quarum una  
remo-

remotior à communi stipite, tot gradibus personæ distant inter se, quot gradibus remotior distat à stipite communi: Sic patruus & nepos distant inter se 2. gradibus, frater & sororis nepos tribus. Ita gradus numerantur à Canonistis in ordine ad matrimonium.

Cognatio spiritualis est propinquitās orta ex Baptismo vel Confirmatione. Matrimonium contrahendum dirimit Jure Ecclesiastico. vid. *Cap. VII. de Baptism.*

Cognatio legalis est propinquitās orta ex adoptione alicujus in filium vel filiam. Dirimit matrimonium inter adoptantem & adoptatum, ejusque legitimos descendentes; item inter adoptatum & adoptantis uxorem, ac proles naturales sub patria potestate existentes. *c. unicum. de cogn. leg.* Hæc intelligenda sunt de adoptione perfecta, quâ personâ in alterius familiam transfertur, & instar prolis legitimæ esse incipit.

## AFFINITAS.

*Quid sit & inter quos?*

Affinitas est propinquitās personarum, quarum una cum consanguinea alterius habuit copulam carnalem. Intercedit inter solum carnaliter cognoscentem & consanguineos cognitæ, ac carnaliter cognitam & consanguineos cognoscentis; & quidem in quo gradu aliquis est consanguineus personæ carnaliter cognitæ, in eodem sit affinis cognoscenti, ac vicissim.

*Quæ*

*Quæ & in quo gradu dirimat matrimonium ?*

Affinitas ex legitimo thoro dirimit matrimonium usque ad 4. gradum, ex illegitimo usque ad secundum inclusivè. *Trident. Sess. 24. c. 4.* Sed quo jure? Affinitatem in linea recta v. gr. inter privignum & novercam dirimere jure naturæ, affirmant quidam; negat cum multis Sanchez l. 7. d. 66. num. 7. asserens: Affinitatem in quocunque gradu, etiam in linea recta, dirimere matrimonium Jure solum Ecclesiastico.

*Coroll.* Invalidè contrahit matrimonium cum Caja, qui copulam habuit cum ejus sorore, quamvis ebrîa, vel coactâ, vel ignorante jus aut factum; validè tamen: Si copula non fuerit perfecta utpote sinè seminatione, vel Sodomitica; item validè contrahunt duo fratres cum duabus sororibus. *Sporer num. 72.* Quia ad affinitatem requiritur & sufficit copula perfecta; & affinitas non parit affinitatem, sive non oritur inter consanguineos viri cognoscentis & consanguineos mulieris cognitæ. c. *Super his. de consang. & affin.*

## HONESTAS.

*Quid publica Honestas ?*

Publica Honestas est propinguitas, quæ oritur tum ex sponsalibus inter sponsum & consanguineos sponsæ, ac vicissim; tum ex matrimonio rato etiam invalido (nisi invalidum fuerit

rit ex defectu consensûs) inter maritum & consanguineos uxoris, ac vicissim.

*Quæ dirimat Matrimonium & quo jure?*

Orta ex sponsalibus dirimit matrimonium cum consanguineis sponsi in 1. tantum gradu, ex Trident. Sess. 24 c. 3. Orta verò ex matrimonio rato dirimit usque ad 4. gradum inclusivè. *Commun.* & quidem Jure tantum Ecclesiastico: Quia solum Ecclesia statuit, ut inter illos, inter quos publica honestas, ob eam non valeat matrimonium.

**COROLLARIA CASUUM.**

*Coroll. 1.* Qui sponsalia contraxit cum una sorore, postea nequit ducere alteram, tametsi sponsalia mutuo consensu sint dissoluta, aut sponsa mortua. Gobat ex Declar. S. Congreg. Quia impedimentum est perpetuum.

*Coroll. 2.* E duabus sororibus neutram potest ducere: 1. Qui post sponsalia cum una fornicatur cum altera: Quia cum prima contraxit affinitatem, cum altera impedimentum publicæ honestatis. Si autem post fornicationem cum una contrahat sponsalia cum altera, potest ducere primam: *Quia sponsalia sunt invalida.* 2. Qui cum utraque commiscetur carnaliter: *Quia utriusque fit affinis.* 3. Qui post sponsalia cum una contrahit matrimonium cum altera: Quia duplex impedimentum publicæ honestatis. Sbo-  
gar

gar *Tr. 90. num. 3.* Unum ex sponsalibus, alterum ex matrimonio rato, quamvis invalido.

## LIGAMEN.

*Quid? quo jure dirimat Matrimonium?*

Ligamen est vinculum inter virum & uxorem ex contractu matrimoniali. Dirimit nuptia cum alia persona contrahendum jure tum Divino *1. Corinth. 7.* Tum Ecclesiastico. *c. de sponsa duorum.* Est ex *Trident. Sess. 24. c. 2.*

*Coroll.* Neutri conjugum quovis prætenu licet ad secundas nuptias transire, nisi habita notitiâ moraliter certâ de morte alterius. *c. in praesentia. de sponsalibus & matrimon.* Ad hanc moralem certitudinem sufficit *1.* Testimonium authenticum Parochi. *2.* Unus testis de visu, si sit omni exceptione major. *3.* Vir bonæ fidei, qui juratus deponit de morte conjugis. *4.* Vir bonæ fidei, qui suæ scientiæ affert probationes, signa & testimonia. *5.* Unus testis de visu, qui similiter affert certa indicia nec vacillat in verbis, maximè si propter locorum distantiam & circumstantias major probatio non sit speranda. Sanchez apud Sporer *de impediment. num. 51.* Non verò sufficit unus vel plures testes de auditu tantum, seu rumor de morte conjugis, multò minus diuturna illius absentia: Quia mortem non faciunt certam. Si tamen accedant non levis momenti indicia, conjecturæ vel præsumptiones,

nes, C  
simula  
tere p  
dere;  
labit.

Q  
D  
in mo  
rium  
Jure  
mon.

q. 1.  
tentu  
dum

que  
solu  
mit  
effic  
cum  
con  
hon  
nius  
dit



nes, Confessarius non consultus prudenter dissimulando, si circumstantiæ postulent, permittere poterit; interrogatus verò vix positivè suadere; post factum seu contractum turè dissimulabit. Ex Layman, Sporer citat. Plura vide c. 7.

## CRIMEN.

### *Quale crimen dirimat Matrimonium?*

Dirimunt conjugicidium sive machinatio in mortem conjugis, effectu secuto; & adulterium, sed in certis tantùm casibus, ut infra. Jure novo Concilii Tridentini dirimit matrimonium etiam Raptus; sed de hoc infra.

### *Quo jure?*

Jure tantùm Ecclesiastico. c. si quis vivente. 31. q. 1. & alibi. Ratio sic statuendi fuit, ut sic vitentur homicidia & adulteria inter conjuges, dum juvare non possunt ad aliud matrimonium.

### *Quando?*

Quandoque solùm conjugicidium, quandoque conjugicidium cum adulterio, quandoque solum adulterium: Solum conjugicidium dirimit matrimonium; quando vir cum foemina efficaciter conspirat in mortem uxoris vel uxor cum viro in mortem mariti, ut postea inter se contrahant matrimonium. Conjugicidium sive homicidium cum adulterio dirimit matrimonium: quando solus adulter vel adultera occidit conjugem ad contrahendum cum adultera matri-

marrimonium; etsi hæc de tali intentione & machinatione mortis non sciverit. *c. significasti de eo qui duxit.* Solum adulterium sinè homicidio dirimit matrimonium: quando adulter & adultera promittunt sibi invicem matrimonium vel actualiter contrahere attentant, nihil faciente, sive promissio matrimonii adulterium præcedat, sive sequatur. Reiffenst. *commun. Canonist.*

*Coroll.* Validè contrahi potest matrimonium: 1. Quando unus machinatur mortem conjugis altero inscio & sinè adulterio. 2. Quando conspiratio in mortem non fit ad contrahendum matrimonium. 3. Quando mors non sequitur ex actione conspirantium. 4. Quando solùm committitur adulterium, & non est *formale* ex parte unius, utpote ignorantis, compartem esse matrimonio ligatam; aut non *perfectum*, utpote sinè seminatione intra vas; aut sinè mutua & seria promissione matrimonii. 5. Quando uxoricidium aut viricidium non est physice vel moraliter procuratum, sed solùm ratihabetur. *And. à M. D. c. 12. p. 5. & commun.*

## RAPTUS.

*Quid sit? quando, quo jure dirimat matrimonium?*

Raptus est violenta foeminae renitentis abductio, causâ contrahendi matrimonii. Dirimit matrimonium inter raptorem & raptam, quamdiu in potestate raptoris manserit; etsi liberè con-

consentiat; & hoc jure *Conciliu Tridenti Sess. 24 c. 6.*  
Si verò post raptum reddita sit loco tuto & li-  
bere consentiat, valet matrimonium: Quia  
non amplius est in potestate raptoris.

*Coroll.* Raptus propriè non est: 1. Si abdu-  
catur puella consentiens, factâ violentiâ solis  
parentibus. Gabat contra Navarr. 2. Si non  
fiat ad contrahendum matrimonium. Sanchez  
contra Bonac. 3. Si quis rapiat pro alio, qui  
nec consensum dedit nec mandatum. 4. Si  
foemina rapiat virum. Sporer num. 30.

## VIS.

*Quæ Vis, & quo jure dirimat  
Matrimonium?*

Per vim intelligitur metus gravis injustè in-  
cussus ad extorquendum matrimonium quod  
metum patiens alioquin nullo modo contraxis-  
set. Dirimit matrimonium juxta *commun. R.R.*  
jure solum Ecclesiastico. *c. cum locum. de Sponsalibus.*  
juxta D. Thom. D. Bonac. Scot. 4. d. 29. num. 7.  
Jure etiam Divino: Quia hoc jure matrimo-  
nium est vinculum perpetuum & indissolubile;  
ergo etiam debet esse perfectè liberum.

*Coroll.* Metus reverentialis erga Parentes &  
Majores ordinariè non sufficit ad irritandum  
matrimonium, nisi accedant sævitia & graves  
minæ. Sanch. Mast. & plures alii. Quia metus  
reverentialis de se non est gravis & cadens in  
constantem virum; ergo. Plura de consensu  
ex metu vide c. 5.

## IMPOTENTIA.

*Quæ & quo jure dirimat Matrimonium ?*

Impotentia ad copulam carnalem, si perpetua sit & conjugium antecedar, matrimonium dirimit jure naturæ; Secus, si superveniat matrimonio jam contracto. c. hi. 32. q. 7. Item c. Fraternitatis. de frigidis & maleficiatis.

*Quid in dubio, an impotentia sit perpetua ?*

Datur à jure triennium ad experientiam, quo elapso si adhuc duret, censetur perpetua, debentque separari vel manere tanquam frater & soror. c. Consultationi. de frigidis.

*Quid de impotentia ætatis ?*

Impotentia ætatis reducitur ad impotentiam cœundi, & est ætas impubes nempe masculi ante annum 14. & foemellæ ante 12. completum, quæ dirimit matrimonium Jure Ecclesiastico. Excipit jus c. de illis. casum, quo malitia supplet ætatem, utpote si constet, puerum & puellam sufficientem rationis usum & copulæ carnalis potentiam esse assecutos.

## COROLLARIA CASUUM.

Coroll. 1. Validè per se contrahunt matrimonium: 1. Senes. 2. Moribundi. 3. Steriles. 4. Hermaphroditi juxta Sexum prævalentem; Si neu-

neuter prævalet, ipsis relinquitur oprio, debentque jurare, quod non velint alio uti. Ratio: Quia omnes illi sunt habiles ad copulam naturalem, quæ per accidens tantum impeditur vel inepta est ad generandum. Deinde matrimonium non tantum est propter bonum prolis, sed etiam in remedium concupiscentiæ.

*Coroll. 2.* Invalidè contrahunt castrati, seu perfectè eunuchi, nempe utroque testiculo carentes: Quia per se sunt inepti ad generandum, utpote vero semine destituti.

*Coroll. 3.* Si impotentia ad copulam propter viri frigiditatem vel propter masculinam superveniat matrimonio jam contracto, manet hoc validum. *Sed quid licet conjugibus illis?* Licet tactus & oscula, modò absit periculum pollutionis. Licet etiam tentare actum conjugalem, quamdiu superest spes, ipsum perficiendi, tametsi aliquando præter intentionem contingat pollutio; Si verò de consummatione copulæ sit totaliter desperatum, accessus est omnino illicitus: *Quia non fit, nisi pollutio.* Sanchez, Layman & alii.

## CULTUS DISPARITAS.

*Inter quos & quo jure dirimat Matrimonium?*

Cultus Disparitas dirimit matrimonium inter baptizatum & non baptizatam Jure Ecclesiastico.



co. Scot. 4. d. 39. Invalide proinde contrahit fidelis cum infideli.

*Coroll.* Validum regulariter est matrimonium Catholici cum hæretica & è contra, sed illicitum. Permitti potest ex causa, maxime in Germania, si absit periculum apostasiæ, & proles educetur catholicè. Pacta enim, ut quidam ex liberis educentur in fide catholica, quidam in hæresi, sunt prorsus impia, irrita, juriq; naturali ac divino de bona prolium educatione repugnantia. Gobat *Tr. 9. num. 220.* Proinde ut proles vel una educetur in hæresi, conjux nunquam positivè consentire potest; quandoque, si impedire nequeat, habere se potest permissivè, prolem instructurus in fide catholica, quantum potest.

### CAPUT XIII.

#### De Dispensatione.

*Quis possit dispensare in impedimentis  
Matrimonii?*

**I**N impedimentis jure naturali dirimentibus dispensare nequit Summus Pontifex, potest & per se solus in dirimentibus solo jure Ecclesiastico, sed non licitè absque iusta causa. Gobat *num. 603.* Obtentâ dispensatione matrimonium invalidè contractum est revalidandum, non necessariò coram Parocho & testibus, si ante adfuerint, & impedimentum sit occultum, sicque decla-

declarâsse Pium V. testatur Navarr. Porro modum revalidandi tradit Sporer *num. 447.*

### COROLLARIA CASUUM.

*Coroll. 1.* Post matrimonium contractum ex tacita Pontificis licentia per accidens dispensare potest Episcopus, si sequentes adsint conditiones: 1. Si matrimonium sit contractum bonâ fide. 2. Si impedimentum occultum. 3. Si separatio nequeat fieri absque scandalo. 4. Si non pateat accessus ad Pontificem vel ejus Delegatum, nempe propter paupertatem aut distantiam loci & magnum periculum incontinentiæ inter conjuges putativos, qui cohabitant & sine scandalo separari nequeunt. Gobat *num. 576.* Reiffenst. *Tr. 14. d. 14. q. 5.* & alii commun.

*Coroll. 2.* Ad matrimonium contrahendum dispensare potest Episcopus, si necessitas urgeat aliter inevitabilis, v. gr. si omnibus paratis ad nuptias cras celebrandas Confessarius hodie deprehendat impedimentum. Quod si non pateat recursus ad Episcopum, Confessarius poenitentem relinquat in bona fide, & occultè agat pro dispensatione; Si verò poenitens sciat impedimentum, aut dubitet, Confessarius 1. Doceat veritatem. 2. Permittat contrahere cum intentione quantum potest. 3. Dicat abstinentium esse à copula, donec dispensatio impetretur & matrimonium revalidetur. Sanch.

*Coroll. 3.* Confessarius deprehendens matrimonium invalidè contractum, attendat, an poenitentem

nirens in bona aut mala fide? Si in bona, relinquat, & dispensationem, si possibilis, procurer; Si in mala, dicere tenetur, matrimonium esse nullum; & si impedimentum sit indispensabile, omnino urgenda est conjugum separatio; quæ, si moraliter impossibilis, cohabitare possunt tanquam frater & soror factâ separatione quoad thorum. Si autem impedimentum sit dispensabile, & matrimonium bonâ fide contractum, dispensare potest Episcopus, ut supra. Si malâ fide contractum, solus Pontifex dispensare potest, at vix solet, quo dispensationem negante facienda est separatio ut supra. *Sporer num. 444. de Matrimon.*

## CAPUT XIV.

### Praxis procurandi Dispensationem.

*Quia observandum à petente dispensationem?*

**A**tendere debet, ne in supplicatione exprimat falsum, aut occultet verum, quod est exprimendum; aliâs dispensatio lubricitatis est & nulla.

*Quid exprimendum in supplicatione?*

I. Impedimentum in sua specie: nam si unum ponatur pro alio, v. gr. affinitas pro consanguinitate, nulla erit dispensatio. II. Pluribus impedimentis concurrentibus, omnia sunt exponenda, etsi quandoque sint ejusdem speciei,  
v. gr.

v. gr. duplex affinitas, quam contraxit, qui cognovit duas suæ sponſæ consanguineas. III. In impedimentis consanguinitatis, affinitatis ac publicæ honestatis exprimi debent gradus; item an consanguinitas vel affinitas sit in linea recta vel transversali; si in transversali, an sit in gradu æquali, vel inæquali. IV. Exprimatur, utrum affinitas sit ex copula conjugali, vel fornicaria, an publica honestas ex sponsalibus vel matrimonio rato. V. Post matrimonium jam contractum, addendum est: an contractum sit scienter cum tali impedimento; an cum spe sic facilius impetrandi dispensationem; an servatis proclamationibus, nec ne. VI. Si dispensatio petatur in casu urgentis necessitatis ab Ordinario loci, ostendendum est, revera adesse urgentem necessitatem, aliasque conditiones *Cap. preced.* recensitas, ob quas juxta DD. Ordinarius dispensare potest. VII. Exponenda est fideliter causa vel causæ dispensandi, de quibus infra.

*Quid faciet Confessorius, deprehendens  
impedimentum?*

Si matrimonium sit contrahendum, & res adhuc integra, instruat poenitentem de impedimento; si autem res non sit integra, nimirum si paratis omnibus ad nuptias sine publico scandalo & confusione non possit sponsus vel sponsa desistere, procedat ut supra *cap. 13. coroll. 2.* Si matrimonium jam sit contractum, attendat, an poenitens in bona vel mala fide de valore illius;

si in bona fide, putans matrimonium esse validum, relinquat, donec impetraverit dispensationem, moneátque, ut certo tempore ad se revertatur; Si in mala fide, sciens vel dubitans, matrimonium esse validum: dicat esse invalidum, & omnino abstinendum à copula; donec obrenta sit dispensatio; & interim cohabitare debent conjuges illi putativi ut frater & soror, vel sequestrari sub prætenu peregrinationis aut negotii alibi peragendi.

*Quando dispensatio petenda ab Episcopo  
vel Diœcesis Ordinario?*

Sciendum est, Reverendissimis Ordinariis in Germania ad eorum supplicationem concedi à Summo Pontifice facultatem dispensandi etiam pro foro externo: 1. In tertio & quarto gradu simplici & mixto cum pauperibus. 2. In impedimento publica honestatis ex sponsalibus. 3. In impedimento criminis ob adulterium cum promissione matrimonii. 4. In impedimento cognationis spiritualis, præter levantem & levatum. Si igitur eiusmodi impedimentum occurrat, dispensandus vel Confessarius recurrat ad Ordinarium, dispensaturum gratis; item ad eundem recurrat pro dispensatione in foro interno tantum seu conscientie, si occurrat impedimentum à Summo Pontifice dispensabile, & subsint conditiones, in cap. præced. Coroll. 1. posite.

*Quan-*



*Quando dispensatio petenda Romæ  
à Dataria ?*

Sciendum est, Romæ duplex Tribunal pro dispensationibus à Summo Pontifice esse erectum : unum pro foro interno & conscientiæ, vocaturque *Sacra Pœnitentiaria* ; alterum pro foro externo, & appellatur *Dataria*. Si igitur impedimentum sit publicum, & dispensatio petenda pro foro externo, peti debet per aliquem (si adsit) Romæ Agentem à Dataria, debentque exprimi nomina Oratorum, & fieri expensæ, sæpe non exiguæ, nisi Rescriptum expediat in forma pauperum.

*Quando dispensatio petenda à sacra  
Pœnitentiaria ?*

Si impedimentum sit occultum, & dispensatio necessaria solum pro foro interno & conscientiæ, Parochus vel Confessarius eam pro pœnitente petens, litteras dirigere debet ad sacram pœnitentiarum, à qua omnia expediuntur gratis, & non debent exprimi dispensandorum nomina vera, sed ficta, vel loco illorum N. sive literæ A. B. In supplicatione exponi debet iusta dispensandi causa : *Quia sine hac Sacra Pœnitentiaria non dispensat.* Causæ ob quas dispensare solet, sunt istæ : 1. Conservatio Illustrissimæ Familiæ. 2. Extinctio litis. 3. Evitatio scandalii vel periculi incontinentiæ, aut alterius gravis damni. 4. Angustia loci. 5. Defectus competentis dotis. 6. Copula cum consanguinea

vel aliâ impedimentum habente jam nota v. gr. ex prole vel imprægnatione. 7. Infamia mulieris ex nimis familiari & suspecta Oratorum inter se conversatione absque copula. 8. Matrimonium cum ignorantia impedimenti contractum, & maximè si consummatum, atque proles subsequuta, &c. apud Reiffenst. l. 4. *Decret. in Appendice.*

*Quis modus recurrendi ad sacram Pœnitentiarum?*

I. Literæ dirigendæ sunt ad maiorem Pœnitentiarium & sic inscribendæ: *Eminentissimo & Reverendissimo Domino, Domino S. R. E. Cardinali Majori Pœnitentiariorum. Romam.* II. Intus in supplica scribatur: *Eminentissime & Reverendissime Domine, Domine &c.* Postea ponatur supplica v. gr. pro petenda dispensatione super impedimento affinitatis in primo gradu ex copula illicita ad remanendum in matrimonio jam invalidè contracto, formula sit huiusmodi: N. N. Publicè in facie Ecclesiæ contraxit matrimonium, & successivè consummavit cum muliere, cuius so-rem antea cognoverat, conscius (nescius) impedimenti, quod occultum est. Cum autem ob dictum impedimentum, absque Sedis Apostolicæ dispensatione, in præfato matrimonio remanere nequeat; & absque gravi scandalo separari non possint; nec spes sit, eos simul continentur viçtuos; hinc ad evitanda scandala & pro suæ conscientie quiete, humillimè ac in Jesu Christi

Christi vitcerious, facti poenitens supplicat pro remedio. Dignabitur Eminentia Vestra responsum mittere ad me infra scriptum per civitatem N. ad civitatem N. idiomate latino; quam Deus conservare dignetur sanam & incolumem.

Eminentia Vestrae

*Devotissimus ad Deum exorator*

N. N.

*Dedi N. die N. anno N.*

III. In fine supplicae poni debent locus per quem, locus ad quem, & nomen illius, cui rescribendum. Si tardaverit responsio, Confessarius rescribat, & poenitentes nunquam desperent. IV. Si rescriptum Romae advenierit, tradendum est dispensando, ut Confessarium eligat, qui aperiet, & dispensationem impertiet.

*Quis modus exequendi literas dispensationis?*

I. Dispensatio danda est in actu Confessionis Sacramentalis. II. Confessarius observare debet clausulas in literis à S. Poenitentia positas, & in rescripto ad supplicam supra positam solent esse sequentes:

Prima: *Quatenus si est ita.* Ut narrata sint vera, scilicet impedimentum occultum, & immineant scandala &c.

Secun-

Secunda: *Audiri prius ejus Sacramentali Confessione.* Ut dispensatio non detur extra Tribunal Sacramentale.

Tertia: *Injunctâ gravi penitentiâ saluari.* Hæc committitur discretioni Confessarii, potestque consideratis personis esse jejunium semel in aliquot septimanis, preces, & eleemosyna.

Quarta: *Ac Confessione Sacramentali semel quolibet mense per tempus arbitrio tuo statuendum.* Satis esse, si statuatur sex menses, censet Navarr.

Quinta: *Et alius injunctus, quæ de jure fuerint injungenda.* Injungi debent restitutiones, reconciliationes &c. si & quatenus peccata postulant.

Sexta: *Dummodo impedimentum occultum sit.* Hæc est conditio sinè qua Sacra Pœnitentiaria non concedit gratiam.

Septima: *Et separatio . . . fieri non possit absque scandalo, & ex cohabitatione de incontinentia vitandum sit.* Hæc clausula temper moraliter certò verificatur.

Octava: *Aliudque Canonicum non obstat.* Non debet adesse aliud impedimentum præter expressum.

Nona: *Muliere de nullitate prioris consensûs certiorata.* Hæc clausula teste Navarro olim Pœnitentiario in Basilica Lateran. non ponitur ut conditio necessaria, quia sæpe impleri non potest absque periculo deregendi viri delictum, sed ad instructionem Confessarii, ut consensus renovetur modo tali, si possit meliori. Ita pariter sentit Sanchez l. 8. d. 24. num. 61. Optimus

mo-

modus, si circumstantiæ permittant, de novo contrahendi est iste: ut vir & mulier veniant ad Confessarium, is de licentia viri dicat mulieri, virum ab initio non rectè præstitisse consensum vel habere de eo anxietatem, adeoque matrimonium esse renovandum; deinde petat à viro: an de novo præsentem mulierem accipiat in uxorem? Postea à muliere: an similiter virum accipiat in maritum: Et dato utrimque consensu dicat: Matrimonium per vos contractum ratifico & benedico in nomine &c. Hic modus coram Confessario renovandi matrimonium servandus est, tamen sine obligatione, si de nullitate matrimonii constet utrique conjugum v. gr. in impedimento criminis, vel consanguinitatis, vel alio, quod non est ex delicto. Alius modus renovandi matrimonium est: Si vir dicat, se à Confessario percepisse, quod à principio non bene præstiterit consensum, adeoque oporteat, ut pro securitate conscientiæ ambo consensum renovent, & statim fiat renovatio. Sanchez *l. 2. d. 36.* Alius, si nequeat practi-  
cari prior, est iste, ut coniugis impedi-  
menti dicat: Solent Religiosi renovare Professionem, & pii conjuges matrimonium ad accipiendam novam gratiam, etiam nos renovemus, ego itaque te accipio in conjugem, etiam me accipis? Ita. Cajet. & alii apud Sanch. *cit. at.* Confessarius adhibeat modum, quem viderit magis expedire, hoc semper salvo, ut renovatio consensu fiat ab utroque conjugue.

Deci-



Decima: *Marrimonium inter se de novo secretè contrahere. Hoc est absque Parocho & testibus, prout modum suggesserit Confessarius.*

Undecima: *Ita, quod hujusmodi dispensatio pro foro judiciali nullatenus suffragetur. Hinc si impedimentum ex occulto fiat publicum, manent quidem in foro conscientie veri conjuges, in foro tamen externo sese submittere debent iudicio Ordinarii, & ab hoc sive a Dataria novam impetrare dispensationem nempe pro foro externo.*

Duodecima: *Præsentibus laceratis. Intelligitur sive statim datâ dispensatione, sive postea, modò Confessarius non reservet, neque tradat poenitenti; neque prodatur delictum vel impedimentum.*

His observatis, Confessarius post datam consuetam absolutionem à censuris & peccatis proferat formam dispensationis hoc modo:

*Et insuper auctoritate Apostolicâ mihi specialiter delegatâ dispenso tecum super impedimento in literis dispensationis mihi commissæ posito, ut illo non obstante matrimonium cum conjugè tuâ putatâ de novo contrahere, consummare & in eo manere licitè valeas & possis. In Nomine Patris &c.*

*Et pariter eadem auctoritate Apostolicâ prolem, si quam suscepisti, & susceperis, legitimam fore decerno & declaro. In Nomine Patris &c.*

Plura de hac materia, præsertim formulas petendi varias Dispensationes videre poteris apud Tiburtium Navar. in *Manuductione ad*  
Praxin

Praxin  
apud  
Hæc  
fura

\*\*\*

Con  
log

C  
I  
conf  
oper  
bus  
char  
est ap  
narur  
sum,  
fessa

fide  
" I  
vinu

*Praxin Executionis Literarum Sacra Pœnitentiaria, & apud Reiffenst. in 4. Decretalium, in Appendice. Hæc de universa Theologia sufficiant sub censura Sanctæ Matris Ecclesiæ.*

D. O. M. L. H. G.

\*\*\*\*\*:\*\*\*\*\*

## DIRECTORIUM

Confessarii juxta præcedentem Theologiam ad rectè judicandum de peccatis & statu pœnitentis.

**C**onfessarius est Minister Christi, Doctor, Medicus & Judex.

I. Ut Minister Christi studeat mundæ esse conscientia. *Ab immundo* (intellige, ex opere operantis) *quid mundabitur: Eccles. 34.* Omnibus se exhibeat æquè paratum, affabilem & charitativum, magnis & pusillis: *Non enim est apud Deum* (cujus Minister est) *acceptio Personarum. Roman. 2.* *Sapientibus & insipientibus debitor sum, inquit Apostolus Rom. 1.* quidni & Confessarius?

II. Ut Doctor sciat pœnitentem instruere in fide & moribus; quid licitum, quid illicitum.

III. Ut Medicus sciat vulneribus infundere vinum & oleum, quod est contra peccata adhibere.

hibere remedia curativa & præservativa, quæ habeat in promptu.

IV. Ut Judex scire debet 1. Materiam & formam Sacramenti. 2. Quos & a quibus possit absolvere. 3. Obligationem sigilli. 4. Distinctionem specificam & numericam peccatorum, circumstantias speciem mutantem, & quæ peccata sint mortalia, quæ venialia. 5. Quæ peccata inducant obligationem restituendi, sermociliandi, deponendi consuetudines, vitandi occasiones & pericula proxima peccandi.

Hæc quidem omnia habentur in præsentia Theologia, in sublevamen tamen confessarii sese ad praxin accingentis redacta sunt in breve quoddam, ut sequitur, Directorium; in quo litera P. significat Pœnitentem, C. Confessarium, M. Peccatum mortale, V. Veniale, F. Folium, ubi materia & resolutio possunt videri.

#### *Contra I. Præceptum Decalogi :*

Pœnitens : Non credidi aliquid, tanquam de Fide. Confessarius : Quare, an satis propositum fuerit tanquam de fide? si ita, est M. contra fidem; si etiam verbo vel signo externo errorem prodidisti, etsi solus nullo audiente vel vidente, jam est casus Bullæ Cœnæ, nisi excuset ignorantia censuræ. Fol. 212.

P. Dubitavi in fide. C. An voluntariè & sine ratione? est M. F. 228.

P. Natus sum & educatus in heresi, in eâque usque modo vixi. C. An errorem agnovit, vel salutem

tem orto dubio agnoscere potuerit, & tamen in eo perseverare pertinaciter voluerit? si ita, est *hæreticus formalis*; si vero agnitâ fidei catholicæ veritate statim ad eam animum adjecerit, est *materialis*; si ex respectu humano distulerit, urgente præcepto fidei, contra hoc solum peccavit. F. 227.

P. Negavi fidem solum externè, ad evadendum gravia mala. C. est M. F. 226.

P. Comedi carnes inter A catholicos, ex causa gravi nolens agnosci Catholicus. C. An judicaverit illicitum? & est M. ex conscientia erronea, aliàs non. F. 227.

P. Legi libros hæreticorum. C. An tra-  
xaverint de rebus fidei, legeritque multum?  
est M. imò calus Bullæ Coenæ, si sciverit en-  
suram. F. 228.

P. Legi concionem hæreticam, illi interfui. C. An  
cum periculo in fide? & est M. alià non. F. 229.

P. Superstitione usus sum. C. An sciverit esse  
vel dubitaverit? est M. an ad nocendum pro-  
ximo? & simul est M. contra justitiam obligans nocu-  
mento secuto ad restitut. an rebus sacris? & simul  
est sacrilegium. F. 134.

P. Adivi sugam pro veneficio inferendo. C. & M.  
scandali, superstitionis & iniustitiæ. Si illatum  
cura, ut tollatur, sed sine novo maleficio, dam-  
numque reparetur.

P. Saga hucusque fui datâ Diabolo singraphâ. C.  
An abnegaverit fidem? an Dæmonem adora-  
verit, Deum blasphemaverit? rebus sacris ab-  
usa? proximo nocumentum intulerit? ex ani-

mo renunciet diabolo non curans de singrapha, peccata omnia confiteatur, damna, ut potest, reparet.

P. *Feci à cyngari mihi futura prædici.* C. An futura naturalia, sciveritque ea à tali ex Physionomia posse prædici? & non est per se malum; An prædici fecerit futura libera, vel quæcunque indeterminatè? P. *Ita sed jocose egi.* C. An etiam alter: aliàs scandalum dedisti inducendo ad divinationem.

P. *Indignatus sum propter tempestatem.* C. An indignatio fuerit in solam tempestatem? & est V. an etiam deliberatè in Deum ut illius causam? & est M. contra charitatem.

P. *Fui desperabundus.* C. An voluntariè, & cogitaverit non amplius orare, confiteri &c. in ordine ad beatitudinem? est M. contra spem. An desperatio hæreticalis? est simul M. contra fidem. F. 231.

### *Contra II. Præceptum.*

P. *Blasphemavi.* C. Quomodo? an verba verè blasphema & advertenter prolata? est M. F. 141. etiam peccatum hæresis: Si verba fuerint hæretica cum assensu, v. gr. Deus est immisericors, injustus &c. F. 142.

P. *Juravi.* C. An falsum, Deum vocando in testem? est M. in quacunque materia. F. 132.

P. *Sed usus sum restrictione mentali.* C. An fuerit solum latè mentalis, ita ut ex circumstantiis  
mens



mens tua & sensus verborum cognosci potuerit? si ita, non est perjurium.

P. *Juramentum promissorium non implevi.* C. An fuerit de re licita, & sine peccato impleri potuerit? si ita, in re levi probabiliter solum est V. in gravi M. contra Relig. & post acceptationem contra justitiam.

P. *Juravi alterius inimicum intoxicare, accepto pretio.* C. Absit, ne tacias. Juramentum nullum; commisit tamen internum homicidium, & M. contra Relig. F. 131. Pecunia, opere non impleto, non est tua. F. 60.

P. *Juravi fidei.* C. An falsum? M. contra Religion. An cum gravi nocumento Tertii? contra justitiam.

P. *Juravi verè, cogitans non implere.* C. est M. in omni materia; teneris alterius damnis. F. 131.

P. *Juravi non amplius dare mutuum, non amplius ludere.* C. Primum non teneris servare, Juramentum debet esse de re meliori; teneris secundum, si jurasti ex fine honesto.

P. *Verba Blasphemia protuli ex indignatione erga hominem & pecora.* C. An ex subita ira sine advertentia ad contumeliam Dei? si ita: est V. secus M. F. 142.

P. *Votum non servavi.* C. An verum emisit votum, an solum propositum? si votum sit certum, idque violaverit, in re levi est V. in gravi M. F. 126.

P. *Pater meus defunctus votum à se factum mihi commisit, ego autem non implevi.* C. Quale fuit? P.

*Novena servanda & calix dandus Ecclesie.* C. Novenam servare non teneris, quia votum personale; ad calicem teneris: quia reale; solum tamen peccasti contra justitiam suppositam acceptatione, si ex hereditate dare potueris, & nolueris. *ibidem.*

P. *Mater mea vovit peregrinationem à me Dettelbacum instituendam, si reconvalescerem.* C. Non teneris vi voti: quia non vovisti; & mater solum tenetur tibi persuadere; persuadeo & ego, si nihil obstat.

**Contra III. Præceptum Decalogi,  
& Præcepta Ecclesie.**

P. *Laboravi die festo.* C. An serviliter, sine causa excusante? quamdiu? F. 197.

P. *Die festo ivi ad aliam Diocesim, ubi festum non erat, ibi laboraturus.* C. An prius, ut debuit, audierit sacrum? an laborare alibi, quod licuit, judicaverit illicitum?

P. *Sacrum non audiavi die festo.* C. An negliger? causæ excusantes. F. 317.

P. *Jejunium violavi.* C. An comedendo carnes, & quoties? an sæpius reficiendo, & non fuerit excusatus? F. 29.

P. *Sæpius modicum comedi in die jejunii extra refect.* C. An pervenerit ad quantitatem notabilem? *ibidem.* item F. 195.

P. *Ad evitandam poenam Ecclesiasticam confessum & communicavi tempore paschali, sed sacrilegè.* C. Quot annis? toties non satisfacisti præcepto  
con-

confessionis annuæ, & Commun. Paschalis. Quoties annis illis confessus sciens sacrilegè & communicasti? tot sacrilegia. Jam Confessiones repetendæ quoad peccata M. sacrilegè confessa.

*Contra IV. Præceptum.*

P. Inobediens fui parentibus. C. An in re gravi, provocando ad gravem iracundiam? est M. an cum gravi damno? restituitio. F. 37.

P. Sponsalia contraxi inficiis, matrimonium contradicentibus parentibus. C. Quare parentes inviti? si rationabiliter, propter gravia mala, scandala &c. est M. aliàs non, quia uteris jure tuo. Sanch. l. 4. d. 23.

P. Verbis asperis & contumeliosis parentes affeci. C. An graviter off. nisi vel contritum; quod M.

P. Parentibus cum potui, non succurri. C. An in necessitate gravi? M.

P. Imprecatus sum parentibus. C. Vix unquam V. nisi ex imperfectione actûs, & rarò.

P. Imprecatus sum & detraxi Superioribus meis. C. In re gravi M. contra justitiam & pietatem Superioribus debitam.

P. Uxorem, liberos male tractavi, domo expuli, plerumque ebrius. C. An ob causam ipsorum & proportionatam? quod rarò, unde & rarò V. an bona dilapidaverit, egentibus domesticis?

P. Inobediens fui Marito. C. In quibus? si in rebus domesticis, si quulque causa fueris blasphemiarum rixarum & gravis damni; peccasti peccato inobedientiæ, scandali & injust. si in de-

bito conjug. est M. marito iustè exigente, multumque invito. F. 385.

*Contra V. Præceptum.*

P. *Odio habui proximum.* C. An gravius M. contra charitatem. An cum desiderio nocendi graviter? M. contra iust. An & quoties odium deposuerit, atque renovaverit? toties P. M. F. 189.

P. *Rixas habui.* C. An cum animo nocendi? an grave odium inde secutum? his conclusis est plerumque V.

P. *Imprecatus sum proximo.* C. An deliberatè, ut malum eveniret? an ex ira solum ad incutiendum terrorem filiis, domesticis &c. Si primum, est M. secundum V. ablente scandalo. F. 196.

P. *Optavi mihi mortem.* C. An ex mala intentione? & juxta hanc est peccatum.

P. *Optavi aliis mortem.* C. An desiderio efficaci & absoluto? M. Quibus, an parentibus, ut acciperes hæreditatem? M. contra IV. præceptum.

P. *Mortem intuli.* C. An voluntariè & injustè? M. injustitiæ. Quot, & quibus personis: an uxori, proli? M. contra pietatem illis debitam. An clerico? Sacrilegium.

P. *Causa defensionis alium occidi.* C. An defensio iusta, & cum moderamine inculpatæ tutelæ? F. 48.

P. *Occidi ad defendendum honorem, conservanda bona.* C. An non potuerit aliter? an honor & bona illa fuerint magni momenti, tibi tuisve omninò necessaria. F. 46.

P. *Provocatus in duello occidi.* C. An debuerit comparere, alias privandus honore & officio, vitæ moraliter conservandæ necessariis? si ita, an usus moderamine inculpatæ tutelæ? his stantibus excusaris à M. & excom. aliàs minimè. F. 238.

P. *Procuravi Abortum.* C. An foetus animatus? & est parricidium. An inanimatus? est M. contra naturam. F. 47. P. *Sed vim passa sum.* C. adhuc M. nam directè procurare abortum nunquam licet, nec semen receptum ejicere. La Croix II. l. 3. num. 928.

*Contra VI. Præceptum.*

P. *Impurus habui cogitationes.* C. An voluntariè? ita. An cum desiderio carnaliter peccandi? non. An tamen cum delectatione carnali? ita. est M. circumstantiam tamen personæ circa quam exprimi per se non est necesse. F. 199.

P. *Turpia locutus sum.* C. An solùm ex joco? V. an animo libidinoso, & circa quam personam? M. an cum scandalo & quot personarum? F. 204.

P. *Tactus habui impudicos.* C. An animo venereo? cum desiderio carnali & circa quam personam? in alieno corpore diversi sexûs ordinariè sunt M. excusantur ancillæ vestiendo



tangentes impudicè puliones, secluso affectu venereo. Sporer.

P. *Motus habui carnales.* C. An voluntariè procuratos? si non, an cum consensu & complacentiâ? utrumque per le M.

P. *Pollutionem procuravi.* C. Quoties? An cum imaginatione alterius personæ & cuius? si solutæ, simul est fornicatio? si conjugatæ, adulterium &c. si procreans ligatus voto, castitatis iniuper est sacrilegium.

P. *Pollutio mihi contigit in somno.* C. An ex causâ M. in materiâ luxuriæ, & prævisa? M. si ex alia causâ per accidens v. gr. cibo vel potu, an intenta? si absque causâ? an postea de ea delectatus? si ita, M. F. 203.

P. *Solicitavi puellam, sed tantum ex joco & cautâ tentandi animum.* C. est M. propter scandalum & sæpe propter periculum proprium.

P. *Luxuriam commisi.* C. An & cum qua persona? P. *Cum soluta & conjugatâ.* C. Quoties cum soluta? tot fornicationes; Quoties cum conjugata? tot adulteria. An poenitens etiam conjugatus? *adulterium duplex.* Attendendum, an proles nata ex adulterio? *restitutio* F. 65. An impediit seminando extra? *pollutio.* An consistens in consuetudine vel occasione proxima? *deferenda.* F. 345.

### *Contra VII. Præceptum.*

P. *Furatus sum.* C. An in quantitate notabili. F. 53. An sacrum vel de sacro? *Sacriligium.* F. 137.

P. *Fu-*

P. *Furatus sum modicum.* C. An animo auferendi multum, si potuisses? *ita.* Peccatum est grave, non gravis obligatio restituendi. F. 53.

P. *Sape modicum abstuli.* C. An pervenerit ad quantitatem notabilem? M. *cum obligatione restituit.* An pervenire voluerit? quoties hoc volens modicum abstulit distinctis moraliter vicibus, aut quantitatem notabilem continuavit, toties P. M.

P. *Sape aliquid surripui parentibus.* C. An tantum, ut parentes quoad substantiam judicaverit graviter invitos? M. *cum restitutione.*

P. *Sartor de panno retinui.* C. An frequenter, vel animo continuandi, & qua de causa? est M. nisi fiat in compensationem justæ mercedis, vel petitæ à dominis non curentur, & aliis indigentibus applicentur. F. 55.

P. *Ufus sum injusto pondere.* C. An pervenerit aut pervenire voluerit ad lucrum notabile? est M. esto nec hic, nec ille sit graviter læsus. Restitutio facienda pauperibus vel piis causis.

P. *Abstuli rem alienam, non animo retinendi, sed solum ad tempus utendi.* C. An Dominum judicaverit rationabiliter & graviter invitum?

P. *Equum bonæ fide emi, postea rescians esse furtivum, retinui, quia pretium recipere non potui.* C. Tuus non est, sub M. restituendus. Imò si rescians furtivum. statim vendidisses alteri, huic restituendum esset pretium.

P. *Dammum grave intuli. C. An voluntariè? M. iniustitiæ; reparandum quoad omne, quod inde domino abest. An ex gravi odio? M. contra charitat.*

P. *Ex incendio mihi eripui mobilia, aliàs tamen peritura. C. Manent domino tuo (nisi habuerit pro derelictis) ei que restituenda. P. Sed alius tamen surripuisset. C. si alius, alius restituere deberet. Si verò rem, quæ certò peritura absque alicujus iniustitia, consumas, ne pereat; ad nihil teneris. F. 72.*

P. *Mercus plurius aequò vendidi. C. An fuerint subhastatæ? licuit F. 94. Si non, an ultra pretium justum summum notabiliter excedendo, vel sæpius cum damno communitatis? M. cum restitutione.*

P. *Aliis domesticis esculenta, poculenta & similia surripientibus, ego pariter surripui. C. An ex communi consilio? si ita, est M. restitutio in solidum. F. 76. si non, an multum? & est M. aliàs non.*

P. *Ego ancilla fregi vitrum valde pretiosum. C. An tuâ culpâ? si non, ad nihil teneris. Sed subtrahitur mihi à salario, an uti licet compensatione? licet, istius substantentibus conditionibus. F. 55.*

P. *Non accipiens debitam mercedem, usus sum occultâ compensatione. C. An illius verè subsint conditiones? damnata propositio 37. ab Innocent. XI. Famuli & famula possunt occultè heris suis surripere ad compensandam operam suam; quam majorem judicant salario, quod recipiunt.*

P. Ho-

P. *Horologium portatile inveni, retinui non sciens dominum factâ inquisitione.* C. An iudicâsti licitum? retine animo restituendi domino, si comparuerit? vel restitue, ut habes. F. 42.

*Contra VIII. Præceptum.*

P. *Dextravi.* C. An injustè & graviter? M. an ad nocendum? iterum M. nocumento secuto præter famam reparanda sunt damna.

P. *Audita contra alterius famam retuli aliu.* C. An nondum de illis fuerit rumor? si non, an ita retulerit, ut audientes crediderint, & fama sit graviter læsa? M.

P. *Delictum quoddam occultum dixi uni viro prudenti, non revelaturo.* C. An iudicasti licitum? non fiat deinceps absque iusta causa. F. 49.

P. *Narravi de aliquo delictum, sed alibi notum.* C. An alibi notum jure vel injuriâ? si primum: solum est contra charitatem, sequente damno. Si secundum: contra justitiam. *ibidem.*

P. *Amico narravi irrogatam mihi a Titio injuriam.* C. An consili vel solatii causâ? & licuit; sicut licet ad avertendum damnum proprium vel alienum. *ibidem.*

P. *Record-r, me graviter detraxisse ante 10. Anos.* C. An fama redintegrata, vel delictum infamatorium abierit in oblivionem? si ita, silendum. An aliàs confessus? si non, cur?

P. *Grave delictum narravi coram pluribus, putans esse publicum.* C. Non peccasti, fama tamen reparanda. F. 66.

P. *Alium*

P. *Alium in sua arte contempsi, lucrum impeditum.* C. An graviter detrahendo? M. dup. in materia detract. & furti. An damnum actu secutum? estque reparandum, sicut & fama. P. *Alium impedivi a consecutione officii.* C. An alteri jam fuerit debitum? M. contra iustitiam. Si non debitum, quomodo impedivisti, an fraudulenter, injuste? iterum M. contra iustit. an consilio, suasionem sine iustâ causâ? M. contra charitatem.

P. *Audivi graviter detrahentem.* C. An cooperatus? M. contra iustit. an potuerit impedire, & advertens se debere, tamen omiserit? M. contra charitatem. F. 51.

P. *Defectus naturales & crimina alteri objeci.* C. An sine iustâ causâ? & laesus est honor. An aliis audientibus & credentibus? & laesa est fama; facienda reparatio honoris & famæ. F. 66.

P. *Temerè judicavi.* C. Utrum in re gravi, certò, absque ratione? M. F. 49.

P. *Infamatoria de alio audita, eidem retuli, unde inimicitia.* C. An absque iustâ causâ? an inimicitiae praevisæ? si ita, dedisti scandalum, reus inimiciarum & aliorum, si quæ inde malorum.

P. *Scandalum praeui.* C. In qua materia? quot personis? F. 238.

### Contra IX. Præceptum.

P. *Desiderium habui carnale.* C. Circa quam personam? si circa solutam, est fornicatio inter-



terna ; circa conjugatam , adulterium ; idque duplex , si & concupiscens sit conjux.

P. Optavi mortem alicujus mariti ex desiderio ducendi viduam relictam. C. An optaverit efficaciter & absolute ? M. contra charitatem. An mortem machinatus facta cum uxore conspiratione ? M. contra justitiam dirimens matrimonium. An de presenti uxorem istam carnaliter concupierit ? adulterium ; si non , an veneret circa eam delectatus ? M. delectationis.

*Contra X. Præceptum.*

P. Concupivi vicini mei pradia &c. C. An efficaciter & cum illius damno , utpote modo injusto ? an ineffaciter ? primum est M. secundum V.

P. Optavi proximo malum. C. An grave , quod & quatenus malum ipsi ? M. F. 236.

P. De malo alteri obveniente complacui. C. An de gravi , deliberatè & injustè ? an ex gravi odio ? utrumque M. contra charitatem. Folio 237.



# MONITORIUM

ad Sacerdotem

Sacerdotalibus fungentem Ministe-  
riis, & ea, quæ Status postulat Cle-  
ricalis, facientem: ut hæc exempla-  
riter faciat, illis ritè, & digne fun-  
gatur, apud homines habiturus æsti-  
mationem, & ædificationem,  
apud Deum meritum, &  
præmium.

## PRÆFATIO.

**S**acerdos *Malach. 2. dicitur Angelus Do-*  
*mini, à Christo Matth. 5. Sal Terræ,*  
*Lux Mundi, Lucerna. Ut Angelus, An-*  
*gelicà nitere debet puritate; Ut Sal Terræ,*  
*animas servare debet à corruptione peccati;*  
*Ut Lux, & Lucerna, fideli populo lucere de-*  
*bet luce sanctitatis, & doctrinæ. Magna*  
*Sacerdotis est dignitas, sed & magna obliga-*  
*tio, ut dignitati vita, & mores respondeant.*  
*Monet S. Ambros. lib. de Dignitat. Sacerdot.*  
*Attende ô Sacerdos, attende: ne honor sit*  
*sublimis, & vita deformis, ne sit Deifica*  
*Pro-*

*Professio, & illicita Actio. Errat proinde, & graviter errat, qui ad sustinendum Sacerdotis nomen sibi sufficere putat, a Laicis veste distingui, & horas, ac sacrificium cursum absolvere; sciat is, nullos magis nocere, nullos graviori judicio à Deo esse puniendos, quàm malos Sacerdotes. O quàm multis in Judicio tolerabilius foret! fuisse mendicos, quàm Canonicos, Pastores ovium, quàm animarum, gestasse claves templi, quàm cæli, stetisse in harà, quàm arà!*

*Sacerdos igitur quisquis es, Sacerdotalem serva dignitatem, sed & obligationis tuæ atque officii ne obliviscaris; Attende, ut dignitati vita, & mores respondeant; respondebunt: Si ut Angelus Angelica niteas puritate, ut Sal animas serves à putredine, ut Lux luceas sanctitate, & doctrinà, Sacerdotalibus ritè, dignèque fungens ministeriis, & ea benè faciens, quæ Status postulat Clericalis.*

*Hunc in finem ex probatis Authoribus eo, quo dantur, animo sequentia accipe Monita, vide, lege, sequere.*

MONI-

## MONITA

## Ad Recitantem Horas Canonicas.

**P**salite Deo nostro : psallite Regi nostro , psallite quoniam Rex omnis terra Deus , psallite sapienter. Psal. 46. Ubi quinquies repetito verbo psallite insinuat , psallendum esse Deo , quoad vocem distinctè , quoad memoriam attentè , quoad intellectum diligenter , quoad voluntatem ardentè , quoad habitum corporis reverenter. Hinc qui obligaris ad Horas Canonicas.

I. Recitaturus præpara animam tuam per orationem : Aperi Domine os meum &c. ut in Breviario , vel per similem.

II. Juxta c. dolentes. de celebrat. Missar. recitabis studiosè pariter ac devotè. Studiosè , quantum ad officium oris , omnia verba bene pronunciando ; Devote , quantum ad officium cordis , ferventer attendendo.

III. Debitam habeas intentionem , & attentionem : Intentio eaque saltem implicita sit laudandi Deum , & applicandi pro felici statu S. Ecclesiæ , ejusque indigentis. Attention , eaque saltem virtualis , sit vel ad verba , vel ad sensum , vel ad Deum , sive quod melius , ad sensum , & Deum simul. Scito : si cor non orat , tunc frustra lingua laborat.

IV. Advertens te distractum , attentionem renova maximè ad Gloria Patri &c. repetitionibus autem , si non fuerint voluntariæ

riæ, noli aſueſcere: ſunt enim fomentum ſcrupulorum.

V. Officium Canonicum non poſtponas aliis, niſi urgeant, occupationibus, minus computationibus, & recreationibus: nonne anima plus eſt quàm eſca? Audi S. Auguſtinum: Orare ante tempus, eſt providentia, in tempore, eſt obedientia, poſt tempus, eſt negligentia.

VI. Non præcipites verba, nec mutiles, nec absorbeas, nec indecorè feſtines: ſic ora, ſicut poſtulat Majeſtas, quam adoras; ſic pete, ut merearis accipere.

VII. Elige locum pietati tuæ magis congruum, & à ſtrepitu, atque interpellatione remotiorem: Domus Dei Domus orationis, eaque pro poſſe eligenda, ſive oratorium, aut ſaltem locus orationi conveniens.

VIII. Adhibe decentem corporis ſitum, videlicet ſi vires ferant, ora nunc ſi ſtando, nunc ſtando conformiter choro: ſic poſtulat Dei Majeſtas, & noſtra exinanitas.

IX. Oculorum evagationes, aliàsque diſtractionum cauſas itud oſè devita: Volens diſtractionis cauſam vult diſtractionem.

X. Officium ad cuiusque adventum, aut opus incidens non facilè & ſtatim interrumpas, te convertens à Deo ad hominem, à Creatore ad creaturam: etenim has cedere oportet Majori.



XI. Cogita te in conspectu Divinæ Majestatis, & Sanctorum Angelorum eam laudantium atque vivâ fide in Deum præsentem tende cum affectu amoris, gratulationis, zeli Deum laudandi, eique per omnia placendi.

XII. Ad verba, quæ significant Deum, ejusque attributa, beneficia, opera &c. conare elicere affectus congruos amoris, adorationis, reverentiæ, admirationis, laudis, spei, timoris &c. ad verba misérias humanas indicantiæ elice affectus humilitatis, contritionis, compassionis, postulationis, & similes.

XIII. Psalmos recita eo affectu, quem verba præ se ferunt, nempe juxta S. Augustinum amando, cum amat Psalmista, laudando cum laudat, benedicendo cum benedicit, timendo cum timeret, postulando cum postulat. Similiter Antiphonas, Versus, Orationes recita cum affectibus, & desideriis congruentibus.

XIV. Post recitationem offer tuum officium etsi imperfectum in unionem orationum, & Meritorum Christi, B. Virginis, atque Sanctorum; Defectus admissos stude expiare actu contritionis, vel per orationem: *Sanctissima & Individuæ Trinitati &c.* atque propone deinceps emendare.

## MONITA

Ad Concionantem.

I. **E**Xcogita propositionem, de quâ dicturus es, eamque ut thema constitue. 2. Inveni

veni materiam, & argumentum ad probandum idonea. 3. Inventa ordinatè dissona: primò statue Exordium tanquam caput, idque breve, & conformè materiæ; deinde propositionem perspicuam, exponendo, qui sis dicturus; & quid in qualibet concionis parte; deinde confirmationem, rationes validiores ponendo in principio, graviores in fine, infirmiores in medio; denique Epilogum, appositè concitando affectus, qui concionis sunt finis, & Concionatoris triumphus. 4. Omnes concionis partes præcipuè confirmationem insignioribus tropis, & figuris exorna, easque gratis amplificationibus exorna. 5. Attende à Dictionis scopo, vide, ne declines.

II. Scito, fructuosam prædicationem non consistere in vanâ, & verborum, aut ingenii ostentatione, sed potius in bono exemplo, & sanctæ vitæ conversatione: vide ergò, ne exemplo destruas, quod verbo ædificas.

III. Devita quæstiones difficiles, curiosas, & subriles Auditorum eorum superantes, utpote ad eorum ædificationem, & instructionem parùm aut nihil conducentes.

IV. Stude, non hominum, maximè Magnatum aures vanis eloquentiæ verbis demulcere, neque fabularum, & fictionum enarratione detinere, aliisque nugis, & impertinentiis, sed potius omnium animas spiritali pabulo reficere.

V. Non affectes magnis, & doctis prædicare, ubi plerumque vana gloria, sed libentius

rudibus, & simplicibus: tum quia non tantum pro illorum, sed & horum animabus pretiosum Christus sanguinem fudit; tum quia saepe majori fructu, & majori merito praedicatur his, quam illis.

VI. Si Auditores sint rudes, praecipua tibi cura erit, eos rebus necessitate tum medi, tum praecepti ad salutem necessariis debite instruere, deinde vitia extirpare, & virtutes implantare. Contra neminem in particulari dices, minus contra Principes, & Dominos, zelo indiscreto eos offendendo, sed omnibus debitor, omnibus praedicabis, eos suaviter, & efficaciter obsecrando, & increpando.

VII. Concionem paratam memoriae firmiter manda, clare, gravique actione suo tempore pronunciaturus. Ad hoc 1. Divinum implora auxilium. 2. Mentem à curis mundanis, aliisque negotiis expurga. 3. Concionem totam lege, & perfecte intellige, mox remoto in loco distinctè edisse, nec ad aliam ejus partem progredere, priori non possessa. 4. Vesperti disce, & manè expergefactus animo revolve: per nocturnam enim quietem species magis collocantur, & per matutinam repetitionem magis firmanentur. 5. Prius tacite disce, ne vocis sonus mentem perturbet, postea, si opus sit, cum gestu clam, & clare prolude, nec in publicum prodi, donec perfecte didiceris. 6. Inter concionandum, si fortè contingat oblivio, poteris pluribus verbis idem explicare, vel aliqua

qua hunc in finem excogitatâ transitione aptâ immiscere, donec oblita occurrant.

VIII. Concionem facturuss tans in medio suggesti utramque manum absque jactantiâ supra suggestum pone, Auditores benignè respice, primas periodos absque ullo gestu pronuntia, postmodum gestus incipe, manus non nisi lentè, & paululum ultra signum protende, oculis manum, & gestum sequentibus.

IX. Vocem accommodabis loco: in parvis non sit nimis clamorosa, nec in magno nimis submissa; Si sit imbecillis: Rarò exalta eam affectu violento, sed familiari tono orationem variabis.

X. In Exordio sit vox clara, & æquabilis, semper tamen sine affectatione, aut cantilatione; in Confirmatione sit elatior, & incitator, quantum vires, & materia postulant; In Epilogo, si instituaturs ad deprecandum, vel placandum, sit suavis, & lenis; si ad miserendum, flexibilis; si ad lætandum, plana, & sonora; si ad hortandum, & terrendum, concitator, & vehementior; quam vocis varietatem discès, observando, quo tono passim loquantur homines, dum irascuntur, rogant, dolent, minantur, lætantur &c.

XI. Cave nimiam in dicendo tarditatem, quæ dictionem reddit languidam, cave & nimiam linguæ volubilitatem, quæ verba truncat, & confundit. Ultimas quoque syllabas clarè pronuntia; & in fine periodi modicò

respira: id enim dicentem reficit, & audientem afficit.

XII. Gestum non semper ad unam dirige partem, sed nunc ad hos, nunc ad illos, tùm ob gratam varietatem, tùm ut à pluribus audiri, & videri possis. In Exordio sit lenior, & modestior, nisi fortè sit invectiva; in Confirmatione acrior, & pugnator; in Epilogo vehementior, & suavior, prout materia, & affectus, sive finis intentus postulant.

XIII. Vultus, oculus, & aspectus non sit erectus, & alacer, nunc demissus, & tristis pro rerum, seu materiae varietate.

XIV. Uti cavenda est gestuum nimia lenitudo, & tarditas; ita etiam nimia celeritas, & levis gesticulatio, nimisque vastitas, quâ brachia nimium extenduntur, & manus ultra caput extolluntur.

XV. In supplicando utramque manum prætende, vel attrollendo, vel submitiendo, sive quod magis congruit, manus junge instar Orantis. In averlando, vel negando caput ad unam partem converte, manus ad alteram, rem quasi à te propellendo; vel caput leniter concute per modum rennientis. In interrogando manum paululum erige, in demonstrando reipsum manum unam ad pectus converte; in demonstrando alias res, manum plerumque protende, & sursum, vel deorsum, vel aliò converte, prout res est supra, vel infra, quam designare cupis, rarò autem id solo digito facies.

XVI.



XVI. Dum declaras: quiesce innixus super suggestum, & voce elatâ, verbisque incisís, ad modum præcepta tradentis enuclea. Dum laudas, vel extollis: os aperi, vocem & oculos serena, sinistram manum in pectore firma, & alteram per aëra eleva. Dum vituperas, vel deprimis: te ipsum contrahe, utramque manum ad pectus extende, & alpero vultu, vocéque interruptâ loquere. Dum hortaris: brachia inter se neſte, & vultum componens vocem trahe ex corde, ut auditorum viscera penetret. Dum dehortaris: voce altâ, suspiriis interruptâ, agili manu, inflexo corpore incede. Dum consolaris: manus eleva, & voce vividâ, vultuque instar medici confortantis exhilara. Dum pudorem injicis, imitare vocem infirmi, humilem gere vultum, caput inclina, & manus dimitte. Dum irasceris: fiat pugno compresso, voce acri, & vultu aspero, pulpitem manu leniter percutiendo. Dum poenites: digitos manu preme, & pectori admove. Dum doles: manus inter se complica, vel deorsum utrumque deice, & expande. Dum vocas, aut alium tibi iſtis: manum sursum eleva, & ad te inflecte. Dum repellis: manum celeriter protende digitis explicaris. Dum minaris: digitum erige, & parum concute, hostili vultu, accensis oculis, voce asperâ, atque terribili. Dum reprehendis: sis iratus in vultu, rigidus in sermone, velox in manibus Patrisfamilias in morem servos objurgantis.

XVII. Cavebis 1. Ne sit nimis diuturna omnium gestuum intermixtio, & ne idem gestus præsertim in eadem periodo nimis sæpe reperatur. 2. Ne unquam ingenii tui acumen, vel eruditam inventionem præstites; neque in detrahentes concioni tuæ aut iugillantes invehas. 3. Ne Histrionum actiones imiteris, aut inanes facias vociferationes; quibus nonnulli nativæ vocis tenorem, & accentum adulterantes, crebroque brachia projicientes, aërem, non aures feriunt.

XVIII. Amicum eruditum consule, eumque precare, ut sincere aperiat, num in aliquo offendas, vel deficias, non auditurus propriam laudem, sed bene dicturus ad majorem Dei gloriam, & hominum salutem.

## MONITA

### Ad Catechizantem.

I. **C**onaberis impetrare à Magistratu, vel Scholæ præfati, ut populus junior ante Catechismum non conveniat ad lulum, non exeat ad prata, campos, vel nemora; à parentibus verò & heredis, eos opportunè monendo, ut filii & filiae, famuli & ancillæ vadant ad Catechesim.

II. Catechesis certâ horâ incipiat, & non ultra horam duret, ne pueri & puellæ radio affectu eam abhorreant.

III. Doctrinam Catechetica tractabis per ordinem juxta Catechismum in Diocesi tuâ usu receptum.

IV. Cu-

IV. Curabis, ut in Ecclesia seu loco Catechesis pueri & puellæ non sint intermixti, sed pueri pueris, puellæ puellis, juniores junioribus, & auliores adultioribus allocientur, & suo quisque in loco permaneat.

V. Dato ad Catechetim ultimo campanæ signo, & præmissâ, ubi solet, cantilenâ, Catechista stans versùs populum, qui flectat versùs Altare, formes signum crucis, & orationes consueta recites alternativè, ita, ut populus verba Catechistæ repetat, sicque juniores crucem formare, & orationes recitare addiscant.

VI. Post orationes, si qui sint caput vel capita ex Catechismo de memorâ recitaturi, recitabunt, te sedente ante Altare.

VII. Post recitationem dices de quâ materiâ priôr fuerit Catechesis, eamque surgens & accedens ad populum repeteres per interrogationes, puncta leviora proponendo parvulis, graviora magnis; eosque, si hærent, adjuvabis, ut non confundantur, & propter confusionem atque erubesceniam aliâ vice emaneant.

VIII. Post repetitionem doctrinæ prioris sedens alium, vel alios explicabis articulos, & doctrinam immiscebis moralem nec non exempla adduces eò pertinentia, quibus potissimum afficitur & tenetur populus.

IX. Post novam explicationem accedens ad populum de punctis explicatis breviter interrogabis.

Ecce sicut X. Non

X. Non omitas sub catechesi etiam instruere tenellos, quosdam docendo formare crucem, alios interrogando de articulis seu magis necessariis & obviis.

XI. Bene respondentibus aut proemolum dabis, aut suaviter laudabis cum promissionem illius: quia sic animantur, ut Catechesim libenter frequentent, atque diligenter addiscant.

XII. Post hæc jubeas, populum flectere: formato signo crucis preces consuetas modo jam dicto recites; atque datâ benedictione omnes dimittas.

## MONITA

### Ad Exorcizantem.

**I.** Non judicabis quemquam obsessum, vel obsessam, nec exorcismos adhibebis, nisi habitis prius obsessionis signis; certa illius sunt: Si linguâ sibi ignorâ loquatur; si remota, & occulta revelet; si diversorum animalium voces imitetur; si faciat, quod viribus naturalibus non potest. Probabilia sunt: si ad verba sacra contremiscat; sacras Reliquias, & res benedictas horreat; si torsiones, & motus furentes patiatur; si corpus vel membrum aliquod præter morem infletur; si linguam tumidam, & nigram protendat; si spumat ore, in terram elusus volutetur, per totum corpus instar animalculi aliquid discurrat &c. Specialiter mulieribus non facile crede, esse obsessas: sæpe enim mentiuntur, præsertim pauperes; quan-

quandoque propter affectus muliebres patiuntur convulsiones, maniam &c. aliasque visu & communicatione inficiunt. Unde

II. Antequam exorcizes, diligenter attende, & si possis, Medicum, vel alios consule: an affectus sive status exorcizandi sit ex morbo, vel complexione hypochondriacâ? an ex simulatione? an ex factione Diabolicâ?

III. Ad exorcizandum non accedas temerè, non, nisi de licentiâ aut obedientiâ tuorum, ad quos pertinet, Superiorum; non nisi bonâ conscientiâ, aut existens in statu gratiæ, Dæmone prius expulso ex temetipso; exorcismoque non adhibeas, nisi approbato, & in Ecclesiâ Dei usurpari solitos; idemque est de Reliquiis.

IV. Non quæstus gratiâ fungaris officio tuo; non loquaris, nec inquiras, aut facias, quod est impertinens.

V. Exorcizatio non fiat in domibus privatis sæcularium, sed in Ecclesiâ vel Oratorio, & ubi potest, ante Sacratissimum Sacramentum; non in conspectu multitudinis, sed in præsentia quarundam tantùm personarum, quæ, & quot videntur necessariæ. Si exorcismum adhibea energumeno, assistant viri quidam Ecclesiastici, sive Religiosi; si energumena, assistant duo vel tres viri probatæ vitæ, itémque mulieres quædam pariter probatæ vitæ, quæ energumenæ sint consanguineæ, vel affines.

VI. Doc-



VI. Dæmonium sæpe non ejicitur nisi in jejunio & oratione, adeoque dum opus videtur, ad exorcizandum jejunio & oratione te munias, ipsumque exorcizandum vel exorcizandam ad eadem, & similia devotionis exercitia inducas.

VII. In adjuratione Dæmonis petere licet illius nomen, causam & tempus ingressus; an unus, vel plures; an corpus obligeat, vel quam partem &c. alia verò, quæ curiosa, & quæ ad Dei gloriam non faciunt, nec ad hominum salutem, nec ad Dæmonis expulsionem, per se loquendo petere non licet; nunquam jocos facere, aut permittere.

VIII. Cavendum, ne quid intercurrat superstitionis, aut vanæ observantiæ; néve certa & infallibilis tribuatur efficacia exorcismis, rebusque benedictis, sed omnis fiducia in adjutorio Altissimi collocanda est.

IX. Si afflicti quædam portet involucria, aut brevia, ea examinabis: unde, à quo, ad quid; & prout inveneris, auferes, vel permisses.

X. Adhiberi possunt fœtores ex herbis, flagella, sputa, alapæ, item Dæmonis nomen in chartâ comburi: ut superbus Diabolus inde confusus abscedat.

XI. Sanctissima Eucharistia corpori obfessi non admoveatur, nisi suadente necessitate, & cessante irreverentiæ periculo.

XII. Cavebis à variis deceptionibus Dæmonum : aliqui enim faciunt obiectum post multos exorcismos apparere non esse Dæmoniacum, vel esse liberatum; alii persuadent, esse infirmitates naturales; alii infirmum faciunt dormire, aliaque conjurationibus ponunt impedimenta; alii se occultantes ad tempus quiescunt; alii ostendentes esse maleficium, inducunt ad illud alio maleficio solvendum &c. contra has similesque deceptiones sis in exorcizando constans, circumspectus, devotus, fide, spe, & charitate plenus; donec desiderata sequatur liberatio.

XIII. Exorcismos adhibiturus contra maleficia, aut veneficia, prius attende & inquire, num verum sit maleficium, aut veneficium, & compertâ veritate exorcismos adhibe deo orâ & zelo è ante imaginem Crucifixi, & ardentibus candelis, aliaque ut suprà, quæ huc pertinent, observa.

## MONITA

### *Circa Spirituum Apparitiones.*

**D**iscernere Spiritus donum Dei est, non omnibus, sed quibusdam concessum; non raro tamen contingit, Confessarios à poenitentibus consultari, adeoque his quædam sunt scitu necessaria.

I. Possunt quidem hominum Spiritus redire, & ex singulari Dei dispensatione aliquando solent;

solent; non tamen nisi rarissimè, & ex causa gravissimâ id à Deo permittitur: proinde rem attentissimè examina, nec leviter crede esse spiritum, nisi certissimis signis cognoveris rei veritatem.

II. Ubi ergo certis indiciis constiterit, extraordinariè apparere spiritum, maturo examine inquirere: quis, aut qualis sit? quid perat quomodo juvari queat?

III. Cum notæ sint malignorum spirituum fraudes, omnem insolitam apparitionem merito habebis suspectam, adeoque si ubi spiritus tumultuantem audieris, adversus eum tanquam demonem armaberis.

IV. Observa indicia mali spiritus: Sunt  
 1. Si fugiat ad præsentiam & usum rerum sacrarum, v. gr. signi crucis, aquæ benedictæ, Nominis JESU &c. 2. Si prætendat suæ apparitionis causam pravam, aut falsam. 3. Si aliquid dicat contra fidem aut bonos mores. 4. Si aperte & subdolè mentem hominis excitet, vel inducat ad malum. 5. Si appareat in formâ deformi, & horribilâ, cum tumultu, vel in specie sordidi animalis &c. 6. Si, postquam præstitum est, quod petiit, subsidium, rursus quaeritis aliis causis redeat.

V. Si animæ simplici & devotæ appareat spiritus in formâ Angeli, vel alicujus sancti aut sanctæ, non facillè credas, imò vix unquam: Daemon enim ad decipiendum sæpe transfigurat se in Angelum lucis; Proinde moneas,  
 non

non statim eum audire, sed adhibendas esse res  
sacras, v. gr. signum crucis, aquam benedictam,  
invocationem Nominis Jesu &c. donec ex his,  
ipsiusque spiritûs doctrinâ verâ, & revelationi-  
bus bonis constet non latere fraudem, aut falla-  
ciam dæmonis.

## MONITA

### Ad Baptizantem.

I. **A**D Sacramenta administranda, quando-  
cunque vocatus ex parte conscientie sis para-  
tus. Si verò, quod summopere cavendum,  
peccati mortalis tibi sis conscius, & ad vitâ pe-  
riculantem, sive prolem baptizandam, sive  
moribundum absolvendum voceris, in viâ eli-  
cias contritionem perfectam; extra autem ne-  
cessitatem, habetâ copiâ Confessarii, & morâ  
temporis permittente convenit confiteri.

II. Pro necessitatis casu vocatus nullam  
interponens moram, admonito etiam populo,  
ut quacunque diei, & noctis horâ, si necessitas  
postulet, te vocare non pertimescat.

III. Dum sacramentum ministras, sacris  
vestibus, prout postulat, decenter sis indutus:  
singula verba, maxime quæ ad illius formam  
pertinent, attentè, distinctè, & clarè pronun-  
ciabis: Cæremonias, & Ritus ad populi ædifica-  
tionem devotâ, gravique actione perages.

IV. Pro materiâ baptismi adhibenda est,  
si haberi possit, aqua ex fonte baptismali, si mi-

nus sit sufficiens, in minori quantitate admisceri potest non benedicta; si omnino deficiat, vel aliunde est accipienda, vel benedicenda juxta formam in Rituali. Si congelata sit, aut nimis frigida, resolvatur, & tepescat, sic non nocitura infantulo.

V. In defectu aquæ naturalis adhibendus est quicumque alius liquor ad lotionem aptus, tametsi materia sit dubia, subintellectâ tamen conditione: *Si baptizare valeo, ego te baptizo &c.*

VI. Formam Baptismi, quæ est: *Ego te baptizo in Nomine Patris & Filii, & Spiritus Sancti. Amen*, clarâ voce pronuntiabis sub trinâ super caput infantis affusione aquæ in modum crucis, sic, ut prima affusio fiat sub verbis: *in Nomine Patris*. Secunda sub verbis: *& Filii*, tertia sub verbis: *& Spiritus Sancti*. Cavendum proinde, ne affusio aquæ verba præfata præcedat, aut sequatur, quæ sub ipsis verbis facienda.

VII. In dubio, an parturiens sit editura prolem vivam, dic obterrici: si quâ ratione possit vel digito, vel instrumento, conerut aquam, sibi calidam, immittere ad infantem, formam baptismi pronuntiando conditionarè; si prodierit membrum aliquod, rursus baptizet sub conditione; si totus prodeat vivus, tu ipse met, qui præsens es Parochus, vel Sacerdos, baptismum repete conditionatum: *Si non es baptizatus, ego te baptizo &c.* non enim intelligitur iteratum, quod ambigitur esse factum. *¶ finali. de Presbytero non baptizato.*

VIII. Si



VIII. Si parturiens moriatur, os ejus servetur apertum, ne infanti, qui statim extrahendus, & baptizandus, obstruatur via respirationis. Quod si prodeat mortuus, nec baptizari potest, nec in loco sacro sepeliri.

*Rituale.*

IX. Scito, baptismi administrandi locum esse Ecclesiam, ex Concilio Viennensi, administrari tamen potest in locis privatis, si infans ad Ecclesiam deferri nequeat absque periculo, vel acceleratione mortis; item in nobilium oratoriis, aut aliis locis decenter ad hoc ornatis, si fortè sint personarum illustrium filii, id ipsis ita deposcentibus, ut habet Agenda Moguntina, & consuetudo.

X. Virâ periclitante prole, non sis multum sollicitus de sexu illius, aut patris: quia error in sexu exigui est momenti, & patrini tunc non sunt necessarii.

XI. Baptismum iterare nullo modo licet, si tamen de valore illius prudens oriatur dubium, vel ratione materiæ, aut formæ, vel quia infans præcipitanter, & tumultuariè est baptizatus sine certitudine, an necessaria omnia fuerint adhibita; vel quia in necessitate baptizavit obstetrix; vel quia in necessitate ablutum est membrum aliud quàm caput; vel quia infans expositus & inventus sine certo testimonio baptismi collati &c. reperendus est sub conditione, hoc modo: *Si non es baptizatus, ego te baptizo. &c.*

XII. Quia Sacerdotem ad parturientem ingredi non decet, nisi fortè in articulo mortis versetur, & absolvenda sit, hinc curare debes, si Parochus sis, ut ostentrix rectum baptizandorum probè sciat, & servet.

XIII. Pater in necessitate propriam prolem baptizare potest, & nullam tunc contrahit cognitionem, quæ matrimonii usum impediat.

XIV. Baptismus quandòque conferendus est sub conditione: in dubio, an infans vivat, sub hac: *Si vivis, ego te baptizo &c.* In dubio, an animatus, vel monstrum, sub hac: *Si tu es homo, ego te baptizo &c.* In dubio, an baptizatus sit, ut supra, sub hac: *Si non es baptizatus, ego te baptizo &c.* In dubio, an adsit materia valida, vel alia essentialiter requisita, sub hac: *Si baptizare vuleo, ego te baptizo &c.* In necessitate, si plures simul absolutè baptizandi, sub hac: *Ego vos baptizo &c.*

XV. Baptizaturus extra necessitatem, prius inquire, quis, vel qui sint patrini, sciens ex Decreto Concilii Tridentini admitti posse unum, vel unam, sive ad summum unum, & unam; debentque patrini orthodoxæ esse fidei, & bonorum morum, adeoque arcendi sunt hæretici, nisi ubi consuetudo admittit, secluso tamen in fide, si adolescat, perversionis periculo.

XVI. Baptizaturus in alienâ Ecclesiâ; si Parochus sis; vel in pago, aut alibi, si Religiosus sis, de modo baptizandi in Ecclesiâ illâ usitato

tato apud loci ædituum, vel alium Ecclesiæ Ministrum prius te informa.

XVII. Baptizaturus solemniter habeas aquam baptismalem, vascula cum sacris oleis catechumenorum, & chrismatis, vasculum cum sale benedicto, vel benedicendo, & gossipium ad abstergenda loca oleis factis inuncta, & quæ de oleis sacris accipiendis, conservandis, & renovandis in Agendâ, seu Rituali sunt præscripta, observato.

XVIII. Post baptismum collatum nomen baptizati, nomina parentum, & parrinorum in librum baptismalem referre memento.

## MONITA

### Ad Celebrantem.

I. **A**Nte celebrationem considera: quâ potestate fungaris, quam personam representes, nempe Christi, cui, & in cuius conspectu sacrifices, nempe Dei, quæ sit victima, & quam sumpturus sis, nempe Sanctissimum Corpus, & Purissimum Sanguinem Christi Domini cum Divinitate. Quanta proinde in te requiritur cordis, & corporis munditia!

II. Panem sumis Angelorum: vide, num Angelus sis puritate, & castitate, prout Sacerdos nuncupatur *Malach. 2. Angelus Domini*; An verò porcus, & foetidissima cloaca. Scias: Qui manducat, & bibit indignè, Iudicium sibi manducat, & bibit. *1. Corinth. 11.* Scias: Non est sanctum,

quod sit sanctum ; nisi sanctè fiat , quod sanctum est. S. Chrysoſt. Sanctè proinde tractes , quod sanctum est , ut tibi sanctum sit.

III. Recommen data tibi habe tria puncta à Sancto Carolo in Synodo Mediolanensi instituta : 1. Ut Sacerdotes quò puriores ad rem Divinam faciendam accedant , singulis hebdomadibus peccata sua confiteantur, etsi graviora (quod absit) non occurrant. 2. Ut ante celebrationem sese recolligant , quid facturi , & in quo statu ; atque orantes mentem in tanti mysterii cogitatione defigant. 3. Ut sacris vestibus induti nemini loquantur, nemini dent aures ; oculos verò , & mentem ab omni, quod distrahit , amoveant.

IV. Sacerdotibus competente modestiâ , & gravitate ibis ad Sacristiam , lavans manus orabis : *Da Domine virtutem &c.* ex Missali.

V. Sumens paramenta Sacerdotalia , ad Amictum recordare illius fasciæ, quâ oculi Christi Domini fuere velati, & coronæ spineæ, quâ caput fuit coronatum. Ad Albam, illius albi indumenti, quo fuit illusus. Ad Cingulum, & Manipulum, funium, quibus fuit ligatus. Ad Stolum in modum crucis formandam, cencis quam portavit. Ad Casulam, purpureæ vestis, quâ ut Rex fuit illusus. Sub his compassivos elice affectus, réque stude Christo , quem paramentis illis indutus repræsentans, conformare:

VI. Sacerdotalibus indutus sume calicem cum velo, & corporali ; Calix denotat sepulchrum

chrum Christi, velum sudarium in sepulchro super caput ejus positum, corporale linteum, cui corpus Christi fuit involutum.

VII. Sumpto calicè, incessu gravi, & modesto sine cursitatione, oculis dimissis, accede ad Altare, memor introitus Christi in hortum Gethsemani, simulque ora: *In Nomine Sanctissime Trinitatis accedo ad Sacrificium Missæ cum intentione celebrandi, consequendi illius fructus, & lucrandi omnes, quas possum, indulgentias.*

VIII. Debitam reverentiam Altari, debitas ad terram genuflexiones, & ritum celebrandi, quem præscribit Missale, ritè observato.

IX. Missâ perquisitâ, stans in medio Altaris attentionem, & intentionem renova, dicens: *Domine Deus, digneris intellectum meum illuminare, & voluntatem inflammare, ut piè, devotè, & attentè celebrare valeam, tibi que sit acceptabile Sacrificium meum, quod offero in honorem . . . ad intensionem . . . vel pro . . .*

X. Factâ cruci capitis inclinatione descendere, & Missam incipe voce mediocriter altâ, altiori, si solus, vel in pago celebres.

XI. Verba omnia clarè, & distinctè pronuncia, eliciens sub illis pios, & correspondentes affectus, cavens autem ab indevotâ festinatione; unde nulla spiritus dulcedo, nulla animi affectio; sed ex merâ consuetudine, & cursim celebrantibus mentis ariditas, & voluntatis tepiditas. Sacerdos non properat in convivio profano, cur properaret in sacro?

Ef 3

XII. Sub



XII. Sub Sacrificio Missæ sis memor posteriorum vitæ, & Passionis Christi, quæ sacrificium hoc incruentum cruenti commorativum significat, & quidem

Primò *Confessio*, & *preces* ante gradum Altaris repræsentant lapsum Adami, & misericordiam Dei. *Introitus Missæ*, & *Kyrieleyson* significant desiderium Sanctorum Patrum ad Messiam, & preces, quas fundebant. *Gloria in Excelsis* repræsentat hymnum, quem cecinerunt Angeli nato Christo. *Dominus vobiscum* indicat Filium Dei, Deum de Deo, qui Emmanuel, esse nobiscum in carne. *Orationes* significant illas, quas Christus fudit ad Patrem pro populo, & quia mediator est inter Deum, & hominem, per ipsum petendo finiuntur, vocantur *Collectæ*: quia Sacerdos eas dicit nomine populi collecti. *Epistola* significat Dei mandata, in quibus debere nos ambulare denotat *Graduale*, & sic cœli gaudia nos consecreturos designat *Alleluja*.

Secundò *Evangelium* significat Christi prædicationem, dicitur ad Aquilonem, ubi sedes Luciferi: quia contra ipsum. *Credo* significat fidem nostram. *Oblatio Hostiæ* oblationem Christi, quâ se Patri pro genere humano obtulit; *Oblatio calicis* calicem passionis, quem acceperat; *Ablutio digitorum*, lachrymas Magdalene pedes Domini abluentis; *Orate Fratres* excitationem Discipulorum ad orandum; *Orationes secreta* Christi orationes in horto. *Prefatio triumphalem*

lem Christi ingressum in Jerusalem in die Palmarum, & ingressum ad Passionem.

Tertiò Canon, latine regula nempe sacrificii, repræsentat seriem Passionis Christi; legitur voce submissâ: quia Christus tanquam agnus non aperiens os suum est immolatus. *Consecratio* significat Christi immolationem, & *Hostia elevatio* crucis in monte Calvarie cum Christo erectionem, *Calicis autem elevatio* effusionem Sanguinis Christi crucifixi. *Cruces quinque* significant quinque vulnera, & *tres sequentes* tres horas Christi in cruce; *Nobis quoque peccatoribus* petitionem boni latronis; *Pater noster*, continens septem petitiones, designat septem verba Christi in cruce; *Fractio Hostie* separationem animæ Christi à corpore; *Dimissio particula in calicem* descensum animæ Christi ad inferos, corpore manente in cruce; *Agnus Dei* quorundam Judæorum conversionem, percutientium pectora; *Sumptio Hostie* sepulturam Christi; *Postcommunio* lætitiâ Sanctorum Patrum in limbo oð descensum Christi; *Dominus vobiscum* resurrectionem Christi; *Orationes*, Christi interpellationem ad Patrem pro nobis; *Ite missa est*, mysterium esse completum; *Benedictio* benedictionem Christi ascendentis; *Ultimum Evangelium* prædicationem Apostolorum, juxta præceptum Christi *Marci 16.* *Euntes in mundum universum predicate Evangelium &c.*

XIII. Non obliviscaris applicare fructum sacrificii, isque necessario ante consecrationem applicandus. Non autem sufficit ex pluribus sa-

cris v. gr. pro diversis defunctis, vel ex distinctis intentionibus velle legere unum, sed determinandum est: quodnam velis v. gr. primum secundum ordinem constitutionis, & sic consequenter, si intentiones non scias individualiter an sint diversæ, & quæ.

XIV. Tenens Hostiam consecraturus, intentionem mentaliter renova, v. gr. volo consecrare, sicut Christus instituit, & Sancta Ecclesia facit; statimque verba consecrationis reverenter, distinctè, & submissè pronuncia.

XV. Sacram elevans Hostiam cogita: *Clementissime Pater respice in faciem Christi tui, & miserere nostri.* Elevans verò Calicem: *Te ergo quasumus tuus famulus subveni, quos pretioso Sanguine redemisti.*

XVI. Ad primum Domine non sum dignus cogita te indignum propter vilitatem tuam; ad secundum propter peccata tua; ad tertium propter excellentiam Christi.

XVII. Sacras species sume reverenter, devotè, & affectuosè, sollicitus, ne quid remaneat, aut ulla committatur irreverentia.

XVIII. Sacro finito, recessum devotè orabis, in pios erumpens affectus, necessitates tuas Dulcissimo Jesu exponens, teque, aliosque, pro quibus orare soles, & debes, pro salute animæ, & corporis recommendans, potissimum necessitates occurrentes; unde cavendum, ne depositis paramentis quasi à convivio profano mox ad garrulitates, jocos, vanitates, evagationes, & hujusmodi dilabaris.

MONITA

## MONITA

## Ad Absolventem.

**I.** Ingressurus Confessionale debitam formes intentionem hac vel simili oratione: *Omnipotens sempiterne Deus, sicut Christus Dominus, Salvator noster, Sacramentum poenitentiae instituit, & Sancta Ecclesia administrat, sic ego servus & minister tuus administrare intendo, idque ad maiorem tuum honorem, meam & animarum salutem; peto ad hoc tuam sanctam Benedictionem, in Nomine Patris &c. Ingressus confessionale Sacramentum devotè, reverenter, & fructuosè administres, sis prudens in interrogando, adhortando, remedia præscribendo. Sis mansuetus, ne deterreas poenitentem; si tamen hic duræ sit cervicis, increpes opportunè importunè; sis patiens: quod tibi fieri velles, si esses poenitens, id facias Confessarius. Sis diligens: ad quid vivis de Altari? frueris fidelium eleemosynis aut collectis, aut fundatis? missus es in messem Domini operarius?*

**II.** Poenitens rudis, ignorans necessaria, si juvenis non habens M. in confluxu poenitentium parentibus est remittendus. Si adultior habens M. breviter instruendus circa necessaria necessitate medii, contritionem, propositum, & absolvendus, cum adhortatione, ut melius addiscat.

**III.** Poenitentem non facilè interpellabis, etsi immitteat impertinentia. Si tamen confessio sit longior, expedit intra actualem confessionem

feffionem interrogare de numero & specie peccatorum, dictare obligationem restituendi, deponendi odium &c. ne obliviscaris, & foris poenitens indispositus absolvatur.

IV. Abstineas ab exprobrationibus, ne poenitens perterritus reticeat peccata, aut odiosa reddatur confessio. Si danda admonitio, vel correctio, sit suavis, & paterna, fiatque post audita peccata.

V. Dubitans, ne lateat adhuc grave peccatum, aut advertens defectum examinis in poenitente, examinare debes, aliàs non.

VI. Ubi interrogatione opus, fieri debet attento statu poenitentis, servatâ cautelâ circa peccata carnis, ne sibi, aut poenitenti sit scandalo.

VII. Si poenitens per plures annos confessiones fecerit sacrilegas, non dimittatur se preparaturus ad confessionum repetitionem; juvetur quarendo: quoties sacrilegè confessus, & communicaverit; quoties tempore Paschali? An alia Sacramenta in tali statu suscepit? quæ peccata M. in confessionibus sacrilegis habuerit, an peccata carnis, odium &c. & sic cognito statu poenitentis absolvas, monendo, ut dicat in confessione seq. si quod adhuc peccatum M. sacrilegè confessum incidat.

VIII. Si poenitens casum habeat reservatum, absolvere potes indirectè in casu necessitatis, dum celebrare debet, aut communicare nec adest, qui directè absolvat; aliàs remittere debes



debes ad habentem potestatem, nisi ipse eam petere velis suppressio poenitentis nomine.

IX. Si invenias matrimonium invalidè contractum, prævideâsque ex manifestatione impedimenti scandala, & peccata; poenitens, si in bonâ fide, relinquendus est; donec occultè impetrarâ, si impetrabilis, dispensatione matrimonium possit, debeatque ratificari.

X. Si nequeas judicare, an peccatum M. vel V. nec poenitens dicere, quâ conscientia sit operatus, absolvas, quantum est reus. Si confiteatur mera dubia quoad substantiam, cures addi peccatum certum; si non adferat materiam sufficientem absolutionis, examina; si nihil accipias, pere peccatum aliâ confessum sive M. sive V. si nec hoc, datâ benedictione dimitte.

XI. Tempore absolutionis non requiritur distincta memoria peccatorum, nec quandò imponenda poenitentia; sufficit nosse statum poenitentis.

XII. Poenitentia sit accommodata statui poenitentis; proportionata tamen, quantum spiritus, & prudentia suggesserit. *Trident. Sess. 14. can. 8.* Misericordia superexaltet iudicium: ne unquam imponas, quam poenitens fortè non est impleturus.

XIII. Quid si poenitens poenitentiam priorem omiserit? ignoret, quam acceperit? quæras, an habuerit peccatum M. & iteratâ accusatione imponatur alia.

XIV.

XIV. Quoad consuetudinarios caveas nimiam severitatem, & nimiam clementiam; si post tentata remedia, inter quæ optimum est frequens apud eundem Confessarium confessio, emendationis spes nulla appareat, differatur absolutio juxta proposit. 60. damnatam ab Innocentio XI. poenitente interim disposito ad perfectam contritionem. Imò consuetudinarius absolvendus non est, nisi Confessarius prudenter credere possit, quod non ore solum se dolere dicat, sed & corde doleat, ex proposit. damnatâ cit.

XV. Si poenitens nolit restituere, dum potest, occasiones proximas non vitare, non ignoscere &c. omnem moveas lapidem ad persuadendum; si pertinax, dimittendus est sine absolutione.

XVI. Dubius de poenitentis dispositione, teneris eum disponere, non absoluturus, nisi de sufficiente dispositione fueris moraliter certus.

XVII. Dubius de obligatione poenitentis, absolvas, si poenitens obligationi suæ satisfactorius de eâ inquirere, aut eam auditurus redire promittat. Quid si obligaveris, vel deobligaveris, ubi non debuisti? vide fol. 344.

XVIII. Non facilè externis te immisceas poenitentis negotiis. Si quando in causâ poenitentis oportet agere, eam peras tibi manifestari extra confessionem.

XIX. Si

XIX. Si erraveris iudicio tuo circa peccatorum gravitatem, numerum, speciem &c. non ideo absolutio est invalida. Si poenitentem malè instruxeris, in proximâ confessione, vel aliâ occasione errorem tollas.

XX. Si poenitentem ex inadvertentiâ, oblivione, vel simili causâ non absolveris, aut aliunde invalidè; redeuntem moneas ut de omnibus peccatis aliàs confessis doleat, eumque absolvas; Si non speretur rediturus, moneas eum, si possis absque gravi scandalo, & incommodo. Quod si versetur in articulo mortis, omnino teneris eum accedere, & disporre ad novam absolutionem.

XXI. Vocatus ad infirmum, si hic confiteri possit integrè, teneris per se loquendo (non enim tempore contagionis) audire; si periculum mortis sit in morâ confessionis, absolvas audito uno, alteròve peccato; si confiteri nequeat, signa tamen det doloris, aut dedisse confiteri, aut Confessarium petierit, absolvendus est absolute; si horum nihil, conditionatè.

XXII. Consultus non facile suadeas vota perpetua v. gr. castitatis, abstinentiæ &c. Sed tempus, quo elapso possunt repeti. Consultus in causâ Matrimoniali consulentem mittas ad bonos amicos, aliòsve rei gnaros, te ipsum non immiscens.

XXIII. Poenitentem habens scrupulosum:  
1. Consideres scrupulorum causas, eâ que coneris tollere; exercitia corporalia suadeas, jejunia,

junia, & austeritates dissuadeas. 2. Moneas, ut in omnibus sine examine sequatur consilium confessarii, ejusque præcepta, & hunc non facile mutet. Item ut scrupulos contemnat infestens resolutio. i confessarii, & nunquam judicet esse peccatum M. vel se consensisse, nisi certò constet, imò quandoque, nisi jurare possit. 3. Non permittas confiteri scrupulos, nec confessiones de peccatis præteritis iterare, & si aliam non habeat materiam ad S. Communionem à te sine absolutione repellas. 4. Firmasingere resolutiones absque ratiocinationibus, ne scrupulus scrupulo superindicatur, adstringasque scrupulosum, ut per omnem modum sequatur.

XXIV. Peraçto ministerio, si benè, gratias age; sin minùs, doleas, studeasque emendationi. Denique Ministerium tuum Deo oblaturus hac vel simili uti poteris oratione: *Omnipotens, sempiterna Deus, suscipere digneris hoc obsequium mei Ministerium. Defectuum commissorum peto humillimè remissionem; Omnesque, & singulos, quos absolvi, gratia tua commendo, rogans: ut in novâ vitâ sanctitali ambulent, in eâ perseverent, & sic salvi fiant. Amen.*

## MONITA

Ad Assistentem infirmis.

I. **S**I cura animarum tibi incumbat, audito, quempiam è tuis ægrotare, etiam non rogatus cum invicè, vilurus, an periculum subsit.

Voca-

Vocatus autem, sepositis omnibus, ad eum propera, ne culpâ tuâ anima negligatur, & pro neglectâ tibi in die judicii reddenda sit ratio.

II. Veniens ad infirmum, aquâ benedictâ eum asperge: non statim de Confessione, vel de periculo loquere, nisi extremum adsit periculum, sed blandè per asceticum discursum, quod à felici morte felix dependeat æternitas, ut se disponat, si fortè avocandus, persuade.

III. Curabis ob oculos decumbentis poni imaginem Crucifixi, & aquam adesse lustralem, quâ æger, & lectus frequentèr aspergatur; si ægrotus magnis cruciatur doloribus, non multum loquere, sed breviter ad patientiam, & resignationem excita, proponendo dolores Christi.

IV. In promptu habeas salutares hortationes, item remedia contra timorem mortis, contra impatientiam &c.

V. Propones infirmo actus fidei, spei, charitatis, contritionis, resignationis &c. v. gr. an credat omnia, quæ Deus revelavit, & quæ S. Ecclesia proponit credenda? an speret per Dei gratiam, & merita Christi æternam beatitudinem? an Deum summum bonum diligat super omnia &c.

VI. Non ultra mediam horam, nisi sit periculum, apud infirmum moram trahere, ne visitatio tua reddatur odiosa.

VII. Si periculum mortis advertas, impediâs amicorum accessum, & multò magis præsen-



sentes eorum gemitus, & ploratus; periclitanti confessionem suade, vel statim, si opus, vel post tempus aliquod, si morbus permittat, faciendam.

VIII. Ad Confessionem generalem non urgeas, nisi fuerit necessaria; timidis verò, & scrupulosis eam non permittas; sufficit confessis confitendis de aliis in genere dolere, seque accusare.

IX. Auditâ Confessione, antequam des viaticum, si tempus permittat, aliquid cum ægroto orabis.

X. Si medicus, vel amici ægrum de propinquo mortis periculo monere nolint, tu ipse suaviter, & benignè moneas, proponens insuper: *An sit adhuc aliquid ordinandum ratione bonorum, an habeat debita, vel credita occulta, an teneatur voti, an omnibus ignoscat, sibi que ignosci p'stulet?*

XI. Testamento condendo te non immisceas, memor tuarum partium aliud non esse, quàm animæ providere.

XII. Ab ægro recessurus da benedictionem, & hortare priùs: ut spem suam in Christi meritis ponat; actus fidei, spei, charitatis, & contritionis frequenter eliciat; pia suspiria emittat, preces iaculatorias fundat dicens: *Agnus Dei, qui tollis &c. Deus propitius esto mihi Peccatori. In manus tuas Domine commendo Spiritum meum &c.*

XIII. Rediens ad infirmum, subinde orationem aliquam, vel Litanias prælegas, sed non diu,

diu, ne infirmus defatigetur, aut reddatur impatiens.

XIV. Ex moribundo interroges: *An debeat de omnibus peccatis suis, cupiatque in ultimis adhuc semel absolvi?*

XV. Ægrotum ad agonem declinare advertens, cereum trade, aquâ benedictâ asperge; recommendationem animæ ora; quandoque interrumpens des benedictionem, actum contritionis suggeras, signum contritionis petas, & denuo absolvas.

XVI. Si exspiravit, oculos ei claude, preces Ecclesiæ præscriptas prosequere, post eas aquâ benedictâ mortuum asperge; deinde discessurus ad circumstantes dices: *Benignissimus Deus defuncto det requiem, vobis autem suam gratiam & consolationem.*

XVII. Si morbus sit infectivus, habe remedia præservativa, & diligenter attende, ne stes, vel sedeas, ubi infirmi habitum ore excipere possis; neque in cubiculo subsistas, donec mortuus ex lecto deponatur.

XVIII. Si mortuus quædam tibi commiserit animæ salutem concernentia, mox iis, ad quod pertinet, aperias.

## MONITA

Ad Ungentem oleo infirmorum.

I. Si infirmi conditio permittat, ante extremam unctionem danda sunt poenitentia, & Eucharistiæ Sacramenta.

Gg

II. In

II. In promptu habeas , & diligenter custoditum in bombacio , ne effundatur , sacrum oleum infirmorum , quod singulis annis Feriâ s. in Coenâ Domini accipiendum est ab Episcopo novum , veteri combusto. Si videatur non posse sufficere , & aliud benedictum haberi nequeat , affundi potest modicum non benedictum.

III. Sacramentum hoc præberi debet infirmis , qui ad rationis usum pervenerunt , & in mortis periculo censentur constituti ; etiam amentibus , vel deliris , vel sensibus destitutis. Si aliquando petierint , aut dederint signa contritionis , aut Christianè vixerint.

IV. Præberi non debet impœnitentibus in manifesto peccato , & excommunicatis ; neque prælium inituris , aut alia pericula subituris ; neque reis ultimo supplicio afficiendis , neque prægnantibus non infirmis.

V. Non statim conferas extremam unctionem ad initium cujuscunque morbi , te molestiâ viæ ad redeundum exempturus ; nec differas ad extremum , donec infirmus sit sensibus destitutus. Non primum : quia requiritur periculum mortis ; non secundum : quia secus postulat fructuosa Sacramenti susceptio.

VI. Si infirmus cunctetur sacram admittere unctionem ex falsis imaginationibus , putans se inde moriturum , non licere amplius saltare , nec nudis incedere pedibus &c. ejusmodi imaginationes elimina dicens , ita non esse , sed un-

ctionem præter alios salutare effectus sæpe conferre pristinam sanitatem.

VII. Infirmum ungere volens, pollice oleo intincto in modum Crucis inunge S. organa sensuum, & intra digitos bombacium tene ad abstergendum, simulque organo correspondentem profer formam, v. gr. dum oculos ungis: *Per istam sanctam unctionem, & suam piissimam misericordiam indulgeat tibi Dominus, quidquid deliquisti per visum.* Dum autem paria ungis organa, v. gr. duos oculos, observare debes: ut sub pronuntiatione formæ ungatur utrumque, v. gr. uterque oculus.

VIII. Videns infirmum animam agere, subito inunge unum oculum, aurem, os, nares, manum, pedem, vel si hoc tempus non permittat, solam frontem sub unâ hac formâ: *Per istam sanctam unctionem . . . indulgeat tibi Dominus, quidquid deliquisti per visum, auditum, gustum, odoratum, & tactum; vel brevius: quidquid deliquisti per omnes sensus.*

IX. In periculo mortis, omissis orationibus, statim incipe ab unctione; eâ factâ, si infirmus supervivat, omittas supple, & quæ in Rituali sequuntur, adde.

X. In dubio de virâ, unge sub conditione: *Si vivus, per istam sanctam unctionem &c.*

XI. Si in necessitate facta sit unctio unius membri sub conditione, & infirmus supervivat, unctionem sub conditione repete, ungendo singulos sensus.

XII. Organa ungas in modum rucis, manus interiùs (nisi infirmus sit Sacerdos, cui exteriùs) & pedes superiùs; si membrum ali- quod sit destructum, v. gr. oculus erutus, unge in parte vicinâ.

XIII. Si infirmus laboret morbo contagio- so, tibi que timeas, ungere licet instrumento, imò omittere, si vita Pastoris sit aliis necessària.

XIV. In eadem moraliter infirmitate hoc Sacramentum non licet iterare; licet: si infir- mus aliquamdiu convalescat, & postea in peri- culum mortis recidat.

XV. Si cura animarum tibi incumbat, sci- to, non satis esse infirmo Sacramenta admini- strasse, quid enim prodest gratiam Sacramenta- lem accepisse, si eam perdat, & damnetur? sed cura tibi commissâ postulat, ut infirmum quan- doque visites, & in gratiâ conservare coneris, & maximè si vel levis sit suspicio relapsûs.

XVI. Opus facies maximæ charitatis, si infirmo assistas in agone: tunc enim *descendit Diabolus habens iram magnam, sciens, quod modicum tempus habet. Apocalyps. 12.*

## MONITA

### Ad Educentem captivos.

I. Vocatus ad incarcerationum primò coneris animum ejus tibi devincire, compa- tiendo, familiariter loquendo, charitatem ex- hibendo.

II. Con-



II. Consolaberis dicens: humanum esse seduci, & errare, si quis autem seductus fuerit, & malum fecerit, gloriosum, & laudabile esse, agere poenitentiam, & poenas potius subire temporales, quàm reservari ad Judicium ultionis aeternæ.

III. Moneas, ut justitiæ, & potestati patienter sese submittat: nam qui resistit potestati, Dei Ordinationi resistit, qui autem resistunt, ipsi sibi damnationem acquirunt. Rom. 13.

IV. Foro externo judiciali te non immisceas: unde nec captivum inducere debes, ut se reum fateatur, nec judicalem procedendi modum coram eo improbare, aut querelis assentiri; sed dices: similia non pertinere ad confessarium, te solum ei assistere velle, & debere pro aeternâ salute animæ, non tamen defuturum in bonum ipsius, si quid commode possis.

V. Inducendus est captivus ad frequenter orandum, seque committendum Divinæ dispositioni, quæ utique erit pro meliori bono animæ.

VI. Ad Confessionem Sacramentalem captivum non admittas, nisi post latam sententiam, quamvis antecedenter sit disponendus.

VII. Si spontè confiteri velit, fortè innocentiam suam sperans à Confessario demonstrandam; dicas: confiteri posse, Confessionem tamen nihil conferre ad sententiam, nec

pro , nec contra ; eo quod ex Confessione nihil dicere valeas , nec ipsum reum esse , nec innocentem , & si quid diceres , non credi.

VIII. Si quærat : *utrum teneatur crimen fateri* responde : non teneri , si non interrogetur juridicè , nimirum non existente semiplenâ probatione , si autem interrogetur juridicè , tutius esse , & justitiæ conforme , ut crimen fateatur , moriturus sub assistentiâ Confessarii morte bonâ , quâ fortè aliàs non.

IX. Non expedit , auxilio , vel consilio juvare ad captivi fugam , vel liberationem , si non sit spes emendationis , sed potius periculum mortis alibi , & aliàs malæ.

X. Post causam liquidatam hortaberis reum , ut peccata sua confiteatur , eaque integre , prout sunt in conscientiâ , certus , quod omnia sint servanda sub strictissimo sigillo , & confiteri non noceat , negare autem minimè profit.

XI. Si in Confessione neget , quæ in iudicio factus est , conare eum inducere ad sinceram confessionem proponendo probationes , quibus convictus in iudicio , obligationem sigilli Sacramentalis , gravitatem sacrilegii , æternam animæ damnationem &c.

XII. Si constanter neget crimen , dicens , torturâ , vel metu illius , falsò esse extortum &c. dicas , te ipsius relinquere conscientiæ , & velle absolvere , prout confitetur , & negare in confessione Sacramentali non juvare in Foro externo ,

no, sed innocentiam esse Deo commendandam, & mortem, si sustinenda, pro aliis peccatis esse oppetendam, vel in meritum juxta exemplum Christi innocentis, & sanctorum Martyrum.

XIII. Si quispiam in Confessione deprehendatur innocens, plerumque non expedit denunciare in foro externo: tum quia non creditur; tum quia est contra sigillum, nisi poenitens repetierit extra confessionem; tum quia alii sument ansam, peccata negandi.

XIV. Si captivus alios falsò denunciaverit, tenetur sub peccato mortali revocare, idque si nolit publicè metu novæ torturæ, inducendus est, ut faciat in carcere coram aliquot testibus, qui post mortem ejus propalabunt, nisi falsò denunciati sint simul afficiendi ultimo supplicio, tunc enim revocatio omnino facienda ante executionem.

XV. Si reus sit ad mortem damnatus; Sacra communio danda est pridie ante executionem, & solutis vinculis.

XVI. Ultimâ nocte ante supplicium apud captivum vigila, eumque piis admonitionibus, orationibus, exemplis ad bonam mortem dispone.

XVII. Dum legitur sententia, cavendum est, ut non reclamet, vel alios incuset: quia frustraneum.

XVIII. In educatione cavendum, ne reum præcedas, aut citius ire jubeas, quin potius re-

tarda, ut plùs cum reo orare valeas, eúmque magis ad mortem disponere.

XIX. Reus non circumspiciat, inter orandum quandoque pauset, osculetur Sacra Christi vulnera, actúsque charitatis, & contritionis, quos propones, eliciat.

XX. Si reus petat bibere, non detur nimum, ut maneat sibi præsens.

XXI. Quod si innocentem se dicat, innocentiamque protestari velit, observandum est, ut addat: omnibus tamen se ignoscere, mortémque ad satisfaciendum pro aliis peccatis suis patienter subire velle.

XXII. In loco supplicii reus ad novam disponendus est contritionem, & factâ unius, vel alterius peccati confessione adhuc semel absolvendus.

XXIII. Dum fit executio, prope sis, quantum licet, crucifixum reo ostendas, cum eo ores, cruce signes: ecce crucem Domini, fugite partes adversa &c. & sub actuali supplicio pie interclames, donec expiraverit.

XXIV. Demum circumstantes adhortaberis, ut orent pro animâ illius, sibi que caveant à tali supplicio.

## MONITA

Ad servientem peste, vel alio morbo infectis.

I. **A**ggressurus opus tam excellens charitatis, rectam forma intentionem: quâ vitam tuam

tuam pro salute proximi exponere velis, amore illius, qui vitam suam pro humano genere exposuit in cruce.

II. Diligentissimè cura, ut semper sis in statu gratiæ, semper paratus mori, si fortè inficiaris.

III. Nunquam periculo contagionis te exponas, nisi quando urget necessitas, & salus proximi.

IV. Non sis apprehensivus, & timidus, aliàs ex apprehensione, & imaginatione inficiendus, teste experienciâ.

V. Utere, si possis, vino, sed modicè sumpto; eodémque tempora, nares, & manus sæpè lava, quod & bono accito quandoque faciendum.

VI. Si Parochus sis, populum admonebis. 1. Ut quilibet conetur esse in statu gratiæ, sibi que tempestivè prospiciat per Sacramenta, etiam dum sanus est, Eucharistiam sumendo per modum viatici. 2. Ut quisque studeat Deum placare orationibus &c. 3. Ut peste infecti sese domi contineant. 4. Ut, qui in Ecclesiâ confitentur, os non vertant ad Sacerdotem, sed versùs parietem. 5. Ut, antequam Sacerdos vocetur, fenestram aperiant, suffragium faciant, & aërem igne ex odoriferis lignis purgent. 6. Ut, si infectus in Ecclesiâ antea sumperit Sanctissima Sacramenta, sitque in bono statu, amore proximi non petat Sacerdotem.



VII. Per hebdomadam utere præservativis, nimirum semel pilulis rufis ex pharmacopolio, duobus aliis diebus utere theriacâ, & reliquis mithridatico, vel prout Medici præscripserint.

VIII. Non utaris veste novâ, & pilosâ, sed antiquâ, & atrâ, quæ igne purgetur, postquam ab infecto redieris.

IX. Tecum habeas malum citreum cum caryophyllis, vel spongiam aceto madefactam, & impositam pomo ligneo sparsim perforato, quo usus S. Carolus Borromæus.

X. Cura, si possis, tibi fieri cauterium, quod optimum censetur præservativum.

XI. Excipiens Confessiones in Ecclesiâ, adhibeas præservativa, ut infra.

XII. Oleo scorpionum, vel simili mané ungas aliquas corporis partes, ut circa cor, sub axillis, post aures, pulsus &c. accedens ad ægrum balsamo, vel aceto inungas labia, nares, & tempora.

XIII. Non ex eas, nec visites infectos, nisi sumpto jentaculo; quod esse poterit panis cum buryro, & rutâ, vinumque medicatum, vel absinthio intincto, si jentare nequiveris, utere pomo ligneo, ut supra, theriacâ ad nares, vel aceto &c.

XIV. Sciens aliquem infectum, ut primum pores, tuo fungere officio.

XV. Exiturus manus, & fauces lava aquâ, cui permixtum sit acetum, vel vinum, in quo  
macc-

maceratæ fuerint herbæ odoriferæ, v. gr. absinthium, salvia, melissa, majorana, hyssopus &c.

XVI. Incedens per plateas poteris in ore habere, vel masticare aliquid radicis angelicæ, vel ex caryophyllis.

XVII. Veniens ad ægrum, si opus sit confessione, audies eum à longè, & curabis, ut accedat ad fenestram, vel portam, vel hortum, & semper stabis ab illâ parte, unde ventus fiat versùs infirmum.

XVIII. Quando æger confitens loquitur, non loquaris, sed strophium aceto madefactum, vel pomum odoriferum, ut supra, ori adhibeas.

XIX. Si domum cogaris ingredi, super lapides coctos, in igne positos, in medio domus fundatur acetum ad fumigandum, aut odor fiat ex combustis cornibus, detritis calcæis, sive pulvere tormentario, & quinque, vel sex pedibus stes à lecto infirmi, isque vertat faciem versùs aliam partem, & tegumenta lecti non moveantur.

XX. Ut declines halitum infecti, inter te, & ipsum semper sit ignis ex juniperis, vel saltem faculam ardentem teneas, aut teneri facias, réque citò expedias.

XXI. Sufficit Confessio formaliter integra, nimirum unius, vel alterius peccati juxta circumstantias; Unde infirmo dices: ipsum non teneri ad dicendum omnia peccata, & tamen ab omnibus absolvi.

XXII.

XXII. Quando plures in eodem sunt cubiculo, sufficit dicere peccatum aliquod leve, vel solum, si circumstantiæ petant, elici contritione, absolvi possunt simul, dicendo: *Ego vos absolvo à censuris, & peccatis in Nomine Patris &c.*

XXIII. Si infectus rudis sit, elice breviter cum eo actum contritionis; si confiteri nequeat, tamen absolvi debet; & si sacram Communionem sumere possit, eam porrige vel manu, vel si timeas, per cochlear argenteum, etiam cum iusculo, vel vino, vel aquâ, si necessitas postulet; ita Neusser, & alii.

XXIV. In loco, ubi quis expiravit, collocetur vas amplum cum aquâ frigidâ, postea in foveam fundenda; solet enim pestis ad humores attrahi.

XXV. Domum rediens, vestes ad ignem ex juniperis purga, faciem aceto aquâ mixto lava, te excita, & auram liberiores capta.

XXVI. Si aliquam alterationem sentias, rediens ab agro, haustum sume aliquem odoriferum, & theriacâ, vel simili sudorem provoca, quod etiam, tametsi bene habeas, qualibet hebdomadâ expedit.

XXVII. Manè celebrans sacram Hostiam semper sumas per modum viatici, ut non sit opus, si fortè in vitæ discrimen venias, illud sumere, quamvis absente alio Sacerdote sibi ipsi viaticum præbere liceat, juxta Gobat, & alios.

XXVIII. Si sanus evadas, Deo gratias age,  
& pro omnibus peste sublatis eum exora.

## MONITA

Ad Clericum, præcipuè Regulare.

**Q**uisquis Religiosus es, vide, quomodo dignè ambules in vocatione tuâ; Religiosus haberi, vide, an sis. Ad hoc necesse est: sis in mundo, sed non de mundo; sis cum hominibus, sed quasi sine hominibus. Venisti salvare animam, sed non salvabis, nisi vitam vixeris verè religiosam; igitur sic vive sicut vivere Religiosum decet, i que tenetur; ut autem sic vivas, vive secundùm monita, quæ sequuntur:

I. In nullo te ipsum quæras, sed solum Deum, ejus que honorem. Scias: quia non es propter te, sed propter Deum. *Esto tu Dei, & Deus erit tui.* S. Cyprianus.

II. Esto insensibilissimus hostis peccati. Quomodo potes hoc facere, & peccare in Deum tuum? Deus te creavit, cum nihil esses; te redemit, cum perditus esses; te vocavit ad statum Religiosum, ad Sacerdotium &c. quantà beneficia! visne reddere pro bono malum? absit.

III. Fac, quod postulat professio tua, quodque novisti placere Deo; esto sit tibi difficile, esto displiceat aliis, stultum est enim velle potius placere hominibus, quàm Deo.

IV. Ad-

IV. Adversitates cum lætitiâ suscipe de manu Dei. Tū ne non vis pauca sustinere ex amore Christi, qui tot, & tanta sustinuit ex amore tui? ille crucifixus est, tu nondum crucifigeris. Cogita, quid sustinuerint Sancti; quid sustineres in sæculo?

V. Pacem habe cum proximo: Fratres tuos honore præveni; ablit à te spiritus contradictionis, omnium te vilissimum reputa. Memento ut facias aliis, quod tibi fieri velles; si vis amari, ama.

VI. Nunquam conqueraris, nec internè conturberis in propriâ causâ, scias, & cogites, quod peccata, & defectus tui deterius quid mereantur. Et quis es tu, qui omnia vis tibi fluere ad votum? iustum non conturbavit, quidquid acciderit ei.

VII. Aliorum dicta, & facta tu temerè neque iudices, neque discutias: quid ad te? nosce te ipsum.

VIII. De omnibus non nisi bene; ubi factum non potes, intentionem excusa; Si quid displiceat, cogita: si Deus non daret tibi gratiam, minùs bene faceres.

IX. Quidquid agis, prudenter agas, & respice finem.

X. Sobrius esto, & temperans: multa fereula, multi morbi. *Subtrahatur voluptati, quod futurum est oneri.* S. Leo.

XI. Fac modò, quæ moriens facta fuisse voles, ecce nunc tempus acceptabile, nunc dies salutis. 2. Cor. 6. *Tempus non erit amplius.* Apocal. 10.



XII. Religiosum silentium tibi habe commendatum. *Si quis putat se Religiosum esse, non refrenans linguam suam, hujus vana est Religio. Jacobi 1.*

XIII. In piis lectionibus, & meditationibus frequens esto, & fervidus: ab iis pendet vita religiosa, & perfectio.

XIV. Nunquam sine legitimâ causâ te absentabis à communitate, maximè, dum adesse teneris: ovis, quæ à grege, perit.

XV. Non quæras ire extra conventum, imò nec cellam: qui sæpè exit, sæpè minor redit. Cellam ama, in hac age cum Deo, aut pro Deo: O beata solitudo, ô sola beatitudo! S. Romualdus.

XVI. Integerrimè fac ea, quæ tui sunt muneris in choro, in cellâ, in communitate, in cathedrâ, in confessionali, intus, & foris; dic: quare hic? ad quid venisti? ad quid Ordo tibi subministrat necessaria? ad quid piorum, & omnium pauperum frueris eleëmofynis? quid non facerent alii, quorum tu locum occupas? S. Franciscus non voluit sibi soli vivere, sed & aliis proficere; cur tu, si filius, non similiter?

XVII. Cogita ferè continuò te Religiosum esse, sic non facies, quod Religiosum deceat. Quod Superior vult, fac, & libenter; nunquam neget, quod potes.

XVIII. Paucis contentus esto, & tranquillus eris. Cave, ne contra paupertatem religiosam

sam quidquam habeas non necessarium, aut quidquam sine licentiâ.

XIX. Devita familiaritatem cum personis disparis sexûs. Quid ab illis? tentationes, cogitationes impuræ, motus pravi, etiam nolentibus. *Mulieres faciunt apostatare Sapientes.*

XX. Cave, ne laxa sis conscientiæ: lata est porta, & spaciola est via, quæ ducit ad perditionem.

XXI. O anima! *Statutum est semel mori.* *Hebr. 9.* igitur præ omnibus cura: ut, quod fieri necesse est, & factum corrigi nequit, bene fiat, & feliciter. Post modicum quid proderunt, ubi erunt: dignitas, officium, privilegium, commoditates, recreationes? erunt, quasi non fuissent. Attende, ne fuisse doceas.

XXII. In te ipso sollicitè emenda, quod displicet in aliis.

XXIII. Tunc mori velles in statu animæ tuæ præsentis? Si non: dispone domui tuæ; vigila, quia nescis, quâ horâ Dominus venturus sit. *Mors peccatorum pessima. Psal. 33.* sic vive, ut non timeas mori.

Hæc Monita sæpè relege, & vide, num ea observes; si observaveris, conservabunt te ad vitam, sed constans esto: qui perseveraverit... salvus erit. *Matth. 24.*

MONI-

## MONITA

Ad Superiorem Regularem pro  
felici Regimine.

## I.

**S**Tudeat mutuo amori; amet suos, ut ametur. Verletur proinde inter suos superior, ut inter filios Pater: moneat ut Pater, corrigat ut Pater, ubique & in omnibus Pater. Si fuerit Pater, subditi erunt filii.

II. Quod potest & vult, sine morositate concedat; quod non potest, sine indignatione neget, memor comitatis, & humanitatis, sed & autoritatis.

III. In conversatione vultus, oculi, frons, & omnia præferant modestiam, & benignitatem sine elatione, morositate, asperitate.

IV. Ita clementiam rigoribus permisceat: ut imperia plus referant clementiæ, quàm rigoris.

V. Priùs moneat, quàm puniat, memor verborum S. Bonaventuræ: plus proficies fratres tuos paternè monendo, quàm furore indignationis persequendo.

VI. Promptus sit in suorum necessitatibus, paratusque in omnem horam animus.

VII. Sincerè, & candidè procedat sine dolo, sine furo, sine duplicitate; *Candore* agat & *Amore*.

VIII. Gratum gerat in benefactores, & bene operantes animum. Gratitude benefacto-

res provocat ad nova beneficia, laboris recompensatio laborantes ad novos labores.

IX. Fidem, & promissionem non nisi à maturâ deliberatione dabit. Dedit? servabit.

X. Sit observantissimus secretorum sibi commissorum, item suorum. Si propalet secreta commissâ, tollit inferiorum confidentiam; si propalet sua: durum est mutare, & in honorem, non assequi intentum.

XI. Si domesticam quietem amat superior, si obsequentes desiderat, si ad ardua promptus: sinolit oblocutiones, murmurationes, fraudes, insidias &c. liberalis sit superior, non tamen prodigus, memor paupertatis Religiosæ.

XII. Fortis sit in adversis: cogitet hostes domi, foris, pro vero, pro bono, pro virtute non timidus mori. Deum cogitet, & felicem æternitatem, laborum, constantiæ, patientiæ præmium, nec aliud. Imperat? virum se præbeat. Exiit imperio? latus fruetur otio.

XIII. Utatur discretorum consilio: tacitus antè apud se rei momenta discutiet; proponetque suis, ne quis in unam magis, quàm alteram partem propensum illius animum percipiat. In rebus gravioribus, si moram patiantur, deliberandi tempus concedet; gaudebitque in sententiis ferendis suorum in dicendo libertate, respiciens non ad privata commoda, sed ad id, quod optimum. Ex hac agendi ratione, si quis intercurrat error, non imputabitur superiori, is factorum suorum habebit propugnatores, & laudatores.

XIV.

XIV. Superior pari studio feratur in omnes, omnino imparialis. Ut prudens tamen Medicus pro complexionum varietate varia sciat medicamenta, dum unus solo obtutu corrigitur, alius solo verbo, alius vix minis, & poenitentiis. Non semper in quovis delicto statim procedat ad poenam, solâ sæpe delicti confessio re contentus erit. Si delictum sit puniendum, cogitabit se patrem, delinquentes filios. Post poenitentiam frons, oculi, vultus indignationem omnino non referent; sed patris personam induens, moerorem filii absterget; nisi frequentata delicta, vel illorum gravitas aliud suaserint.

XV. Si suos superior temperantes, & sobrios esse velit, ducem se præbeat, & sequentur. Siq ipse indulgere dapibus, & calicibus velit, similiter suis concedat, necessum est; & quid inde? cujusque ventrem statuet Deum. Si negat, quid tunc? Oblocutionibus domum replebit, imparatosque ad imperata habebit.

XVI. Profitetur superior publicè & verbis, & vel maximè factis, se amatorem obervantiæ, ac disciplinæ regularis, etiam in minimis; seque ostendat zelosum; ut & alii, quæ disciplinæ sunt, observent, nullo timore, nullo humano affectu abducatur.

*Hæc de universâ Theologiâ subjecta sint Censuræ & Correctioni S. Ecclesiæ, cedantque ad majorem Dei Gloriam, & animarum Salutem.*



INDEX RERUM.

*Numerus denotat Paginam.*

*Accusator.*

Obligationes illius. Pag. 111.

*Acedia*

Quid? quale peccatum? 206.

*Abus humanus*

Quid & quotuplex? 155. Unde habeat bonitatem & malitiam? 160. Explicantur circumstantiæ illius. 162.

*Adam*

Creatus est in gratiâ sanctificante. 21. In statu innocentiae fuisset immortalis. Illius peccatum & peccati poena. 22.

*Advocatus.*

Obligationis illius. 112.

*Adulter & Adultera*

Ad quid teneantur, securâ ex adulterio prole vel stante dubio illius? 65.

*Angelus.*

An dentur Angeli, quid sint? eorum Hierarchia & Chori. 14. Ubi & quando creati? 15. Quomodo & quid cognoscant? ibid.  
non

## R E R U M.

non cognoscunt secreta cordium, neque futura contingentia libera, quomodo loquantur? Voluntas eorum est mutabilis, 16. Sunt in loco definitivè; Possunt esse in minimo, & plures in eodem; Quid possint in corporibus assumptis? 17. Sunt creati in gratia ex meritis Christi. 18.

### *Avaritia*

Quid sit, quale peccatum? 200.

### *Aureola*

Quid sit, & quotuplex? 24.

### *Baptismus*

Quid sit? quæ materia illius? 276. Quæ forma? 278. De Ministro. 279. De subiecto. 281. Qualiter Baptismus necessarius? 282. Effectus illius. 283.

### *Beatitudo.*

In quo consistat? quomodo beati impeccabiles & securi? quæ sint dotes Beatorum? 23.

### *Beneficiatus.*

Quando & qualiter obligetur ad horas? 115. Obligatus ad horas & omittens, fructus non facit suos. 116.

### *Blasphemia*

Quid & quotuplex & quale peccatum? 141. Variè committitur. 142.

### *Cambium*

Quid sit, an licitum? 102.

Hh 3

*Censura*

## *I N D E X*

### *Censura*

Quid sit? quotuplex? quis possit ferre? in quos? quando? 210. Causæ exculantes à censura. 212. Quis possit ab eâ absol- vere? ibid.

### *Census*

Quid & quotuplex? 100. An licitus? 101. Quid requiratur ad illum? & quando pere- at? 102.

### *Charitas.*

Quid Theologica? 231. Quando & qualiter obliget? 232. Quis ordo charitatis? 233. Actus charitatis sunt dilectio, eleemoly- na, correctio fraterna. 234.

### *Christus*

Est compositum Theandricum, in eo duæ na- turæ & una persona. 251. Scientia Chri- sti. 253. Fuit liber in materiâ præcepti. 254. Per quid formaliter sanctus? 256. Quomodo & unde impeccabilis? 257. An Merita illius infinita? 258. An satisfecerit de rigore i. stitiæ? 259. Virutes Christi, Potentia & Dignitas. 261.

### *Clausura*

Quid sit? & pœnæ violentium clausuram? 152. Quibus ingredi liceat & quando? 153.

### *Clericus*

Bona Ecclesiastica superflua malè expendens peccat graviter. 39.

*Coꝛnatio*

## R E R U M.

### *Cognatio Spiritualis*

Inter quos? 284.

### *Commodatum*

Quid sit, & quæ Obligationes Commodatarii? 88.

### *Conductio*

Quid sit, & quæ conductoris obligatio? 105.

### *Confessio*

An & quando necessaria? 324. Integritas ejus. 325.

### *Confirmatio*

An Sacramentum? quæ materia ejus & forma? 286. De Ministro & subiecto. 287. De effectibus & necessitate. 288.

### *Conscientia*

Quid sit? 164. An voluntas teneatur sequi? 165. An poenitens laborans conscientiam erroneam instruendus? 166. An liceat sequi opinionem probabilem? 167. In certis casibus non licet. 169. Non licet operari cum conscientiam practice dubiam. 170. Quid conscientia scrupulosa? ibid. Conscientia dubia qualiter deponenda? 171.

### *Contractus*

Quid & quotuplex? 82. Conditiones ut valeat. 83. Quando solubilis? 85. Invalidus non firmatur juramento, hoc tamen servandum, si possit. ibid.

### *Contritio*

Quid sit? quis effectus? 322.

## **I N D E X**

### *Contumelia*

Quomodo committatur & quale peccatum? 52.

### *Cooperantes ad damnum.*

Qui sint cooperantes positivè & qui negativè?

73. Ad quid obligentur secuto damno? 74.

Quo ordine teneantur restituere? 76.

### *Correçtio Fraterna*

Quando & qualiter obliget? 235.

### *Delectatio morosa*

Quid sit, quotuplex, quale peccatum? 198.

### *Depositum*

Quid? & quæ obligationes depositarii? 88.

### *Detractio*

Quotupliciter fiat? quale & quando peccatum?

49. Qualiter peccet audiens detrahentem, non impediens, infamans se ipsum? 51.

Item revelans crimen proximi ad evitandum damnum? ibid.

## **DEUS**

An sit, & quid sit? 3. Quid, & quæ sint at-

tributa Dei? 4. Quomodo visibilis? quæ

principia visionis, & quod objectum illius?

5. Unde visionis beatificæ inæqualitas? 6.

Quodnam objectum intellectus divini? quid

scientia Dei & quotuplex? 6. An, & in

quo videat Deus futura contingentia? 7.

Quodnam objectum voluntatis Divinae?

Quomodo amet se & creaturas? ibid. An

in Deo libertas, & in quo consistat? 8.

*Dispen-*



## R E R U M.

### *Dispensatio*

Quando illicita? 183. Quando invalida? 184.

### *Divortium*

Quid? ob quam causam & quâ auctoritate possit fieri? 382.

### *Dominium.*

Quorum bonorum dominium habeant uxor, filii familias, Clerici, Religiosi? 37. Homo non habet dominium vitæ & membrorum; Licet se vel alium occidit indirectè. 40. Dominium acquiritur Jure Naturali, Jure Civili, & Jure Contractus. 41. An feræ sint capientis, & res inventæ inventoris? 42.

### *Donatio*

Quando revocabilis, & quando invalida? 87.

### *Duellum*

Quid sit? 237. Excommunicationem contra duellantes quinam incurrant? 239.

### *Ebrietas*

Quando & quale peccatum? 205.

### *Ecclesia*

Quid sit? an visibilis? 223. Qui sint in illâ? 224.

### *Emphyteusis*

Quid sit? 104.

### *Emptio*

Quid sit? & quid requiratur ad validè, & quid ad licitè emendum? 93. Emptio sæpe illicita. ibid.

## INDEX

### *Eucharistia*

Quid sit? 289. De reali præsentia. 291. Quæ materia Eucharistiæ? 292. An liceat consecrare sub unâ specie? 294. De forma Consecrationis. 295. De Ministro. 297. Quis possit suscipere & quid requiratur in eo? 299. Quando Eucharistia sit sumenda? 301.

### *Excommunicatio*

Quid & quotuplex? 213. Quibus privet? 214. Explicatur excommunicatio in percussorem Clerici. 219.

### *Extrema Unctio.*

Materia & forma illius. 355. De Ministro, subiecto, effectu. 357.

### *Fama*

A quo, cui, & quomodo restituenda? 66. Causæ excusantes à restitutione. 67.

### *Famulus*

Domino emendo, vel rem ejus vendendo an sibi possit acquirere? 95.

### *Festum*

Quos obliget? quæ sint in festo licita, quæ illicita? 124. Quis dispenset? 125.

### *Feudum*

Quid sit? quando amittatur? 104.

### *Fidejussio*

Quid sit, & quam inducat obligationem? 107.

### *Fides*

## R E R U M.

### *Fides*

Quid sit? objectum ejus. 221. Articuli fidei quales? 222. Regula fidei. 223. An liceat fidem exteriùs negare, vel occultare? 227. Peccantes contra fidem. 228.

### *Filius.*

Filius familias quorum habeat Dominium? 36. Filii sunt quatruplicis generis nempe legitimi, legitimati, naturales & spurii. 91.

### *Furtum*

Quid sit? 52. Committitur in variis casibus. 53. Quando peccatum mortale? & quid de furtis minutis? 54. Cui, & quid restituendum? 68.

### *Gratia*

Quid? quotuplex? 240. An detur cuilibet sufficiens? ad quid necessaria? 241.

### *Hæredes.*

Qui non possint institui hæredes? 91. Hæredes sunt triplicis generis. 92.

### *Hæresis, Hæreticus.*

Quid hæresis? 228. Formalis & externa est reservata. 229. Quis hæreticus materialis, quis formalis? ibid.

### *Homicidium*

Committitur à Magistratu, Judice & aliis in variis casibus. 46. Se ipsum occidens physicè vel moraliter, committit suicidium. 45. Magistratui licet occidere malefactores, unicuique

## I N D E X

cuique bannitum & iniustum inuasorem. 47.  
An pręgnans sumere possit medicinam,  
unde secuturus abortus? ibid.

### *Homo.*

Quis finis illius? 23. Describuntur hominis  
novissima. 24.

### *Horę Canonice*

Quid sint? 114. Qualiter peccet omittens  
unam vel omnes? 115. Qualiter obliget  
Chorus? ibid. Quinam obligentur ad il-  
las? 116. Quo utendum sit breviario?  
118. Quale officium recitandum? 119.  
Qualiter peccet invertens horarum ordi-  
nem, interrumpens, mutans officium? 120.  
Recitatio cum socio. 121. Qualis requira-  
tur intentio & attentio? ibid. Causę ex-  
cusantes à recitatione. 122.

### *Hypotheca*

Quid sit, & quę debitoris obligatio? 107.

### *Jejunium*

Quid requiratur ad Ecclesiasticum? qualiter &  
quos obliget? quis possit dispensare? 28.  
Causę excusantes. 31. Casus violentium  
jejunium. 29. Licita est collatio; qualis &  
quanta? 32.

### *Ignorantia*

An excuset à culpa? 159.

### *Impedimenta Matrimonii*

Quotuplicia sint? quę & quot? 388. De di-  
rimentibus. 391. & seqq.

*Incar-*

## R E R U M.

### *Incarnatio*

Quid sit? 245. An fuerit necessaria? 246.  
Motivum Incarnationis. 248. De unione  
hypostaticâ. 249. De naturâ assumptâ &  
assumptibili. 250.

### *Indulgentiæ*

Quid? 328. Dispositio lucrantis. 330. Cef-  
satio. 331.

### *Injuria*

Quid & quotuplex? 44. Injuriam in bonis  
naturæ infert qui inducit ad peccatum vel  
lædit in corpore. 45.

### *Interdictum*

Quid sit & quotuplex? 217. Peccatum &  
poena violentis interdictum. 218.

### *Invidia*

Quid, quale peccatum? 205.

### *Ira*

Quid, quando peccatum? 206.

### *Irregularitas*

Quid sit? 218. Quæ sint ex delicto, & quæ  
ex defectu? 219.

### *Jubilæum*

Quid & quotuplex? 232. De requisitis ad  
illud. 235.

### *Judex.*

Obligaciones illius. III.

### *Juramentum*

Quid sit & quotuplex? 131. Condiciones Ju-  
ramenti



## *I N D E X*

ramenti l citi. 132. Quando & qualiter  
jurans peccet? ibid. Qualiter obliget Ju-  
ramentum Promissorium, & qualiter obli-  
gatio ejus tollatur? 133.

### *Jus*

Quid & quotuplex? 32. Describuntur species  
ejus. 34.

### *Justificatio*

Quid sit, & quæ causæ illius? 242.

### *Justitia*

Quid & quotuplex? subjectum ejus & ob-  
jectum. 33. Quid distributiva? quomodo  
lædatur? 108. Quid vindicativa? 110.

### *Lex*

Quid sit? quotuplex? quomodo & quando  
obliget? 173. Quid lex æterna & natura-  
lis? 174. An dispensabilis? ibid. A quo  
lex vetus, pro quibus & quamdiu? 176.  
Quos obliget lex nova? ibid. Quis possit  
in eâ dispensare? 177. Quos actus &  
qualiter præcipiat lex humana? 178. An  
obliget clericos, peregrinos, vagos? 179.  
An obliget graviter? 180. An lex cel-  
set cessante fine? item per epikeiam, con-  
suetudinem, abrogationem, dispensatio-  
nem? 182.

### *Librum arbitrium*

Quid sit? an detur? 155.

### *Locatio*

Quid sit, & quæ locatoris obligatio? 104.

*Lucifer.*

## R E R U M.

### *Lucifer.*

Primum illius peccatum philautia. 19. Unde sit Doemonum obitatio? ibid.

### *Ludus*

Quid sit? an licitus? 105. Quando illicitus? 106. Ludens in variis casibus lucrum non facit suum. ibid.

### *Luxuria*

Quid sit? quæ species ejus? 201.

### *Martyrium*

Quid postulet? 27.

### *Matrimonium*

Quid & quotuplex? 371. Minister illius? 372. Qualis requiratur consensus? 373. An valeat clandestinum? 376. De Polygamia & Bigamia. 378. An possit dissolvi? 380. Copula quando licita, quando illicita? 385. De dispensatione in impedimentis, 404.

### *Meritum*

Quid sit? quotuplex? conditiones illius. 244.

### *Metus*

An excuset à culpa? 158.

### *Missa*

Præcepto eam audiendi satisficit in variis casibus. 181. Quid sit, an verum sacrificium? 303. In quo consistat? 304. Effectus sacrificii. 305. De tempore celebrationis. 307. De loco. 309. Qualis legenda sit Missa?

## I N D E X

---

Missæ? 311. De Paramentis. 312. De  
Stipendio. 314. Quis, & quando teneatur  
audire Missam? 316.

### *Monopolium*

Quid sit? sæpe illicitum. 97.

### *Mutuum*

Quid sit? 97. Mutuatoris & mutuarii obligationes. 99.

### *Negotiatio*

An, & quibus licita? 96.

### *Novitiatus*

Quid sit? 145. Conditiones illius & effectus.  
146.

### *Occisor.*

Obligationes occisoris. 62.

### *Odium*

Quotuplex, quando & quale peccatum? 236.

### *Ordo*

Quotuplex? 359. Materia, forma & effectus.  
360. De Ministro & subiecto. 361. Qualitates ordinandorum. 362. Eorum obligationes. 364.

### *Opera sex Dierum.*

Quid Deus quolibet die creaverit? 20.

### *Papa*

An Caput Ecclesiæ? an & quando infallibilis?  
224.

### *Patrinus*

Quis? an necessarius? 284.

*Pecca-*

## R E R U M.

### *Peccatum*

Quid & quotuplex? 187. Quæ peccata specie distincta? 188. Quando & quomodo multiplicentur numero? 189. Peccatum omissionis quando committatur? 190. Peccatum habituale in quo consistat. 191. Veniale fieri potest mortale. 192. Quid requiratur ad mortale. 193. Peccatum mortale fit quandoque veniale. 195. De consensu conditionato. 196. In quibus detur vel non detur paritas materiæ. 197. In quo consistat peccatum originale? 207. Non fuit in Beata Virgine. 208. Effectus illius. 207.

### *Pœnitentia.*

Materia & forma Sacramenti pœnitentiæ. 319. Necessitas illius & effectus. 321. De Ministro. 341. Absolutio quibus danda quibus non? 345.

### *Proclamationes*

An, quot, à quo, & quando faciendæ? 369.

### *Religio*

Sumitur pro statu religioso & describitur. 143. Quis possit recipere, quis recipi? 144. Obligatio voti religionis. ibid. An ejicere liceat, & quæ ejectorum obligatio? 154.

### *Religiosus*

Non est capax dominii in temporalia. 37. Donat suo nomine invalidè. 39. In quibus

## INDEX

bus peccet contra votum paupertatis? 38. Quis obligetur ad horas & quis non, 117. Tenetur tendere ad perfectionem. 143. Ut sit religiosus requiruntur tria vota. ibid. Ad quid teneatur vi votorum? 149. & seqq.

### *Reservatio*

Quid? 346. Peccata reservata & quis possit absolvere? 347.

### *Restitutio*

Quid sit? unde oriatur, quando restituendum ex damnificatione? 56. Casus, in quibus restituendum, in quibus non. 57. Ad quid teneatur impediens à bono, vel seducens ad malum? 58. Acceptum ob turpem causam, vel opus aliunde debitum, an sit restituendum? 59. & seqq. Circumstantiæ restitutionis: quis debeat restituere, quid, cui, quo ordine, ubi, quibus auxiliis, cur, quomodo, quando? 77. & seqq. Causæ excusantes à restitutione ad differendum vel omittendum. 80. & seqq.

### *Resurrectio.*

Describitur resurrectio mortuorum. 24.

### *Reus.*

Obligationes illius. 112.

### *Sacramentum*

Quid sit? 264. Materia & forma illius. 265. De Ministro. 268. De subd. etc. 271. De gratiâ Sacramentali. 273. Quanam Sacra-

cra-



## R E R U M.

cramenta reviviscant ? 274. De Chara-  
ctere. 275.

### *Satisfactio*

An possit mutari ? à quo & quando ? 326.  
Effectus illius. 327.

### *Sigillum*

Quid sit ? quomodo obliget ? 352. Materia  
illius. 353. Quos obliget ? 354. Non  
licet uti scientiâ confessionis. 353. Licet.  
ibid.

### *Sponsalia*

Quid sint ? 366. Dissolvi possunt. 367. Va-  
lida, invalida. 368.

### *Testamentum*

Quid, & quoruplex, & qualiter obliget. 90.  
Qui testari non possint. ibid. Quan-  
do Testamentum revocabile & mutabi-  
le ? 92.

### *Testis.*

Obligationes illius. 111.

### *Theologia.*

Quid Theologia & quoruplex ? 1. An sit  
scientia & qualis ? principia Theologiæ ;  
Objectum Theologiæ dividitur & descri-  
bitur. 2.

### *Thesaurus*

Cujus sit inventus in fundo proprio vel alie-  
no ? 41.

### *Transitus*

An licitus de ordine ad ordinem ? 154.

## INDEX RERUM.

### *Trinitas.*

An plures dentur personæ Divinæ? per quid  
constituantur? an realiter inter se distin-  
ctæ? 9. An tres Personæ Divinæ sint tres  
Dii? cur non? ibid. Quæ notiones in  
Deo, sive per quid una persona noscatur  
distincta ab aliâ? 12. Si Filius non pro-  
cederet à Spiritu Sancto, ramen realiter  
distingueretur ab illo. 13. Quid circum-  
infectio? quid missio? ibid.

### *Venditio.*

Sæpe illicita. 94. Potest rescindi. 95. Res  
vendita cui pereat? 96.

### *Virtus.*

Quæ & quot Virtutes Cardinales? 25. Quid  
Theologica & quotuplex? 221.

### *Votum*

Quid sit & quotuplex? 125. Quos & qualiter  
obliget? 126. Quomodo tollatur. ibid.  
Quis possit votum irritare? quis commu-  
tare? quis dispensare? 128. & seqq. Quid  
circa commutationem & dispensationem  
observandum? 129. Vota reservata. 130.  
Explicantur vota religiosa. 149. & seqq.

### *Usura*

Quid & quotuplex & quale peccatum? 98.  
Committitur in variis casibus. 100. Uti-  
larii obligatio & poena. 98.

CON-

CONTROVER-  
SIÆ FIDEI  
PRINCIPALIORES

*Sive*

In materia Fidei

DOCTRINA

ACATHOLICA,

DOCTRINA

CATHOLICA,

OBJECTIONES

ACATHOLICÆ,

Doctrina Acatholica falsa & respuenda,

Catholica vera & tenenda, Objectiones  
insufficientes & solutæ :

*Quas pridem privato Discipulorum*

*usui, publicæque omnium utilitati nunc ter-*

*tia Editione sub Approbationibus & Cen-*  
*sura priorum dedit*

F. ANGELINUS BRINCKMANN,

Ord. S. Francisci FF. Min. Recollect. SS. Theo-  
logiæ Lector Jubilatus, Provinciæ Thuringiæ S.  
Elisabethæ Minister Provincialis Actualis.

---

Anno MDCCCL.

\* \* \*

Nullæ majores divitiæ , nulli  
thesauri, nulla hujus mun-  
di major est substantia,  
quàm est fides Catholica:  
Hæc in æterna hæreditate  
cum Sanctis Angelis collo-  
cat. S. Augustinus de *ver-  
bis Domini.*


\* \* \*



## CENSURA ORDINARIÆ.

**P**resentes Controversiæ Fidei, cum Do-  
ctrinam Acatholicam solidè impugnent,  
Catholicam propugnent, ut typis ad  
multorum utilitatem publicentur, censeo ac  
permitto. Fuldæ 13. Januarii 1728.

*Petrus Schürpff, SS. Theo-  
log. Doct. Pro-Vicarius &  
Officialis.*




## APPROBATIONES THEOLOGICÆ.

**E**X commissione A. R. P. Ildephonsi  
Stumpff, Provinciæ nostri Thuringiæ  
S. Elisabethæ Ord. S. Francisci Min. Re-  
collect. Vicarii Provincialis legi Controver-  
sias Fidei pro Doctrina Catholica necessariò  
tenenda, eaque contra Acatholicam defen-  
denda, ab A. V. P. Angelino Brinckmann,



præfati Ord. SS. Theologiæ Lectore Jubilato  
& Conventûs Mariano-Fuldens. Guardiano  
clarâ & gratâ methodo concinnatas; Quas,  
quia Sanctæ Doctrinæ, morumque honestati  
minimè repugnantes inveni, ad communem  
Catholicorum & Acatholicorum utilitatem  
prelo dignas censeo. Dabam Limburgi ad  
Lahnam die 8. Septembris 1727.

*F. Ludovicus Eisenbach ,  
SS. Theologiæ Lector Emeri-  
tus, præfate Provinc. Expro-  
vincialis & Pater perpetuus.*



**P**ræsentes Controversiæ Doctrinam Or-  
thodoxam clarâ methodo propugnant:  
quare, ut pro instructione multorum  
in publicum prodeant, dignissimas judico,  
non dubitans, quin aberrantes sint viam ve-  
ritatis & semitam salutis reperturi. Dabam  
in Conventu Episcopo - Tuberano die 18.  
Octobris 1727.

*F. Medardus Wolff ,  
SS. Theologiæ Lector  
Jubilatus & Conv.  
Guardianus.*


LICEN-

# LICENTIA

A.R.P. Vicarii Provincialis.

**U**T Controversiæ à V. A. P. Angelino Brinckmann, SS. Theologiæ Lectore Jubilato & Conventûs Montis Mariani supra Fuldam Guardiano tractatæ & à duobus Theologis approbatæ prelo subjiciantur, permitto. Dabam Limburgi ad Lahnam die 15. Decembris 1727.

*F. Ildephonsus Stumpff,  
Provinc. Thuring. Vicarius Provincialis.*



## AD LECTOREM.

**S**Cire tuum nihil est, nisi scias (1.) An aliquis verus existat Deus: Isque certâ Religione sit colendus; ut non sis Atheus. (2.) Si Deus existat: an Unus sit in Essentia, Trinus in Personis; ut non sis Mahometanus. (3.) An Messias in Lege promissus jam venerit; ut non sis Judæus. (4.) Si venerit; quæ Fides in Christum & inter Christianos sit tenenda; ut non sis Hæreticus. Hæc à quibus æterna pendet felici-

tas, scire, prima tibi & maxima esse debet cura: Hæc si non scias, scire tuum nihil est ad salutem. Ut autem scias, quid credendum & sciens rectè credas & rectè credens bene vivas, sicque salvus fias, recomdatum tibi habe Tractatum Controversiticum, sive hunc, sive alium. Ante hunc

*Nota 1.* Citationes ex Operibus Lutheri Jenensibus esse ex illis, quæ edita Jenæ Anno 1590. quod monere volui, quia posterioribus in editionibus Lutherani Doctorem suum & Magistrum Lutherum correxerunt, quædam, quæ aut erronea, aut bonarum aurium offensiva, aut alibi dictis opposita, omittendo. Quæ autem ex præfatis Operibus citavi, testor in illis contineri, utpote quæ in illis ipse legi, lecta exscripsi.

*Nota 2.* Ad legendum Abbreviationes Prob. & P. significare probatur, R. respondeo, N. nego, C. concedo, D. distingo, maj. majorem, min. minorem, Ant. antecedens, cons. consequens vel consequentiam, Trans. & Tr. transeat; sic lege & intellige veritatem.

✱ ( ○ ) ✱

QUÆ-



# QUÆSTIUNCULÆ PROOEMIALES.



*Quæst. I. Quodnam sit objectum Tractatus  
Controversiæ ? R. Est Fides vera ,  
sumpta pro dogmatibus à Deo re-  
velatis. Ratio : Quia circa eam  
ut asserendam & defendendam ver-*

*sat, ostendendo : quid credendum sit, quid  
non, & quare.*

*Quæst. II. Quid sit credendum & quare ? R. Om-  
ne, quod Deus revelavit & quia revelavit, cre-  
dere debemus, sive scriptum sit, sive traditum :  
credimus enim omne revelatum, non quia  
scriptum, sed quia revelatum. Hinc*

*Inferes : objectum fidei materiale, quod  
creditur, esse omne à Deo revelatum ; For-  
male motivum, propter quod creditur, esse  
Veracitatem Dei, ut Infallibilis est in cognos-  
cendo & loquendo.*

*Quæst. III. Quid sit Fides Divina ? R. Habituan-  
lis est habitus à Deo infusus, inclinans homi-  
nem ad credendum, quidquid Deus revela-  
vit, propter authoritatem Dei revelantis.  
Actualis est actus intellectus, quo propter*

authoritatem Dei revelantis quis credit ea, quæ Deus revelavit & Ecclesia credenda proponit.

Hinc ut elicere possis actum fidei (1.) Tibi proponi debet objectum à Deo revelatum: quomodo credes, non sciens quid credendum & quare? (2.) Proponi debent motiva evidentiæ credibilitatis: qui faciliè credit, faciliè decipitur. (3.) Formare debes iudicium credenditatis: nam fides cadit sub obligationem, sed non nisi formato tali iudicio. (4.) Sequitur pia affectio ad credendum: ut fidei sit libertas & meritum. (5.) Sequitur assensus intellectû & habetur actus fidei.

Quæst. IV. *Quam necessaria sit Fides in Deum?*  
R. Necessaria est ad æternam Salutem necessitate mediæ: Nam sine fide impossibile est, placere Deo. Hebr. 11. Qui non crediderit, condemnabitur. Matth. 16.

Quæst. V. *Cum quibus controversiam habeant Catholicæ?*  
R. Habent cum Paganis de Existentiâ Dei, cum Mahometanis de SS. Trinitate & Incarnatione, cum Judæis de Adventu Messie, cum Hæreticis de quibusdam Fidei Christianæ Articulis; in Germania potissimum Controversia est cum Lutheranis & Calvinistis: Primi se dicunt Evangelicos, Secundi Reformatos, sed Utique malè. Nova Lutheranorum Dogmata, v. gr. *Hominem carere libero arbitrio, Præcepta DEI non posse servari, hominem justificari sola fide &c.* sunt Evangelio con-



contraria: ergo malè se vocant Evangelicos. Dogmata Calvinistarum, ex Authore suo Calvinio homine impio, de libertate, de authore Peccati, de Præceptis, de Prædestinatione &c. sunt falsa & impia; imò Ecclesia vera non potest reformari, quia nequit deficere: ergo malè se vocant Reformatos. Quid? si Lutherani sint Evangelici; cur non & Calvinistæ? si hi Reformati; cur non & isti? Utrique sunt Protestantes, quatenus contradicunt Catholicis; Utrique prætendunt se purum servare Evangelium, séque reformâsse Ecclesiam; utinam non constituissent novam deformatam!

Quæst. VI. *Quid sit Hæresis?* R. Est error contra fidem in homine Christiano. Ut sit *formalis*, requiritur ex parte intellectus iudicium erroneum contra veritatem fidei sufficienter propositam; ex parte voluntatis requiritur pertinacia se nolentis submittere Ecclesiæ. Hinc

*Inferes*: Hæreticos aliquos esse formales, alios materiales: *Formalis* est, qui scienter & pertinaciter adhæret errori contra Veritatem Catholicam sufficienter propositam. *Materialis* est, qui adhæret quidem errori contra fidem, sed absque assensu interno, vel sine pertinacia, utpote ex ignorantia & paratus est errorem deponere, si instruat: quod, si deponere culpabiliter differat, peccat graviter, formaliter tamen non est pertinax, nec Hæreticus.

Quæst. VII. *Qualiter procedendum sit cum Hæreticis?* R. 1. Catholicus in Controversiis non versatus disputationem non ineat cum aggressore Acatholico, sed eum ad rerum Polemicarum peritos amandet.

2. Si incidas in Hæreticum materialem, qui inculpabiliter existimat se non errare, sedque salvandum in fide sua; attende, an prudenter sperare possis conversionem ejus: si ita, ostende viam veritatis; si non, relinque in bona opinione, ne ex materiali peccatore facias formalem; docendus tamen est, quomodo elici debeat contritio perfecta, vi cuius, si peccaverit, justificari poterit & salvari.

3. Si defensivè te habere velis & argumentum quodcunque Adversarii infringere, sic respondeas: juxta te nihil est credendum, nisi quod continetur in Sacra Scriptura: necesse igitur est, ut ostendas, te Sacram habere Scripturam & incorruptam & verba allegata in ea contineri & habere sensum, quem intendis; hoc cum non possis, ex ipsa Scriptura, nec ego tuæ possum assentiri doctrinæ.

4. Si oppugnare velis, abstineas à rixis, gravibus censuris, convitiis & verbis asperis; quibus animi exacerbantur & in tua opinione obfirmantur.

5. Si Hæreticus sit pertinax, evita; si zelosus, Deo commenda; si frigidus, necessitatem fidei inculca; si dubius, instrue & mori-

coriva credibilitatis pro Fide Catholica, quæ  
trā, propone.

6. Oppugnaturus aliquem, non descen-  
das ad articulum particularem, sed manens in  
principiis generalibus, ostende: quæ sit vera  
Ecclesia, cui convenient aut non convenient  
illius notæ & signa; si ostenderis convenire Ec-  
clesiæ Catholicæ, ostendisti veros esse Artic-  
ulos, quos Ea proponit credendos, Eamque  
veram esse Ecclesiam.



## CAPUT I.

Controversiæ cum Atheis, Paganis,  
Mahometanis & Judæis.

### CONTROVERSIA I.

*Cum Atheis & Paganis de existen-  
tia Veri & Unius DEI.*

**D**octrina Atheistica est: *Nullus existit Deus.*  
Nomine DEI intelligitur Ens à se, Opt.  
Max. quod omnia creavit, conservat,  
gubernat & reddet unicuique secundum opera  
sua. Tale Ens negant moderni temporis Pseu-  
do. Politici, exterius simulantes, sed dicentes  
in corde tuo aut in opere: *Non est Deus.*

Doctrina Paganorum fuit: *Plures existunt  
Dei.* Aliqui Deos constabant ex lignis, la-  
pidi-

pidibus &c. de quibus *Psal.* 113. *Simulachra Gentium argentum & aurum, opera manuum hominum.* Alii, turpitudinem istam excusare volentes, dicebant: Deos in Simulachris solum dare responsa; sed Demones erant, qui responsa dabant, juxta illud *Psal.* 95. *Quoniam omnes Dii Gentium Dæmonia.*

## DOCTRINA CATHOLICA:

*Existit Verus & Unus DEUS.*

**P**ROB. I. Dantur entia producta, cælum & terra: In cœlo conspiciamus regulatissimum syderum motum, in terra accuratissimas temporum vicissitudines, in vere flores, in æstate fruges, in autumnu uvas, in hyeme nives &c. Dicat Atheus, unde hæc omnia? à quo gubernantur & conservantur? an à se? nihil potest se ipsum producere, nec duo se mutuò: ergo sunt ab alio, idque est Ens primum & improductum, quod produxit omnia & est DEUS.

Dicit Atheus: Entia esse producta sicut unum ab alio & hoc ab alio in infinitum. De possibilitate talis processûs non constat. imò permessa, Atheum non juvat: nam omnia Entia successivè producta, quamvis in infinitum, sunt verè producta: ergo ab alio extra collectionem istorum Entium; aliàs aliquid ipsum produxisset, vel duo se mutuò; ergo producta sunt ab Ente improducto; productum

omnium extra collectionem omnium Entium probatorum non datur.

Prob. II. Multa sunt facta miracula, naturæ vires excedentia, v. gr. diluvium super universam terram, divisio maris rubri & alia in Libris Exodi, Numer. Jud. &c. atqui hæc non potuerunt fieri casualiter, nec ab alio, quam à vero Deo: ergo. Quod si Atheus credere nolit Bib. iis tanquam Verbo Dei, saltem credere debet tanquam Historiis, vel negare omnes Historias.

Prob. III. Ex duabus sententiis, quarum una affirmat, altera negat, esse Deum, negativa tenetur cum periculo aternæ miseriæ, affirmativa est sine periculo ullius mali: ergo hæc præ illa tam periculosa est tenenda.

Prob. IV. *Unitas Dei*: Plures Dii essent æqualiter potentes, quia æqualiter Dii; dicere autem plures Deos æqualiter potentes, est juxta Arthanasium; dicere plures æqualiter impotentes, adeoque non Deos.

*Objectiones Atheorum.*

I. Multi ignorant vel negant Deum: ergo non est evidens, quod detur. R. Ignorant non inquirentes, negant insipientes.

II. Gentiles non agnoverunt Deum Verum. R. Agnoverunt tamen Deum.

III. Si detur Deus, est Causa perfectissima; unde ergo mala & defectus? R. Est Causa perfectis-



fectissima ; mala & defectus inde , quia est  
Causa libera permissiva.

IV. Si existeret Deus, se manifestaret omnibus. *sc.* Omnibus in communi *C.* in particulari & privatim, *Subd.* per revelationem internam *C.* per externam *N.*

## CONTROVERSIA II.

*Cum Mahometanis de existentia*

*SS. Trinitatis.*

**D**Octrina Mahometanorum , à Mahometh in Arabia , adjuvantibus quodam Monacho Apostatâ Sergio & perfidô quodam Iudeo , ex Christianismo & Iudaismo compilata , atque in libro , quem appellavit Alcoranum , conscripta , est hæc : 1.) Datur verus Deus , sed non Personarum Trinitas. 2.) Christus est verus Propheta natus ex Virgine , non Deus. 3.) In sua quisque Religione salvari potest. 4.) Fides gladio propagari debet. 5.) Licitum est plures habere uxores & uxorem ad libitum dimittere. 6.) Mahometani in Paradyso aſſequentur omne genus voluptatum carnalium , maximè Mulierum &c.

Ex his patet : Mahometh non fuisse Prophetam à Deo missum , utpote cujus vita fuit luxuriola & scelerata , doctrina impia.

## DOCTRINA CATHOLICA:

*In Divinis Tres sunt Personæ.*

**P**Rob. I. Tum ex motivis credibilitatis, de quibus infra, quæ sunt pro Ecclesia Catholica, id ipsum docente. Tum ex apparitionibus Divinarum Personarum, *Marc. 1.* Tum ex Miraculis, denis & gratiis securis ad invocationem SS. Trinitatis, de quibus Historiæ authenticæ.

**Prob. II.** Contra Judæos: *Genes. 1.* dicitur: *Faciamus hominem ad imaginem & similitudinem nostram: & creavit Deus hominem ad imaginem & similitudinem suam.* Ubi per verbum *faciamus* à Viris Sanctis intelligitur Pluralitas Personarum, per verbum *Deus* Unitas Essentiæ.

*Objectiones Mahometicæ &c.*

**I.** Idem nequit esse unum & multiplex. *R.* Addere debes: secundum idem & concedo. Deus Unus in Essentia, Trinus in Personis; Unus & Trinus non secundum idem.

**II.** Christus dicit *Joan. 14.* *Pater major me est.* Quomodo ergo Deus? *R.* Loquitur ibidem de se secundum humanitatem, loquens autem de Divinitate sua, dicit *Joan. 10.* *Ego & Pater unum unitate Essentiæ sumus, distincti quoad Personas.*

**III.** Si Christus Verus Deus, non diceret *Joan. 17.* *Hæc est vita æterna, ut cognoscant Te solum Deum Verum.* *R.* Dicit solum Deum,   
um,

um, ad excludendum Idola & Deos falsos.  
Ita Chrysost. Cyr. &c.

### CONTROVERSIA III.

#### *Cum Judæis de Vero Messia.*

**D**OCTRINA Judæorum est: *Messias nondum venit.* Plures eorum errores & fabulæ continentur in Thalmud Hierosolymitano & Babylonico, qui sunt duo Tomi à Rabinis editi.

### DOCTRINA CHRISTIANA:

*Messias in Lege promissus jam venit; isque fuit Christus Dominus, Mariæ Virginis Filius.*

**P**ROB. I. De Messia prædictum est Isaia 7. *Ecce Virgo concipiet & pariet &c.* Item Michæ 5. *Bethlehem Ephrata! ex te mihi egredietur, qui sit Dominator in Israël.* Item Genes 49. *Non auferetur Sceptrum de Juda, donec veniat, qui mittendus est.* Item Isa. 53. quod patraturus sit miracula: *Tunc aperiuntur oculi cæcorum & aures surdorum patebunt.* Item Isa. 11. *Erit sepulchrum Ejus gloriosum &c.* Atque qui hæc & alia sunt in Christo impleta, ut constat ex Evangeliiis: ergo fuit Messias.

Sed Judæi non admittunt Evangelia tantum Verbum Dei. &c. Sufficit, quod negare non possint Ea per orbem terrarum à Viris Sapientissimis esse credita, miraculis confirmata & ipsi Judæi non possint docere contrarium.

II. Chri-

II. Christus plurima fecit miracula, v. gr. Lazarum resuscitando, aquam in vinum mutando &c. Item evidentiſſima facta ſunt miracula in morte Chriſti, de quibus etiam *Joſephus Hebraeorum Historicus lib. 18. Antiq.* jam ſic: miracula non poſſunt eſſe niſi à Deo, & Deus nequit facere in teſtimonium approbativum doctrinæ falſæ: ergo, cum facta ſint in teſtimonium doctrinæ Chriſti, hæc eſt vera.

*Dicunt Judæi:* Moſes etiam fecit miracula & tamen non fuit Meſſias. & Fecit, ſed non ad docendum, ſe eſſe Meſſiam & Filium Dei; Chriſtus autem ſic fecit.

III. Ad invocationem Chriſti adhuc plurima ſunt miracula; fides in Chriſtum per totum orbem eſt propagata & quidem per Apoſtolos, homines aliâ illiteratos, qui faciebant ſigna & prodigia multa; perſecutores Fidei Chriſtianæ de cœlo variè ſunt puniti; Martyres ſæpe ſervati illæſi; Judæi, qui Pragæ præſumebant Chriſtum in Hoſtia cultris contingere, igne de cœlo ſunt conſumpti; Ipi ſunt Gens abiecta & deſpecta, poſtquam Chriſtum crucifixerunt & clamaverunt *Math. 27. Sanguis Ejus ſuper nos & ſuper filios noſtros.* Hæc & ſimilia Judæus ſine pertinacia negare non poteſt; quid autem ſequitur? certiffimè hoc: vel Meſſiam jam veniſſe & fidem in Chriſtum eſſe tenendam, vel Deum impoſtorem; hoc eſſe nequit: ergo illud eſſe debet.

*Objectiones Judæorum.*

I. **S**criptura de Messia non est impleta in Christo, signanter illa *Isa. 11. Congregabit profugos Israël & dispersos Juda colliget à quatuor plagis terra.* R. Fuit impleta; quia loquitur de filiis Israël spiritualibus congregandis in fidei unitate & reducendis in terram viventium, ex qua per peccatum eieci.

II. Messias Rex erit potentissimus, ut habet Prophetia *Num. 24. Reaedificabit civitatem Jerusalem & templum:* ut habet Prophetia *Zach. 6.* Neutrum autem impletum est in Christo. R. Scripturam loqui de regno & templo spiritualibus: nam Messias fuit promissus & expectatus statim post lapsum Adami, ut liberaret populum suum, non à iugo hominum, sed dæmonis & peccati, non per regnum temporale, sed mortem suam *Isa. 53.* Sic impleta est in Christo, qui Jerusalem cœlestem & Ecclesiam militantem ædificavit ex lapidibus vivis, seu fidelibus *Math. 16.* Gubernat & iudicabit in fine mundi *Act. 10.*

## CONTROVERSIA IV.

*De abrogatione Legis Veteris.*

**D**octrina Judæorum est: *Lex Vetus nec abrogata est, nec abroganda.* Lex Vetus, seu scripta & Mosaica est illa, quæ post Legem naturæ à Deo populo Israëlítico fuit data, in 5. libris Moylis conscripta & ab eo promulgata, conti-



continens præcepta moralia, cæremonialia & judicialia; erat ante Christum Lex vera, sicut & Synagoga Ecclesia vera, nunc verò

### DOCTRINA CHRISTIANA:

*Lex Vetus à Messia, Christo Domino, est abrogata.*

**P**ROB. I. Danda fuit à Messia Lex Nova, tum juxta illud *Jerem. 32. Ecce dies venient, dicit Dominus & feriam domui Israël & domui Juda fœdus novum.* Item juxta illud *Isa. 2. Venite & ascendamus ad montem Domini, quia de Sion exibit Lex, & Verbum Domini de Jerusalem &c.* ergo data est à Christo; cùm Is fuerit Messias, ut suprà; & Lex Illius, non verò Moytis, in Sion primum sit promulgata & in Jerusalem divulgata.

II. Judæi post Christum occisum vagantur per orbem sine summo Sacerdote, sine Principe, ubique sunt sub jugo, sunt plebs abjecta & despecta, in Thalmud docent valde impia & absurda de Deo, de Cere, maximo Bo-ve &c. ut refert *Nicol. de Lyra* ex Judæo Christianus in *cap. 40. Job.* ergo non est credibile, Legem eorum adhuc tenere.

### *Objectiones Judæorum.*

**L**EX MOSAICA dicitur *Baruch 4. Lex in æternum.*  
Item fuit bona: ergo non abroganda.  
R. Dicitur Lex in æternum, non absolute, sed usque ad tempus Messie; quia sic longo tem-  
pore

pore duravit. Bona fuit pro statu Legis scriptæ, sed ordinata ad meliorem, scilicet Evangelicam, sicut figura ad figuratum.

II. Christus non venit, Legem solvere *Math. 5.* R. Non solvere intellige non violare; eam enim servavit, quamdiu viguit.

III. Si Lex Vetus abrogata, cur Christiani obligantur ad præcepta Decalogi? R. Obligantur non vi Legis Mosaicæ, sed Evangelicæ *Math. 19.* & quatenus præcepta illa sunt juris naturæ.

IV. Synagoga fuit Vera Ecclesia & hæc est indefectibilis: ergo non defecit. R. Ecclesia Vera est indefectibilis, ut nequeat abrogari à Deo quoad præcepta positiva N. ut non abrogata nequeat tota errare in fide C. Synagoga defecit per abrogationem à Deo.



## CAPUT II.

De Controversiis cum Hæreticis  
in communi.

### CONTROVERSIA I.

*De necessitate Unius Fidei.*

**D**Octrina quorundam, si non ore, in corde dicentium, est: *Quilibet, sive Christianus sit, sive Judeus aut Turca, salvari potest in sua fide, modò in Deum credat, Eumque colat.* Sic dicentes, propter libertatem & indifferentiam ad cre-

den

dendum, appellantur *Libertini & Indifferentista*:  
*Seçta eorum Indifferentismus.*

Alii sunt *Indifferentista strictiores*, volentes ad  
 beatitudinem non requiri Fidem Christianam  
 certam, sed sufficere quameunque; sic: ut Ca-  
 tholicus in Fide Catholica, & quilibet *Seçtarius*  
 sive Lutheranus, sive Calvinista, aut alius in  
 sua Seçta possit salvari, modò præcipuos credat  
 Fidei Christianæ Articulos, quos vocant *funda-*  
*mentales & essentielles*, & plerique asserunt conti-  
 neri in Symbolo Apostolorum; alios verò Ar-  
 ticulos, quos vocant *arbitrarios & accidentales*,  
 credere vel non credere, ignorare vel negare  
 juxta illos est perinde. Sed contra est

## DOCTRINA CATHOLICA:

*Una inter Christianos Vera est Fides & Re-*  
*ligio, sine qua impossibile est placere*  
*Deo & salvari.*

**P**Rob. I. Impossibile est, plures Religiones  
 inter se in fidei articulis oppositas esse simul  
 veras, alias contradictoria essent simul vera,  
 v. gr. *Messias venit, Messias non venit &c.* atqui di-  
 stinctæ Religiones sunt inter se in fidei articulis,  
 oppositæ: ergo impossibile est esse simul veras:  
 ergo vel non in qualibet earum potest obti-  
 neri salus, sed eâ tantum, quæ vera: vel fal-  
 sa Religio salvificat; hoc posterius est impossi-  
 bile, quia falsa Religio idem ac nulla in ordine  
 ad salutem: ergo prius tenendum.

*Confirm.* Si Deus diversas vellet Religiones, revelâret & credi vellet opposita v. gr. *Christus est Deus, non est Deus; est in Eucharistia, non est in Eucharistia &c.* quod impossibile.

II. Christus misit Apostolos in universum mundum, prædicare Evangelium omni creaturæ, dicens *Matth. 16. Qui non crediderit, condemnabitur.* Primæva Christi Ecclesia & Concilia magnis sumptibus congregata damnârunt hæretes. Martyres pro fide tuderunt sanguinem, à Deo miraculis illustrati &c. Ad quid hæc omnia, si quilibet in sua fide possit salvari? ergo non potest. Et dato posse: pessimè ergo fecerunt Lutherus, aliique Hæresiarchæ detestando Ecclesiam Catholicam, in qua salvari potuerunt; injustissimè fecerunt Tyranni contra Ecclesiam Catholicam gerendo bella, Tempia & Monasteria evertendo, possessiones diripiendo &c.

III. Ad *Ephes. 4.* dicitur: *Una Fides, unum Baptisma, Unus Deus & Pater omnium.* Quomodo una fides? non una simpliciter, sunt enim multæ; sed Una Vera, in qua salvari oportet.

IV. Articuli, quos Indifferentista vocat *accidentales*, sunt à Deo revelati, ideoque veri & certi. Jam sic: negans articulum à Deo revelatum injuriam facit Deo revelanti: ergo articulos, sint quicumque, à Deo revelatos negare non licet. Aliquos tamen non tenetur quilibet scire & credere explicitè; modò credat implicitè, paratus credere explicitè, si proponatur; & eatenus dici possunt *accidentales*.

*Confirm.* Ad salutem non sufficit servare duo vel tria mandata, sed necesse est servare omnia; ergo etiam non sufficit duos, tres, vel plures articulos credere, sed necesse est credere omnia, quæ Deus revelavit & Ecclesia credenda proponit. Audi *S. Athanasium* in suo Symbolo: Quicumque vult salvus esse, ante omnia opus est, ut teneat Catholicam fidem, quam nisi quisque integram inviolatamque servaverit, absque dubio in aeternum peribit.

V. Denique si Indifferentista sit obstinatus, sic contra eum arguo: Si tu Indifferentista eligas fidem pro beneplacito, exponis te periculo damnationis; quia contra te fermè totus clamat orbis: non sufficere quamlibet fidem ad salutem; si amplectaris Fidem Catholicam, te ipso iudice, in ea salvari poteris: ergo imprudenter facis, sequendo Indifferentissimum; prudentissimè, amplectendo Fidem Catholicam.

### *Objectiones Indifferentistarum.*

I. **I**udæi, Turcæ & Sæctarii possunt errare inculpabiliter; atqui sic errantes possunt salvari: ergo. R. Sic errantes possunt salvari vi suæ sæctæ N. per accidens, si parati sint facere, quod ad salutem necessarium & de peccatis, si quæ habent, perfectè contrici C.

II. Apostolus suadet: 1. Cor. 7. *Unusquisque in qua vocatione vocatus est, in ea perseveret*: ergo. R. Loquitur de vocatione ad certum vitæ statum v. gr. Religiosum, matrimonialem &c. non verò ad falsam Religionem.



III. *Omnis, qui invocavit Nomen Domini, salvus erit. Joël. 2.* Sed quilibet in sua fide invocatur Nomen Domini: ergo. *R.* Quilibet invocatur, sed non sicut oportet, credendô & faciendô, quæ Deus vult.

IV. Non displicet Regi terrestri à diversis nationibus coli diversis ritibus: ergo nec Deo displicere videtur diversis coli Religionibus; tolerat enim. *R. C. Ant.* si Rex ille non præceperit certos ritus. *N. Conf.* Ut cultus placeat Deo, Deicola credere debet omnia saltem implicite, quæ Deus revelavit, & facere, quæ præcepit. Tolerat quidem Deus diversas Religionem, sed non approbat.

V. In primitiva Ecclesia fuerunt dissensiones inter fideles *Act. 15.* fuerunt inter Petrum & Paulum *ad Gal. 2.* & hodie sunt inter Theologos Catholicos: ergo non obstant *saluti.* *R.* Fuerunt dissensiones in articulis fidei *N.* in rebus facti vel quæstionibus fidei nondum definitis *C.* & hæc non obstant.

VI. Multi articuli accidentales non sunt clarè expressi in Sacra Scriptura: ergo Deus non vult obligare ad credendum illos. *R. T. Ant.* ergo Deus non vult obligare ad credendum illos implicite *N.* explici è, *subd.* ante Definitionem Ecclesiæ *C.* post eam *N.* In quatuor primis Conciliis, quæ admittunt Acatolici, multa proponuntur credenda explicite, quæ priùs tantum credebantur implicite v. gr. Con-

Substantialitas Filii, Processio Spiritûs Sancti à Patre, Filióque &c.

VII. Catholici sunt valde pauci, Acatholici multi & quandoque probi; sed non est credibile, hos omnes damnari, illos solos salvare. ergo. R. Si Catholici, qui tamen reperiuntur per orbem terrarum, sint pauci, scias: *Pauci sunt electi Matth. 20.* Si Acatholici sint probi, non est credibile, eos damnari, si sint Acatholici ex errore invincibili C. si ex vincibili & culpabili N.

## CONTROVERSIA II.

*Quæ Fides & Religio sit capeßenda?*

Vera Religio, eaque tenenda, est Una; sed quæ illa? Lutherus respondet esse suam, Calvinus suam; cuique Hæresiarchæ, quod suum, pulchrum est. Contra quos

## DOCTRINA CATHOLICA:

*Fides ad salutem necessaria, eaque tenenda, est sola Romano - Catholica, Apostolica.*

Quare hoc: Motiva sequentia impassionato & indifferenti animo considera & intellige veritatem.

Motivum I. *Ex Antiquitate.*

Hæc dicit Dominus (Jerem. cap. 6.) *Interrogate de semitis antiquis, quæ sit via bona & ambulate in ea:*

*ea* : ergo Religio antiqua est tenenda. Quæ illa ? non Lutherana ; quæ sæculo decimo sexto fuit in cunis Lutheri & Catharinæ, Monachi & Monialis ; nec Calvinistica , quæ nata eodem sæculo , parente Calvino Canonico ; nec ulla alterius Hæresiarchæ post tempora Christi : Catholica est , quæ à temporibus Christi & Apostolorum ; ut patet ex continua successione Episcoporum & Summorum Pontificum usque ad Apostolos ; aut si quis neget hanc antiquitatem , assignet , quando Religio Catholica in- ceperit , & à quo.

*Confirm.* A temporibus Apostolorum usque modò nec Pagani, nec Hæretici, nec Portæ Inferi potuerunt prævalere contra Ecclesiam Catholicam ; quare non ? quia est Ecclesia Vera, Ecclesia Christi ; si hæc non esset , utique prævalere potuissent. Ubi jam Ariani, Pelagiani, Manichæi ? ubi post modicum moderni Hæretici ? audi Christum *Matth. 15.* *Omnia plantatio, quam non plantavit Pater meus cœlestis, eradicabitur.*

*Respondent Lutherani* : se habere Fidem, quæ fuit quinque primis sæculis, adeoque antiquam ; quæ, postquam defecerat & mille circiter annis sopita fuerat, à Luthero est resuscitata. *Contra est* (1.) Idem dixerunt Ariani, Manichæi, &c. Idem dicunt Calvinistæ ; an omnes verum ? certè non ; an Lutheranis credendum & non illis ? minimè : non sunt veraciores. (2.) Si ita : ergo mille annis usque ad Lutherum Vera Fides non fuit in mundo ; quis sibi persuadeat

teat (3.) Ergo à tempore, quo Fides defecerat, utque ad Lutherum nullus, exceptis infantibus, potuit salvari? ubi ergo Majores nostri? (4.) Articuli Sectæ Lutheranorum sunt: *Sacrificium est Idololatria: Mandata non possunt servari: sola fides justificat: non datur liberum arbitrium, non Purgatorium, non presentia Christi in Eucharistia ante usum, non invocatio Sanctorum &c.* Ostendant primos Christianos sic credidisse; omninò non possunt: quomodo ergo Fides eorum antiqua? (5.) In Ecclesia Catholica à tempore Christi usque ad Lutherum & post semper fuerunt Sancti, facta sunt miracula &c. ergo semper Vera fuit Ecclesia; & hodie est eadem, quæ fuit tempore Apostolorum, additis solum ritibus & cæremoniis, quæ Fidem non variant.

Motivum II. *Ex Sanctitate.*

**I**lla Religio est præferenda, quæ Sancta est in doctrina Fidei & morum; item Sancta in Membris suis, habens Sanctos, qui in ea vixerunt; nam Ecclesia in Symbolo Apostolorum dicitur Sancta; sed quæ illi? Catholica est: Hæc (1.) Sancta in doctrina Fidei & morum; quia non solum nihil credit aut docet Deo, Sacra Scripturæ, vel rectæ rationi contrarium & falsum, sed credit omnia, quæ à Deo revelata; docet, quod primum est & sanctum v. gr. *Servare mandata; vitare vitia; facere opera bona; considerare de merito Christi; eaque sibi applicare per frequentem Sacramentorum usum; colere Sanctos, non verò adorare &c.* Quid

Quid plura ? Utrum Ecclesia Catholica contra Fidem & bonos mores aliquid doceat, impartialis quisquis scrutetur : certè nihil inveniet, modò non falsò imponat.

(2.) Sancta est in Membris suis : nonne Sancti sunt Augustinus, Ambrosius, Benedictus, Bernardus, Franciscus, Elisabetha, Catharina &c. & post tempora Lutheri, Carolus Borromæus, Franciscus Salesius, Ignatius, Petrus de Alcantara, Theresia, Catharina Bononiensis &c. utique Sancti sunt : sanctitatem eorum testantur miraculorum gloria, corporum incorruptio, vitæ innocentia &c. & fatentur A catholici, ponentes eos in Calendariis ; sed, in qua vixerunt Religione ? certè non in Lutherana, nec in Calviniana, quarum vel neutra tunc fuit, vel constat fuisse Episcopos, Monachos, aut Moniales in Ecclesia Catholica : ergo vixerunt in ea, adeoque habet Sanctos & consequenter est Sancta ; eamque tene, si & tu sanctus esse velis.

### Motivum III. *Ex Miraculis.*

**C**hristus dixit *Matth. 16.* *Signa autem eos, qui crediderint, hæc sequentur : in nomine meo Demonia ejicient &c. & Joan. 10.* *Si mihi non vultis credere, operibus credere : ergo ex miraculis propriè dictis vera dignoscitur Religio ; atqui miracula illa sunt facta & adhuc sunt in Ecclesia Catholica, ut constat ex Historiis, Annalibus, vitis, rebusque gestis Sanctorum : apud A catholicos nec ullum*



Illud est, nec esse potest ? alias Deus miracula testaretur & probaret, simul veros esse articulos oppositos.

*Respondent Acatolici* (1.) Miracula esse conficta. *Contra est* : Facta sunt impetratoriè à Viris Sanctis, approbata publicè, auditis testibus juratis, commendata Annalibus authenticis &c. quomodo ergo conficta ?

*Respondent alii* (2.) Miracula esse facta ope Dæmonis. *Contra est* 1. Quod facta sint à Viris Sanctis. 2. Quod superent vim Dæmonis v. gr. suscitatio mortuorum. 3. Si miracula Catholicorum fiunt à Diabolo ad retinendos homines in falsa Religione, cur non facit similia in aliis falsis Religionibus ? vel dic : in qua Religione fiunt à Deo ? certè non in Lutherana, Calviniana, aut simili.

*Motivum IV. Ex Successione.*

**I**lla Religio est Religio Christi, quæ verum habet sacerdotium ; Illa habet, cujus Ministri omnes ab Apostolis descendunt, vel ab eorum Successoribus Ordinationem acceperunt ; atqui talis est Religio Catholica : ergo. *P. min.* Quia in Ecclesia Catholica omnes Sacerdotes ordinantur ab Episcopis, Episcopi suum Ordinem acceperunt ab aliis Episcopis & hi rursus ab aliis usque ad Apostolos ; idèmq; est de successione Summorum Pontificum ; Qui negat hanc successionem, assignet, ubi & quando fuerit interrupta.

Moti-

Motivum V. *Ex Conversione  
Gentium.*

**I**lla Religio est Apostolica & tenenda, ad quam per Apostolos & postea per Viros Religiosos facta est conversio Gentium; atqui hæc facta est ad Religionem Catholicam: ergo. *P. min.* Quia ad Fidem Catholicam conversi sunt Græci, Romani, Hispani, Germani, Galli, Sueci, alique populi & manserunt in Fide ista, donec quidam per Hæresiarchas & Apostatas fuerunt perversi, non tam prædicatione Verbi Dei, quàm ope gladii, vel prædicando non veritatem, sed mendacia, non quæ Dei sunt, sed quæ hominum, illis ad gustum v. gr. *Peccata non esse confitenda; Bona Ecclesiastica occupanda, mandata & vota non servanda; non jejunandum; auctoritatem Ecclesiasticam esse apud quemlibet regentem in suo regno, principatu &c.* Si hominum inclinationi contraria prædicasset Lutherus, certe vix ullus eidem adhæsisset.

Motivum VI. *Ex Certitudine  
Salutis.*

**N**on tantum asserunt Catholici, sed etiam plerique confitentur Acatholici, Romano-Catholicos salvari posse in sua Religione: sic Ego ipse à Magistris Lutheranis, eorum mentem expiscaturus interrogans, responsum accipi non semel; sic declaraverunt Superintendentes Brunswicensēs ante conversionem modernæ  
Impe-

imperatricis Elisabethæ, quæ è Domo Wolfen-  
buteliana: negant verò Catholici, quemquam  
extra Ecclesiam Catholicam salvari posse. Jam  
sic: in Fide Catholica, affirmantibus etiam  
A catholicis, salvari poteris; in alia Secta, ne-  
gantibus Catholicis, non poteris: ergo tutius  
est, amplecti Fidem Catholicam: ergo ample-  
ctere, qui non habes & salvari poteris, nemine  
te condemnante.

*Respondent A catholici:* Illa motiva fuisse pro  
Ecclesia Catholica ante sextum sæculum pro  
tempore, quo nondum defecerat, non probare  
pro hoc tempore. *Contra est* (1.) Ecclesia Vera  
non potest errare & deficere, ut infra. (2.) Si  
Ecclesia Catholica ante sæculum sextum Vera  
fuerit Ecclesia: ergo manet in possessione,  
quod sit Vera; manent pro ila præfata moti-  
va, donec Adversarii demonstrent, eam defe-  
cisse, quod nec fecerunt, nec facere possunt.  
(3.) Si Notæ & motiva allata non conveniant  
Ecclesiæ Catholicæ, cui ergo conveniunt? cer-  
tè nulli: nulla enim præter Catholicam est an-  
tiqua, nulla habet Sanctos, nec miracula, nec  
successionem Ministrorum ab Apostolis &c.  
ergo vel Ecclesia Catholica non defecit & est  
Vera adhuc Ecclesia; vel Ecclesia Vera hodie  
non datur in mundo.

*Corollar.* His notis ac motivis bene perpen-  
sis, resolve te ad id, quod post mortem coram  
Deo iudice vis fecisse & cogita. (1.) An non  
potius vivere velis & mori in Religione antiqua  
Majo-

Majorum tuorum, quàm in nova & damnata, sicut Hæreses priores. (2) An non securius, vivere in Religione à Christo & Apostolis descendente, quàm in nova à Lutherò Monacho Apostata confecta; vel à Calvino Apostata Canonico? Utrumque esse missum à Deo, est impossibile; unum potius esse missum, quàm alterum, est incredibile. (3) An non potius mori velis in ea Religione, in qua mortui sunt omnes, quotquot scimus, & ipsi Acatholici agnoscunt, Sancti? certe nunquam audivimus de Sancto Lutherano vel Calvinista; & quomodo tu primus eris? Religio Catholica est, in qua vixerunt Majores tui; ea est, quæ descendit à Christo & Apostolis; in ea vixerunt Sancti; ea coruscat miraculis, sanctitate doctrinæ & Memoriarum: proinde statuas, in ea & vivere & mori.

### CONTROVERSIA III.

#### *De Notis & Signis Religionis falsæ.*

Sicut Catholicæ Fidei Veritas ex variis Notis ac motivis facillè innotescit, ita etiam Acatholicæ falsitas; proinde

#### DOCTRINA CATHOLICA:

*Quælibet falsæ Religio ex variis Notis & Signis facillè potest dignosci.*

Signa illa falsitatis potissimum sunt sequentia:

Sig-

Signum I. *Ex Novitate.*

FALSA Religio est & hæretica, quæ nova; quæ non à temporibus Apostolorum, consequenter non à Christo; sed Religio Lutherana & quævis Acatholica est talis: ergo. *P. min.* Nova est: quia assignare possumus illius auctorem, qui Lutherus; assignare possumus locum & tempus, ubi & quando: item: modum, quo introducta, quibus tumultibus. Si non est nova, dic: ubi, in quo angulo ante Lutherum fuerit? quis antiquus Scriptor illius faciat mentionem? quæ Natio crediderit omnia Lutheranorum dogmata, scil. Christum esse in Eucharistia tantum in sumptione; Humanitatem illius esse ubique; Sacrificium esse Idololatriam; duo tantum esse Sacramenta &c. Certè ante Lutherum nullibi fuit, nullus de ea scripsit, nullus ita in omnibus credit, sicut modò Lutherani: ergo Secta eorum non est antiqua. Lutheranismum fuisse ante Lutherum, est prolem esse ante patrem, ovum ante gallinam.

*Respondent:* Religionem seu doctrinam antiquam, quæ fuerat collapsa, à Dre. Lutero esse resuscitatam, sèque nunc habere eam. *Contra* est, quod *suprà pag. 26.* Item quæro: an Religio Vera aliquando cessaverit esse in mundo? si ita: ergo non omni tempore potuerunt homines salvari; si non: ergo non opus fuit Reformatione. *Ad hoc*

*Respondent:* Religionem Lutheranam ante Lutherum fuisse in infantibus & simplicibus Catholicis.



tholicis, quibus error non imputatus ad hæresim. *Contra* (1.) Infantile est Prædicantium commentum. Infantes apud Catholicos sunt baptizati, adulti quique Fidem Catholicam per omnia capita sunt professi; quomodo ergo fuerunt Lutherani? (2.) Ergo vera Fides nullibi per aliquot sæcula fuit prædicata, nullus ad eam sese potuit convertere, Sacramenta non sunt legitime administrata, non fuit ullum veræ Religionis exercitium: adeoque hæc miserabilior Synagogâ Judæorum &c. sed quis credat? (3.) Idem commentum allegare possunt quivis Sectarîi; sed quis probat? nullus.

*Respondent alii:* In Papatu quidam, qui non erant de Papatu, tenuerunt Fidem Lutheranam, sed occultè; sicut Nicodemus fuit discipulus Christi, sed occultè. *Contra* 1.) Ubi scriptum est? undè probatur? idem quilibet Sectarîus de Secta sua somniare potest. 2.) Externè omnes professi sunt Fidem Catholicam, nullus Lutheranam: ergo non hanc, sed istam præsumuntur tenuisse, etiam internè. Ergo Vera Fides nullibi fuit prædicata &c. *vide supra.*

### Signum II. *Ex defectu Successionis.*

**R**eligio aliqua non est Apostolica, nisi Ministri illius continuam habeant successionem ab Apostolis; sed hanc non habent Lutherani, nec Calviniani: cui enim Lutherus successit? quis ante eum Lutheranz Religionis Antis-

Actus fuit? quis ante Calvinum Calvinianæ? nec hic in Calvinismo, nec ille in Lutheranismò ulli successit; nullus extitit ante eos Superintendens. Calculent Lutherani suos in Suecia, Dania & alibi Superintendentes; quàm citò ad Catholicos pervenient, minimè ad Apostolos.

### Signum III. *Ex defectu Missionis.*

SI Ecclesia Christi reformari possit, ut sit bene reformata, necesse est, Reformatores esse missos à Deo. *Quomodo prædicant, nisi mittantur?* Rom. 10. Lutherus fatetur in Epist. ad Mulhusianos: *Sathan non nisi erroneos mittit, qui neque à Deo missos se probare possunt, neque ab hominibus vocati sunt, sed sua sponte veniunt; sed nec Lutherus, nec Calvinus, nec ambo sunt missi ad reformatandam Ecclesiam: ergo. P. min. Quia missionem suam nec miraculis, nec vitæ sanctitate probaverunt; vel maximè autem probârunt Apostoli, quibus Christus dixit Matth. 10. Euntes autem predicate, infirmos curate, mortuos suscite, demones ejicite &c.*

Lutherus & Calvinus eodem pene tempore venerunt: si uterque sit missus; infero: ergo Deus sibi contradicit, idem v. gr. præsentiam Christi in Eucharistia per unum affirmans, per alium negans. Si unus sit missus, quæro ex Lutherano: cur Lutherus sit missus, Calvinus non? ex Calvinista: cur Calvinus, non Lutherus? majorem

jorem rationem nec hic pro suo Calvino, nec iste pro Luthero asserere poterit unquam. *Infero*: ergo neuter est missus à Deo, neuter audiendus, uterque ex illis, de quibus Christus *Matth. 24. Multi venient . . . & multos seducent.* Lutherus *Tom. 2. Germ. Wittenberg. fol. 66. de se facitetur*: *Gloriari non possum, me a Deo immediate de celo missum.*

*Respondent 1. aliqui*: Lutherum non esse missum missione speciali, quæ deberet probari, sed generali, quâ quilibet, videns proximum suum esse in errore, tenetur eum reducere. *Contra* (1.) Fictitium est, quod non magis Luthero suffragatur, quàm Ario, Calvino, Zwinglio &c. ergo nulli. (2.) Si Ecclesia defecerit statim post sæculum quintum, ut fingunt Acatolici, quis credat, Deum illius reformationem per octo vel novem sæcula distulisse usque ad Lutherum & Calvinum?

*Respondent 2. alii*: Luthero miraculis opus non fuisse; quia non prædicavit doctrinam novam, sed quæ Christi & miraculis dudum est confirmata. *Contra* 1.) Idem eodem jure Calvinistæ asserunt de Calvino, quilibet hæretici de suis Hæresiarchis: an propterea omnibus credemus? 2.) Lutherus fassus est ipsemet, doctrinam suam esse novam. *In Brevis Confess.* 3.) Si doctrina non esset nova, novum tamen & extraordinarium fuit opus reformationis, adeoque signis probandum, quod sit à Deo.

*Respondent*

*Respondent* 3. alii : Signum Vocationis & summum esse miraculum, quòd doctrina Lutheri, resistantibus Regibus, Principibus & vel maxime Imperatore Carolo V. tam velociter per Germaniam sit propagata. *Contra est* (1.) Præcipuæ Sectæ v. gr. Arianismus, Mahometismus &c. similiter & magis sunt propagatæ; an ideo pro Veris Religionibus habendæ? omnino non: ergo nec Lutheranismus. (2.) Doctrina Lutheri multa continet dogmata falsæ, impia, blasphema, hæretica, ut *infra*: ergo propagatio illius nequit esse à Deo. (3.) Quid est miraculi, si velociter recipiatur doctrina tam amica carni, abolens quidquid asperum, fastidique difficile? vide *pag. 30.*

Signum IV. *Ex Sectariorum mendaciis  
& fraudibus.*

**N**ON est censenda vera Religio, cuius Auctores & Prædicantes utuntur mendaciis & fraudibus; sed hoc faciunt Auctores & Prædicantes Religionis Lutheranae & Calvinianæ, nam Catholicis ad infamandam eorum Religionem falsò imponunt, eos adorare Sanctos, statuas; adorare panem in Eucharistia; fiduciam ponere in meritis propriis & Sanctis, non in meritis Christi &c. Hæc & similia meræ & malitiosæ sunt imposturæ: adeòque Religionem Catholicam arguere nequeunt falsitatis, neque A catholicorum obstare conversioni.

Signum V. *Ex vitiosa Origine.*

**O**pus Reformationis in Fide non est à Deo, quando Reformator est pessimæ vitæ; (quis enim credet Deum Ecclesiam, spontam dilectam, reformare voluisse per hominem impium, Diaboli mancipium? malum ovum, malus corvus) sed nullus extitit ab Ecclesia Catholica Apostata, nullus cujuscunque Sectæ Auctor, qui fuerit vitæ sanctimoniâ celebris; nullus, quem non superbia, inobedientia, luxuria, aliæ vitæ ad novitates impulerint, atque infamem reddiderint: ergo nullius Sectæ est Ecclesia Christi. *Minorem* qui negat, assignet Sectæ cujuscunque Auctorem, qui famâ sanctitatis sit celebris aut Thaumaturgus approbante vel non improbante orbe Christiano. Modernos quod attinet;

Lutherus fuit 1.) Apostata, superioribus suis rebellis & votifragus contra illud Deuteronom. 23. Cum votum veneris Domino Deo tuo, non ratum dabis reddere: fuit Violator Monialis Deo obstrictæ per votum castitatis, in damnato Apostasiæ & irriti inter se Monachum & Monialent matrimonii statu expiravit.

2.) Fuit Falsificator Sacræ Scripturæ Rom. 3. habetur: Arbitramur hominem justificari per fidem, addidit: solam. Rogatus à quodam ex suis, cur id fecisset? quid respondendum Catholicis? respondit Tom. 4. Germ. Wittenberg, 1551. fol. 475. Si Papista morosum & difficile se præbere vo-



let de voce sola, statim dic: Papista & asinus eadem res est; sic volo, sic jubeo, sit pro ratione voluntas: Lutherus Doctor est omnium Doctorum in Papatu. Item 2. Petr. 1. habetur: Quapropter fratres, magis satagite, ut per bona opera certam vestram vocationem & electionem faciatis. In vertione omisit verba: per bona opera: quare? quia non amabat, ut infra.

3.) Fuit superbus valde & ambitiosus, Libr. contra Regem Angliæ scribit: Reges, Principes, Pontifices non esse dignos, qui solvant ipsius corrigiam calceamenti; se pro Sancto Viro habere velle, velint, nolint homines. — Et ibid. Se non magni facere mille Cyprianis mille Augustinis. In lit. ad Electorem Saxonie dicit: se a Christo nominari Evangelistam; & supra: se Doctorem omnium Doctorum in Papatu; sed Doctor ille

4.) Fuit Pseudo-Doctor, docuit blasphemiam: Tom. 2. Wittenberg. 1548. pag. 266. scribit: Ich es doch nicht möglich, daß wir uns der geringsten Sünd entwehren möchten, inutemat wir des Teufels gefangen seind als unsers Fürsten und Gottes. Docuit aperte contra Sacram Scripturam: in Resolut. contra Eckium; & in Assert. artic. 31. docet: *Nullus in omni bono opere peccat.* Lib. de vita conjug. dicit: *usum semina magis esse necessarium, quam edere, bibere & dormire.* Sermon. de Matrimon. licitum esse vii ancillā, si uxor debicum recuset.

Docuit opposita, sibi contradicens, sui immemor: in Postilla Eccles. super Dom. 1. post Epiph. edita Wittenberg. 1584. pag. 168. docet: Ecclesiam errare posse in rebus fidei: oppositum docet in Tractat.

de veteri vera Eccles. Tom. 7. Wittenberg. Germ. 1554. pag. 562. dicens: Ecclesia nec debet, nec potest mendacia & errores docere, ne in unico quidem articulo, cum os Dei sit os Ecclesia. Plura D. Cochlaus in lib. cui tit. Lutherus septiceps.

Docuit peccare: Tom. 1. 7en. lat. fol. 345. in Epist. ad Melancthonem scribit: Pecca fortiter, sed fortius fide & gaude in Christo; peccandum est, quamdiu hic sumus: sufficit, quod agnovimus Agnum, qui tollit peccatum mundi, ab hoc non aveller nos peccatum, etiamsi millies, millies uno die fornicemur.

Docuit, quæ voluit, sive vera essent, sive falsæ, modò contra Catholicos: lib. de formula missandi ait: Si quod Concilium statueret aut permitteret utramque Speciem, nos nequaquam utràque uti vellemus, sed in despectum Concilii, ejusque statuti, aut unâ aut neutrà uti vellemus, maledicturi universos, qui ex Statuto Concilii utràque uterentur.

Docuit, quæ ipse non credidit: in Colloq. mens. lat. Tom. 1. fol. 34. fatetur: Ego ita credere non possum, sicuti doceo, at tamen homines alii fidem me habere firmissimam judicant. Nihilominus quamvis hæc & similia falsæ docuerit, scribit tamen in lit. ad Electorem Saxoniae datis: Qui meam doctrinam non admittit, non potest salvus fieri: quia ipsa est Dei, non mea. At Lutherè! si Doctrina Dei est, cur credere non potes, sicuti doces? an Deus fallax est, aut fallibilis? vel ergo doctrina tua Dei non est; vel si est & credere non possis, Deum fallacem facis aut fallibilem; utrumque ex te & contra te.

Vitam

Vitam Calvini & doctrinam nihilo meliorem qui volet, legat *Bolseum in vita Calvini*; Is refert *cap. 5.* Calvinum Novioduni per sententiam damnatum de crimine sodomitico, aliisque, & publicè cremandum fuisse, nisi ad preces Episcopi poena ignis fuisset commutata in supplicium virgarum & ferri candentis in tergo ustulationem Idem & pejora habet D. Schlisselburg *Prædicans Lutheran. lib. 2. Theol. Calvinist. art. 9. fol. 122.*

Quis nunc sibi persuadeat, Deum hujusmodi hominibus, quorum vita turpissima, doctrina blasphema, falsa, scandalosa &c. uti voluisse ad reformationem Ecclesiæ? Appello te, quisquis amas salutem: nonne Ecclesia Catholica primis saltem temporibus Vera fuit Christi Ecclesia? fatentur Reformatores: nonne Scriptura Sacra monet *Matth. 7. Attendite a falsis Prophetis, qui veniunt ad vos in vestimentis ovium, intrinsecus autem sunt lupi rapaces? nonne prædicit Matth. 24. Multi venient . . . & multos seducent?* unumque: quinam ergo sunt illi? unde constat Lutherum, Calvinum & similes non fuisse ex numero illorum? imò fuisse, ex fructibus eorum cognoscimus: quis prudens ergo adhæreat illis? nullus.

Respondent Lutherani: Quid ad nos Lutherus, vita fuerit qualiscunque, etsi mala, non hanc sequimur, sed puram doctrinam: sic multi dicunt ab ipso Magistro tuo Luthero edocti *Tom. 2. Jen. fol. 92. dum*

ait: Also mußt du sagen, der Luther sey ein Bu-  
 be oder heilig, da liegt mir nichts an, seine Lehr  
 aber ist nicht sein, sondern Christi selbst. Qui-  
 bus verbis præoccupans, qualis sit, insinuat.  
*Contra est* (1.) Moyſes, per quem data est Lex  
 Verus; Apostoli, per quos prædicata est Lex  
 nova, Viri fuerunt probi & sancti, sanctitate  
 & miraculis probantes se missos esse à Deo:  
 quis ergo credat, Deum Ecclesiam reformasse  
 per hominem impii, sacrilegi, Veneris  
 mancipium? Si Deus reformare voluisset, non  
 defuerunt Augustini, Ambrosii, Cypriani, ali-  
 que Viri sancti. (2.) Si Lutherus non fuerit ali-  
 cuius sanctitatis, nec fecerit miracula, unde  
 constat tibi doctrinam ejus esse puram & ex  
 Deo; Arij & aliorum, quos dicis hæresiarchas,  
 non esse? (3.) Lutherus docuit apertè contra  
 Sacram Scripturam, docuit opposita, docuit  
 peccare, docuit, quæ ipse non credidit &c. ut  
*suprà pag. 38. seqq.* ergo sicut vita, ita nec doctrina  
 ejus est ex Deo; & mentitur, in Tom. Jen. jactan-  
 ter se nominans Evangelistam Christi, item dicens:  
*Os meum Os Dei.* (4.) Lutherus ipse contra præ-  
 fatos Lutheranos loc. citat. dicens: Du mußt den  
 Luther nicht so gar himwerffen, du wiſſeſt sonſt  
 seine Lehr auch mit hin. Ita est, qui Lutherum  
 rejicit, rejicit & doctrinam ejus; rejicimus Lu-  
 therum tanquam votifragum, sacrilegum, lu-  
 xuriosum, blasphemum, calumniatorem &c.  
 ut patet ex propriis ejusdem Tomis Jenensibus:  
 ergo & doctrinam ejus tenentes doctrinam Ec-  
 clesie

clesiæ Catholicæ superædificatæ super fundamen-  
tum Apostolorum *Ephes. 2.* donec hanc à veri-  
tate defecisse demonstraverint Acatolici. Ab-  
jiciat pariter Lutherum & doctrinam ejus, hære-  
sarchas & hæresim, quisquis amat salutem.



### *CAPUT III.*

Controversiæ de vera Ecclesia, Sum-  
mo Pontifice, & Ecclesiæ  
Ministris.

#### *CONTROVERSIA I.*

*De Notis Veræ Ecclesiæ.*

**V**era Ecclesia est Congregatio omnium in  
Christo baptizatorum eandem Fidem  
sub uno Capite, Christi in terris Vicario,  
profitemium. Hujus proinde Membra non  
tantum sunt justî, ut volunt Lutherani; nec  
tantum prædestinati, ut volunt Calvinistæ; sed  
etiam injusti & reprobi, quamdiu manent in  
vera fide & obedientia. Diversis existentibus  
Ecclesiis, quæ sit vera, ex certis Notis (ut fa-  
tentur Adversarii) cognosci potest; sed quæ  
Notæ illæ? cui Ecclesiæ conveniunt?

DO-



## DOCTRINA CATHOLICA:

*Vera Ecclesia est Una, Sancta, Catholica, & Apostolica; eaque est Romana.*

PRIMUM est de fide ex Symbolo Constanti-  
nop. Secundum de consequenti.

I. Vera Ecclesia est *Una*, nempe unitate fidei cum Ecclesia primitiva, & unitate Membrorum inter se in iisdem fidei articulis. Hæc Unitas reperitur in Ecclesia Romana, ut *suprà*; minimè in Lutherana, vel alia. Lutherani (idem est de aliis) in fidei articulis non conveniunt cum Ecclesia primitiva Apostolica, *suprà* pag. 33. *de Novitate*. Nec conveniunt inter se, aliter docentes in Germania, aliter in Suecia, aliter in Dania: Sacramenta aliqui admittunt duo, alii tria; bona opera aliqui negant, aliqui affirmant ad salutem necessaria; Sacrificium alicubi litant, alibi dicunt Idololatriam &c. Vix ullus hodie reperitur Lutheranus, qui cum Luthero; vix Calvinista, qui cum Calvino in omnibus consentiat; sunt hodie (Testem provocho vel unicam Angliam) Anabaptistæ, Ubiquistæ, Pietistæ, Impanatores, Sacramentarii, Quackeri &c. universim plures, quàm ducentæ ex Lutheranismò & Calvinismo Sectæ, de quibus *Floremundus lib. 2. cap. 14.* Quid mirum? ex uno absurdo sequuntur plura.

II. Est *Sancta*, nempe sanctitate doctrinæ & sanctitate Membrorum. Hæc *Sanctitas* reperitur

tur in Ecclesia Catholica, de qua pag. 27. minime in Acatholica: nullius Acatholicæ doctrina est sancta, utpote quâ opposita Catholicæ contra Sacram Scripturam & ab Ecclesia Universalis damnata. Nulla habet Sanctos: edisserant Lutherani aut Calvinistæ vel unicum, qui omnia Lutheri aut Calvinii dogmata sit professus & ab orbe Christiano habeatur verè sanctus, cujus sanctitatem morum integritas, corporis incorruptio, aut alia miracula authentica manifestent; non potuerunt, nec poterunt unquam.

III. Est *Catholica*, hoc est *Universalis*. Talis est (1.) *Ratione loci*, quia per totum orbem diffusa, postquam Christus præcepit, Evangelium prædicari omni Creaturæ *Marc. 16.* (2.) *Ratione temporis*: quia duravit à tempore Christi, durabitque usque ad consummationem sæculi *Matth. 28.* Ecclesia Romana est *Catholica*: quia utraque Universalitas illi convenit & ab ipsismet Acatholicis *Catholica* appellatur.

IV. Est *Apostolica*: Quia per Apostolos propagata; sequitur Apostolorum doctrinam & successionem Episcoporum habet ab Apostolis sicut & Summorum Pontificum in Cathedra Petri. Hæc omnia conveniunt Ecclesiæ Romano-Catholicæ: etenim quem alium habet Auctorem, quàm Christum & Apostolos? quo alio tempore est fundata, quàm Apostolorum? ergo *Apostolica* est & *Vera*. Aliæ sectæ nec foundationem habent ab Apostolis, nec successionem;

nem ; sed a Luthero , Calvino , vel similis farina Apostatis : quomodo ergo Apostolica sunt & Veræ ?

## CONTROVERSIA II.

### *De Veræ Ecclesiæ Visibilitate.*

**D**Octrina Lutheranorum & Calvinistarum est : Ecclesiam Visibilem totam deficere posse & extingui, ut nullibi sit publica Verbi Divini vera prædication, nullibi vera Sacramentorum administratio. Extinctâ Ecclesiâ totâ Visibili remanere volunt veram Ecclesiam invisibilem, scilicet aliquos soli Deo notos, purum Verbum Divinum & veram fidem retinentes in corde, ab erroribus fundamentalibus immunes: cum enim doceant, Veram Ecclesiam Visibilem defecisse sæculo quinto & sexto & reformatam esse à Luthero vel Calvino sæculo decimo sexto, coguntur dicere per mille annos vel nullam in mundo fuisse Veram Ecclesiam, vel invisibilem: primum nolunt fingunt ergo secundum. Sed Contra est

## DOCTRINA CATHOLICA:

*Ecclesia Christi in terris militans semper est Visibilis.*

**P**Rob. I. Omnia, quæ in Sacra Scriptura habentur de Ecclesia, conveniunt Visibili: ergo Christus fundavit Visibilem; & qualem fundavit, talis perseverat. P. Ans. De Ecclesia habet

habetur *Matth. 18.* Dic Ecclesie, si Ecclesiam non audierit &c. *Apost. 20.* Attendite vobis & universo gregi &c. *Ephes. 4.* Dedit quosdam quidem Apostolos, quosdam autem Prophetas, alios vero Evangelistas, alios autem Pastores & Doctores, in adificationem Corporis Christi, donec occurramus omnes &c. Item Ecclesia dicitur *Matth. 5.* Civitas supra montem posita. *Matth. 13.* Sagena congregans bonos & malos Pisces &c. atqui hæc omnia non conveniunt nisi Ecclesie Visibili; nec possunt Prædicantes vel unicum asferre textum, qui certò conveniat invisibili: ergo.

II. Ex S. Augustin. qui *Epist. 174. ad Severinum* scribit: Ipsa Ecclesia Catholica per totum terrarum orbem diffunditur; hanc ignorare nulli licet: ideo secundum Verbum Domini abscondi non potest. Unde

III. Juxta SS. Patres extra Veram Ecclesiam nulla est salus: ergo quilibet volens salvari tenetur se illi aggregare: ergo debet semper esse Visibilis & Conspicua. Quomodo Gentilis eam inveniet, si nesciat, in quo mundi angulo lateat? quomodo credet sine prædicante veram doctrinam? quomodo hæc prædicabitur, si publicum ministerium sit corruptum?

IV. Occulti Orthodoxi, qui constituerunt, juxta Adversarios, Ecclesiam Invisibilem, vel professi sunt exterius fidem, vel non, simulantes & communicantes cum Papistis in externo Religionis exercitio? si primum: ergo Ecclesia fuit Visibilis; si secundum: ergo peccaverunt, negandi à Christo, qui dicit *Matth. 10.*

Omnis,

*Omnia, qui negaverit me coram hominibus, negabo & ego eum coram Patre meo.*

V. Confessio Augustana, Lutheranorum Alcoranum, artic. 7. docet: *Una Sancta Ecclesia perpetuò est mansura, in qua Evangelium purè docetur & rectè administrantur Sacramenta.* Hinc infero quod: 1.) Ergo Ecclesia est Indefectibilis; quomodo deficere potest, si perpetuò mansura? 2.) Ergo est semper Visibilis; quomodo invisibilis, si perpetuò Evangelium purè doceatur & rectè administrantur Sacramenta? nonne prædicatio & administratio actus sunt externi? errant proinde vel hunc articulum asserendo, vel visibilitatem Ecclesiæ negando.

### *Objectiones A catholicæ.*

**I.** Ecclesia 1. Petri 2. dicitur *Domus Spiritualis.* Matth. 13. comparatur *Thesaurò abscondito.* Luc. 17. *Regno Dei, quod intra nos.* R. Dicitur *Domus Spiritualis* quoad fidem, quam habere debent fideles C. quoad ipsos fideles Ecclesiam constituentes N. Comparatur *Thesaurò abscondito* quoad se N. quoad inventorem, qui prius ignoravit C. *Regnum Dei est intra nos* potestate, nimirum gratiâ & donis spiritualibus, quibus acquiri potest.

II. Fides, quæ efficit fideles & Ecclesiæ Membra, est invisibilis: ergo etiam Ecclesia. R. Rectorq. Anima, quæ efficit hominem, est invisibilis: ergo etiam homo. Negatur utrobique consequentia: convenit concreto, quod non formæ.

III. So-



III. Soli iusti & prædestinati constituunt Ecclesiam : ergo est invisibilis. *P. Ant.* Quia Ecclesia Ephes. 2. dicitur : *Non habere maculam aut rugam.* Hebr. 12. dicitur *Primitivorum*, qui conscripti sunt in Cælis. 1. Petri 2. fideles vocantur. Genus electum. Joan. 10. dixit Christus : *Oves mea vocem meam audiunt, & nemo rupiet eas de manu mea.* *Ant.* IV. nam Ecclesia comparatur *Math. 25.* Saginæ congreganti pisces bonos & malos. *Math. 5.* Virginibus prudentibus & fatuis : ergo etiam iniusti sunt Membra Ecclesiæ. Non habet quidem maculam in doctrina fidei, habet tamen in aliquibus Membris. Dicitur *Primitivorum*, qui conscripti sunt in Cælis : Per primitivos intellige primos Christi discipulos & Apostolos, quorum nomina revelante Christo *Luc. 10.* scripta sunt in coelis ; ab his vocatur Ecclesia *Primitivorum*, sed male *invers* : Primitivi Ecclesiæ sunt scripti in coelis, seu prædestinati : ergo omnes, qui sunt in Ecclesia *Primitivorum*. Fideles vocantur *Genus electum* electione ad gratiam, fidem & cultum Dei, sive iusti sint, sive iniusti ; sic electus fuit Judas, de quo Christus *Joan. 6.* *Nonne ego vos duodecim elegi & unus ex vobis diabolus est ?* Aliqui baptizati sunt oves Christi, solâ fide, ut iniusti ; alii fide & charitate tantum, ut iusti ; alii fide, charitate & finali perseverantiâ, ut prædestinati ; de his ultimis ovibus juxta S. Augustin. loquitur Christus *Joan. 10. supra.*

IV. Ecclesia fuit invisibilis tempore Eliæ : nam *3. Reg. 19.* deficientibus à Domino filius Israël, reli-

reliquit sibi Dominus in Israël 7. Millia Virorum, quorum genua non sunt incurvata ante Baal; sed fuerunt occulti, quia Elias queritur, se solum relictum. R. (1.) Esto occulti fuerint Eliæ, non propterea etiam omnibus aliis. (2.) Quamvis tunc non in Israël, in Judæa tamen floruit Ecclesia sub Rege Josaphat. (3.) A Synagoga ad Ecclesiam Christi non valet consequentia.

V. Credimus Sanctam Ecclesiam: ergo non est Visibilis; qua enim apparent jam fidem non habent, inquit S. Gregor. homil. 11. in Evang. R. Credimus Ecclesiam secundum quid, non simpliciter, aliud videntes, aliud credentes: Coetum hominum fidem profitentium, qui est Ecclesia, videmus; Coetum illum fidem habere & Veram esse Ecclesiam credimus. S. Thomas Apostolus vidit & credidit (teste Christo Joam. 20. Quia vidisti me, credidisti.) Hominem vidit, Deum credidit.

### CONTROVERSIA III.

#### De Veræ Ecclesiæ Infallibilitate.

**D**Octrina Acatholica est: Visibilem Christi in terris Ecclesiam in rebus fidei & ad mores pertinentibus totam seu universalem posse errare errore formali, sicque ante annos circiter 1200. sensim errasse & ab errore vel a Luthero, juxta Lutheranos, vel a Calvino, juxta Calvinistas, vel ab alio, juxta alios, esse expurgatam & reformatam. Contra hanc Acatholicam de Ecclesia Christi Visibili tota seu universali, quæ sunt

sunt omnes fideles cum visibili Ec-  
clesiæ Capite, Romano Pontifice, vel cum eo omnes Episcopi  
in Concilio generali congregati, est

## DOCTRINA CATHOLICA:

*Ecclesia Christi militans nec unquam tota erravit in rebus fidei, nec errare potest.*

**P**Rob. 1. Pars: Ecclesia Catholica moderna nihil credit, nec docet, quod sit contra primitivam; vel ostendant Adversarii (quod debent tanquam actores) quando & in quo erraverit, non credendo, quod credidit Primitiva, vel credendo oppositum; hoc non possunt: ergo non erravit.

*Dicent* : Nunc aliquos articulos credi , qui olim non. *R.* Nunc post definitionem Ecclesiæ credi explicitè , olim implicitè.

II. Si Ecclesia defecisset sæculo sexto, usque ad reformationem (rectius deformationem) Lutheri: ergo omnibus illis sæculis à sexto usque ad Lutherum nullus potuisset salvari; quia non fuisset vera Ecclesia; hoc autem impium est dicere & incredibile: ergo non defecit.

*Respondent* : Homines salvari potuisse in Ecclesia invisibili, quæ juxta Lutherum non defecit. *Contra* : Homines non potuerunt ingredi Ecclesiam invisibilem ; quomodo enim quis ingreditur Ecclesiam, quam ignorat : ergo non potuerunt in ea salvari. Si dicant, ingre-

fos esse per Baptismum ; Dico : egressos rursus vel perversos esse per professionem saltem externam doctrinæ corruptæ : ergo iterum non potuerunt salvari.

Prob. 2. Pars I. Ecclesia dicitur 1. *Timoth. 3. Columna & firmamentum veritatis.* Item de ea dicit Christus *Matth. 16. Porta inferi non pravelebunt adversus eam. Joan. 14. Ego rogabo Patrem & alium Patritum dabit vobis, ut maneat vobiscum in æternum, Spiritum veritatis. Matth. 28. Ego vobiscum sum omnibus diebus usque ad consummationem sæculi. Luc. 22. Ego rogavi pro te, ut non deficiat fides tua. hæc autem omnia essent falsa, si Ecclesia deficere posset : ergo non potest.*

*Respondent Adversarii 1.)* Textus allatos esse intelligendos de Ecclesia invisibili, quam volunt non deficere, sed manere, deficiente & non manente visibili. *Contra 1.* Ecclesia Christi non est invisibilis, ut *suprà.* 2. Christus *loc. citat.* locutus est ad Apostolos & discipulos, qui utique fuerunt Ecclesia visibilis. 3. Christus iussit *Matth. 18. Luc. 10.* audire Ecclesiam, eique obedire ; quomodo autem audire possumus invisibilem ? quomodo iussisset obedire fallibili ?

*Respondent 2.)* Ecclesiam visibilem per promissiones divinas non habere, quod errare non possit, sed quod in errore non persistat. *Contra :* Vi promissionis Divinæ Christus apud Ecclesiam suam est omnibus diebus *Matth. 28. apud eam Spiritus veritatis manet in æternum Joan. 14.* ergo

ergo semper: ergo nunquam tota errare potest. Nonne portæ inferi verè prævaluissent adversus eam, si vel semel errâset? Deus vult omnes homines salvos fieri: ergo omni tempore veram esse Ecclesiam.

*Respondent alii* 3.) Promissiones à Christo pro visibilis Ecclesiæ Infallibilitate factas esse sub conditione, videlicet Ecclesiam errare non posse, si sequatur Verbum Dei. *Contra* 1. Sic Christus Ecclesiæ suæ nihil promississet; quia seculis promissionibus verum est, Ecclesiam errare non posse, si sequatur Verbum Dei. 2. Si sequatur Verbum Dei, certum est, quod errare non possit; id non controversitur, sed hoc: utrum Ecclesia ita regatur à Spiritu Sancto, ut tota non possit non sequi Verbum Dei, tota non possit errare in fide? & affirmamus, vi promissionis divinæ in locis citatis.

Prob. 2. Pars II. Testimonio ipsiusmet Lutheri, qui *loc. citat.* dicit: *Ecclesia nec debet, nec potest errores docere, ne in unico quidem articulo. . Cum os Dei sit os Ecclesia.* Dicent Lutherani: ipsum docuisse oppositum *Tom. 7. Wittenberg. fol. 464.* Ita est, sed, *infero*: ergo vel hîc vel ibi docuit falsum, sibi contradicens.

Prob. 2. Pars III. ad Adversarium: Ecclesia Catholica visibilis juxta te erravit: ergo etiam tua errare potest: ergo forte erravisti, te non advertente, sicut dicis: Catholicam errâsse, multis non advertentibus: ergo non certus es, nec eris de veritate Ecclesiæ tuæ. Si



*dicat*: te sequi purum Verbum Dei, ideóque in Vera esse Religione. *Contra*: Idem omnes dicunt & dixerunt Sectæ; & tamen errant, atque errârunt; quare tua non, si possit: Ecclesia Catholica non potest, ideóque Catholici sunt securi.

### *Objectiones A catholicæ.*

I. **S**ynagoga Judæorum defecit à fide, quando adoravit virulum; item 3. Reg. 19. ubi Elias queritur, se solum relictum: ergo etiam Ecclesia Christianorum potest deficere. *R. Tr. Ant.* Extra Synagogam obtinere potuit beatitudo, ut patet de non circumcisis; quid ergo refert, si deficere potuerit? tota tamen ante abrogationem Legis non defecit. *N. Conf.* Quia Ecclesia habet promissionem de stabilitate, quam Synagoga non habuit.

II. Ecclesia comparatur lunæ, ut patet ex Script. & PP. atque luna aliquando deficit: ergo. *R.* (1.) Comparatur etiam soli *Psal. 18.* qui non deficit. (2.) Comparatur lunæ non per omnia, non in defectibilitate; sed quatenus illuminatur à Christo, sicut luna à sole.

III. Tempore S. Hieronymi Ecclesia defecit ad Arianismum, ait enim: *Ingenuit totus orbis & se Arianum esse admiratus est.* *R.* S. Hieronymum loqui tropicè, totum orbem sumendo pro magna parte. Apostoli tempore passionis quidem fugerunt, manserunt tamen fideles, errantes in facto, non in fide.

IV. Fieri

IV. Fieri potest, ut tota Ecclesia visibilis quoad publicum ministerium erret in fide; hoc autem errante, non sequitur errare totum populum & damnari. *R. N. totum*: Errante, si posset, toto publico ministerio, errant omnes Pastores & Ecclesiæ Doctores, atque his errantibus ex consequenti totus errat populus, qui debet audire Pastores suos. *Luc. 10.*

V. Hic Catholicus potest errare in fide, ille potest, iste, & sic de reliquis: ergo omnes. *R. Possunt errare omnes distributivè, non omnes collectivè: à sensu distributivo ad collectivum hìc non valet consequentia.*

#### CONTROVERSIA IV.

##### *De Capite Ecclesiæ, Romano Pontifice.*

**D**Octrina Acatholica est: Nullum datur in terra totius Ecclesiæ Caput, Christi Vicarium; sed quilibet Rex, sive Regina est Caput Ecclesiæ in suo regno, quilibet Dominus in sua ditione. Quis non inferat? ergo quot Ecclesiæ, tot Capita; quot Capita, tot Sententia. Pro Doctrina Catholica

*Nota*: Per Caput Ecclesiæ intelligi Ecclesiæ Gubernatorem, ac supremum ovium Christi sive fidelium Pastorem. De hoc

## DOCTRINA CATHOLICA I.

*Christus existens in terra erat Visibile Caput  
Ecclesiæ, nunc existens in cœlo  
est Invisibile.*

**P**Rob. Christus est Caput Ecclesiæ: sic habetur Coloss. 1. Ipse est Caput Corporis Ecclesiæ. In terra existens erat Visibile: nam visibiliter Ecclesiam fundavit, nova Sacramenta, novum Sacrificium & novas Leges Evangelicas instituendo, Ministros Ecclesiæ, nempe Apostolos ordinando Item visibiliter Eam gubernavit, docendo, monendo, corrigendo, Apostolos mittendo tanquam potestatem habens. In cœlo existens est Invisibile: nam invisibiliter Eam gubernat, gratiam, aliâque dona & quæ placita, influendo.

## DOCTRINA CATHOLICA II.

*Post Ascensionem Christi Ecclesia militans habet aliquod Caput Visibile, quod  
Christi Vicarium.*

**P**Rob. I. Synagoga Judæorum, dum vera fuit Ecclesia, semper habuit Caput Visibile, nempe Summum Pontificem, ab eoque fuit gubernata, ut patet ex *Vet. Testam.* cur non haberet Ecclesia Christi?

*Respondent:* Christum Ipsum esse Caput Ecclesiæ: adeo, ut non indigeat Visibili. *Contra:* Christus Messias etiam Synagoge fuit Caput Invi-

I. Invisibile quoad internum influxum gratiæ; unde enim hanc habuit, quam ex meritis Christi prævisit? & tamen, præter Christum Caput Invisibile, Synagoga habuit Visibile, nempe primitus Moysen, & postea Pontifices quoad externam gubernationem: ergo similiter Ecclesia in novo Testamento habere debet.

II. Post Ascensionem Christus non amplius Ecclesiam suam visibiliter gubernat, & tamen eam visibiliter gubernari postulat fidelium utilitas & fidei uniformitas. Vel dicant Adversarii: ad quid ipsis Superintendentes, Prædicantes & Rectores? ergo à Christo constitutum est Caput aliquod Ecclesiæ Visibile, Christi Vicarium, quoad externum regimen.

III. Ecclesia conparatur Dan. 2. Regno. Joan. 10. Ovili. 1. Petri 3. Navi; atqui in Regno est Unus Rex, quo absente est Unus Pro-Rex; in Ovili Unus Pastor; in Navi Unus Gubernator: ergo in Ecclesia tanquam Ovili est Unus omnium Pastor &c.

### DOCTRINA CATHOLICA III.

*S. Petrus Apostolus tenuit Primatum Ecclesiæ; sive: fuit Caput Ecclesiæ, Pastor Ovium Christi & sic Vicarius illius in regenda Ecclesiâ.*

**P**rob. I. Christus dixit soli Petro Joan. 21. *Pasce Agnos meos, pasce Oves meas.* Qui sunt Oves Christi, nisi omnes omnino fideles, etiam Episcopi, etiam Reges? Quid est *pasce*, nisi sis Pastor

stor præcedendo, regendo, docendo, corrigendo &c. ? ergo S. Petrus fuit Pastor omnium Christi fidelium; atqui Pastor omnium fidelium tenet Primatum Ecclesiæ, est Caput Ecclesiæ & Vicarius Christi: ergo hæc omnia conveniunt S. Petro.

II. Sancta Ecclesia post Ascensionem Christi habere debuit & jam debet Caput Visibile Vicarium quoad externam gubernationem, ut *supra*; sed aliud assignari non potest, quàm S. Petrus & Ejusdem Successores; cui enim dixit Christus: *Pasce Oves meas*, nisi soli Petro? ergo.

#### DOCTRINA CATHOLICA IV.

*Successor S. Petri in Cathedra est Romanus Pontifex, Isque proinde Caput & Pastor totius Ecclesiæ; Vicarius Christi.*

**P**Rob. I. Romanus Pontifex per legitimam electionem evehitur in Cathedram Petri, qui Romanam Ecclesiam rexit annis 22. & tandem Romæ per Martyrium sub Nerone sublatuſ est: ergo Successor est Petri in Cathedra. Jam hæc: quando Christus dixit Petro *Joan. 21. Pasce Oves meas*, non tantum voluit pasci oves suas ad dies viæ Petri, sed etiam post mortem Ipſius: ergo debet esse aliquis Successor Petri, qui sit Vicarius Christi & Pastor totius Ecclesiæ, sicut fuerat Petrus; atqui Successor ille est Romanus



manus Pontifex succedens in Cathedra, quo enim jure alius? ergo.

II. Tum ex continua Romanorum Pontificum successione à S. Petro usque ad modernum CLEMENTEM XIII. Tum ex variis exercitiis hujus supremæ potestatis, constat enim, quod Romanus Pontifex alios Episcopos instituat, eos confirmet, Concilia indicat, Controversias decidat & universam Ecclesiam regat.

*Objectiones Acatolicæ.*

I. Ecclesia Christi non est biceps; esset autem, si haberet duo Capita, nempe Christum & Papam: ergo non habet. *re. N. min.* Mulier habet caput naturale, & caput mulieris vir est. *Ephes. 5.* an ideo biceps? Item Regnum Siciliae hodie Regem absentem habet Carolum VI. Imperatorem, & Pro-Regem præsentem; non propterea biceps: ergo nec Ecclesia, quamvis habeat Caput Primarium & principale, quod Christus; & Secundarium atque Ministeriale, quod Romanus Pontifex.

II. Apostolus scribit *Rom. 12. Multi unum Corpus sumus in Christo, singuli autem alter alterius membra*: ergo singuli si teles, etiam Papa, sunt Membra Ecclesiæ: ergo nullus Caput. *re. D. Conf.* Quatenus Ecclesia per internum influxum gratiæ gubernatur invisibiliter C. quatenus gubernatur visibiliter N. Primo sensu Papa est Membrum, accipiens gratiam à Christo; secundo est Caput, autoritate participatâ gubernans.

III. Chri-

III. Christus reprehendit discipulos, contententes de Primatu *Luc. 22.* ergo unus non est cæteris major. *R. N. Conf.* Contendere de Primatu non licet; an propterea non datur? dari supponit Christus, dicens *ibid.* *Qui major est, fiat sicut minor.*

IV. *1. Petri 2.* Jubemur subesse Regi quasi præcellenti: ergo potestas omnis, etiam Ecclesiastica, residet in Rege. *R. D. Ant.* In politicis C. In Ecclesiasticis N. Unde Regi Jurisdictio Ecclesiastica? Apostolis data est a Christo *Joan. 21.* nulli Principi sæculari.

V. Christus omnibus Apostolis æqualem dedit potestatem, dicens eis *Matth. 16.* *Docete omnes gentes.* *Joan. 20.* *Sicut misit me Pater, & ego mitto vos.* *Matth. 18.* *Quaecunque alligaveritis &c.* ergo Petrus non habuit Primatum. *R. D. Ant.* In ratione Apostolatus tanquam Legatis ad prædicandum & absolvendum C. in ratione officii pastoralis &c. N. nam soli Petro dixit; *Pasce Oves meas.* Similiter omnes Apostoli *Ephes. 2.* dicuntur *Fundamentum Ecclesiæ* non quasi Pastores totius Ecclesiæ, sed quatenus prædicaverunt Evangelium, propagârunt fidem, tanquam Legati per totum mundum.

VI. Apostoli miserunt Petrum cum Joanne in Samariam *Act. 8.* Paulus resistit Petro in faciem *Gal. 2.* ergo signum est, Petrum non habuisse Primatum. *R. N. Conf.* Nam Apostoli miserunt Petrum suadendo, consulendo, non præcipiendo. Paulus resistit Petro, discretè corrigens.

rigendo ob incautè dissimulatum Jucalium  
cum scandalo Gentilium. Corrigitur superio-  
rem quandoque licet inferiori.

VII. Papa est Anti - Christus : ergo non  
Caput Ecclesiæ, nisi Ante - Christianæ. *Re. An-  
tecedens est calumnia Prædicantium.* Si nomine  
Anti - Christi intelligant illum, de quo *Dan. 7.*  
*Apocal. 12.* manifestè Papa non est Anti - Chri-  
stus, nullo illi conveniente Anti - Christi Cha-  
ractere. Si nomine Anti - Christi intelligant  
quemlibet, qui adversatur Christo, Anti - Chri-  
sti sunt, non Papa, sed ipsimet, qui Apollatæ  
novam tradunt doctrinam, de quibus *1. Joan. 2.*  
*Nunc Anti - Christi multi sunt.* Cœterum

*Observe* (1.) Si quis Pontifex illegitimè fuerit  
electus aut intrusus, Sedes vacavit, nisi postea  
fuerit acceptatus ab Universa Ecclesia. (2.) Pon-  
tifices Avenione in Gallia residentes fuerunt  
veri Episcopi Romani & Successores S. Petri.  
(3.) Tempore Schismatis, quo duo vel plures  
prætendunt Pontificatum, unus est verus Pon-  
tifex, licet non omnibus notus; si nullus sit  
verus, Sedes vacat. (4.) Circa Annum Chri-  
sti 850. foeminam fuisse Papam, fabula est, de  
qua fusiùs AA. & quid, si fuisset? error facti  
& Sedes vacasset. (5.) Sit, Pontifices quos-  
dam fuisse malos; Officium tamen, quod  
malus, nisi in externam labatur hæresim, re-  
tinet, sanctum est, indeque vocatur *Sanctissi-  
mus.*

CON-

## CONTROVERSIA V.

## De Summi Pontificis Infallibilitate.

**D**Octrina Acatholica: *Summus Pontifex nullatenus est infallibilis.* Pro Catholica

*Nota:* Summum Pontificem tripliciter spectari posse: (1.) Ut est Persona seu Doctor privatus. (2.) Ut Caput est, & Pastor totius Ecclesie absque Concilio. (3.) Cum Concilio. In rebus fidei & morum loquitur ut Doctor privatus, quando non intendit Universam Ecclesiam obligare ad indubitanter credendum, vel sequendum id, quod dicit; si verò definiat, volens Universam Ecclesiam docere & obligare, jam non loquitur ut Doctor privatus, sed ut Pastor universalis Ecclesie, sive, ut dicitur, ex Cathedra.

## DOCTRINA CATHOLICA:

*Summus Pontifex, ut Pastor Universalis Ecclesie loquens ex Cathedra, nequit errare in rebus fidei & decretis morum, etiam extra Concilium Generale.*

**P**ROB. I. Christus dixit Petro Luc. 22. *Simon, Simon, ecce Sathanas expetivit vos, ut cribraret, sicut triticum: ego autem rogavi pro te, ut non deficiat fides tua, & tu aliquando conversus confirma fratres tuos.* Ubi Christus prius loquitur ad Ecclesiam, eam esse tentandam in fide, dicens: *Ecce Sathanas expetivit*

petivit vos. Deinde ad Petrum, indicans, quòd illi tanquam Capiti & Pastori totius Ecclesiæ, non membris, adeoque sine Concilio, petierit infallibilitatem his verbis: *rogavi pro te, ut non deficiat fides tua.* Postea præcipit Ecclesiam docere & stabilire in fide, dicens: *Confirma fratres tuos.* Infero: ergo quilibet Summus Pontifex est infallibilis in rebus fidei; nam Privilegium, quod conceditur existenti in officio conceditur etiam Successoribus; & Ecclesia semper indiget Pastore, qui eam infallibiliter confirmet in fide.

II. Christus dicens Petro *Math. 16. Super hanc Petram ædificabo Ecclesiam meam.* & *Joan. 21. Pæce oves meas,* constituit Ipsum fundamentum Ecclesiæ & Pastorem omnium fidelium etiam extra Concilium: ergo hi tenentur Pastorem suum, etiam extra Concilium, sequi: ergo etiam extra Concilium est infallibilis; alias tota Ecclesia posset induci in errorem & deficere, quod est contra promissionem Christi, ut *suprà.*

### Objectiones A catholicæ.

I. Pontifex definiens non accipit novam revelationem: ergo si potest errare ut privatus, potest etiam ut Pontifex. *re. N. Conf.* Etsi enim non accipiat novam revelationem, ita tamen illuminatur & dirigitur, ut definire non possit, nisi, quod revelatum est.

II. Pontifex definit liberè: ergo potest errare. *re. Definit liberè quoad exercitium, non quoad*



quoad specificationem; nam definire potest, vel non definire; volens autem definire, non potest, nisi verum, ne Ecclesia inducatur in errorem.

III. Papa peccare potest contra iustitiam, castitatem & alias virtutes, cur non contra fidem? R. Contra fidem peccare potest, docere non potest, ob rationes datas.

IV. S. Petrus coëgit Gentes judaizare, ideoque ei resistit S. Paulus *Galat. 2.* ergo egit contra fidem. R. D. Ant. Coëgit Gentes judaizare prædicando, seu docendo Judaïsmum N. incautè cum Judæis convertendo. C. Nam, Teste Tertulliano, *conversationis fuit vitium, non prædicationis.* Petrus permittebat aliqua obviantias Legis Judaicæ, ut paulatim Judæos converteret & assuefaceret Legi evangelicæ; quia autem exinde Gentes arbitrabantur judaizandum esse, ideo Petrus ob conversationem incautam, non ob errorem in fide, fuit reprehensus à Paulo.

V. Pontifices Romani sæpius errarunt extra Concilium: ergo. R. D. Ant. In materia facti, prout Stéphanus VI. erravit sæviens in Formosum Papam mortuum, acta ejus annullando C. In rebus fidei, definientes vel loquentes ex Cathedra N. De his fusiùs Theologi & Historici. Hic insuper

*Observa 1. Omnis homo mendax, Psal. 115. conclusâ assistentiâ Spiritûs Sancti. 2. Petrus negans Christum non erravit in fide, sed externâ tantum*

tantum illius professione; si etiam in fide, quid  
tum? nondum erat Pontifex, nec errorem  
istum privatum docuit ex Cathedra. 3. Stante  
infallibilitate Pontificis non frustra convocan-  
tur Concilia, sed ad veritatem magis discuti-  
endam, ad faciliorem executionem & efficacio-  
rem Hæreticorum refutationem &c.

## CONTROVERSIA VI.

### De Vocatione & Ordinatione Mi- nistrorum Ecclesiæ.

**D**OCTRINA A catholicis: *Vocatio ad Ministerium fit  
per Ecclesiam, quæ constat ex Magistratu, Mini-  
stris Ecclesiæ & plebe* Hutter. Profet. Wittenberg.  
Wo ein Priester nicht fürhanden wäre, thut eben  
so viel ein jealicher Christen-Mensch, ob er gleich  
ein Weib oder Kind wäre. Ita D. Lutherus art. 13.  
Tom. 1. Jen. fol. 415. Pro Doctrina Catholica

*Nota 1.* Vocationem Ministrorum Ecclesiæ  
(qui sunt Episcopi, Parochi & alii in Ordinibus  
constituti) aliam esse extraordinariam & imme-  
diatam, aliam ordinariam & mediatam: *Prima*  
fit à solo Deo; hæc vocati sunt Moyse, Pro-  
phetæ, Apostoli. *Secunda* fit ab hominibus au-  
thoritatem habentibus; hæc vocatur Parochus  
ab Episcopo, Episcopus à Pontifice, Pontifex à  
Collegio Cardinalium.

*Nota 2.* Ad Vocationem completam per-  
tinere (1.) Electionem seu designationem per-  
sonæ promovendæ. (2.) Personæ electæ Con-  
secra-

secrationem seu Ordinationem. (3.) Ejusdem missionem. In Ordinatione confertur *potestas Ordinis*, in missione *jurisdictio*, assignando subditos, quos missus doceat, Sacramenta eis administret &c. Sic Christus misit Apostolos *Marc. 16.* dicens: *Euntes in mundum universum predicare Evangelium &c.*

## DOCTRINA CATHOLICA:

*Ordinatio Ministrorum Ecclesiæ, eorumque missio non pertinet ad Laicos, sed ad solos Episcopos & Summum Pontificem.*

**P**ROB. I. Per Ordinationem Ministris Ecclesiæ confertur potestas supernaturalis & merè spiritualis, ut patet; sed hanc conferre non possunt Laici, utpote eam non habentes, nec subiecti vè; aliàs Laici non essent: nec obiectivè; nullibi enim in Scriptura potestatem illam conferre, Deus Laicis concessit, nec illi unquam in primitiva Ecclesia contulerunt: ergo Ordinatio Ministrorum non pertinet ad Laicos.

II. Quotquot tempore Apostolorum consecrati sunt Sacerdotes vel Episcopi, semper ab Episcopis, nunquam à Laicis consecratos esse constat ex Sacra Scriptura: Sic Presbyteri Lystræ, Iconii & Antiochiæ consecrati sunt à Paulo & Barnaba *Act. 14.* Sic Timotheus à cœtu Episcoporum consecratus est Episcopus juxta illud *1. Timoth. 4.* *Noli negligere gratiam, qua in te est*  
cum

cum impositione manuum Presbyterii, id est, Episcoporum, ut interpretatur Chrysost. & alii. Sic Christus consecravit Apostolos *Luc. 22.* Apostoli alios Episcopos, illi alios Sacerdotes & Episcopos, adeo, ut nullus in Ecclesia repertus sit Sacerdos vel Episcopus, qui ab alio, quam Episcopo, fuerit consecratus, Sacerdos quidem ab uno, Episcopus à duobus vel tribus. Item in primitiva Ecclesia viguit lex, ut Sacerdotes & Clerici ab Episcopis ordinarentur: sic testatur Clemens Roman. *Constitut. 2. Apostol. Presbyter ab uno Episcopo ordinetur & Diaconus & reliqui Clerici.* Dionysius Areopag *Eccles. Hierarch. cap. 5.* Ignatius *Epist. ad Smyrn.* & alii primitivæ Ecclesiæ Patres; ex his sic formo argumentum:

Si primitiva Ecclesia Apostolica agnoverit, facultatem ordinandi Sacerdotes ad solos pertinere Episcopos, omnemque Ordinationem non factam ab illis habuerit irritam, absque dubio facultas illa jure divino solis comperit Episcopis; atqui sic agnovit primitiva Ecclesia, ut patet ex præmissis: ergo.

*Corollar. 1.* Prædicantes Lutherani & Calviniani, qui vel à Magistratu, vel à populo, vel ab aliis Prædicantibus, vel à Monachis Apostatis ordinati sunt Sacerdotes, non sunt veri Sacerdotes; nec enim Lutherus & Calvinus potuerunt, nec ullus alius Sacerdos ab Ecclesia Catholica Apostata potest veros ordinare Sacerdotes; cum ordinatio jure divino solis competat Episcopis. Scio; Superintendentes ha-

bent Lutherani; sed quis consecravit eos? 2. Apud Lutheranos æquè Sacerdotes sunt sutores, sartores, vetulæ &c. ex artic. 13. Lutheri citat.

### Objectiones Acatolicæ.

I. **C**hristus dicit Joān. 20. Sicut misit me Pater, & ego mitto vos: ergo ad Eum spectat vocare & mittere Ecclesiæ Ministros. R. D. Conf. Ad Christum spectat vocare Apostolos & discipulos primos C. Omnes etiam alios, subd. mediātè C. immediātè N.

II. Quod omnes tangit, ab omnibus debet approbari: ita Regula Juris; sed missio Ministrorum omnes, nimirum Ecclesiam, tangit: ergo R. Quod omnes tangit activè, ab omnibus debet approbari C. quod passivè N. Vocatione Ministrorum non tangit omnes, nimirum Magistratum & plebem activè.

III. De multitudine credentium dicitur Act. 1. Statuerunt duos scil. Mathiam & Barnabam. Item Act. 6. Elegerunt Stephanum: ergo per Laicos factæ sunt Sacerdotum electiones. R. Factæ sunt electiones, hoc est, nominationes & præsentationes ordinandarum personarum, sicut etiamnum in Ecclesia Catholica Laici habent Jus Patronatûs; personæ autem præsentatæ postea ordinatæ sunt ab Apostolis vel Episcopis, ut patet ex Act. 14. & ad Titum 1. scribit ei Paulus: Reliqui te Creta, ut constituas per civitatem Presbyteros. Ad quid, si Magistratus & populus potuisset? Credo, potuisse Presbyteros



teros constituere Lutheranos, si Lutherani fuissent.

## CONTROVERSIA VII.

### De Cœlibatu Ministrorum Ecclesiæ.

**D**OCTRINA A catholicis: Sacerdotibus licet contrahere matrimonium. Ita Confess. Augustan. art. 10. 2. de abusibus; Ein Weib haben ist nöthiger dann Essen und Trinken. Ita Lutherus sacrilegium Veneris mancipium Tom. 2. 7en. von Ehelichem Leben. fol. 147. de voto castitatis inquit: Wann du weißlich geloben wilt in oder ausser dem Kloster, so geiehe die Nasen dir selbst nicht abzubreissen, das kanst du halten. Ibid fol. 150. Freulich ist's wahr, daß der huten muß, der nicht ehelich wird, wie selts anderst zugehen? fol. 156. Sed quid sequitur? Hoc: Lutheranos vel conjugatos esse, vel scortari.

## DOCTRINA CATHOLICA:

*Episcopi, Presbyteri, Diaconi, Subdiaconi  
Jure Ecclesiastico obligantur ad cœlibatum.*

*¶ rectè: ita, ut uxores ducere nequeant, vel  
si duxerint ante Ordinationem,  
eis uti non liceat.*

**P**ROB. I. Ecclesia potest Sacerdotes, alióque Ministros obligare ad cœlibatum, & eos obligandi justam habuit causam: ergo rectè obligavit. (1.) Potest obligare: quia audienda

est præcipiente Christo *Matth. 18. Qui Ecclesiam non audierit, sit tibi sicut Ethnicus & Publicanus*; si audienda: ergo potestatem habet legislativam & obligativam ad honestum & licitum, uti est cœlibatus. (2.) Habuit justam causam obligandi: Tum propter functiones Sacerdotalis; ut Ministri curâ conjugum & liberorum non implicati sanctè, expeditè & libere vultant Sacramenta administrare, prædicare, studere, orare, infirmos visitare &c. Debent illi solliciti esse, quæ Domini sunt, quomodo placeant Deo, qui autem cum uxore est, sollicitus est, quæ sunt mundi, quomodo placeat uxori. *1. Corinth. 7.* Tum propter reditus Ecclesiasticos; ut illi, qui in antiquis Canonibus dicuntur *Patrimonium Christi & pauperum*, non distraherentur, non impendantur conjugibus & prolibus. (3.) Ergo rectè obligavit: quod enim Ecclesia potuit, decuit; utique rectè fecit

II S. Paulus suadet cœlibatum *1. Corinth. 7.* Dico autem non nuptus & vinculus, bonum est illis, si sic permanent, sicut & ego. *Ad Tit. 1.* Oportet Episcopum . . . esse continentem. Antiqui Canones, & Concilia præcipiunt cœlibatum: S. Clemens canon. 27. *Apost.* Concilium Elbertinum Anno 313. canon 33. Concilium Carthagenense 11. Anno 396 canon. 2. qui talis est: Omnibus placet, ut Episcopi, Presbyteri, Diaconi & qui Sacramenta contrectant, pudicitia custodes etiam ab uxoribus se abstinant: ut, quod Apostoli docuerunt & ipsa servavit Antiquitas, nos quoque custodiamus. Antiquitas servavit cœli-

coelibatum, teste *Concilio citato*. Jam sic: Quod Sacra Scriptura suadet, quod Canones antiqui & Concilia præcipiunt, quod Antiquitas servavit, vel servandum est vel non? si ita: ergo servandus est Clericis coelibatus; si non: ergo primava Ecclesia erravit, coelibatum præcipiendo, Antiquitas servando; quod nemo sanæ mentis dixerit.

### *Objectiones Acatholicæ.*

I. PAULUS 1. *Timoth.* 4. vocat doctrinam Dæmoniorum, quæ prohibet nubere. R. Vocat doctrinam Dæmoniorum, quæ absolute prohibet nubere, quasi matrimonium in se sit malum; non verò illam, quæ conditionate prohibet, nimirum, si quis susceperit vel suscipere velit Sacerdotium.

II. Propter fornicationem unusquisque uxorem habeat. 1. *Corinth.* 7. ergo etiam Sacerdos. R. Unusquisque habeat de præcepto N. de consilio subd. Si non impeditus sit voto, morbo vel aliter & uratur C. stante impedimento N.

III. Non est bonum hominem esse solum. *Genes.* 2. Unde præcepit Deus: Crescite & multiplicamini *Genes.* 9. R. Non est bonum, hominem luxuriosum, ut Lutherus, esse solum C. continentem N. Verbis citatis Deus solum insinuare voluit, quod in principio mundi viro necessaria fuerit uxor ad multiplicationem generis humani; hæc autem necessitas non urget in novo Testamento, dum S. Paulus affirmat: Bonum est

homini, mulierem non tangere. 1. Corinth. 7. Illa autem verba: Crescite & multiplicamini, non mandatum, sed benedictionem præ se ferunt; vel si mandatum, illud in communi ad totum genus humanum dirigitur, non ad singulos in particulari; aliàs etiam ad Christum, ad S. Joannem Evangelistam &c.

IV Oportet Episcopum irreprehensibilem esse, unius uxoris virum. 1. Timoth. 3. R. Oportet esse unius uxoris virum non positivè, ut habeat, quia S. Paulus hoc scribens ipse uxorem non habuit, ut patet ex 1. Corinth. 7. sed negativè, ut non habeat vel habuerit successivè plures, aliàs esset Polygamus, qui irregularis; Monogamus potest ordinari, ita tamen, ut absterneat ab uxore.

V. Homo à natura est liber ad matrimonium: ergo Ecclesia nequit adimere libertatem contrahendi illud. R. Nequit adimere absolute & conditionatè N. Ecclesia neminem absolute cogit ad cœlibatum, sed tantum, si velit ordinari.

VI Sacerdotes in Ecclesia Græca non obligantur ad cœlibatum, cur obligati essent in Latina? R. Lex cœlibatûs est Ecclesiastica, Ecclesia igitur ex causa permittere potest & permittit Græcis, ut uxores ante Ordinationem acceptas retineant, eique uti valeant, excepto tempore vicis suæ, sicut in Veteri Testamento.

Corollar. Sacra Scriptura cœlibatum non præcipit, Ecclesiæ præcipere non prohibet.

CAPUT

## CAPUT IV.

Controversiæ de Sacra Scriptura,  
Traditionibus, Judice Controversia-  
rum & Sacramentis.

## CONTROVERSIA I.

## De Sacra Scriptura.

**D**Octrina A catholica: *Sacra Scriptura est apud  
Lutheranos, (ut volunt Lutherani) apud Cal-  
vinistas, (ut Calvinistæ) eaque dilucida & perspicua  
in locis omnibus, quæ de fide, æternæque salute agunt.*  
Pro Catholica

*Nota: Quod Sacra Scriptura sit Verbum  
Dei, inspirante Spiritu Sancto, à Prophetis,  
Apostolis, aliisque Viris Sanctis Scriptum. No-  
mine Sacræ Scripturæ veniunt omnes Libri  
Biblici Veteris ac Novi Testamenti; quorum  
aliqui dicuntur Canonici, ii scilicet, de quibus  
Ecclesia testatur, esse divinos & qui velut Ca-  
non & Norma credendorum relati sunt in Ca-  
talogum Librorum sacrorum; alii sunt Apo-  
cryphi, qui vel positivè rejecti, vel nondum  
declarati tanquam sacri. Canonici sunt, qui  
in Bibliis vulgaræ editionis continentur, do-  
cente Concilio Tridentino Sess. 4. & jam olim  
circa Annum 402. docuit Innocentius I. Apocry-  
phi sunt Libri: tertius & quartus Esdræ, tertius  
& quartus Machabæorum.*



## DOCTRINA CATHOLICA I.

*Ecclesia Catholica authenticam habet Scripturam Sacram, legitimam illius Versionem & genuinum Sensum.*

**P**ROB. I. Dari Scripturam Sacram, & quæ sit illa, quæ legitima Versio & Sensus, non constat ex ipsa Scriptura, ut certum est, sed per Ecclesiam, per quam Deus testatur. Jam sic: Illa Ecclesia authenticam habet Scripturam Sacram, Versionem & Sensem; quæ est infallibilis, habens assistentiam Spiritûs Sancti, & infallibiliter de illis testatur; atqui Ecclesia Catholica est talis, & ita testatur; ergo. Unde S. Augustinus ait: *Non crederem Evangelio, nisi moveret me Ecclesia Catholica autoritas.* Ita dicit, non quali autoritas Ecclesiæ major sit, quàm autoritas Evangelii, sed quatenus de Evangelio nobis non constat, nisi per Ecclesiam, utque infallibiliter constet, Ecclesia debet esse infallibilis.

Doctrinæ Catholicæ suffragatur Lutherus ipse *Tom. 4. Jenens. fol. 320.* his verbis: *Wir bekennen, daß im Pabstthum die rechte Heilige Schrift sene, rechte Tauffe, rechte Sacrament des Altars, rechte Schlüssel zu Vergebung der Sünd ic.*

*Coroll. 47.* Nec Lutherani, nec Calvinistæ probare possunt se veram habere Sacram Scripturam, minùs authenticam versionem & genuinum

I. Scriptura. I. num sentium: Probare non possunt 1.) ex ipsa Scriptura; nullibi enim dicit, hos vel illos Libros esse divinos: imò dicere non sufficit; aliàs Alcoranum Turcarum, & Thalmud Judæorum essent Scriptura divina. 2.) Non ex auctoritate Ecclesiæ: hæc enim juxta illos errare potest & quodlibet ejus Testimonium est humanum. 3.) Non ex privato Spiritu, nec ex Prædicantium judicio: hoc enim est fallibile, & de interno Spiritu non constat. Certè omnes Nationes allegare possunt internum Spiritum, minimè tamen omnes habent Scripturam divinam. 4.) Non aliunde: unde enim? nihil juxta Lutheranos & Lutherum *Tom. 7. enens. fol. 141.* docendum est aut tenendum, nisi clarè contineatur in Sacra Scriptura; in hac autem minimè continetur, qui Libri sint divini: quid igitur mirum, Biblia Lutheri toties esse mutata per additionem, corruptionem &c. de quibus *Becanus in Manuali l.b. 1. cap. 1.*

## DOCTRINA CATHOLICA II.

*Sacra Scriptura non est in omnibus clara, etiam in multis ad salutem scitu, creantique, si proponantur necessariis.*

PRimam partem, Scripturam non esse in omnibus claram, plenique fatentur Adversarii. Itaque

Prob. 2.

Prob. 2. Pars : S. Petrus in *Epist. sua 2. cap. 3.* de Epistolis S. Pauli ait : *In quibus sunt quedam difficilia intellectu, quæ indocti & instabiles depravant, sicut & cæteras Scripturas ad suam ipsorum perditionem.* Si quedam difficilia : ergo non in omnibus est clara. Si indocti depravant ad suam perditionem : ergo non clara in omnibus pertinentibus ad salutem.

Prob. II. Multi sunt Articuli, de quibus inter Catholicos & Adversarios, multi, de quibus inter Lutheranos & Calvinistas est controversia. Jam sic: nonne Articuli illi pertinent ad fidem? imò; aliàs omnium una fides: an de illis clara est Scriptura? minimè; cur enim in illis explicandis & probandis adeo laborant cujuslibet Religionis Academia? cur congregata tot Concilia? cur tam multi errant, tam multæ hæreses? utique quia Articuli controversi non clarè exprimuntur in Scriptura; imò ex ea manifestè infero, quod est contrarium Articulis communiter admitti solitis: Dicit Christus *Joan. 14. Pater major me est. I. fero: ergo non est illi æqualis, nec Deus.* Dicit *Luc. 14. Qui non odit Patrem suum & matrem suam non potest meus esse discipulus.* Infero: ergo Parentes sunt odio habendi. Dicit *Psalmista Psal. 1. Non resurgent impii in judicio.* Infero: ergo extremum judicium non est universale &c. Has similèsq; illationes Adversarii non admittunt: ergo nec admittere possunt, Scripturam in omnibus ad fidem & mores pertinentibus esse claram.

Respon-

*Respondent Adversarii* 1. Scripturam esse claram fidelibus devotè & attentè legentibus. *Contra*: Scriptura non est in se ubique clara, ut patet ex repugnantia variorum Textuum: ergo nec devotè legentibus. Si clara: ad quid Lutheri & tot Sectariorum Commentarii in Sacram Scripturam?

*Respondent* 2. Scripturam clarè se ipsam explicare, Textum per Textum. *Contra* (1.) Scriptura sæpe non magis est pro uno Textu, quàm pro alio. (2.) Aliter Textum & Textum intelligunt Catholici, aliter Lutherani, aliter Calvinistæ; an hi rectè & non illi vel isti, ubi scriptum? (3.) Si Textus explicandus per - vel ad Textum, prius certò constare debet, quisnam sit clarior, & verior, & uter explicandus ad alium: v. gr. an hic: *Rom. 3. Arbitramur hominem justificari per fidem sine operibus*, ad illum: *Rom. 2. Factores Legis justificabuntur*, an vice versâ; ex sola autem Scriptura non constat.

### Objectiones A catholicæ.

I. Psalmista testatur *Psal. 18. Præceptum Domini lucidum illuminans oculos. & Psal. 118. Lucerna pedibus meum verbum tuum*: ergo Scriptura est clara. R. Idem Psalmista dicit *Psal. citat. Da mihi intellectum & discam mandata tua*. Igitur Scriptura est clara in aliquibus & lucerna, non in omnibus, nisi post interpretationem.

II. *Jerem. 31. dicit Dominus: Dabo Legem meam in visceribus eorum . . . & non docebit ultra vir proximi.*

proximum suum & vir fratrem suum : ergo Lex Domini omnino clara est. R. Ad quid igitur Prædicantes ? quid prædicabunt & cur, si non docebit vir proximum ? 2. Lex Decalogi est clara saltem quoad sensum explicitum, non sequitur : ergo tota Scriptura.

III. Scriptura est Testamentum, illud utem oportet esse clarum, ne lites generet & iurgia. R. Verum est de Testamento humano: quia post mortem testatoris non est, qui explicet; secus est de Testamento divino.

IV. Est inconveniens, Verbum Dei esse obscurum; vult enim Deus, ut intelligamus & conformiter vivamus. R. N. Aff. Causa obscuritatis potior est, ut omnes unanimiter juxta sensum Ecclesiæ interpretantis intelligant, non quilibet suam sequatur mentem, juxta illud Pauli 1. Corinth. 12. Nunquid omnes Doctores? nunquid omnes interpretantur? quasi diceret: Non.

## CONTROVERSIA II.

### De Traditionibus.

**D**octrina Acatholica: Nichts ist zu lehren, oder zu halten, was nicht klar in der Schrift steht. Lutherus Tom. 2 Senens. fol. 141. Frey, frey wessen und sollen wir seyn in allen, das ausser der Schrift ist; Trug der es uns wahre. *ibidem.* Pro Catholica

*Nota:* Traditiones sunt doctrina sacra, quæ in aliquo Libro Canonico Sacræ Scripturæ non habet.



habetur scripta, sed ab initio solis verbis fuit tradita & ab uno ad alium, de aure in aurem, usque ad nos pervenit. Traditio dividitur in Divinam, Apostolicam & Ecclesiasticam: *Prima* est immediate à Deo vel Christo; *Secunda* ab Apostolis; *Tertia* ab Ecclesia. De prima controvertitur: an præter Verbum Dei scriptum detur non scriptum, quod ejusdem cum scripto sit authoritatis, sive: an dentur Traditiones, eaque sint observandæ.

## DOCTRINA CATHOLICA:

*Traditiones sunt tenendæ.*

**P**ROB. I. Ex Apost. 2. Thessal. 2. Itaque Fratres *scite & tenete Traditiones, quas didicistis sive per sermonem, sive per Epistolam nostram.* In quem locum inquit S. Chrysost. *Hinc patet, quod non omnia per Epistolam tradiderint, sed multa etiam sine literis; eadem verò fide digna sunt tam illa, quam ista: quia utraque Dominus locutus est.*

II. Fide infallibili credimus, quæ continentur in Sacra Scriptura: ergo eadem fide prius certi esse debemus, quod detur Sacra Scriptura & quæ sit illa; quomodo enim poteris credere contenta in Scriptura, non prius credens ipsam Scripturam? atqui de Scriptura certi non sumus fide infallibili, nisi per Traditiones Divinas, infallibilem habentes authoritatem: ergo sunt admittendæ.

III. Verbum Dei scriptum admittimus, eique credimus, non quia scriptum, sed quia Domi-

Dominus verax locutus; atqui etiam non scriptum est locutus: ergo. Si neges, dari Verbum Dei non scriptum, quæro 1.) Unde tibi constat, dari Verbum Dei scriptum? nonne per Ecclesiam infallibiliter testantem? utique. *Subjuncto*: atqui per eandem à primis sæculis Christianis constat, dari Verbum Dei non scriptum, sive Traditiones: ergo. 2.) Unde tibi constat, quòd hi vel illi Libri sint Biblici & Canonici; quòd Spiritus Sanctus procedat à Patre, Filiòque; quòd in Christo una sit Persona & duæ Naturæ; quòd infantes baptizandi; quòd loco Sabbathi celebranda sit dies Dominica &c. certè non constat ex Verbo Dei scripto, sed tradito: ergo præfatos admittens articulos, exercitè admittis Traditiones.

### Objectiones A catholicæ.

I. **P**ROhibet Deus Deuteronom. 4. *Non addetis ad Verbum, quod loquor.* R. Traditiones non adduntur ad Verbum, quod Deus loquitur; quia sunt ipsùm, sed non scriptum.

II. S. Paulus Galat. 1 scribit: *Licet nos aut Angelus de celo evangelizet vobis, præterquam quod evangelizavimus, Anathema sit* R. 1. Etiam Verbum Dei non scriptum est evangelizatum; non enim omnia, quæ evangelizaverunt Apostoli, sunt scripta, ut patet Joan. cap. 8. & versu ult. Dixit illis Iesus: *predicite; non: scribite* 2. Anathema dicitur, qui contrarium evangelizaverit; Traditiones autem non sunt contrariæ Verbo evangelizato.

III. Tra-

III. Traditiones reprehenduntur *Matth. 15. Irritum fecistis mandatum Dei propter traditionem vestram.*  
 12. Reprehenduntur Traditiones Judaicæ & superstitiosæ, non Divinæ vel Apostolicæ.

IV. Non potest certò constare, quæ sint Traditiones Divinæ vel Apostolicæ. 8c. Constat per Ecclesiam, Spiritu sancto eam docente omnem veritatem *Joan. 16.* Quando igitur universalis Ecclesia tenet aliquid tanquam de fide, quod non reperitur in sacra Scriptura; vel servat aliquid non scriptum, quod à solo Deo potuit constitui, ut: baptizari parvulos nondum credentes, habetur id per Traditionem Divinam. Quando observatur aliquid, quod institui potuit ab Apostolis, ut Episcopis; nec scitur institutionis initium, ut: jejunium quadragesimale, quatuor temporum, habetur id per Traditiones Apostolicas: quando introductum per Ecclesiam, habetur per Ecclesiasticas.

### CONTROVERSIA III.

#### De Judice Controversiarum.

**D**Octrina Acatolica: Sacra Scriptura est Norma & Judex Controversiarum Ecclesiasticarum. *Hutter. Dr. Wittenberg. in Compend. Lincor. Theolog.*  
 Sed Contra: Si Norma, non est Judex; si Judex, non est Norma; etenim Norma est, iuxta quam deciditur Controversia; Judex est, qui decedit. Pro doctrina Catholica

*Nota:* In Judice Controversiarum quatuor requiri Dotes: (1.) Ut non detur ab eo Appellatio; aliàs non esset finis Controversiæ. (2.) Ut sententiam ferre possit in quavis materia; aliàs alius quærendus esset Judex. (3.) Ut sententiam pronunciet clarè; aliàs partibus non constaret, an pro hac vel illa pronunciata. (4.) Ut sit infallibilis; aliàs fallere posset in fide & falli Ecclesia. Controversia est: Quis sit ille?

### DOCTRINA CATHOLICA:

*Supremus Controversiarum Judex non est Scriptura Sacra, sed Summus Pontifex & Ecclesia.*

**P**Rob. I. Scriptura Sacra tantum est Norma, juxta quam Judex judicare debet: ergo non ipse Judex. Quis dicat, jus civile esse judicem? Norma est: sic & Scriptura, juxta quam judicandum; constituitur tamen præter Legem Civilem scriptam aliquis Judex litium in civilibus: ergo similiter præter Scripturam Sacram constitutus est Judex controversiarum in Ecclesiasticis; Quis ille? utique Summus Pontifex, cui in Petro à Christo dictum: *Pasce oves meas. Joan. 21. Confirma fratres tuos. Luc. 22. Quodcumque solveris, erit solutum. Matth. 16.*

II. Sacra Scriptura non de qualibet potest Controversia ferre sententiam: Controversiæ sunt: *Quinam Libri Scriptura sint Canonici? Qua*  
*Script.*

*Scripturæ editio sit authentica? Quot sint Sacramenta?*  
Dicant Adversarii: ubi Scriptura decidit? nul-  
libi: ergo non est Judex Controversiarum.  
*Item:* Scriptura non pronunciat sententiam tam  
clarè, ut cuique partium certò constet, an sit  
pro-vel contra se: controversant Lutherani &  
Calvinistæ de reali præsentia Christi in Eucha-  
ristia; si Scriptura Judex, clarèque pronunciet  
sententiam, vel stulti sunt, quod non intelli-  
gant; vel pertinaces, quod non acquiescant:  
si neutrum velint, fateantur Scripturam non  
esse Judicem controversiarum.

III. Summo Pontifici conveniunt 4. Do-  
ctes in Judice Controversiarum requisitæ; de  
quibus in Not. & patet ex Cap. III. *Controvers. IV.*  
*De Capite Ecclesiæ.* *Item:* A tempore Apostolo-  
rum usque modò Controversiæ sunt decissæ  
per Summum Pontificem & Ecclesiam: Con-  
troversia de legalibus, observandis vel non,  
delata est ad Concilium Apostolorum & ab  
eo decisa *Actor. 15.* Similiter aliæ Controver-  
siæ post tempora Apostolorum exortæ à Pon-  
tifice Romano vel à Conciliis ab eo approba-  
tis sunt decissæ, ut notum est ex *Historia Ec-  
clesiast.* Arius, Nestorius, aliæque Hæresiar-  
chæ sunt damnati tanquam Hæretici; & re-  
ctè, etiam juxta Lutheranos & Calvinistas:  
ergo Judex Controversiarum semper fuit & ho-  
die est Summus Pontifex & Ecclesia, nimirum  
Concilium à Pontifice approbatum, Ecclesiam  
repræsentans.



*Objectiones Acatolicæ.*

I. **C**hristus remittit ad Scripturam *Joan. 5. Scrutamini Scripturas.* R. Judæos remisit ad Scripturam tanquam ad Judicem *N.* tanquam ad testem *C.* Volebat eos testimonio Scripturarum convinci de adventu Messæ. Judex allegat legem, an lex propterea Judex? minimè.

II. Beroënſes *Aſtor. 17. erant quotidie scrutantes Scripturas, si se ita hæc haberent*, scil. quæ dicebantur à Paulo: ergo Scripturam agnoverunt pro Judice Controversiarum. R. Erant scrutantes Scripturam tanquam Judicem *N.* tanquam Normam, utrum Paulus juxta eam diceret *C.*

III. *Omnis Scriptura divinitus inspirata utilis est ad docendum, arguendum & corripiendum 2. Timoth. 3.* ergo non opus est alio Judice. R. 1.) Retorq. Jus civile utile est ad docendum, arguendum &c. ergo non opus est iudice. Si valet consequentia: quare Lutherani & Calvinistæ præter jus habent iudices? Si non valet: etiam non valet in objectione. 2.) Scriptura utilis est, sed non sufficiens se solâ; etiam admittendæ sunt Traditiones, ut *supra*, & necessarius Judex distinctus, quando oritur Controversia.

IV. Summus Pontifex decidere debet & definire juxta Scripturam: ergo potius hæc decidit, estque Judex, quàm ille. R. *D. Conf.* Ergo Scriptura decidit tanquam Norma, juxta quam, *C.* tanquam Judex, qui, *N.*

V. Si Pontifex judicet de Scripturis, est supra Scripturam; quod falsum. R. Si judicet

cet de Scripturis, an veræ vel falsæ, potens eas tollere vel mutare C. Si judicet tantum de sensu earum, sicut Judex de legibus, qualiter sint intelligendæ. N.

VI. Non necesse habetis, ut aliquis doceat vos, sed Unctio docet vos de omnibus, 1. Joan. 2. ad quid ergo alius Judex? R. vers. preced. 26. ait S. Joannes: *Hæc scripsi vobis de his, qui seducunt vos. Unde Versus objecti sensus est: Non necesse habetis, ut Pseudo-Apostoli & Hæretici Seducutores doceant vos fidem Christi, sed unctio Spiritus Sancti docet vos per Apostolos, quos Christus misit, Marc. 16. ita Bellarmin. lib. 3. de Verbo Dei cap. 3.*

#### CONTROVERSIA IV.

##### De Numero Sacramentorum.

**D**OCTRINA Acatholica: Die Schrift hat nicht mehr denn zwey Sacrament, die Tauffe und den Tisch des Herrn. Ita Luther. Tom. 2. *Jenens. fol. 209. ait in lib. de capt. Bab. adstruit unum, in lib. de Missa Angular. tria. Lutherani in Apologia Confess. Augustan. ponunt tria his verbis: Verè sunt Sacramenta Baptismus, Cæna Domini, Absolutio.*

##### DOCTRINA CATHOLICA:

*In Lege nova sunt septem Sacramenta: Baptismus, Confirmatio, Eucharistia, Pœnitentia, Extrema Unctio, Ordo, Matrimonium.*

**P**Rob. in Sacra Scriptura nomen Sacramenti soli tribuitur Matrimonio, non Baptismo,

non Coenæ, nec alteri ritui; unde ergo scire possumus, quæ sint Sacramenta & quot? Scimus 1. ex perpetua Ecclesiæ Traditione & SS. Patrum consensu apud Cōcursum in *Epitome Controvers.* Ecclesia primitiva septem Sacramenta tenuit; Sectarii ostendere nequeunt, quando nam aliquod ex septem nominatis haberi coeperit Sacramentum, ita, ut antea non fuerit: ergo septenarius Sacramentorum numerus descendit à Christo & Apostolis. Scimus 2. ex definitione Sacramenti; quæ illa? Apologia Confess. Augustin pag. 200. ponit hanc: *Sacramenta sunt Ritus, qui habent mandatum Dei & quibus addita est promissio gratiæ.* Infero: ergo ad Sacramentum requiruntur solum tria; (1) *Ut sit signum sensibile seu ritus externus.* (2) *Ut habeat promissionem gratiæ* (3) *Ut sit à Christo institutum.* Jam sublimus; atque nunc conveniunt septem Sacramenti nominatis: ergo. 1) Conveniunt Baptismo & Coenæ, ut farentur Adversarii. 2.) Conveniunt Confirmationi; Ritus externus est manuum impressio, Actor 8. Promissio gratiæ est acceptio Spiritus Sancti, *ibid.* vers. 17. Non atum seu institutum Christi deducitur ex facto Apostolorum, qui baptizatis manus non impressissent ad accipiendum Spiritum Sanctum, nisi Dominus mandasset. 3) Conveniunt Penitentia: Ritus externus & promissio gratiæ patent ex Joan. 20. *Quorum remisseritis peccata, remittuntur eis.* Quis potest dimittere peccata, nisi solus Deus? ergo institutio est à Deo; & mandatum habetur

Matth. 3.

*Matth. 3. Pœnitentiam agite.* 4.) Conveniunt extrema *Unctio*: Ritus externus est *Unctio*, quæ exprimitur *Jacob. 5. Infirmatur quis in vobis, inducat Presbyteros Ecclesia, & orent super eum, ungentes eum oleo.* Promissio gratiæ additur his verbis: *Alle- viabit eum Dominus, & si in peccatis sit, remittentur.* Hic effectus est à Deo: ergo etiam institutio. 5.) Conveniunt *Ordini*: Ritus externus est manuum impositio, *1. Timoth. 4.* ubi additur promissio gratiæ; institutio patet ex illo *Ephes. 4. Ipse dedit quosdam quidem Apostolos &c.* 6.) Conveniunt *Matrimonio*: Ritus externus est contractus; promissio gratiæ & institutio sumuntur ex illo *Ephes. 5. Sacramentum hoc magnum est &c.*

### Objectiones Acatolicæ.

I. **U**bi scriptum: septem esse Sacramenta?  
 R. Ubi scriptum: esse duo vel tria? Hoc nullibi in Bibliis, illud, nimirum esse septem, in illis saltem implicite & quoad rem, ut *suprà*. Septem tradit Ecclesia & contentiunt Patres, qui tamen non uno, eodémque loco omnia septem quandoque expresse- rint, diversis tamen locis omnium meminerunt.

II. Ordo & Matrimonium jam fuerunt in Veteri Lege & non fuerunt Sacramenta: ergo nec modo sunt. R. *N. Conf.* in Lege Veteri defuit institutio divina, in nova habetur. Matrimonium ab initio fuit institutum à Deo solum in ratione contractus, prohibetur Sacerdotibus, quatenus impedit Sacerdotale Officium.

## CONTROVERSIA V.

## De reali Præsentia Christi in Eucharistia.

**D**Octrina Calvinistica & Zwingliana est: Corpus & Sanguis Christi non sunt in Eucharistia, nisi figuratè, quatenus panis & vinum sunt signum Corporis & Sanguinis Christi, adeoque tantum sumuntur spiritualiter & per fidem. Calvin. lib. 4. institut. cap. 17. Doctrina Lutherana est: Christus realiter est in Sacramento in - cum - & sub pane & vino, non tamen extra actionem Cœna Dominicæ. Apologia Confess. Augustan. pag. 157.

## DOCTRINA CATHOLICA I.

*Corpus & Sanguis Christi realiter sunt in Eucharistia.*

**P**Rob. I. Christus promittit Joan. 6. Panis, quem ego dabo, Caro mea est pro mundi vita. Et postea instituens Sacramentum clarissimè dixit Matth. 26. Luc. 22. Hic est Corpus meum, quod pro vobis tradetur. Hic est Sanguis meus novi Testamenti, qui pro multis effundetur in remissionem peccatorum. Denique Apostoli & Christi Discipuli communicantes idem agnoverunt 1. Corinth. 10. Panis, quem frangimus, nomen participatio Corporis Domini est? ergo Corpus & Sanguis Christi vel realiter sunt in Eucharistia, vel verba ista sunt falsa.

Respondent: Christum Joan. 6. promississe manducationem spirituales; & Luc. 22. locutum esse



esse figuratè hoc tenu: *Hoc est figura Corporis mei;* sive: *significat Corpus meum.* Contra est 1. Non licet Scripturam detorquere ad sensum improprium & tropicum, nisi contradiçtio postulet aut inconvenientia; quid aliàs ex Scriptura habebimus? quis convincetur? Verba autem citata in proprio sensu accipi, nihil obstat. 2. Quæ in Scriptura de hoc Sacramento dicuntur, non conveniunt figuræ, sed ipsi Corpori & Sanguini, v. gr. quòd Corpus tradetur, Sanguis effundetur, quòd vitam det manducantibus, quòd indignè manducantes judicium sibi manducant &c.

Prob. II. Ecclesia Christi à temporibus Apostolorum ubique & semper credidit ac tradidit Christum realiter & substantialiter esse in Sacramento: ita testantur S. Clemens D. Petri discipulus in *Constitut.* *Apostol.* lib. 8. cap. 14. S. Dionys. *Eccles. Hierarch.* cap. 3. S. Damascen. lib. 4. *Orthod. fidei.* cap. 14. Concilium Nicæn. II. añ. 6. his verbis: *Dixit: accipite, edite, hoc est Corpus meum &c.* non dixit: *sumite, edite imaginem Corporis mei.* Sic & alii PP. his autem contraire, perire est.

Prob. III. In contestationem præsentia Christi Deus varia fecit miracula: dum visibiliter Christus apparuit in Hostia consecrata, aut loco vini Sanguis; dum agnitus est & veneratus etiam à brutis; dum Judæi, Christum in Hostia configere tentantes, effluxo Sanguine,  
f 5 igne

igne de coelo sunt consumpti, similésque Sacri-  
legi puniti &c.

*Dicent Calvinistæ:* Miracula illa esse præstigias  
dæmonum & illusiones. Sed quibus credes :  
an Calvinistis pro foro suo frivole negantibus ;  
an antiquæ Ecclesiæ, Sanctis Patribus & Scrip-  
toribus Ecclesiasticis affirmantibus ? Si præstigiæ  
sunt dæmonis : cur easdem non molitur pa-  
riter apud Lutheranos realem præsentiam etiam  
admittentes ? non molitur ; quia miracula cir-  
ca Eucharistiam sunt à Deo : non sunt apud  
Lutheranos ; quia defectu Sacerdotii non ha-  
bent nisi panem : sed apud Catholicos ; quia  
verum, ut sequitur, habent Sacramentum.

## DOCTRINA CATHOLICA II.

*Post Consecrationem de Pane & Vino sola re-  
manent accidentia & sub illis Corpus  
& Sanguis Christi.*

**P**ROB. Christus dixit *Matth. 26. Hoc est Corpus  
meum* : ergo substantia panis fuerat mutata.  
*Prob. Conf.* Si non mutata ; ergo sensus verbo-  
rum istorum fuit : *hic panis est Corpus meum* ; atque  
hic tenus est falsus, quia prædicatum non iden-  
tificatur subiecto : ergo, ut vera sint Verba Chri-  
sti, debet facta fuisse Transubstantiatio.

*Confirm.* Tenens spongiam aquâ plenam  
non potest dicere : *hoc est aqua* ; quia pronon-  
men *hoc* demonstrat spongiam, quæ non est  
aqua : ergo etiam Christus, tenens panem cum

Cor.

Corpore suo, non potuit dicere: *Hoc est Corpus meum*; quia pronomen *hoc* demonstrasset panem, qui non est Corpus Christi.

### DOCTRINA CATHOLICA III.

*Corpus & Sanguis Christi adsunt statim post Consecrationem, adeoque etiam extra usum.*

**PROB. I.** Corpus Christi in Eucharistia ponitur vi verborum ejus: *Hoc est Corpus meum*. Jam sic: Verba illa sunt de præsenti; non enim Christus dixit: *Hoc erit* - sed: *est Corpus meum*. Item sunt absoluta, non enim dixit conditionarè: *est, si manducabitur*. Idem est de consecratione Calicis; ergo prolatis Verbis Consecrationis statim adsunt Corpus & Sanguis Christi; si non: certissimè Verba Consecrationis sunt falsa; quia dicunt esse Corpus, & non est.

**II.** Ante manducationem dixit Christus: *Hoc est Corpus meum*: ergo etiam fuit; cibis enim non fit per manducationem, sed ante datur. Item Christus dixit *Matth. 26. Bibite ex hoc omnes*. Cautam subdit; *Hic enim est Sanguis meus*: ergo fuit; quomodo alius movisset ad bibendum?

**III.** Ex Luthero contra Luther nos; Is *Tom. 2. §. nens fol. 207.* ait: Man soll die nicht bedammern, noch Keger sagen, welche das Sacrament anbeten. Et ad marginem: Das Sacrament anbeten, oder nicht anbeten soll frey seyn, weils nicht gebotten. Subjuncto; atqui Sacramen-

tum

tum adoramus non in alterius gutture, non in stomacho, sed extra usum in Altari: ergo extra usum præiens est Christus Dominus; aliâs adorantes essent idololatæ, & adorare, quod concedit Lutherus, non liceret.

### Objectiones Acatolicæ.

I. **C**hristus Capharnaitis in verbo de manducanda Carne sua scandalizatis respondit Joan. 6. *Spiritus est, qui vivificat, Caro non prodest quidem*: ergo insinuat, Carnem suam esse spiritualiter sumendam. R. Caro non prodest quidquam ad vitam spiritualem sumpta materialiter ad modum alterius carnis, ut sumendam putabant Capharnaitæ; prodest sumpta Sacramentaliter, ut sumi voluit Christus & prodesse docuit Joan. 6. dicens: *Qui manducat meam Carnem . . . habet vitam æternam.*

II. 1. Corinth. 10. *Patres nostri eandem escam spirituales manducaverunt & eundem potum spirituales biberunt*; sed illi in veteri Lege non manducaverunt Corpus Christi ore: ergo nec nos manducamus. R. Eandem escam manducaverunt inter se C. nobiscum subd. eodem modo N. or. verso C. Illi in figura per Manna, nos in figurato, quod Christus sub Speciebus consecratis.

III. Eucharistia appellatur *Panis*, 1. Corinth. 10. *Germinen vitis*, Marc. 14. ergo est sine - vel cum Corpore & Sanguine Christi. R. Sic appellatur propter conversionis terminum à quo, sicut Ge-  
nes. 2.

nes. 2. Eva dicitur os, quia ex osse; vel per analogiam, quia cibus spiritualis; vel ratione Specierum.

IV. Christus ascendit in coelum: ergo vel coelum deserit, vel simul est in pluribus locis. Quando *Actor. 9.* apparebat Saulo, non deſerebat coelum: sic non deſerit, quando adest in Eucharistia; est igitur simul in pluribus locis, quod supernaturaliter fieri non repugnat.

V. Ex reali praesentia sequuntur absurda, v. gr. Christum descendere in stomachos valde foetidos, impiorum manibus contrectari, in locis immundis solum detineri, à muribus posse corrodi, cremari &c. *12.* Christus, qui ex nimia charitate vult nobiscum esse usque ad consummationem saeculi, *Matth. 28.* nihil inde patitur; cum Corpus Eius sit gloriosum, & partes Eius non extense localiter: sicut non inficitur radius solis transiens per cloacam. Si Hostia corrodat, cremetur, frangatur, putrescat, generentur vermes, ejusmodi non afficiunt Corpus Christi, sed Species panis & vini.

VI. Accidentia panis manent in Eucharistia: ergo etiam substantia panis; est enim eorum subjectum, sine quo esse non possunt. *N. Conf.* Accidentia non possunt esse sine subjecto substantiali naturaliter C. supernaturaliter N. De essentia accidentis non est inesse actualiter, sed aptitudinaliter.

VII. Christus, ut habetur *Matth. 26.* prius dixit: accipite & comedite, postea: Hoc est Corpus meum:



meum : ergo Corpus Christi non fit ante comestionem. R. N. Conf. Christus per verba : *Hoc est enim Corpus meum : Hoc est enim Sanguis meus*, Apostolos movere voluit ad comedendum & bibendum, ut patet ex particula *enim* : ergo ante comestionem ea protulit ; quo modo alias movissent ? adeo quæ & antè Corpus Christi fuit. Nota : prius dixit, *comedite*, quam *Hoc est Corpus meum &c.* sed non prius comederunt, quàm dixerit : *Hoc est Corpus meum*.

VIII. Baptismus non est Sacramentum extra actionem : ergo nec Eucharistia. R. N. Conf. Baptismus constituit in ablutione & verbis, quæ transeunt ; Eucharistia in Speciebus consecratis, Corpore & Sanguine Christi, quæ permanent.

IX. Christus non instituit Sacramentum, ut asservetur & adoretur. Ita Luther. citat. R. Etiam non inhibuit ; utrumque consequens est ad institutionem, & laudabile : ergo bene fit. Asservabatur in principio Ecclesiæ Christianæ, quare jam non ? Dico : præcepta est manducatio. Dico : sed non, ut statim fiat cibis aliquamdiu asservari potest. Si Species quandoque sine manducatione corrumpantur, culpa est asservantium. Adorandus est Christus ubique, quare non in Eucharistia ? Dico : non est præceptum. Dico : an ideo non potest ? Si non debet, tamen, ut fatetur Lutherus, potest.

CON

CONTROVERSIA VI.

*De Communionē sub utraque  
Specie.*

**D**OCTRINA A catholicis: Es sollen nach Christi Ordnung beyde Gestalt begehrt und ge-  
reichet werden. Dr. Luther. Tom. 3. Jenens. fol. 274.  
Luthero consentiunt Lutherani, Lutheranis  
Calvinistæ.

DOCTRINA CATHOLICA I.

*Nullum extat præceptum divinum, omnes fide-  
les obligans ad Communionem sub  
utraque Specie.*

**P**ROB. I. Ejusmodi præceptum nec in Scrip-  
turis reperitur; nec ex majorum Traditio-  
ne habetur; nec Ecclesia unquam agnovit:  
ergo non extat. *Antecedens pater à posteriori:*  
Apostoli distribuerunt Eucharistiam sub Specie  
panis tantum: nam *Actor. 2. Erant perseverantes*  
*(primi Christiani) in doctrina Apostolorum & commu-  
nicatione fractionis panis, intellige, Eucharistici, iux-  
ta illud 1. Corinth. 10. Panis, quem frangimus, nonne  
participatio Corporis Domini est?* Item primis Sæcu-  
lis fideles Sacramentum sub Specie Panis porta-  
verunt ad ædes, ad eremum, asservaverunt &  
in necessitate sumpserunt, ut testantur Concilia  
& PP. ergo primitiva Ecclesia non agnovit præ-  
ceptum communicandi sub utraque Specie:  
adeoque non extat.

II. Chri-

II. Christus Ipse communionem sub una Specie approbavit tum facto, tum verbo; verbo: quando sub una specie communicantibus promisit vitam æternam *Joan. 6. Qui manducat hunc Panem vivet in æternum.* Facto: quando Eucharistiam sub una Specie dedit discipulis in Emaus *Luc. 24. accepit panem & benedixit, ac fregit & porrigebat illis . . . & cognoverunt Eum in fractione panis,* scil. Eucharistici, ut intelligunt S. Chrysost. S. Augustin. & alii PP. si panis fuisset communis, Christum ex fractione ejus non cognovissent.

III. Communicantibus sub una Specie scil. Panis Christus promisit vitam æternam *Joan. 6. supra, & ibid. vers. 50. Hic est Panis de cælo descendens, ut, si quis ex ipso manducaverit, non moriatur:* ergo communio sub utraque Specie non est de præcepto divino; aliàs sumentes sub una peccarent, & non haberent vitam æternam.

## DOCTRINA CATHOLICA II.

*Extat præceptum Ecclesiæ, utque legitimum, ut sacra Communio detur & extra Sacrificium sumatur sub una tantum Specie scil. Panis.*

**P**ROB. I. Nullum extat præceptum divinum de Communionem sub utraque Specie; ut *supra.* (2.) Sub una Specie non minùs continetur & sumitur totus Christus, quàm sub utraque; ubi enim post resurrectionem Corpus Christi,

Christi, ibi & Sanguis; ubi Sanguis, ibi & Corpus ac reliqua per concomitantiam. (3.) Christus Ecclesiæ reliquit vel unam vel utramque Speciem præcipere, prout cir. umitantix postulant: Ipse enim solum præcepit Sacramenti Sumptionem quoad substantiam, non modum unius vel utriusque Speciei; itaque vel inde patet: quia *Joan. 6.* modò unam, modò utramque Speciem dicit conferre sumentibus vitam æternam. (4.) Coeteris paribus, non minor fructus percipitur ex sumptione unius, quàm utriusque Speciei; quia sub qualibet torus sumitur Christus. (5.) Ecclesia ad prohibendum Laicis Calicem iustas habet causas, scil. ut multiplex caveatur irreverentia Sacri Sanguinis in effusione, adhaesione ad barbam &c. Item: ut omnes fideles, etiam ab illis, pariformiter sumant Sacramentum; & ubique, etiam in regionibus, in quibus non aut difficillimè pro multis & frequenter communicantibus haberi potest vinum, faciliteretur Eucharistiæ usus &c. Ex his omnibus evidentissimè infertur: ergo præceptum Ecclesiæ, quo prohibetur usus calicis, est legitimum & iustissimum.

II. Lutherò verinde fuit sumptio unius Speciei, vel utriusque, vel nullius: ergo ipse aut non agnovit præceptum divinum communicandi sub duplici specie; aut, si agnoverit, malitiosè contravenire voluit. *Antecedens ostendo ex Tom. 3. Lutheri Jenens. fol. 274. ubi scribit:* Wir sagen weiter, wann ein Concilium bende

Gestalt zu reichen zuließe, wolten wir dann nicht beyder Gestalt brauchen, ja wir wolten dann erst zu Verachtung des Concilii allein einer, oder gar keiner, und mit nichten beyder brauchen, und alle die verfluchen, so aus Gewalt desselben Concilii beyder Gestalt brauchen würden: ergo perinde fuit Luthero sumptio unius Speciei, vel utriusque vel nullius; ast malè: etenim Luthere! ubi Evangelium arbitrio tuo unam Speciem, vel utramque, vel nullam relinquit? malitiosus es, volens unâ Specie uti vel nullâ in despectum Concilii, qui tamen utramque asseris esse sumendam ex ordinatione Christi: Impostor es, Concilio utramque ordinante Speciem, unâ volens uti, aut nullâ, qui tamen *Tom. 1. Jenens. fol. 417. artic. 16.* doces: Es wäre gut, daß die Kirche in einem gemeinen Concilio ordnere, den Leuten beyde Gestalt des Sacraments zu geben. Si bonum, si præceptum Christi, quomodo prævaricari licet utendo unâ Specie aut nulla? Verùm perinde tibi, quid doceas, modò contra Ecclesiam Catholicam, modò hæresis; quis dicit? tu ipse in *Prologo de capt. Babyl. & Tom. 2. Jenens. lat. fol. 260.* Dum illi (Papistæ) de mea aliqua hæresi triumphabunt, ego aliam NOVA M producā: ergo Hæresiarcha es, sequaces tui hæretici, doctrina tua de communionē sub utraque Specie vel unâ vel nullâ hæretica.



*Objectiones A catholicæ.*

I. **C**hristus instituit Sacramentum sub utraque specie: ergo sub utraque sumendum. *R.* *N. Conf.* Substantia Sacramenti scilicet totus Christus datur in una Specie; & quoad substantiam Sacramentum cadit sub præceptum, non quoad modum unius vel utriusque Speciei.

*Inst.* Cur ergo Christus instituit sub utraque Specie? *R.* Ut in Consecratione, quâ mystica fit separatio Sanguinis à Corpore, representetur Sacrificium cruentum in cruce, quo facta est realis.

II. Christus distribuit Eucharistiam sub utraque Specie & præcepit *Luc. 22. Hoc facite in meam commemorationem.* *R.* Non omnia, quæ Christus egit in ultima Cœnâ, sunt de præcepto, aliâs etiam lotio pedum. Distribuit quidem Eucharistiam sub utraque Specie, non autem distribui præcepit; nam *Hoc facite in meam commemorationem* tantum dixit post Consecrationem Panis; de Consecratione autem Calicis dixit conditionatè: *Hoc facite, quotiescunque biberitis, in meam commemorationem.* *1. Corinth. 11.*

III. Præceptum habetur *Joan. 6. Nisi manducaveritis Carnem Filii hominis & biberitis ejus Sanguinem, non habebitis vitam in vobis.* *R.* Præcipitur Sumptio Carnis & Sanguinis, eaque fit sub una Specie Panis, & per illam satisficit præcepto: si cui proponeretur panis & vinum sub præcepto: *manduca & bibe*, satisfaceret sumens panem

intinctum vino; sic & satisfacit sumens Carnem Filii hominis cum Sanguine sub una Specie.

*Inst.* Dicitur: & biberitis; sub Specie autem Panis non bibitur. *R.* Bibitur æquivalenter; quia verè cum effectu sumitur: non requiri, ut Sanguis bibatur formaliter, colligitur ex verbis Christi eod. cap. *Qui manducat hunc Panem, vivet in æternum.*

IV. Præcepit Christus *Matth. 26. Bibite ex eo omnes*: ergo omnibus præcipitur usus Calicis. *R.* Præcepit omnibus fidelibus *N.* Apostolis, volens, ne primus totum biberet *C.* Unde Marcus testatur *cap. 14. Biberunt ex eo omnes*, utique non omnes tunc fideles: ergo nec omnibus fuit dictum.

V. Qui sumit unam Speciem, non accipit integrum Sacramentum. *R.* Non accipit ex parte signi, quod sunt Species panis & vini *C.* ex parte rei significatæ, quæ est Christus sub qualibet Specie totus *N.*

VI. Eucharistia sumi debet per modum cibi & potus; sic autem non sumitur sub una Specie: ergo. *R.* Sub una Specie sumitur per modum cibi & potus æquivalenter, sumptione Hostiæ Corpus & Sanguinem continentis æquivalente potationi, quod sufficit ad præceptum Christi & effectum Sacramenti. Pro aliis

*Observa*: Gelasius Papa dicens *cap. Comperimus. de Conf. d. 2. Divisio unius & ejusdem Mysterii non potest sine grandi Sacrilegio provenire*, loquitur de Sacri-

Sacrificio, in quo non licet unam Speciem consecrare & sumere sine alia. Alii SS. Patres, adstruentes necessitatem Communionis sub utraque Specie, vel loquuntur de Sacerdotibus in Sacrificio, vel de illis temporibus, quibus utraque Species permixta erat aut præcepta.

## CONTROVERSIA VII.

### *De Sacrificio Missæ.*

**D**octrina Acatholica: So schliesse ich, daß die Messe weder Opfer, noch gut Werk sey. Dr. Luther *Tom. 2. Jenens. fol. 140.* Contra dicit *Tom. 2. fol. 69.* Wir können ja nicht läugnen, daß die Mess, und zum Gottes Tisch geben, eine Ordnung sey von Christo selbst eingesetzt. *fol. 251.* Wir lassen die Mess-Gewand, Altar, Lichter noch stehen, bis uns gefällt zu ändern. Ecce! Luther docet, mutatque, ut placet. Pro doctrina Catholica

*Nota:* Duplex in Novo Testamento distinguatur Sacrificium: unum est cruentum, in quo Christus Patri suo oblatus est in ara crucis; alterum incruentum, in quo Christus sub Speciebus panis & vini offertur in Altari. Controversia est: an Christus in ultima coena Corpus, Sanguinemque suum tanquam verum Sacrificium obtulerit Deo Patri; & Apostolis, eorumque in Sacerdotio Successoribus similiter offerre præceperit per hæc verba: *Hoc facite in meam Commemorationem.*

## DOCTRINA CATHOLICA:

*In Missa offertur Deo verum Sacrificium.*

**I** Rob. I. Christus in ultima Cœna verum obtulit Sacrificium : ergo & Sacerdotes offerunt in Missa ; faciunt enim , quod Christus fecit , & facere præcepit *Luc. 22. dicens : Hoc facite in meam commemorationem. Prob. Ant.* Tum quia se ipsum Deo Patri sub Speciebus panis & vini obtulit , quando se dedit non tantum discipulis in cibum , sed & pro illis in victimam ; sic autem dedisse colligitur ex verbis illius *Luc. 22. Hoc est Corpus meum , quod pro vobis datur ;* 17 Græco textu : *DATUM* , id est , quod jam sub Speciebus panis & vini offertur vel oblatum , postea offerendum in cruce. Tum quia de Christo dicitur *Psal. 109. & Hebr. 5. Tu es Sacerdos in æternum secundum ordinem Melchisedech ;* si Sacerdos secundum ordinem Melchisedech ; ergo actum Sacerdotalis Melchisedech proprium , qui fuit offerre panem & vinum , etiam ipse exercuit ; quando ? in ultima cœna se offerens sub pane & vino. Ita P. P. Si Sacerdos in æternum ; ergo adhuc offert , non visibiliter per se , sed per Sacerdotes Christum in Altari representantes.

II. In omni statu tum legis naturæ , tum scriptæ fuit Deo vero oblatum Sacrificium ? cur non offeratur in lege Evangelica ? an non Deus æquè colendus ? offerendum esse varicinas est Malachias *cap. 1. In omni loco sacrificatur & offertur*

tur nomini meo oblatio munda. Quæ oblatio ista? non Judaica: quia fit à gentibus conversis; non preces & bona opera Christiana: quia Sacrificium non sunt, nisi metaphoricè; quæ ergo? Sacrificium Corporis & Sanguinis Christi incruentum. Sic testantur S. Clemens Roman. Constitut. Apostol. lib. 7. cap. 3. Theodoretus in Malach. cap. 1. Chrysost. Augustin. Tertullian. alii- que Patres primitivæ Ecclesiæ.

III. Ecclesia à temporibus Apostolorum Missam celebravit, habuitque pro vero Sacrificio; sic testantur Liturgiæ (id est formulæ Missarum) Apostolorum Petri, Jacobi, & Marci Evangelistæ. S. Andreas Apost. (ut referunt Presbyteri Achajæ in vita illius) Aegæ Proconsuli suadenti, ut Diis immolaret, respondit: Ego omnipotenti Deo immolo quotidie, non tantorum carnes, sed immolatum Agnum in Altari &c. S. Clemens Petri Discipulus lib. 6. Constitut. Apostol. cap. 23. ait: Pro Sacrificio cruento incruentum & Mysticum Sacrificium instituit; quod per Symbola Corporis & Sanguinis sui celebratur. Omitto plures alios: ergo in Missa verum offertur Sacrificium; si enim absque Idololatria potuit primis Sæculis, quare non moderno?

IV. Confessio Augustana artic. de Missa sic habet: Falso accusantur Ecclesia nostræ, quod Missam aboleant; retinetur enim Missa apud nos & summâ reverentiâ celebratur, servantur & usitata ceremonie fere omnes. Vel ergo Missa est verum Sacrificium vel non? si est, quare Confessionistæ Luthe-



rani non celebrant? si non, quare in Confessione sua retinent? Inconstantia doctrinæ signum est erroris; aliud verbo docent, aliud facto. *Dicent*: Nomine *Missæ* à se intelligi *Cœnam*. *Contra est*: Nomine *Missæ* à Statibus Imperii tunc intelligebatur & in controversiam veniebat Sacrificium, quod hodie celebrant Catholicis; vel ergo Confessio sic intellexit, vel fraudulenter egit.

V. Lutherus ipse *Tom. 3. Jenens. fol. 270.* tradit formulam Missam celebrandi, sive, ut vocat Missam & Cœnam sumendi: ergo Missam à Cœna distinguit. Pro ritu Missam celebrandi ponit *Introitum, Kyrie, Gloria, Collectas, Epist. Graduale, Evangelium, Symbolum Nicæn. Preparationem panis & vini, Præfationem, Consecrationem, Elevationem, Sanctus, Pater noster, Communionem, Benedictionem.* Paramenta vult esse arbitraria. Ritus iste, paucis mutatis, est Catholicus; sumpsit enim Lutherus fermè totum, qui in Missali Romano. Juxta ritum illum Lutherani alicubi, ut in Saxonia, Missam celebrant, vel saltem celebrârunt; alibi non.

Ex his ad Lutheranos formo quæstiones: Si Missa non sit institutum à Christo Sacrificium, cur Lutherus eam à Cœna distinguit, Lutherani Confessionistæ retinent? ad quid ritus celebrandi, Consecratio, & Elevatio? vel enim peractâ Consecratione adient Corpus & Sanguis Christi, vel non? si non: ergo Consecratio est scenica & falsâ, nihilque elevatur, nisi

nisi panis & vinum ; si adiunt : ergo offeruntur Deo , ut intendit Ecclesia iuxta institutionem Christi , & verum habetur Sacrificium ; postea sequitur Communio seu Cœna , quæ non est Sacrificium , sed Victimæ sumptio : sicut in Veteri Testamento Sacrificium non fuit ipsa rei consumptio vel destructio , sed prævia oblatio. Hinc

*Collige :* Apud Catholicos ritum esse Sacrificii & verum Sacrificium ; apud Lutheranos nudum ritum Lutheri , nudum panem & vinum ; hoc si nolint , sentiant cum Catholicis & primæva Christi Ecclesia.

### Objectiones Acatholicæ.

**I** Eucharistia sumitur : ergo non est oblatio. *R. Luther. Tom. 2. Jeronf. fol. 22. R. N. Conf.* Offeritur juxta verba : *Hoc facite in meam commemorationem* : postea sumitur juxta verba : *Accipite & manducate*. Non in sumptione consistit Sacrificium , sed prævia Consecratione.

*Inst.* Sacrificium non debet comedi ab hominibus. *R.* Quid prohibere ? In Veteri Testamento comederatur agnus paschalis & ex parte alia Sacrificia.

**II.** Ad *Hebr. 9.* Christus semel oblatus est. & *cap. 10.* Una oblatione consummavit in sempiternum sanctificatus : ergo non debet amplius offerri. *R. D. Conf.* Non debet amplius offerri modo cruento. *C. inuenio N.* Sacrificium Crucis est infiniti & infiniti valoris ad redemptionem nostram

stram & peccatorum remissionem; per Sacrificium tamen Missæ, sicut & per Sacramenta, pretium ejus nobis applicari debet; vel dicant Adversarii, ad quid Baptismus, Coena, fides justificans &c.?

III. *Sine Sanguinis effusione non fit remissio. Hebr. 9.* ergo non per Sacrificium incruentum. *R.* Retorq. & contra te infero: ergo etiam non per fidem justificantem. *Dicis:* per hanc fieri dependenter à Sacrificio Crucis; *Dico:* sic etiam fieri per Sacrificium incruentum; hoc quatenus propitiatorium non remittit peccata immediate, sed mediatè, conferens gratiam ad obtinendam poenitentiam; quatenus verò satisfactorium delet immediate poenas pro peccatis dimissis adhuc debitas, adeoque rectè offertur pro defunctis.

IV. Eucharistia est Sacramentum: ergo non Sacrificium. *R.* Ubi scriptum, quòd Sacramentum sit & non Sacrificium? utrumque est: Sacramentum, quatenus est signum efficacie gratiæ; Sacrificium, quatenus offertur Deo in protestationem supremi illius dominii.

V. Missa in Papatu est ad quæstum Simoniacum. *Luther. citat. R.* Ministri Acatolici accipiunt pro exequiis, baptizatiõne, absolutiõne, aliisque Ministeriis; an ideo hæc ad quæstum? Sacerdotes celebrantes non accipiunt quidquam tanquam premium pro Missa, sed alii qui stipendium aliquod pro labore extrinsecus expensis & in sustentationem, idque permittunt

sum 1. Corinth. 9. Nescitis, quoniam qui Altari deser-  
viunt, cum Altari participant? & ibid. vers. 11. Si nos  
vobis spiritualia seminavimus, magnum est, si nos carna-  
lia vestra metamus? q. d. non

## CONTROVERSIA VIII.

### De Confessione Sacramentali.

**D**Octrina Acatholica: In dem Sacrament  
der Buß, wo ein Priester nicht furhanden  
ware, thut eben so viel ein jeglicher Christen-  
Mensch, ob er gleich ein Weib oder Kind wäre.  
Luther. artic. 13. Tom. 1. Jenens. fol. 4:5. En,  
quam faveat suæ Catharinæ de Bore ex Moniali  
putatitæ Uxori ac prolibus suis spuris! imò &  
Judæis favet, etenim mulierem vel puerum ab-  
solvere posse rationem, addit loc. citat. Wann  
das Sacrament der Tauffe zur Noth mag ein  
Weib und Kind geben, wie täglich geschieht,  
warum soll nicht auch gemein seyn das Sacra-  
ment der Schlüssel oder Absolution? Subsumo;  
atqui Judæus in necessitate baptizare potest:  
ergo & absolvere. Item Luther. artic. 12. docet:  
Wann ein Priester leichtfertig oder scherzend je-  
mand absolviert, so er doch glaubt, er sene absol-  
viert, so ist er gewißlich absolviert. Quæso?  
Absolutio vel efficit aliquid vel non? si non,  
ad quid illa? si efficit, certè absolutio jocosa &  
putata, quia nulla, non plus agit, quàm nulla,  
quæ nihil. Putare nihil ponit in re. Lutherus  
Tom. 3. Jenens. fol. 514. putat se Deum; an idem  
est?

est: absit: Deus, qui Lucifero similis. Denique Confessio Augustana artic. 4. de Confessione sonat: *Confessio apud nos non est abolita, & infra: Enumeratio delictorum non est necessaria.*

### DOCTRINA CATHOLICA:

*Confessio peccatorum mortalium post Baptismum commissorum, quæ memoriæ occurrunt, est de jure divino.*

**P**rob. I. Christus Apostolis, eorumque Successoribus dedit potestatem remittendi peccata & retinendi Joam. 20. dicens: *Quorum remiseritis peccata, remittuntur eis, quorum retinueritis, retenta sunt. Infero 1. Ergo Sacerdotibus data est potestas absolvendi, adeoque contra Lutherum absolvere nequit mulier vel puer. 2. Ergo tunc instituta est distincta peccatorum Confessio: quomodo enim Sacerdos remittere potest peccata vel retinere, si ea non sciat? quomodo sciet, si poenitens non confiteatur?*

II. Præcipitur Jacobi 5. *Confitemini alterutrum peccata vestra: ergo præcepta est peccatorum Confessio, & quædam Sacramentalis ad obtinendam remissionem, quia subditur: ut salvemini. 1. Joam. 1. si confiteamur peccata nostra, fidelis est & justus, ut remittat nobis peccata nostra: ergo peccatorum remissionem præcedere debet eorum Confessio.*

III. Distincta peccatorum Confessio fuit in usu primis jam sæculis, ut testantur S. Clement



mens D. Petri Discipulus *Epist. ad Fratr. Dom. S. Cyprianus serm. 5. de Lapsis. S. Hieron. ad cap. 16. Matth.* Alique; vel dicant Adversarii, quando inceperit? Audian: S. Augustin. *lib. 2. de visitat. infirm. cap. 5.* Non te pudeat coram uno dicere, quod te non puduit forsitan coram multis & cum multis facere . . . revela Sacerdoti vias tuas & ipse tibi exhibebit Antidotum reconciliationis. Item Ecclesia vel Papa in obligatione distinctè confitendi nunquam dispensavit, nequidem cum Imperatoribus, Regibus, Cardinalibus vel Episcopis: ergo signum est, quod obligatio hæc sit juris divini.

IV. Lutherus *Tom. 3. Jenens. fol. 276.* ait: Von der heimlichen oder Ohren-Beicht vor der Communion halte ich noch, daß sie weder noth. ist, noch gefordert soll werden, doch nutz und mit nichten zu verachten: ergo utilis est Confessio auricularis, & bene faciunt Catholici eam frequentantes, malè Acatholici eam cavillantes. Item *Tom. 1. Jenens. fol. 413.* ait: Man soll die Leute nicht treiben alle ihre Sünd zu erforschen, und sie lassen beichten, die ihnen zur Zeit einfallen, oder bewußt seyn. Item habet *Catechismus minor Lutheri*: Für dem Beicht-Vatter sollen wir allein die Sünde bekennen, die wir wissen und fühlen im Herzen: ergo ex Lutheri sententia etiam necessaria est Confessio peccatorum, quæ memoriæ occurrunt.

Obje-

*Objectiones A catholicæ.*

I. S<sup>olus</sup> Deus potest dimittere peccata : ergo Sacerdotes solum nunciant esse remissa, ad quod non requiritur Confessio. *R.* Solus Deus potest dimittere peccata autoritate propria, Sacerdotes possunt delegata, quam dedit Christus *Juan. 20.* his verbis : *Quorum remiseris peccata, remittuntur &c.* remittere autem peccata non est nunciare, esse remissa.

II. Distincta peccatorum Confessio est impossibilis ; delicta enim quis intelligit, nisi Deus ? *R.* Confessio peccatorum post diligens examen memoriæ non occurrentium est impossibilis *C.* occurrenti *m.* *N.* Ultima est sub obligatione, non prior.

III. Christus absolvit Magdalenam sine prævia Confessione specifica. *R.* Sciebat ille peccata sine Confessione, at non sciunt Sacerdotes.

IV. Sola contritio justificat sine Confessione : ergo etiam absolutio. *R.* *N. Conf.* Contritio justificat extra Sacramentum, ubi non requiritur Confessio, nisi in voto, quatenus contritus paratus esse debet ad servandum omnia præcepta, adeo que etiam ad præceptum Confessionis ; absolutio verò non justificat, nisi in Sacramento Pœnitentiæ, ad quod requiritur Confessio tanquam pars.

V. Præceptum Confessionis incepit in Concilio Lateran. sub Innocentio III. ergo non est divinum. *R.* Incepit ibi præceptum Confessionis

Confessionis simpliciter, quod Divinum *N.* annuæ, quod Ecclesiasticum *C.* Similiter à Nectario Patriarcha Constantinopolitano abrogata non fuit Confessio abfolutè, sed folùm publica, quæ tunc erat in ufu.

## CONTROVERSIA IX.

*De Indulgentiis.*

**D**Octrina Acatholica: Abtaß dienet nicht abzulegen die Straf oder Pein. Luther. artic. 19. Tom. 1. *Jenens.* fol. 421. cui petra scandali & lapis offensionis fuerunt Indulgentiæ à Leone X. pro bello contra Turcas feliciter gerendo concessæ; cùm enim earum promulgationem Albertus Archi-Episcop. Moguntin. commisisset Ordini Prædicatorum, Lutherus ex Ordine Eremitarum S. Augustini, qui Indulgentias *Cruciata* ante habuerat promulgandas, id ægrè ferens contra Indulgentias prædicavit, eo successu, quod factus sit Apostata & Hæresiarcha. Pro Doctrina Catholica

*Nota 1.* Quando remittitur peccatum, remitti quidem semper pœnam æternam culpæ mortali debitam, remanere tamen sæpe pœnam temporalem per modum satisfactionis Deo vel in hac vel in altera vita præstandæ. Patet (1.) Exemplo Adami, Davidis & aliorum, qui post dimissa peccata fuerunt puniti. (2.) Ex verbis Christi ad Magdalenam *Luc. 7.* Remittuntur ei peccata multa, quoniam dilexit multum; cui autem minus dimit-

*dimittitur, minus diligit.* Minus diligenti alicui minus dimitti non de reatu culpæ, quia unum peccatum mortale non dimittitur sine alio, sed de reatu poenæ; de qua quandoque plus, quandoque minus dimitti potest, & *justa verba citat.* Christi dimittitur.

*Nota 2.* Indulgentiam in præfenti esse Remissionem poenæ temporalis pro peccatis jam remissis adhuc debitæ, quæ sit extra Sacramentum per applicationem satisfactionis Christi & Sanctorum ex Thesauris Ecclesiæ. Thesaurus ille sunt satisfactiones Christi; item: Opera satisfactoria Sanctorum ipsis non necessaria; item: Preces & Sacrificia nulli applicata vel incapaci; hæc omnia, ut non sint absque fructu, utque sit communio inter fideles unum Corpus mysticum constituentes, integrant Thesaurum Ecclesiæ, qui distribuitur à Summo Pontifice vel aliis Prælatiis concedendo Indulgentias, de quibus

## DOCTRINA CATHOLICA:

*Datur in Ecclesia potestas Indulgentiarum.*

**P**ROB. I. Christus dixit Petro & consequenter Successoribus Ejus *Math. 16.* Tibi dabo claves regni Cælorum . . . quodcumque solveris super terram, erit solutum & in cælis. Quæro: An per verba illa potestatem dederit solvendi omne, quod impedit ab ingressu cœli? si non: ergo non dedit claves regni cœlorum; si dedit: ergo

ergo dedit potestatem solvendi poenam ex peccato remanentem, quia hæc impedit ab ingressu coeli, solvitur autem per Indulgentias.

II. Datur in Ecclesia Thesaurus ex meritis Christi & Sanctorum, ut *suprà*, sicut in Republica commune ærarium: ergo etiam potestas Thesaurum illum distribuendi, quod fit per Indulgentias.

III. Ufus Indulgentiarum fuit in primitiva Ecclesia & temporibus Apostolorum; nam D. Paulus Corinthio incestuoso poenitenti aliquid donavit in Persona Christi, 2. Corinth. 2. per quam donationem intelligunt Indulgentias Ambrosius, Chrysostomus, & alii Patres. Item: Indulgentias dedit Concilium Nicanum Anno 327. Indulgentias Stationum concessit Gregorius Magnus circa Annum 590. Indulgentias variis Ecclesiis in Germania, cum eam pertransiret, dedit S. Leo III. electus Anno 795. inò Christus Ipse S. Francisco Assisii in Ecclesia Portiunculæ Indulgentias dedit pro omnibus fidelibus verè poenitentibus, quæ postea miraculis sunt illustratæ, ut testantur Annales Ordinis S. Francisci.

### Objectiones A Catholicæ.

I. **Q**Uando Christus dixit Petro: *Tibi dabo Claves regni cælorum, quodcumque solveris super terram, erit solutum &c.* tantum dedit potestatem remittendi peccata. R. N. Ass. Nam potestatem absolventi dedit omnibus Apostolis Joan 20. dicens: *Quorum remiseritis peccata, remittuntur eis;*  
h
hoc



hoc autem loco soli loquens Petro futuro Vicario suo in pascendis ovibus, ampliorem ei dedit potestatem, se extendentem ad remissionem poenæ, dicens: *Quodcunque solveris, erit solutum.*

II. Juxta Scripturam, gratis justificamur: ergo non requiritur aliqua satisfactio, nec Indulgentia extra Sacramenta. R. Gratis justificamur, non quasi opera bona non requirantur, ait enim Scriptura *Matth. 3. Poenitentiam agite. Isa. 45. Convertimini ad me. 1. Joan. 3. Qui non diligit, manet in morte &c.* sed gratis, quatenus contritio, dilectio & alia opera nostra ad justificationem obtinendam fundantur in gratia, gratis acceptantur & non sufficiunt opera ex solis naturæ viribus.

III. Satisfactio Christi omnibus peccatoribus non tantum à peccatis, sed etiam à poenis liberandis est sufficiens: ergo. R. Est sufficiens, sed efficaciam non habet, nisi applicetur vel per Sacramenta, vel per Indulgentias. Christus omnibus meruit gloriam, an ideo omnes salvantur? *Qui redemit te sine te, non salvabit te sine te.*

IV. Sancti in cœlo habent gloriam pro bonis operibus suis: ergo hæc non sunt reposita in Thesauro Ecclesiæ, ut dispensentur aliis. R. Habent gloriam pro bonis operibus quâ meritis C. quâ satisfactionibus N. Opera poenalia & satisfactoria Sanctorum in cœlo, quibus non indiguerunt, & piorum in terra, quibus

bus non indigent, aliis indigentibus dispensantur, alias futura absque remuneratione.

V. *Matth. 18.* ait Christus: *Omne debitum dimisi tibi. quoniam rogasti me:* ergo non remanet poena per Indulgentias tollenda. R. Non remanet semper C. non unquam N. Cui minus dimittitur, minus diligit, *Luc. 7.* ergo non semper dimittitur totum. Demum

*Sciendum* 1. Indulgentias gratis concedi, ut patet ex Bullis: unde pecunia nunquam datur pro Indulgentiis, sed quandoque pro Bullæ expeditione, aliisque sumptibus. 2. Si concedantur Indulgentiæ non plenariæ, v. gr. 100. dierum non remitti 100. dies de purgatorio, sed tantum, quantum remitteretur, si quis si biret poenitentias 100. dierum juxta antiquos Canones.

## CONTROVERSIA X.

### De Purgatorio.

**D**Octrina Acatolica: Niemand ist schuldig zu glauben, daß ein Fegefeuer seye, Dr. Luther. *Tom. 2. Jenens. fol. 208.* Adm. *Tom. 1. fol. 431.* his verbis: Ich habe das Fegefeuer noch nie geläugnet, halte es auch noch, wie ich vielmal geschrieben. Catholici nomine Purgatorii intelligunt locum, in quo animæ, de hoc mundo cum peccatis levibus decedentes, aut poenis temporalibus ob peccata com. & remissa sol-

vendis obnoxix purgantur ; donec purgata transferantur ad cœlum. De hoc est

## DOCTRINA CATHOLICA :

### *Datur Purgatorium.*

**P**ROB. I. Judas Machabæus curavit offerri Sacrificia pro occisis militibus, quod approbans Sacer Textus 2. *Machab.* 12. subdit: *Sancta & salubris est cogitatio pro defunctis exorare, ut à peccatis solvantur ; ergo datur Purgatorium : non enim orationes fiunt pro existentibus in inferno, quia juvari nequeunt ; neque pro Sanctis in cœlo, quia juvari non indigent.*

*Respondent Adversarii :* Libros Machabæorum non esse Canonicos. *Contra est,* quod duos priores esse Canonicos definiêrit Concilium Carthaginense III. cui subscripsit D. Augustinus. Et datò, non esse, saltem Lutherani, ponentes eos in Codice Bibliorum, admittent tanquam veros Historicos & fidem non negabunt, in Veteri Testamento Populum Judaicum orasse pro defunctis ; si autem pro illis oraverit populus ille tunc electus, cur non oremus & nos ?

II. *Matth.* 12. dicit Christus : *Qui autem dixerit contra Spiritum Sanctum non remittecur ei, neque in hoc seculo, neque in futuro : ergo supponitur dari peccata, quæ in altero sæculo remittuntur.*

III. In antiquissimis Liturgiis Apostolorum ab Ecclesia approbatis, & antiquo Missali Romano extant orationes pro defunctis & perpetuò

peruò in Ecclesia sunt factæ, vel ostendant Adversarii, quando inceperint. Sancti quondam petierunt preces post mortem; sic S. Monica S. Augustini Mater ad circumstantes dixit moritura: *Tantum vos rogo, ut ad Altare Domini memoritus mei.* Augustin. lib. 9. Confess. cap. 13. Anima quondam ex purgatorio apparuerunt penitentes suffragia; sic refert S. Gregorius Magnus aliquæ Scriptores omni exceptione majores. Ex quibus infero: ergo datur Purgatorium.

IV. Potest quispiam mori in statu gratiæ cum peccatis levibus, aut pœnis in satisfactionem peccatorum sustinendis esse obnoxius; quò perveniet? non ad cœlum; quia nihil coinquinatum intrabit, *Apocalyps. 21.* non ad infernum; quia est in statu gratiæ, quæ semen gloriæ: ergo ad Purgatorium.

### Objectiones Acatolicæ.

I. Nullibi in Scriptura exprimitur Purgatorium. 1. Non exprimitur quoad nomen, exprimitur quoad rem in iis locis, ex quibus colligitur, ut *suprà*.

II. Duo tantùm sunt status, in quibus homines post mortem collocantur; quia dicitur *Eccles. 12. Si ceciderit lignum ad Austrum, aut ad Aquilonem, in quocunque loco ceciderit, ibi erit.* 2. Duo tantùm sunt status, cœlum & infernus, in quibus homines collocabuntur æternaliter post ultimum judicium; tertius status, Purgatorium, est ad tempus, & comprehenditur sub

*Aufro in loc. citat.* nam animæ in Purgatorio sunt in statu beatitudinis obtinendæ.

III. Duo tantum sunt hominum genera, unum piorum ac fidelium, alterum impiorum & infidelium; illis Christus assignat coelum, his infernum, nullis purgatorium. R. Duo sunt præfata genera, sed cum divisione; nam piorum & fidelium aliqui habent peccata levia vel poenas adhuc sustinendas, alii verò non; hi ibunt in vitam æternam sine purgatorio, priores per illud.

IV. *Ezech. 18.* Si impius egerit penitentiam, omnium iniquitatum ejus non recordabor. R. Deus post poenitentiam non recordatur iniquitatum quoad poenam æternam C. quoad temporalem & aliquam satisfactionem N.



## CAPUT V.

Reliquæ Controversiæ, quæ sunt  
hujus temporis.

### CONTROVERSIA I.

#### De libero Arbitrio.

**D**octrina Acatholica: Der freye Wille nach dem Fall Adâ ist ein eutler Nahme; und wann er thut das seine, so sündet er tödtlich. Dr. Luther. artic. 36. Tom. 1. *Re-nens. fol. 449.*



Liberum arbitrium in homine est Voluntas cum indifferentia contradictionis & contrarietatis ad operandum. De hoc

## DOCTRINA CATHOLICA:

*Datur in homine lapsa liberum arbitrium, etiam respectu actionum moralium.*

**P**Rob. I. Ex Script. Eccl. 31. *Beatus vir . . . qui potuit transgredi & non est transgressus, facere mala & non fecit.* Et cap. 15. *Ante hominem vita & mors, bonum & malum, quod placuerit ei, dabitur illi.* Consequens ponit S. Augustin. de grat. & libero arbitr. cap. 3. inferens: *Ecce apertissime videmus expressum liberum humane voluntatis arbitrium.*

II. *Ratione*: Si homo careret libero arbitrio, necessario faciens, quæ facit, frustra essent leges & præcepta; item: actibus bonis homo non mereretur præmium, nec malis supplicium; etenim certò frustra præcipitur, aut prohibetur, ut fiat vel non fiat, quod necessario fit, aut non fit. Item: nullus meretur præmium propter factum, quod non potuit non facere; nec justè potest quis puniri propter factum, quod non potuit omittere.

*Respondent*: ut homo peceet, sufficere libertatem à coactione. *Contra*: Ergo amens peccabit aliquem occidendo, eritque supplicio afficiendus. Qui liber est à coactione, non item à necessitate, equidem ad malum non cogitur,

tamen non potest non facere ; si non possit non facere , est sine culpa.

III. Appello ad confessionem cujuslibet de experientia ; Quis non experitur , quod dormire possit vel non dormire , manducare , ludere , quando & quomodo placet ? certè quilibet : ergo datur liberum arbitrium circa actiones naturales. Qui non experitur , quod malum facere possit vel omittere , poenitentiam agere vel differre &c. ? certè quilibet ; unde & Sacra Scriptura precipit , prohibet &c. ergo datur liberum arbitrium , etiam circa actiones moraliter bonas & malas : ad has tamen non negamus requiri gratiam Dei , sed solùm , per gratiam tolli libertatem.

#### *Objectiones Acatholicæ.*

**N**on sumus sufficientes cogitare aliquid ex nobis quasi ex nobis , sed sufficientia nostra ex Deo est , 2. Corinth. 3. Item Deus est , qui operatur in vobis & velle & perficere , Philipp. 2. ergo. 13. N. Conf. Textus allati solùm probant , quod soli sinè Dei gratia non possimus operari meritorie ad salutem , idque definit Concilium Tridentin. Sess. 6. cap. 3. Gratia autem non necessitat , imò vacua esse potest , homine resistente : sicut . tametsi homo nihil possit in naturalibus sinè concursu Dei generali , eo tamen non obstante , homo adhuc liberè operatur vel non operatur.

II. S. Augustin. in Enchirid. cap. 30. dicit : Homo male utens libero arbitrio , & se & ipsum perdidit.

B2. Per-

R. Perdidit quoad substantiam N. quoad facilitatem ad bonum C.

## CONTROVERSIA II.

### De Prædestinatione.

**D**Octrina Acaholica: Si non possumus rationem assignare, cur suos (nempe electos) Deus misericordia dignetur, nisi quoniam illi ita placet; neque etiam in aliis reprobatis aliud habebimus, quàm ejus voluntatem. Ita Calvin. lib. 3. Institut. cap. 22. §. 11. Idem asserit cap. 23. §. 1. Minime consentaneum est, præparationem ad interitum aliò transferre, quàm ad arcanum Consilium Dei. Unde Doctrina est Calviniana: 1. DEum ab æterno quibusdam hominibus præordinasse vitam æternam, aliis damnationem, nullis prævisis & meritis eorum meritis aut demeritis, sed solo suo beneplacito ac voluntate. 2. Cum voluntas Dei sit immutabilis & efficax, volunt, hominem in negotio salutis carere libero arbitrio: ita, ut prædestinari à Deo destinentur & prædeterminentur ad bonum, propter quod salvantur, reprobi ad malum, propter quod damnantur; idque agant necessario acti & adacti à Deo, perinde ac agitur globus à ro ante, secus à secante, lutum à figulo. Ante Doctrinam Catholicam

*Nota:* Prædestinationem esse actum divinæ voluntatis, quo creaturæ aliquæ rationales ab æterno efficaciter sunt præordinatæ ad gloriam: Reprobationem esse destinationem ad gehennam.

## DOCTRINA CATHOLICA I.

*Admittenda est Prædestinatio &  
Reprobatio.*

**P**ROB. I. *Ex Script. Romanor. 8. Quos prædestinavit, hos & vocavit &c. Eccles. 9. Multi reprobi facti sunt.*

II. Quidquid Deus agit in tempore, decrevit ab æterno, quia immutabilis; sed in tempore aliquos assumit ad gloriam, alios mittit in gehennam: ergo id ipsum decrevit ab æterno.

## DOCTRINA CATHOLICA II.

*Prædestinatio facta est propter merita, Reprobatio propter demerita.*

**I**ntellige: Nullus prædestinatus est; saltem quoad executionem, ad coronam gloriæ, nec eam accipiet, nisi propter Justitiam finalem; & nullus destinatus est ad gehennam ignis, nec mittetur in eam, nisi propter peccatum finale.

I. Nullus accepturus est coronam gloriæ, nisi propter merita: Tum quia Deus reddet unicuique secundum opera ejus, *Roman. 2. Dicit Christus: Venite benedicti . . . esurivi enim &c.* Tum quia beatitudo dicitur *Mercies, Matth. 5. Corona Justitia, 2. Timoth. 4. Denarius diurnus, Matth. 20. Bravium, 1. Corinth. 9. Merces autem datur laborantibus, corona certantibus, denarius operariis, bravium currentibus & comprehendentibus.*

II. Nul-

I.

destina-  
reprobi, de  
ed in  
alios  
crevit

II. Nullus destinatus est ad gehennam ignis, nec mittetur in eam, nisi propter demerita; Tum quia Deus omnes homines vult salvos fieri, 1. *Timoth. 2.* puta, quantum est ex parte Dei: ergo non vult quemquam damnari non prævis demeritis; aliàs vellet omnes salvos fieri & non vellet. Tum quia Deus de facto neminem condemnat, nec condemnare potest ad ignem æternum, nisi demeritis positis; quia justus est, ut inquit S. Augustin. *lib. 3. contra Julian. cap. 18.* ergo nec vult condemnare, nisi illis prævisis.

II.

Re

 Item  
oriz,  
alem;  
, nec  
male.  
oriz,  
et uni-  
Chri-  
Tum  
Corona  
th. 20.  
labo-  
rariis  
us.  
Nul-

### Objectiones Acatolicæ.

I. **D**Eus tanquam Supremus Dominus disponere potest de creaturis suis pro libitu. R. Potest, quatenus bonitati & æquitati suæ infinitæ non repugnat, velle autem damnare innocentem, repugnare videtur.

II. *Universi propter semetipsum operatus est Dominus, impium quoque ad dnm malum, Proverb. 16. item Sapient. 12. dicitur: Cum sis justus, juste omnia disponis; eum quoque, qui non debet puniri, condemnas.* R. Primus textus loquitur de impio, cujus peccatum præviderat Deus; Secundus de afflictione temporali, quam Deus Justo ad probationem ejus, vel castigationem quandoque immittit.

III. De Jacob & Esau habetur *Romanor. 9.* Cum nondum nati essent, aut aliquid boni egissent aut mali. . . *Jacob dilexi, Esau autem odio habui.* Subditur: *Igitur non volentis, neque currentis, sed misere-*  
rentis



rentis est Dei, vers. 16. Cujus vult, misereatur, & quem vult, indurat, ibid. vers. 18. An non habet potestatem figulus luti, ex eadem massa facere aliud quidem vas in honorem, aliud in contumeliam, ibid. vers. 12. Infert Calvinus: ergo reprobos ante prævisa demerita Deus destinavit ad poenas æternas, & consequenter ad actus malos, quibus has poenas merentur. R. (1.) N. Conf. Horrendum est illarum dogma Calvini: ex eo sequitur, hominem necessario peccare, qui ad peccandum destinatus, & necessario damnari, quia decretum Dei prævium ante prævisa demerita, quod ponit Calvinus, est homini reprobo inevitabile, ejusque executio inevitabilis. Imò sequitur, non hominem peccare, sed solum Deum, qui ad actum malum impellit & prædeterminat; dicere autem Deum peccare, est ex Deo tacere demonem, quod horrenda blasphemia. R. (2.) Deus non vult mortem peccatoris *Ezech. 33.* Vult omnes salvos fieri *1. Timoth. 2.* ergo ante peccatum neminem positivè habet odio, nec positivè indurat &c. quomodo igitur? R. (3.) Textum de Jacob & Esau non loqui de electione Jacob ad gloriam, nec de reprobatione Esau, qui verisimiliter est salvatus; sed litteraliter de dilectione, quâ Jacob, ejusque posteri Judæi sunt electi in populum Dei, atque multis dotati bonis; de odio verò improprie sumpto pro minori dilectione, quatenus Esau, ejusque posteri neglecti & minus dilecti; uti sumitur *Luce 14.* ubi jubemur odisse Patrem & Matrem. Alle-

Allegoricè Textus intendit, Christianos credentes esse præpositos Judæis incredulis, filios Abrahæ secundum spiritum filios secundum carnem. Ita S. Augustin. lib. 16. de civitat. 35. Ad alios Textus

32. *Non est volentis, neque currentis* scil. plus diligere per fidem & gratiam, est tamen, cooperari gratiæ, quæ datur omnibus ad beatitudinem sufficiens. *Quem vult, indurat, puta, permissivè & indirectè.* *Facit vas in contumeliam*, similiter permissivè, idque est impius, quem peccare permittit.

### DOCTRINA CATHOLICA III.

*Prædestinatio certa est & infallibilis.*

**I**ntellige: Qui prædestinatus est, certò & infallibiliter salvabitur; qui reprobatus, certò & infallibiliter damnabitur.

Prob. I. De omnibus prædestinatis dicit Christus Joan. 10. *Vitam æternam do eis & non peribunt in æternum.*

II. Voluntas Dei est immutabilis & inimpedibilis: ergo decretum illius in negotio prædestinationis certò & infallibiliter sortietur effectum.

*Dilemma Calvinisticum:*

**A**ut sum prædestinatus, aut reprobatus? si prædestinatus, infallibiliter salvabor, benè an malè vixero; si reprobatus, infallibiliter damna-

damnabor, non juvantibus operibus bonis; quia decretum Dei efficax frustrari non potest: adeoque nihil refert, qualiter vivam. R. 1.) Negando, si prædestinatus sis, te salvandum, bene an malè vixeris; si enim prædestinatus sis, Deus decrevit, te salvandum per merita, seu bona opera, & non salvaberis, nisi habueris ea. 2.) Si infirmus sis, Deus scit & decrevit, te sanitati vel restituendum vel non; si restituendus, non opus medicinâ; si non, ad quid illa? Dices: te uti medicinâ; quia Deus decrevit te restituendum per medicinam. Dico pariter: Deus decrevit te, si prædestinatus sis, salvandum per bona opera, hæc fac & vives.

*Inst.* Esto, decreverit Deus me salvandum per bona opera, ea tamen prævidit, & ego infallibiliter operaturus sum, ad quid ergo multum desuper sum sollicitus? R. Infallibiliter quidem operaturus es ad salutem, si Deus præviderit; sed, unde scis, Deum prævidisse? hoc non sciens, cum timore & tremore operare salutem. Cave, ne operum neglectus & vita licentiosa sit causa reprobationis.

#### DOCTRINA CATHOLICA IV.

*Prædestinatio nullam prædestinato, Reprobatio nullam reprobo infert necessitatem.*

**I**ntellige: quamvis Deus ab æterno decreverit hunc salvandum per opera bona, illum damn-

damnandum propter mala; salvandus tamen liberè facit opera bona, damnandus mala. Unus infallibiliter salvatur, alter damnatur; neuter necessariò.

Prob. I. Deus decrevit aliquos salvandos, alios damnandos, postquam prævidit horum opera mala, istorum bona, utraque liberè ponenda: ergo in tempore liberè ponuntur; sicut enim Deus res fieri decrevit & prævidit, ita fiunt.

II. Si prædestinatio necessitaret ad opera bona, reprobatio ad mala: hæc non essent peccata, illa non essent merita; quia peccatum & meritum petunt esse libera: si autem peccata & merita non essent, prædestinatus salvaretur sinè merito, reprobus damnaretur sinè peccato; hoc falsum est: ergo prædestinatio non necessitat.

### Objectiones A catholicæ.

I. **Q**uidquid Deus præscit futurum, est certò & infallibiliter futurum: ergo necessariò; atqui præscit omnia, quæ facturi sumus: ergo. *R. N. Seq. Maj.* Quod Deus præscit futurum, est certò & infallibiliter futurum, quia præscientia Dei est infallibilis; non tamen est necessariò futurum, quia futurum est ex libera determinatione hominis, qui potuisset se non determinare.

II. Quod Deus præscit, non potest non fieri: ergo fit necessariò. *R. Non potest non fieri*

fieri potentiâ antecedente liberam determinationem *N.* consequente *C.* Sedens non potest non sedere, sedet tamen liberè, quia liberè se determinavit.

III. Ergo prædestinatus poterit damnari. *R. N. seq.* Prædestinatus sinè necessitatione infallibiliter operabitur salutem.

IV. Decreto Dei nemo potest resistere: ergo, quæ Deus decrevit in negotio Prædestinationis, sunt necessariò. *R. N. Conf.* Postquam voluntas humana se determinavit v. gr. ad peccatum, nequit resistere decreto Dei, quo vult concurrere ad actum illum; potuisset tamen decretum illud impedire, si ad peccatum sese non determinasset: ergo, quod decretum sit & impleatur, est originative à libera voluntate hominis.

#### *Corollarium ad hominem.*

**D**E Prædestinatione noli esse anxius; scias: Deus omnes homines vult salvos fieri, 1. *Timoth.* 2. Neminem damnat nisi propter peccata; peccatum gratiâ Dei vitare potes, vitare, & non damnaberis: Neminem salvat nisi per opera bonâ; bonum gratiâ Dei operari potes, operare, per opera bona certam tuam vocationem & electionem facias 1. *Petri* 2. & salvaberis.



## CONTROVERSIA III.

*De observatione Præceptorum Dei.*

**D**OCTRINA A catholica: Keiner halt dieses (nemlich das vierte) und andere Gebott, es kans auch niemand halten. Dr. Luther. in *Explicat. Decalogi* Tom. 4. Jenens. fol. 522. *De præcepto: Non machaberis*, dicit fol. 526. Dieß Gebott ist ein Lafter-Büchlein und ein Schand-Titel, schilt uns alle, niemand aufgenommen, daß wir Huren-treiber sind, ob wirs gleich nicht für der Welt of-fentlich sind, so sind wirs doch im Herzen. De-mum concludit fol. 532. Also haben wir die Zehen Gebott, die uns alle zu Schand und Bu-ben machen für Gott. Darum darff sich keiner berümen, daß er fremm sey für Gott, sondern muß bekennen, daß er an allen Gebotten schul-dig sey, wie sie lauten. Viderint ergo Lutheri atleclæ, quomodo non sint Idololatæ, homi-cidæ, fures, adulteri, scortatores &c.

## DOCTRINA CATHOLICA:

*Præcepta Decalogi ab homine servari possunt  
& debent.*

**I**ntellige 1. Servari posse tam perfectè, ut ho-mo non peccet saltem mortaliter, possitque salvari. 2. Requiri auxilium gratiæ, ut obser-vatio præceptorum prolit ad beatitudinem, non sufficientibus ad hanc solis viribus liberi arbitrii. Doctrina Catholica

Prob. I.

Prob. I. *Math. 19.* Unus accedens ad Jesum ait: *Magister bone, quid boni faciam, ut habeam vitam æternam?* cui dixit: *Si vis ad vitam ingredi, serva mandata:* ergo servari possunt. Servaverunt Apostoli, ut testatur Christus *Joan. 17.* servaverunt Sancti: ergo & nos servare possumus.

II. Vel homo tenetur servare mandata Dei, vel non? si non: ad quid illa? si tenetur: ergo sunt observatu possibilia; nemo enim ad impossibile tenetur. Unde S. Hieronymus *lib. contra Pelag.* ait: *Fatemur possibilia Deum mandasse, ne ipse author Injustitia sit, si exigit fieri, quod fieri non potest.*

*Respondent:* Hominem suâ culpâ, nempe per peccatum originale, observationem mandatorum Dei sibi fecisse impossibilem: adeoque adhuc peccare non observando, sicut peccat non solvendo, qui solutionem fecit impossibilem. *Contra:* Per peccatum originale observatio mandatorum Dei quidem facta est difficilis, sed non impossibilis; quod si facta esset impossibilis, homo peccasset causando impossibilitatem, non peccaret non observando, quando non potest, & stante impossibilitate obligari non posset. Si cuius propriâ culpâ fregisset tibiâ, possétne à Principe suo obligari ad currendum? fractionem tibiæ punire posset Princeps, ad cursum non obligare.

## Objectiones Acatholicæ.

I. **S.** Petrus dixit *Actor. 15.* Quid tentatis imponere jugum super cervices discipulorum, quod neque Patres nostri, neque nos portare potuimus. *R.* Textum loqui de Legalibus Moisaicis; cum enim quidam discipulorum putarent totam Legem Moysis Genibus conversis esse servandam, habitum est ea super re primum Concilium, in quo Petrus decidit, Legem Cæremonialem non amplius esse servandam, quæ ab antiquis difficulter servabatur, non verò jugum erat simpliciter importabile.

II. **S.** Paulus fatetur *Romanor. 7.* Velle adjacet mihi, perficere autem bonum non invenio. *R.* Loquitur de concupiscentia carnis adversus spiritum: quamvis eâ perfectè liberari non potuerit ipse, sicut & nos, amittâ Justitiâ originali, non possumus; hæc tamen peccatum in eo non erat, neque est in nobis, si non adsit consensus: quia non nocet sensus, ubi non est consensus.

III. Si dixerimus, quoniam peccatum non habemus, ipsi nos seducimus & veritas in nobis non est. *1. Jo. an. 1.* ergo Legem nemo potest totam servare. *R.* *D. Conf.* Ne no potest viribus naturæ & ad longum tempus *C.* viribus gratiæ *Subd.* non potest esse absque peccato mortali *N.* absque omni veniali, iterum *Subd.* non potest esse per auxilia gratiæ ordinaria *C.* extraordinaria *N.* Solum vult Scriptura hominem ordinariè non vivere absque omni peccato veniali, unde *Proverb. 24.* Septies cadit justus.

IV. De corde exeunt cogitationes mala, homicidia, adulteria, fornicationes, furta &c. *Matth. 15.* ergo, tametsi nonnulli exterius abstineant timore gladii, interius tamen in corde omnes sunt prævaricatores. *Luther. citat. R.* Peccata illa exeunt de corde omnium *N.* aliquorum *Subd.* liberè *C.* necessariò *N.* Omnes quidem homines præcepta Decalogi transgredi possunt, non tamen omnes transgrediuntur, saltem non omnia; & si transgredierentur, peccarent potentes non transgredi.

#### CONTROVERSIA IV.

##### *De observatione Præceptorum Ecclesiæ.*

**D**Octrina Acatholica: Es ist gewiß, daß der Pabst gar nicht Macht hat, noch die Kirche, zu setzen Gebott der Sitten oder guten Werke. *Luther. artic. 37. Tom. 1. Jenens. fol. 425.* idem docet *fol. 385.* In unserer Willkühr steht, Menschen Gesetz zu folgen oder nicht zu folgen, wir seynd auch nicht schuldig, sie zu halten. *Sed paulò antè fol. 166. aliter:* Der Einnigkeit sollen wir acht nehmen, und bey Leib nicht widerstreben den Päpstlichen Gebotten. & *infra:* Dem Heiligen Römischen Stuhl sollte man in allen Dingen folgen. *Ecce, quàm inconstans!*

## DOCTRINA CATHOLICA:

## Præcepta Ecclesiæ sunt observanda.

**P**Rob. I. Deus præcepit obedire Ecclesiæ & Summo Pontifici: ergo præcepta Ecclesiastica sunt observanda. *Prob. Ant. Ex Vet. Testam. Deuteronom. 17. Qui superbiërit, nolens obedire Sacerdotis imperio, qui eo tempore ministras Domino Deo tuo, morietur homo ille. Ex Nov. Testam. Matth. 15. Si Ecclesiam non audierit, sit tibi sicut Ethnicus & Publicanus. Et Romanor. 13. Subditi estote non solum propter iram, sed etiam propter conscientiam.*

**II.** Apostoli *Actor. 15.* præceperunt Gentibus conversis abstinere ab immolatis simulachrorum & sanguine & suffocato. Ecclesia & Summi Pontifices primis temporibus varia dederunt præcepta & decreta morum, ut patet ex Jure Canonico. Jejunium quadragesimale cepit per Traditionem Apostolicam, quis enim alius instituit? ergo Ecclesia & Summi Pontifices possunt præcipere. Primi Christiani præcepta Ecclesiæ habuerunt, habentes observaverunt, & bene; cur non & nos? Audiant refractarii hæretici S. Paulum *Romanor. 13. Qui potestati resistit, Dei ordinationi resistit; qui autem resistunt, ipsi sibi damnationem acquirunt; atqui illi potestati Ecclesiasticæ, consequenter Dei ordinationi resistunt: ergo damnationem acquirunt.*



## Objectiones Acatolicæ.

**I**D Euteronom. 12. ait Dominus: *Quod præcipio tibi, hoc tantum facito, non addas quidquam, nec minus: ergo non sunt addenda præcepta Ecclesiæ.* R. N. Conf. Deus solum inhiuit, præceptis suis à Judæis aliquid addi ex ritu gentilium, inter quos vixerant in Aegypto; in Legge autem Nova præcepit obedire Ecclesiæ & Præpositis, adeoque præcepta eorum servari.

II. Christus Marci 7. ait: *In vanum me colunt, docentes doctrinas & præcepta hominum.* R. Loquitur de Phariseis & Scribis; qui relinquentes mandatum Dei tenebant traditionem hominum. Vide locum citat.

Matth. 15. docet Christus: *Non quod intrat in os, coquinat hominem.* & Lucæ 10. ait: *Manducate, quæ apponuntur vobis.* 1. Cor. 10. docet Apostolus: *Omne, quod in Macello vanit, manducate, nihil interrogantes propter conscientiam: ergo præcepta jejuniorum non ligant.* R. Ad 1.) Quod intrat in os, non coquinat, si sumatur phyticè & materialiter C. si formaliter, quatenus prohibitum N. aliàs nec potum coquinaſſet Evam. Ad 2.) Christus monet discipulos, ut cunctes in mundum & prædicantes, sint contenti cibis appositis: non vult, ut manducent prohibitos; aliàs Apostoli Act. 15. frustra præcepissent abſtinentiam ab immolatis simulachrorum & sanguine & suffocato. Ad 3.) Docet S. Paulus Corinthios, quod carnes in Macello ſecurè emere & manducare poſſint, non obligati in conſci-

scientia interrogare, an fuerint idolis immolata, quæ prohibita *Actor. 15.*

## CONTROVERSIA V.

*De bonis Operibus.*

**D**octrina Acatholica: Ein frommer Mensch sündiget in allen guten Wercken. Dr. Luther. *artic. 31. Tom. 1. Jenens. fol. 427.* Ein gut Werk aufs allerbeste gethan, ist dannoch eine tägliche Sünde. Idem Luther. *artic. 32. fol. 428.* ubi articulum explicans ait: Ein gut Werk auf das beste gethan, ist eine tägliche Sünde nach der Barinbergigkeit, und eine Tod-Sünde nach dem strengen Gericht Gottes. Ex hac Doctrina impia inter varia absurda sequitur: bona opera non esse necessaria ad beatitudinem, imò impedire. Aliter sentiunt Catholici, nam est

## DOCTRINA CATHOLICA I.

*Dantur Opera ita bona, ut non  
sint peccata.*

**P**ROB. I. Sacra Scriptura imperat & suadet bona opera: ergo non sunt peccata. *Prob. Ant. ait enim 2. Petri 1. Magis satagite, ut per bona opera certam vestram vocationem & electionem faciatis; hac enim facientes non peccabitis aliquando. Isa. 1. Qui-escite agere perverse, discite bene facere.* Plures Textus si velis, aperiens Biblia ubique invenies.

II. Si quodlibet opus bonum sit peccatum, sequitur 1. esse opus bonum & non esse: esse,

ut supponitur; non esse, quia peccatum. 2. Deum præcipiendo opera bona præcepisse peccata, adeoque hæc velle. 3. Hominem faciendo opus bonum peccare, adeoque nullum opus bonum esse faciendum &c. Hæc sunt falsa, impia, absurda: ergo etiam Doctrina Acatolica, ex qua sequuntur.

## DOCTRINA CATHOLICA II.

*Bona opera adultis ad beatitudinem sunt necessaria.*

**I**ntellige (1.) de operibus moraliter bonis & meritoriis, sive procedentibus ex viribus gratiæ, non solius naturæ; unde non excludimus fidem, nec merita Christi, quasi omnem ponentes fiduciam in operibus: hæc enim sine illis nulla. (2.) De operibus cadentibus sub præceptum; non enim ad beatitudinem necessaria sunt opera supererogatoria, v. gr. vota, jejunia, cilicia, peregrinationes & similia, quæ nullibi præcipiuntur, sed vel suadentur, vel sponte suscipiuntur. De operibus sic intellectis

Prob. I. Adultus sine bonis operibus non potest obtinere beatitudinem: ergo ad eam sunt necessaria. Prob. Ant. ex Sacra Scriptura Matth. 7. dicit: Omnis arbor, quæ non facit fructum bonum, excidetur & in ignem mittetur. & infra vers. 21. Non omnis, qui dicit mihi: Domine! Domine! intrabit in regnum caelorum; sed qui facit voluntatem Patris mei, qui in caelis est, ipse intrabit. Matth. 19. Si vis ad vi-

tam ingredi, serva mandata, atque facere voluntatem Patris, qui in cœlis est, facere fructum bonum, servare mandata, &c. sunt opera bona: ergo sine his non potest obtineri beatitudo. Ad hæc

Dicunt Lutherani: Bona opera esse necessaria tantum necessitate præcepti & ratione voluntatis divinæ, non per modum meriti & medii ad beatitudinem. R. Sufficit, modo sint necessaria ad salutem. Sed tamen: ad quid à Deo præcepta, si non per modum meriti & medii? audiant: Romanor. 4. Ei, qui operatur, merces non imputatur secundum gratiam, sed secundum debitum. Beatitudo in Sacra Scriptura Matth. 5. dicitur merces: 2. Timoth. 4. Corona Justitiæ: Matth. 20. denarius diurnus: Matth. 26. Filius hominis reddet unicuique secundum opera ejus: ergo opera bona sunt ad beatitudinem necessaria non nudè necessitate præcepti, sed etiam per modum meriti & medii.

II. In ultimo Judicio Christus dicet his, qui à sinistris erunt: *Discedite à me maledicti in ignem æternum, Matth. 25.* causa subditur: *Esurivi enim, & non dedistis mihi manducare &c.* ergo damnantur, qui non faciunt opera, etsi habeant fidem. Unde & S. Jacob, cap. 2. ait: *Fratres mei, si fidem quæ dicat se habere, opera autem non habeat: nunquid fides poterit eum salvare? & infra versu 26. Fides sine operibus mortua est.*

## Objectiones Acatolicæ.

I. **F**ACTI sumus ut immundi omnes, & quasi pannus menstruatus univerſa Juſtitia noſtra, Iſa. 64. Non eſt juſtus, qui faciat bonum, & non peccet, Eccleſ. 7. ergo opera juſtorum ſunt peccata. R. Ad 1.) Prophetam loqui de Judæis pro tempore, quo propter peccata ducendi erant in captivitatem Babyloniam; pro illo juſtitias omnium (ſumendo more ſcripturistico Omnes pro multis) per peccata mortificatas dicit quaſi pannum menſtruatæ. Ad 2.) Non eſt juſtus, qui faciat bonum & non peccet in opere bono N. in alio ſaltem leviter C. & N. Conf.

II. Chriſtiani non ſunt ſub Lege; nam Romanor. 6. Non eſtu ſub lege, ſed ſub gratis. 2. Corinth. 3. Ubi Spiritus, ibi libertas. 1. Timoth. 1. Juſto non eſt lex poſita: ergo præter fidem non ſunt neceſſaria bona opera Legis. R. Chriſtiani non ſunt ſub Lege Moſaicâ C. Chriſtianâ N. Sic & R. ad Text. 1. citat. Romanor. 6. Ad 2. ubi Spiritus, ibi libertas à peccato & timore C. ab omni præcepto N. Ad 3. Juſto non eſt lex poſita coactivè, ſponte eo legem obſervante C. non directivè, lege cum dirigente N. Ant. & Conf.

III. Promiſſiones Evangelii ſunt gratuitæ: nam Tit. 3. Non ex operibus Juſtitia, qua fecimus nos, ſed ſecundum ſuam miſericordiam ſalvos nos fecit: ergo non ſunt ſub conditione operum. R. D. Ant. Sunt gratuitæ quoad elevationem & ordinationem hominis ad finem ſupernaturalem & ipſam conditionem fidei & operum, ſub qua imple-

tur



tur C. quoad consecutionem finis supernaturalis, seu vitæ æternæ N. Gratuitò Deus hominem ordinavit ad statum supernaturalem, gratuitò redemit; ast vitam non dabit, nisi positâ conditione operum: ait enim Christus *Matth. 19. Si vis ad vitam ingredi, serva mandata.*

IV. Beatitudo datur nobis gratis ex gratia & misericordia; nam *Gratia Dei vita æterna, Romanor. 6.* ergo non propter opera. R. N. Ant. ad prob. dico: Gratia Dei vita æterna formaliter N. causaliter per opera, in ea fundata C.

V. Vita æterna vocatur *Hæreditas Ephes. 5.* hæreditas autem datur sinè meritis: ergo. R. Vocatur hæreditas tantùm N. etiam merces & corona Justitiæ C. Vita æterna non datur nisi filiis Dei, & sic est hæreditas; non datur nisi operariis, & sic est merces. Unde, dum *Romanor. 8.* dicimur hæredes Dei, cohæredes autem Christi, additur: *Si tamen compatimur, ut & conglorificemur.*

VI. Inter opera nostra & gloriam sempiternam non est proportio: *Non enim sunt condigna passiones hujus temporis ad futuram gloriam, Roman. 8.* ergo hæc non datur pro operibus tanquam merces. R. Non est proportio, si opera nostra secundum se spectentur & materialiter; est tamen, si spectentur, ut procedunt ex gratia Dei, cùsque connotant acceptationem & promissionem; de illis sic sumptis habetur *2. Corinth. 4. Quod in presenti est momentaneum & leve tribu-*

*tribulationis nostra, aeternum gloria pondus operatur in nobis.*

## CONTROVERSIA VI.

### *De Justificatione.*

**D**OCTRINA A catholica: Wir werden nicht gerechtfertiget durch Werke, durch Büßen oder Beichten. Dr. Luther. *de Confess. artic. 7. Tom. 1. fol. 143.* Der Mensch wird allein gerecht durch den Glauben, *Tom. 1. fol. 228.* Lutherum sequitur *Confess. Augustan. artic. 4.* his verbis: *Homines gratis justificantur propter Christum per fidem.* Unde Lutherani duplicem distinguunt fidem, unam vocant Historicam vel dogmaticam, alteram promissionum: Prima est, quâ homo credit vera esse, quæ à Deo sunt revelata. Secunda est, quâ credit seu potius confidit, peccata sibi esse remissa per merita Christi; hanc ultimam dicunt esse justificantem.

## DOCTRINA CATHOLICA:

### *Fides sola non justificat.*

**I**ntellige: ut homo justificetur; sive ex peccatore fiat justus, non sufficit sola fides promissionum, seu specialis fiducia, quâ homo confidit, peccata ex meritis Christi sibi esse remissa; sed requiritur fides, eâque dogmatica, quâ homo assentitur omnibus, quæ & quia Deus revelavit, & præter fidem requiruntur spes, amor Dei, poenitentia seu dolor de peccatis,

tis, propositum emendationis &c. requiruntur autem non tanquam opera meritoria de condigno justificationis, sed solum tanquam dispositiones ad eam ex meritis Christi accipiendam. Doctrina Catholica

Prob. I. Scriptura ad Justificationem præter fidem requirit Spem, Romanor. 8. *Spe salvi facti sumus*: requirit Charitatem, 1. Corinth. 13. *Si habuero omnem fidem, ita ut montes transferam, Charitatem autem non habuero, nihil sum, requirit timorem Dei*: Eccles. 1. *Qui sine timore est, non poterit justificari*: requirit Pœnitentiam, Luc. 13. *Nisi pœnitentiam habueritis, omnes similiter peribitis* &c. ergo non sola fides justificat.

II. Ex Epist. S. Jacobi cap. 2. *Ex operibus justificatur homo, & non ex fide tantum. Ex Roman. 2. Factores legis justificabuntur.*

III. *Fides solu justificat*, dicunt Lutherus & Lutherani. Infero (1.) Ergo non est angusta porta, quæ ducit ad vitam; solâ enim justificante fide, intrare facillè est, imò omnes intrabunt (si superis placet) Lutherani; omnes enim habent fidem promissionum. (2.) Ergo quilibet salvari poterit sinè Confessione, sinè pœnitentia, sinè charitate, sinè observantia mandatorum; sinè his enim esse potest fides promissionum, seu justificans: vel si non possit, non sola justificat. (3.) Ergo cessabit exercitium virtutum, porta aperietur vitiis; solâ enim justificante fide, hæc loco virtutum sufficit, & vitia tegit; imò ex confidentia homo facilis

facilis erit ad peccandum. Unde Lutherus in *Epist. ad Melancthon.* scribit: *Pecca fortiter, sed fortius fide; sufficit, quod agnovimus agnum, qui tollit peccatum mundi, ab hoc non avellet nos peccatum, etiamsi millies millies uno die fornicemur. & Tom. 1. Jen. fol. 240.* Gott ist den Sündern nicht feind, dann allein den Ungläubigen. Ecce, quàm falsa, quam absurda ex Doctrina A catholica!

*Respondent:* Fidem semper connotare bona opera non antecedenter ad justificationem, sed consequenter tanquam signum fidei & effectum justitiæ obtentæ, & sic fidem à S. Jacobo vocari mortuam, quam bona opera non sequuntur. *Contra est:* Bona opera ad justificationem requiruntur pro priori tanquam dispositiones, eo modo, quo requiritur fides; nam sinè charitate, pœnitentiâ, dolore, proposito non fit iustificatio, ut patet ex *Textibus citatis.* Quodsi non præcedant, etiam non infallibiliter sequuntur; quæ enim inter fidem & opera est necessaria connexio? quàm multi fidem habent fiducialem, opera non habent; *Matth. 23.* damnantur non propter defectum fidei, sed operum.

### Objectiones A catholicæ.

I. Fide justificari hominem, docet Scriptura *Galat. 3. Ex fide justificat gentes Deus. Act. 13. In Christo omnis, qui credit, justificatur: ergo.* Scriptura citata docet, hominem justificari fide, abstrahendo à bonis operibus, quæ requiritur  
alibi

alibi C. excludendo bona opera N. Scriptura dicit, hominem justificari *Charitate*, *Luc. 7. Spe*, *Romanor. 8. Pœnitentiâ*, *Luc. 13.* & tamen ex his locis non sequitur, bona opera justificare sinè fide: ergo nec ex prioribus sequitur, fidem justificare sinè bonis operibus.

II. Scriptura etiam excludit opera à justificatione; ait enim *Romanor. 3. Arbitramur hominem justificari per fidem sinè operibus Legis.* Item *Romanor. 3. Ex operibus Legis non justificabitur omnis caro.* R. Excludit opera Legis cæremonialis Mosaicæ, opera naturæ, seu liberi arbitrii C. Opera Legis gratiæ, seu facta ex fide in Christum & ex gratia Dei N. De his ultimis dicit *S. Jacobus cap. 2. Ex operibus justificatur homo, & non ex fide tantum.*

III. Ad Magdalenam dixit Christus Ipse *Luc. 7. Fides tua salvam te fecit.* R. Dixit etiam de illa *cap. eodem: Remittuntur ei peccata multa, quoniam dilexit multum.* Unde non fides nuda Magdalenam salvam fecit, sed fides charitate formata.

IV. Qui crediderit, & baptizatus fuerit, salvus erit. *Matth. 16.* R. *Isaias 2.* dicitur: Qui invocaverit nomen Domini, salvus erit; an ideo sufficit sola invocatio sine fide? non: sic & non sufficit fides sinè invocatione, sive bonis operibus. Unde *distinguo Ant.* Qui crediderit fide, charitate formatâ, salvus erit C. qui crediderit fide sterili & informi &c. N. *Ant. & Conf.*

CON-



CONTROVERSIA VII.  
De Cultu & Invocatione San-  
ctorum.

**D**Octrina Acatolica: Scriptura non docet invo-  
care Sanctos, aut petere auxilium à Sanctis. Ita  
Confess. Augustan. artic. 21. Lutherus in Evang. Dom.  
23. post Pentecost. omnem cultum & veneratio-  
nem Sanctorum vocat rem diabolicam; at  
catholicè loquitur Tom. 1. Jenens. fol. 165. Ich  
sage und halte fest mit der ganzen Christenheit,  
daß man die liebe Heilige ehren und anrufen soll.  
Præ Doctrina Catholica

*Nota 1.* Cultum, seu adorationem esse con-  
testationem excellentiæ in altero, cum debita  
animi submissione. Cultus alius est *Politicus*,  
alius *Sacer* seu *Religiosus*: *Primus* exhibetur prop-  
ter excellentiam naturalem vel civilem, & com-  
petit Regibus, Principibus, &c. *Secundus* exhi-  
betur propter excellentiam supernaturalem, &  
quidem si exhibeatur propter excellentiam di-  
vinam ac supremam, vocatur *Latria*, compe-  
tens soli Deo; si propter excellentiam superna-  
turalem gratiæ & gloriæ, vocatur *Dulia*, com-  
petens Sanctis; si propter excellentiam crea-  
tam specialem, vocatur *Hyperdulia*, quæ cultus  
major *Dulii*, competens Humanitati Christi  
propter unionem hypostaticam, & B. V. Ma-  
riæ propter maternitatem Dei.

*Nota 2.* An cultus seu adoratio sit *Latria*  
vel *Dulia*, non ex actionibus externis, v. gr. ge-  
nuflexione.

naflexione, inclinatione, &c. discernendum esse, sed ex intentione colentis seu adorantis; si enim quis Deum adoret, Eique se submittat propter excellentiam in Deo infinitam, erit *Latria*; si Sanctos colat propter excellentiam & Sanctitatem eis intrinsecam, erit *Dulia*, & quidem *absoluta*; si imagines vel reliquias propter excellentiam Sanctorum, quorum sunt imagines vel reliquiae, erit *Dulia respectiva*, quâ Sancti coluntur in imaginibus & reliquiis suis, non imagines & reliquiae secundum se.

## DOCTRINA CATHOLICA I.

*Licitus est cultus Sanctorum.*

**I**ntellige: Sanctos tanquam Dei amicos, nostrosque apud Ipsum Intercessores colere licet; qui non vult, non tenetur.

Prob. I. Abraham *Genes. 18.* adoravit scilicet cultu *Duliae* duos Angelos sibi apparentes. Idem fecit Loth *Genes. 19.* Item Josue, cum vir, qui apparebat, dixisset se Angelum esse, cecidit pronus in terram & adoravit *Josue 5.* ergo licet colere Angelos; si Angelos, cur non & Sanctos.

II. Deus ipse glorificat glorificantes se *1. Reg. 2.* honorificat amicos suos *Joan. 12.* Item primitiva Ecclesia Sanctos coluit, templa in honorem eorum erigendo, festa celebrando, peregrinationes instituendo &c. ergo licitus est cultus Sanctorum.

k

DO:

## DOCTRINA CATHOLICA II.

*Licita pariter est Sanctorum invocatio, et  
que utilis.*

**I**ntellige 1. Solum Deum esse invocandum tanquam rerum omnium Dominum; Sanctos solum invocari tanquam Intercessores & Patronos, ut pro nobis Deum orent. 2. Sanctorum invocationem non esse necessariam ad salutem, sed utilem ad facilius obtinendum.

Prob. I. Angeli sunt invocari; nam Genes. 48. Jacob invocavit pro benedictione filiorum Joseph dicens: *Angelus, qui eruit me de cunctis malis, benedicat pueris istis.* Osea 12. *Jacob invaluit ad Angelum, flevit, & rogavit eum.* Genes. 19. dixit Angelus ad Loth: *Ecce etiam in hoc suscepi preces tuas, ut non subvertam urbem, pro qua locutus es: ergo etiam Sancti in coelo invocari possunt; cur enim Angeli, & non Sancti?*

II. Apocalyps 5. dicitur: *Viginti quatuor Seniores ceciderunt coram Agno, habentes singuli citharas & phialas aureas plenas odoramentorum, quae sunt Orationes Sanctorum.* Baruch. 3. *Judaei ita precabantur: Domine omnipotens, Deus Israel, audi nunc Orationes mortuorum Israel, & filiorum ipsorum, qui peccaverunt ante te. ergo Sancti orare possunt & oraverunt pro vivis.*

III. Viventes possunt orare pro viventibus, licetque viventes invocare; si viventes in terra, cur non Sanctos in coelo? imò potius, hi enim sunt amici Dei, Eumque vident facie ad faciem.

*Respon-*

A II.

io, eá-

candum

n; San-

flores &amp;

2. San-

ariam ad

ndum.

am Genes.

filiorum

unctis mo-

ruit ad An-

dixit An-

reces tuas,

s : ergo

nt ; cur

uatuor Se-

uli citharus

sunt Ora-

recabant.

nunc Ora-

qui pecca-

t &amp; ora-

ventribus,

s in terra,

hi enim

d faciem.

Respon-

*Respondent* : Sanctos in coelo non cognoscere viventium preces in particulari ; adeoque nec in particulari pro nobis posse intercedere, licet possint in genere. *Contra est* : *Luc. 15.* dicitur : *Gaudium erit in coelo coram Angelis Dei super uno peccatore penitentiam agente* : ergo Angeli in coelo cognoscunt preces nostras : ergo etiam Sancti. Sed quomodo ? *R.* Cognoscunt vel in Essentia Divina, quatenus eam videndo vident in ea, quidquid Deus vult ostendere ; vel ex revelatione Dei, quatenus necessitates & preces nostras Deus Sanctis manifestat : siue autem hoc modo, siue altero Sancti cognoscant preces nostras, parum refert ; sufficit quod cognoscant.

IV. Ad invocationem Sanctorum Deus varia concessit beneficia ; sic testantur Historiæ, testantur etiamnum pii homines ; aliqui, se impetrasse sanitatem corporis ; alii, liberationem à periculis ; alii, alia bona & dona : ergo manifestum est, Deo placere invocationem Sanctorum, eamque hominibus esse utilem.

### *Objectiones Acatholicæ.*

I. *Soli Deo honor & gloria 1. Timoth. 1.* ergo præter Deum non sunt colendi Sancti cultu sacro. *R.* *D. Conf.* Sancti non sunt colendi cultu sacro Patriæ C. Dulæ N. Scriptura citata à cultu sacro excludere vult idola, non Sanctos.

II. *Apocalyps 22.* Angelus noluit adorari à S. Joanne, dicens : *Vide, ne feceris, conservus enim tuus sum, Deum adora* : ergo nec cultu Dulæ colendi

lendi sunt Sancti. *R. N. Conf.* Vel enim S. Joannes erravit in persona, putans esse Deum, quem adorare voluit; vel Angelus adorationem Dulzæ admittere noluit ex reverentia erga S. Joannem, sciens eminentiam dignitatis & sanctitatis in ipso.

III. Catholici Sanctos colunt sacrificiis, templis, altaribus, votis, thurificatione &c. ergo committunt idololatriam: nam cultus ille soli competit Deo. Item Virginem Mariam vocant *Mediatricem, Redemptricem, &c.* solus autem Christus & Mediator noster & Redemptor. *R.* Colunt Sanctos sacrificiis, templis, altaribus, &c. primariò *N.* secundariò *C.* Sacrificium offertur soli Deo, Eique eriguntur templa & altaria; secundariò iis coluntur Sancti, quatenus fiunt in memoriam & honorem Sanctorum, adhibenturque preces ad Sanctos, ut Deum colentes in Sanctis, accedente eorum patrocinio, faciliùs impetremus, quod petimus. *B.* *V.* Maria vocatur *Mediatrice, Redemptrix, &c.* non in sensu proprio, in quo Christus, sed quatenus mater Redemptoris ad redemptionem nostram mediare concurrit.

IV. Scriptura non meminit, Sanctos esse invocandos: ergo non sunt invocandi ex parte Scripturæ. *R. 1. N. Ant.* Tamen enim invocatio Sanctorum non sit de præcepto, esse tamen licitam & utilem, habent probationes nostræ ex Scriptura *suprà.* *R. 2. Transf. Ant.* ex eo non sequitur: Sanctos non esse invocandos.

Luthe-



Lutherani baptizant infantes, fatentur Sanctos in coelo generaliter pro nobis orare, & tamen non plus horum meminit Scriptura. Multa ergo rectè fiunt, quæ in Scriptura non exprimuntur; sufficit, non esse contra Scripturam, nec contra aliquam legem aut rationem.

V. Dominus dicit *Psal. 49. Invoca me, eruam te, & honorificabis me.* 2. Ipsemet scit necessitates nostras & paratus est succurrere: ergo Sancti non sunt invocandi ex parte Dei. *R. N. Conf.* Nam ad 1. dico: invocantes Sanctos, invocamus mediare nempe per ipsos Deum. Ad 2. Scit Deus necessitates nostras & paratus est succurrere; sed sæpe non sumus digni, qui exaudiamur, ideoque invocamus Sanctos, per eos tanquam Dei amicos impetraturi, quod non valeamus per nos.

VI. *Unus Mediator Dei & hominum homo Christus Jesus 1. Timoth. 2. (2.) Per ipsum habemus accessum ad Patrem Ephes. 2. (3.) Merita Christi sunt infinita, & ex illis oportet nos consequi gratiam & gloriam: ergo Sancti non sunt invocandi ex parte Christi. R. Utrique Christus est Mediator noster; per Ipsum accessum habemus ad Patrem; ex meritis Ipsius accipimus; sed non omnes æquè faciliè; requiruntur meritum applicatio: ut igitur mediationis & meritum Christi reddamur participes, Sancti orant pro nobis, utque orent, nos invocamus. Unde ad argum. *N. Conf. ad 1. dico: Unus est Mediator Christus: puta, unus Mediator re-**


demptione & principalis, Sancti sunt Mediatores intercessionem & Christo subordinati. Ad 2. per ipsum habemus accessum ad Patrem; puta, per Christum tanquam Redemptorem, per Sanctos tanquam intercessores. Ad 3. Etiam consequimur dona supernaturalia ex meritis Christi, dum Sancti pro nobis intercedunt; hi enim pro nobis rogant non per sua, sed Christi merita.

VII. Sancti nihil sciunt de precibus nostris in particulari; nam *Eccles. 9. Mortui nihil novērunt amplius. Isa 63. Abraham nescivit nos, & si aël ignoravit nos.* (2.) Sancti in cœlo pro meritis suis receperunt primum, & nihil amplius mereri possunt. (3.) Sæpe invocantur frustra: ergo Sancti non sunt invocandi ex parte ipsorum. R. Ad 1. Sanctos scire necessitates & preces nostras, patet ex dictis pag. 147. Textus in oppositum citati loquuntur de cognitione naturali. Textus ex *Isaia* tropologice loquitur de scientia approbationis quoad mores, quâ Abraham nescivit Judæos, quando ducebantur in captivitatem. Ad 2. Sancti non amplius merentur, sed meriti sunt in vita, & præter primum essentiale, quod visio intuitiva Dei, acceperunt accidentale, ad quod spectat, pro nobis posse intercedere & exaudiri. Quemadmodum belli Dux emeritus, quamvis in aula Regis non amplius mereatur, pro aliis tamen efficaciter potest intercedere propter merita in bello. Ad 3. Sæpe malè peti-

petimus, vel malum nobis, quid mirum, si non exaudiamur? Deum Ipsum sæpe invocamus frustra, & tamen est invocandus; ad Cuius honorem & gloriam sit Controversiarum harum, quas subiectas volo iudicio atque censuræ Sanctæ Ecclesiæ Controversiarum

Judici, (utinam & omnium, ut  
unus sit Pastor & unum  
ovile,)

F I N I S.



I N D E X I.



I N D E X I.

Capitum & Controversiarum.

C A P U T I.

*Controversiae cum Atheis, Paganis, Mahometanis, & Judæis.*

- |      |   |          |
|------|---|----------|
| I.   | Cum Atheis & Paganis de Existentia Dei.       | Pag. 11. |
| II.  | Cum Mahometanis de Existentia SS. Trinitatis. | 14.      |
| III. | Cum Judæis de Messia.                         | 16.      |
| IV.  | De abrogatione Legis Veteris.                 | 18.      |

C A P U T II.

*Controversiae cum Haereticis in communi.*

- |      |                                     |          |
|------|-------------------------------------|----------|
| I.   | De necessitate Unius Fidei.         | Pag. 20. |
| II.  | Quæ Fides & Religio sit capienda?   | 25.      |
| III. | De Notis & Signis Religionis falsæ. | 32.      |

C A P U T III.

*Capitulum & Controversiarum.*

**C A P U T III.**

*Controversiæ de Vera Ecclesia, Summo Pontifice, & Ecclesiæ Ministris.*

I.	De Notis Vera Ecclesiæ.	Pag. 43.
II.	De Ejus Visibilitate.	46.
III.	De Ejus Infallibilitate.	50.
IV.	De Romano Pontifice.	55.
V.	De Ejus Infallibilitate.	62.
VI.	De Vocatione & Ordinatione Ministrorum Ecclesiæ.	65.
VII.	De Cœlibatu Clericorum.	69.

**C A P U T IV.**

*Controversiæ de Sacra Scriptura, Traditionibus, Judice Controversiarum, & Sacramentis.*

I.	De Sacra Scriptura.	Pag. 73.
II.	De Traditionibus.	78.
III.	De Judice Controversiarum.	81.
IV.	De numero Sacramentorum.	85.
V.	De reali præsentia Christi in Eucharistia.	88.
VI.	De Communionem sub utraque specie.	95.
VII.	De Sacrificio Missæ.	101.

k 5

VIII. De




*Index I. Capitum & Controversiarum.*

VIII. De Confessione Sacramentali.	Pag. 107.
IX. De Indulgentiis.	111.
X. De Purgatorio.	115.


*C A P U T V.*

*Reliquæ Controversiæ quæ sunt  
hujus temporis.*

I. De libero Arbitrio.	Pag. 118.
II. De Prædestinatione.	121.
III. De Observatione Præceptorum DEI.	129.
IV. De Observatione Præceptorum Ecclesiæ.	132.
V. De Bonis Operibus.	138.
VI. De Justificatione.	140.
VII. De Cultu & Invocatione Sanctorum.	144.



INDEX II. Rerum præcipuarum.



INDEX II.  
Rerum præcipuarum.

*Arbitrium liberum*

Quid sit? datur. Pag. 119.

*Confessio Peccatorum*

Est de Jure divino, pag. 108. Eam admit-  
tit Lutherus, p. 109. Juxta ipsum qui-  
libet potest absolvere, p. 107.

*Deus*

Existit Unus, pag. 12. Est Trinus, p. 15.

*Ecclesia*

Quid sit, pag. 43. Qui in illa vixerint, p.  
28. Nota Vera Ecclesia, p. 44. seqq.  
Est Visibilis, p. 46. seqq. Infalibilis  
& indefectibilis, p. 51. seqq.

*Eucharistia*

Realiter continet Corpus, & Sanguinem  
Christi, pag. 88. 89. Etiam extra usum,  
p. 91. seqq. Non manent panis & vi-  
num, p. 90. Communio sub utraque  
Specie

## *I N D E X II.*

---

Specie non est de praecepto divino , p.  
95. 96. Sub una Specie sumitur totus  
Christus , p. 96. 97.

### *Fides*

Quotuplex ? pag. 7. Non qualibet salvifi-  
cat, p. 21. seqq. Quæ sit tenenda ? p.  
25. seqq. Motiva veræ Fidei, ibid. So-  
la non justificat, p. 140. seqq.

### *Hæresis*

Duplex. pag. 9. Qualiter cum Hæreticis sit  
procedendum ? p. 10.

### *Indifferentiæ*

Qui sint ? pag. 20. Quotuplices ? p. 21.

### *Indulgentiæ*

Quid sint ? pag. 112. Dantur, ibid. & p.  
113. Gratis, p. 115.

### *Invocatio Sanctorum*

Est licita & utilis, pag. 146.

### *Judex Controversiarum :*

Quæ requirantur in eo, pag. 82. Quis sit,  
ibid. & p. 83.

### *Justificatio*

Non fit per solam Fidem, pag. 140. seqq.

*Luthe-*

*Lutherus*

Non est missus à Deo, pag. 35. Ejus qualitates, p. 38. seqq. Sibi contradicit, p. 39. & 53. Docuit peccare, p. 40. Docuit, quæ Ipse non credidit, ibid. Quid Lutherus ad Lutheranos? p. 41. Docet, castitatem non posse servari, p. 69. Putat se Deum, p. 107. nam de se Torn. 3. citat. fol. 514. ita scribit: Ist mir der Luther nicht ein selbamer Mann, ich meyne, daß er Gott seye, wie wollte er sonst aus Bettlern Herren, aus Eseln Doctores, aus Buben Heilige, aus Dreck Perlen, aus Schandflecken herrliche Leute machen?

*Lutherani*

Patentur Catholicum salvari posse in Fide Catholica, pag. 30. Non habent veros Sacerdotes, p. 67. Nequeunt probare, se habere Sacram Scripturam, p. 74.

*Messias*

Venit, pag. 16. Legem Vet. abrogavit, p. 19.

*Ministri Ecclesiæ*

A quo sint vocandi & ordinandi, pag. 66. Tenentur ad Cœlibatum, p. 69.

*Missæ*

## INDEX II.

---

### *Missa*

Est Verum Sacrificium, pag. 102. Retinet  
eam Confessio Auguttana, p. 103. Lu-  
theri Forn.a missandi, p. 104.

### *Opera bona*

Non sunt peccata, pag. 135. Sunt adultis  
ad salutem necessaria, p. 136.

### *Papa*

Est Visibile Caput Ecclesiæ, pag. 58. Suc-  
cessor S. Petri in Cathedra, ibid. Non  
est Anti-Christus, p. 61. Quare Sanctif-  
simus, ibid. Quando infallibilis, p. 62.

### *S. Petrus*

Tenuit Primatum Ecclesiæ, pag. 57.

### *Præcepta Dei & Ecclesiæ*

Servari possunt & debent, pag. 129. & 133.

### *Prædestinatio*

Quid sit, pag. 121. Facta est post prævisa  
merita, sicut Reprobatio post demeri-  
ta, p. 122. Reprobis infallibiliter dam-  
natur, p. 125. Non tamen necessario,  
& quidquid egerit, p. 126. Reprobatio  
non necessitat ad opera mala, p. 127.

*Purga-*



*Rerum præcipuarum.*

---

*Purgatorium*

Quid sit, pag. 115. Datur, p. 116.

*Religio.*

Signa Religionis falsæ, pag. 32. seqq.

*Sacramentum*

Quid sit, & quot, pag. 85. seqq.

*Sacra Scriptura*


Quid sit, pag. 73. Apud quos, p. 74.


Non ubique clara, p. 75. seqq.

*Traditiones*

Quid sint, pag. 78. Sunt tenendæ, p. 79.











Biblioteka Jagiellońska



stdr0028990





THEOLOGIA  
SPECULATIVA  
MORALIS  
BRINCKMANN

MDCCCLVIII